

Wedau Mark



The Gospel of Mark in the Wedau Language of Papua New Guinea

Wedau Mark
The Gospel of Mark in the Wedau Language of Papua New
Guinea
Buk Mak long tokples Wedau long Niugini

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-30

PDF generated using Haiola and XeLaTeX on 22 Feb 2024 from source files dated 31 Aug 2023
aa19f3e3-98fb-51fa-9c53-3906edc75f11

Contents

FRT	1
INT	2
Genesis - Karena	3
Exodus - Oputawanana	31
Leviticus - Levi ai kaua	51
Numbers - Au Mutulua	54
Deuteronomy - Tarawatu Viruaina	62
Joshua	67
Judges - Taurauetara	69
1 Samuel	70
Samuel Viruaina	80
1 Kings - Gulagulau Naona	84
2 Kings - Gulagulau Viruaina	97
Chronicles Viruaina	104
Ezra	106
Nehemiah	107
Job	108
Psalms - Wela ma Pari	113
Proverbs - Nuaulaula Riwai	123
Ecclesiastes - Tauviararamana	127
Isaiah	133
Jeremiah	146
Lamentation	151
Ezekiel	153
Daniel	156
Hosea	157
Amos	158
Jonah	159
Micah	162
Zechariah	163
Mark	164
Apasol	197

**Buka Vivivireina
Parivainuaḡana Wadubona Ḡuta Vinevine
ma
Mark ma Acts**

**Translation of The Gospel of Mark and Acts in the
Wedau language,
Milne Bay Provins, Papua New Guinea.**

**Buka Vivivireina
Parivainuaḡana Wadubona Ḡuta Vinevine ma Mark ma Acts**

**Translation of The Gospel of Mark and Acts in the Wedau
language,
Milne Bay Provins, Papua New Guinea**

© VITAL/SIL PNG 2010

Milne Bay Province
Papua New Guinea.
Printed in Ukarumpa.
2016, 700 Printed
wed
ISBN 9980 0 3979 5

© Wycliffe Bible Translators 2016

Illustrations:

By Horace Knowles and are used by permission of
© The British and Foreign Bible Society, 1954, 1967, 1972
Additions and amendments by Louise Bass
© The British and Foreign Bible Society, 1994

© VITAL/SIL PNG 2010

Translation of The Gospel of Mark in the Wedau language,

Milne Bay Provins,

Papua New Guinea.

Printed in Ukarumpa.

Preface - Pariverena

Nature & Purpose of book

Translation principles

Text followed

Orthography

Name location & number of speakers

Genesis Karena Pariverena

Wei bukana e ririweta ma e viviegeta da menanarena mara ma dobu i tupuanei. Wei bukana maiteni e viviegeta da aiai rava i kauai ma menanarena mai Israel i tupuanei. Kaua gaegaei ruağa e viviegeta wei bukana au orana.

1. Kapita 1-11 e viviegeta da menanarena mara, dobu ma rava i kauai. E viviegeta da Adam ma Eve, Cain ma Abel, Noah ma ututuva ma numa gegetelarana au Babel.
2. Kapita 12-50 e ririweta menanarena mai Israel i tupuanei. E viviegeta da Abraham natuna Isaac ma goğana Jacob ma Jacob natunatuna 12 Israel noinonii.

Wei bukana taugirumana eğa wavana ita viegeta. Wate tauviararamana gelai e notanotai da Moses i girumi mai Israel aubaii da tau i ita aramanei da God i vinei da Tauna ana rava, ma aiwai i kauai mai Israel aubaii. Au gunai wei bukana Moses i girumi madeğa! 1,500 - 1,230 BC. - muriai Iesu i tupua.

Giruma rereğana

Virarautua wadubona

God, mara ma dobu i kauai (1:1 - 2:3)

God, oroto ma wavine i kauai (2:4, 7-9, 15-25)

Apoapoe mena i vikarenei (3:1-24, 4:1-12; 25-26)

Noah ana virarautua (6:5-22; 7:1-5, 17, 23; 8:15-22; 9:1-15)

Babel ana numa gege dewadewana (11:1-9)

Mai Israel goğogai

Abraham, Isaac ma Jacob

God Abram i kwatuei (12:1-7)

Abram ma Lot i vilamonei (13:5-6, 8-1)

Abram, Lot i vai-melei (14:11-16)

Melkisedek, Abram i viaiaini (18-20)

God parivainuağana bagibagina Abram maiteni i kauai (15:1-6, 12-16)

Sarai ma Hagar (16:1-3, 15)

God ana mataira terenana (17:1-21)

Nelara tonuğa i nei Abraham awarina (18:1-15)

Sodom ana virarautua (23; 19:1-7, 24-26)

Isaac i tupua (21:1-5)

Hagar ma natuna Ishmael i paritawanei (21:8-14)

God Abraham ana tumağa i raudadani (22:1-19)

Esau ma Jacob i tupua (25:19-26)

Esau, natuevou ana buderi i verenei Jacob awarina (25:27-34)

God i parivainuağana da Isaac ina viaiaini (26:1-6)

Isaac, Jacob i paritawanei Laban awarina (28:1-4)

Jacob ana rauboni au Bethel (28:10-22)

God, Jacob i viaiaini (35:9-15, 16-20, 22b-29)

Joseph, tuatana maiteni ai virarautua (37:1-8, 12-35)

Joseph ana nola au Egypt (39:1-23)

Joseph, rava ai rauboni anoi i viegei (40:1-23)

Pharaoh ana rauboni (41:1-16, 25-42, 45-49, 53-57)

Jacob natunatuna i paritawanei au Egypt (42:1-10, 21-23)

Joseph i vieğana-melei (45:4-11, 25-28)

Jacob, natunatuna ma goğogana maiteni i nae au Egypt (46:1-7, 28-30)

Jacob, Ephraim ma Manasseh i viaiaini (48:1-6, 13-21)

Jacob, Juda i viaiaini (49:8-10, 33)

Joseph, tuatuaana i vinuubai (50:15-21)

BADA, mara ma dobu i kauēi

¹ Au karena, God, mara ma dobu i vitupui. ² Dobu kwakwavina ma eġa aiwai ita mamae. Gimtona, gabinou i purui. Ma God Aruana, gabinou au tepana i genagenara ġaira.

³ Ma God i riwa i pa, “Ina lalai!” Ma i lalai. ⁴ Ma lalalaina i ’nanai da i ai. Ma lalalaina ma gimtona i vilamonei. ⁵ Ma lalaina i ġorei Marai ma gimtona i ġorei Au Pom. Ma au bigai i nae ma ubaubanai i nei, au pom tagogi.

⁶ Ma God i riwa i pa, “Parata mara au tepana ina mae da waira au tepana ma waira au gabaurina ina vilamonei.” ⁷ Ma parata mara au tepana i terei da waira au dobu ma waira au mara i vilamonei. ⁸ Ma parata i ġorei Mara. Ma au biga i nae ma ubaubanai i nei, nai au pom viruaina.

⁹ Ma God i riwa, “Waira, mara au gabaurina, gabu au tagogi ona vitagogiemi ma doa alalana ina eġa.” Ma nanare i tupua. ¹⁰ Ma doa alalana i ġorei, Dobu ma waira i vivitagogieia i ġorei, Boga. Ma i ’nanai da i ai.

¹¹ Anina ma God i riwa i pa, “Dobu, tam modu ma ai ma vigogoi, modu rauano i nununai ma ai raruano i nununai, ma peii ina gogo ma ina rauano me aloi nanare, ma nanare i tupua.” ¹² Ma dobu, modu ma ai anatapu i i vigogoi. Ma i ’nanai da i ai. ¹³ Au bigai i nae ma ubaubanai i nei, au pom vitonuina.

¹⁴ Ma God i riwa i pa, “Aniravilala au mara ina mae da marai ma waguvara ina vilamonei, ma iri ina vieġeta ma nanare mara ma borima.* ¹⁵ Ma tau i, mara ina ravilalai da lalaina dobu ina verei.” Ma nanare i mae. ¹⁶ Ma aniravilala ġaeġae ruāġa i kauēi, voġaeġaena marai i vibadei ma voaburuna waguvara i vibadei ma ubona maiteni i kauēi. ¹⁷ Aniravilala au mara i terei da dobu ita ravilalai ¹⁸ da marai ma waguvara ita vibadei ma lalalaina ma waguvara ita vilamonei. Ma i ’nanai da i ai. ¹⁹ Ma au bigai i nae ma ubaubanai i nei, au pom vi-four-na.

²⁰ Ma God i riwa i pa, “Sia ma lawalawai anatapu i waira ona vioai ma kiu ona tupua ma ona lave au aidamo.” ²¹ Ma sia ġaeġae ma sia tapuna ma tapuna, boga au orana maemaēi ma kiu tapuna ma tapuna maiteni i vitupui. Ma God, i ’nanai da i ai. ²² I viaiaini ma i riwa i pa, “Ona vinatuna ma ona vimaġaimi da boga ona vioai ma kiu ona vinatuna da ona maġa au dobu.” ²³ Ma au bigai i nae ma ubaubanai i nei, au pom vi-five-na.

²⁴ Ma God i riwa i pa, “Doa, ġamoġamo nununai ma vitupui, ġamoġamo mara-maraġamai ma ġamoġamo moduei, ma ġamoġamo tetetei ma ina vinatuna da me tau i nanare.” Ma nanare i tupua. ²⁵ ġamoġamo nununai anatapu i i vitupui ma tau i ina vinatuna da me tau i nanare. Ma i ’nanai da i ai.

²⁶ Anina ma God i riwa i pa, “Marina, rava tana kauēi me tauta ma ai kaua tauta nanare. Ma tau i sia ma kiu ma ġamoġamo anatapu i au dobu ina vibadei, ġamoġamo maramaraġamai ma ġamoġamo moduei, ġaeġae ma muomuoi.”

²⁷ ✧ Ma God, rava i kauēi

Anina ma oroto ma wavine i kauēi,
me tauna nanare.

* **1:14:** Eng. Year, Madeġa tagogi. ✧ **1:27:** Mrk 10:6

28 Rava i viaiaini ma i riwei i pa, “Ona vinatuna ma ona vimaġaimi da dobu ona vioai ma dobu ona vibadei. Taumi, sia, kiu ma aiwai anatapui au doa tetetei ona vibadei.

29 Lam, modu anoi ma ai uana a vereveremi ami lam. 30 Ma ġamoġamo moduei ma kiu ma ġamoġamo nununai anatapui aubai; ai rugurugu a vereveri ai lam.” Ma nanare i mae.

31 Aiwai anatapui i kaukaueia i nanai da i ai kaua ma i vinuaiai. Ma au bigai i nae ma ubaubanai i nei, aupom vi-six-na.

2

1 Ma nanare God mara ma dobu ma anataputapuna au orana i vitupui.

2 ✧ God ana nola i vorovei ma mara au vi-seven-na i vilauvitau. 3 Ana nola i vikwai ma lamna aubaina God wei marana vi-seven-na i viaiaini ma i vovivirei.

Oroto ma Wavine

4 Wei lamna mara ma dobu ana virarautua. Menanare BADA God mara ma dobu i vitupui.

7 Ma BADA * God doa pokauna i vaia ma oroto i voai ma lavutu lawalawaina au ġiaganana i uveni ma oroto† i lawana.

8 Ma BADA God peipei Eden i paewi au maramatanei ma kampa orotona i vivitupua i terei da i mae. 9 Ma BADA God ai inanana aiaina ma uana amna aiaina anatapui i paewi ma peipei au pouna ai vinevinei ruāġa i gogo. Ai tagogi uana lamna lawana tauvereina ma ai ġelauna uana lamna nota rava ina verei da metauna aiaina ma metauna apoapoena.

15 Ma BADA God oroto au peipei Eden i terei da ita nolei ma ita paini. 16 Ma BADA God riwa bagibaginei i riwei i pa, “Ai uana anatapui au peipei am ġoanei ma ani. 17 Wate a viviġaem da nota aiaini ma nota apoapoei aina uana eġa ma ani! Mepa da u ani, tam nai au marana ma iraġel!”

18 BADA God i riwa i pa, “Oroto ainelana e mamea ma lamna eġa ita ai. Ana tauagu ana kauai da ina voagui.”

19 Ma BADA God doa pokauna i vaia ma ġamoġamo anatapui ma kiu anatapui i kauai. Ma tau i neiai oroto awarina da ita viwawai. Ma oroto aiwai i viwawai, nanare ai wava i mae. 20 Ma oroto kiu ma ġamoġamo maramaraġamai ma moduei, wava i verei. Wate Adam eġa ana tauagu ita nelaġai da ita voagui.

21 Ma BADA God oroto i kauai da i matave ma maranaina i raunuavuru kaua, torotorona tagogi i votawanei ma vioa i pota-melei ana au gabu. 22 Ma BADA God oroto torotoronei wavine i kauai ma wavinena i neiai oroto awarina.

23 Anina ma oroto i auepai ma i riwa,
“Ee wei tauna! Marina gelama tau gelamiuei
ma vioa tauvioauei,

wei tauna awariu i votawanei,
lamna aubaina, ana ġorei *Wavine*.‡”

24 ✧ Ma nanare i tupua ma lamna aubaina oroto, amana ma alona e vovoterei ma awana maiteni e vivitagogiei.

25 Oroto awana maiteni, ana kovakovai, wate eġa ita vinimala.

✧ 2:2: Exo 20:11 * 2:7: Yahweh bo Jehovah Exo 3:13-15. † 2:7: ... doa pokauna i vaia ma oroto Pona Hebrew oroto lamna Adam, ma doa lamna adamah. ‡ 2:23: Au Hebrew pona oroto lamna ish ma wavine lamna isah. ✧ 2:24: Mrk 10:7-8

3

Apoapoe mena i vikarenei

Maranai God mara ma dobu i vitupui, aiwai anatapui i ai kaua ma rava aiiai. Wei virarautuana lamna menanare apoapoei au dobu i rui.

¹ Anina ma mota lamna terevaidega kaukauana ega me gāmoḡamo ḡelau i kaukaueia nanare. Ma mota wavine i paridadanei i pa, “Riwa kaua bo ega da God i riwem da ega ai uana au peipei ma ani.”

² Ma wavine i paribelei i pa, “Tauai ai uana peipei au orana ana ani. ³ Wate God i riwa da peipei au pouna, ai uana ega ana ani bo ana vodadani. Mepa da ana ani bo ana vodadani lamna ana iraḡe.”

⁴ Ma mota wavine i paribelei, “Egateni! Amapo ega ma iraḡe. ⁵ Nai maranai u ani, matam ina vikalai me God nanare ma aiaina ma apoapoena ona aramanei. Ma God i aramanei, lamna aubaina i viḡaem da avena ma ani.”

⁶ Ma wavine i 'nana da ai uana aniam aiaina ma inanana i ai kaua, ma i ḡoei da ita ani da nuaulaula ita vaini, lamna aubaina tauna ai uana i vaia da i ani. Ma ḡelauna awana au ririvana i mamae i verei da i ani. ⁷ Ma matai i kala ma i aramanei da tau ai ana kovakovai, lamna aubaina ai bawara rugurugui i vaia da i vaturi da tupuai i tere-ḡaḡari.

⁸ Au biga ubana i opuopu ma tau i nonori BADA God au peipei i bababara nae. Ma oroto awana maiteni ai au orai BADA God i raugovaḡei. ⁹ Wate BADA God oroto i kwatuei i pa, “Tam mepa?”

¹⁰ Tauna i paribelei i pa, “A nonorim au peipei ma tau ana kovakovau aubaina a rovo da a raugovaḡem.”

¹¹ Ma BADA God i riwa i pa, “Aiiai i riwem da tam ana kovakovam? Ai uana a viḡaem da avena uta ani, ma u ani bo?”

¹² Ma oroto i paribelei i pa, “Wavine u verevereu, tauna ai uana i vereu da a ani.”

¹³ BADA God wavine i riwei i pa, “Aiwai u kauei?”

Ma wavine i paribelei i pa, “Mota i moruiu da a ani.”

BADA, Rava ai kovoḡa i vinolenolei

¹⁴ BADA God mota i riwei i pa, “Wei u kauei aubaina, kovoḡa ḡaeḡaena tam awarim, ega me gāmoḡamo ḡelau nanare, maramaraḡamai ma moduei.

Manawamei ma matave-taitaina-nae

ma am lam doa ma ani

am mara au anatapuna.

¹⁵ Ana kauei da tam ma wavine ona viḡavia nonoa, ma am epaia ma wavine ana epaia ona viḡavia.

Tauna kolam ina gwadai

ma tam ae karena ma ani.”

¹⁶ Ma wavine i riwa i pa:

“Am nuabola ana viratai am au raumanawa, ma am iniviara ina rata am au vinatuna.

Tam u ḡoei da awam uta vibadei, wate tauna tam ina vibadem.”

¹⁷ Adam i riwei i pa,

“Ma tam awam ponana u rautaniḡanei

ma ai uana a viviḡaiea u ani,

Tam am kauei doa u viapoepoeni.

Tam ma nola guratana ma inim ina viara da lam ma nelaḡai, am mara au anatapuna.

18 Ma doa, donadona ma modu viganaganai ina vigogoi aubaim
ma tam ma ipi da ma am.

19 Tam polapolam ina toi
da lam ma nelaḡai
ma nanare ma mae da ma nae me au doa.
Doa pokauna a vaia da tam a kauem
ma tam ma nae me doa au pokauna.”

20 Orotō i aramanei da awana tauna rava anatapui aloi ma lamna aubaina
i ḡorei Eve.*

21 BADA God ḡamoḡamo opina i vaia da iniḡaḡara i kauēi Adam† awana maiteni aubai ma ini i tere-ḡaḡari.

BADA, Adam ma Eve Edenei i viopuni

22 BADA God i riwa i pa, “Orotōna aiaina ma apoapōena i aramanei, tauna marina tauta nanare. Eḡa tana voterei da urana ina vilolo-melei da lawana aina uana ina vaia da ina ani ma ina mae-nonōa.” 23 Ma lamna aubaina peipei, oroto i viopuni da doa ita ipiei. BADA, doi oroto i voai. 24 Anina ma oroto i viḡaḡana-opunei ma *cherub*‡ biḡaḡa au peipei Eden au maramatanei i terei ma ana dabaruma araratana i terei da i nae ma i nenei ma lawana aina etanaina e gagalogei.

4

Cain ma Abel

1 Ma Adam awana Eve maiteni i matave ma i duama ma tevera orotōna i tupua. Ma i riwa, “BADA ana aḡuei natu a vaia.” Lamna aubaina i ḡorei “Cain.”*

2 Ma muriai tevera orotōna ḡelauna i ḡuni ma i ḡorei “Abel.”†

Ma maranai tau i vilaraga, Abel tauna tauviḡamoḡamo ma Cain tauipi. 3 Mara tagōi Cain doa uana ḡelau i neiāi da i pulōi BADA awarina. 4 Wate Abel nanare sipu natuevouii i vunū-naiei ma sia monamonai i apui BADA awarina ana pulo. BADA Abel ma ana pulo i vinuāiaiei. 5 Wate Cain ma ana pulo eḡa ita vinuāiaiei. Ma lamna aubaina, Cain amlona i ḡaiḡai ma naona i peu.

6 Anina ma BADA Cain i riwei i pa, “Aiwai aubaina amlom i ḡaiḡai? Aiwai aubaina naom i peu? 7 Mepa da kaua aiaina uta kauēi, lamna ata vinuāiaei awarim. Wate am nota da apoapōena ma kauēi, lamna ma aramanei da apoapōe am au metaeta e daradaraim da ina vovaiubaim. Wate tam ma viREWAPANA da ma vovaiubai.”

8 Ma muriai Cain ana tevera Abel i riwei, i pa, “Tana nae, tana babara.” Ma maranai i ḡeta au wapu, Cain i vomairi ma ana tevera Abel i vunūi da i virāḡeni.

9 Ma BADA Cain i paridadani i pa, “Am tevera Abel mepa?”

Ma Cain i paribelei, i pa, “Eḡa ata aramanei! Tau au tevera taupainina bo?”

10 Ma BADA i riwa, i pa, “Aiwai u kauēi? Am tevera tarana doi e kwatukwatu raubiwa aubaina. 11 Lamna aubaina tam marina apoapōe awarim a tereterei. Am tevera tarana uramei au doa i toi da doa i matave ḡaḡari. 12 Ma lamna

* 3:20: Eve Wei wavana nonorana me Hebrew ponanei lawana tauverena. † 3:21: Au Hebrew ponana oroto lamna adamah lamna aubaina oroto i ḡorei Adam. ‡ 3:24: Arua lawalawaii gabu vivivireina taupaini. Tagōi lamna cherub

* 4:1: Cain Wei wavana nonorana me Hebrew ponanei anona a vaia. † 4:2: Abel Wei wavana nonorana me Hebrew ponanei anona lavutuna tupona.

aubaina maranai u ġoei da doa uta ipiei, lamna uana eġa ma nelaġai ma am animae eġa. Tam ma babara labalababa.”

¹³ Cain BADA i riwei, i pa, “Au kovoġa i rata kaua ma eġa tagotagogina da ana avarai! ¹⁴ Tam wei doanei e viviopuniu da naom eġa ana inana-melei. Tau ana babara labalababa ma eġa au animae. Ma rava ina nelaġaiu ma ina virageniu.”

¹⁵ Ma BADA i paribelei, i pa, “Eġa! Aiai da i viragenim, ana kovoġa ina rata guratana.” Ma ana mataira Cain awarina i terei da rava ita viġaei da tauna avena ita vunui, maranai i nelaġai.

²⁵ Adam awana maiteni i matave ma Eve natui ġelauna i ġuni. Eve i riwa, i pa, “Cain ana tevera Abel i virageni. Ma lamna aubaina God natu orotona i vereu da Abel i raviepaiai.” Ma i ġorei Seth. †

²⁶ Seth natuna orotona i tupua ma i ġorei Enosh. Ma nai marana, rava, BADA wavana vivivireina viborumana i vikarei.

6

Rava ai ġo'apoapoe

⁵ Ma BADA i 'nanai da rava anapui au dobu ai ġo'apoapoe i rata kaua ma aiwai i viogatarei ma i vinua-notenotei anapui apoapoei. ⁶ BADA i 'nanai ma orana i viara kaua ma i vinuabola da aiwai aubaina rava i kauiei. ⁷ Ma BADA i riwa, “Tau rava a kaukaueia ana vipupui dobu au anapuna ma nanare ġamoġamo ġaeġaei ma ġamoġamo au doa tetetei ma kiu au aidamo. Nuanuau i bola-kauiei da tau i kauiei.” ⁸ Wate BADA Noah i 'nanai ma i vinuaiaiei.

Noah ana virarautua

⁹⁻¹⁰ Noah ma ana epaepaiea ai virarautua wenanare.

Noah natunatuna nelarai tonuġa: Shem, Ham ma Japheth. Noah ana ġo'apoapoe eġa, tauna ainelana rava aiaina eġa me aiai ġelauna nai au marana. Ma God maiteni i bababani nonoa ma ana au viaiaina i mammae.

¹¹ Rava ai ġo'apoapoelei dobu i viapoapoeni God au matana ma vigaigaiawa dobu i oai. ¹² Ma God i 'nanai da rava ai ġo'apoapoe i rata kaua ma lawana apoapoea i maemaelei. ¹³ Ma God Noah i riwei, “Rava pupunana a vivinua-notenotei. Aubaina rava ai ġo'apoapoe dobu i oai, lamna aubaina rava ma dobu anapuna ana vipupui. ¹⁴ Lamna aubaina a ġoei da wei ma kauiei. Waga ġaeġaena ai bagibaginei ma voai tam aubaim. Ma babalaraġi ma koltei au orana ma au doa ma pasi. ¹⁵ Wenanare ma voai. Waga ana manawa 140 mita ma ana dabora 22 mita ma ana ġae 14 mita* ¹⁶ Ma poewi ma gavogavo aburuna ma voterei poewa ma biribiri au poui, ive ma madeġa aubaina. Ma au ririvana, metaeta ma terei. Ma vatara, au gabaurina, au pouna ma au tepana ma voai.

¹⁷ —Ona rautaniġana! Tau marina ututuva ana paritawaneia i dobu ma aiwai anapui lawalawai ina amoa. ¹⁸ Wate marina tau parivainuaġana bagibagina ana kauiei tam maiteni. Tam, awam, ma natunatum awawai maiteni au waga ona rui. ¹⁹⁻²⁰ Ma ġamoġamo anapui, wavinena ma orotona ma vigerui, kiu, ma ġamoġamo au doa tetetei ruaruagei ava ina rui da ina lawana. ²¹ Ma lam taputapunei ava ma vaia da taumi ma ġamoġamo aubaii.”

† 4:25: Seth Wei wavana nonorana me Hebrew ponanei anona i vereu. * 6:15: Hebrew pona ana manawa 300 cubits ma ana dabora, 50 cubits ma ana ġae 30 cubits.

22 Ma God aiwai anapuna i ririweia; Noah i kauēi.

7

Ututuva i vikarei

1 Ma BADA Noah i riwei, “Tam ainelam rava jijimanim au dobu wei au marana. Lamna aubaina tam ma am numa ravai anapuni au waga ona geru. 2 Ma BADA ġamoġamo i vianinei aniam ma pulo aubaina, ororotoi 7 ma waivinei 7 ma vaia. Ma BADA ġamoġamo eġa ita vianinei, orotona tagogi ma wavinena tagogi ma vaia. 3 Ma nanare kiu ma vaia, ororotoi 7 ma waivinei 7. Wei ma kauēi da ġamoġamo da kiu anapui lawalawai ina mae ma ina vinatuna. 4 Ma au pom 7 au murina ma garewa ana paritawaneiai da mara 40 ma au pom 40 ina atuna. Ma aiwai au dobu a kaukaueia, e mamae ma e lavulavutu anapui ina pupu.”

5 Anina ma BADA anapuna i ririweia, Noah i kauēi.

17 Ma au pom 40 au orana ututuva i rarata ma waga i tenam epa.

23 Anina ma BADA anapuna lawalawai au dobu i pupuna-pai, rava ma ġamoġamo ma kiu ma ġamoġamo tetetei, anapui i viamoai. Noah ma tauī aiavoī au waga i gerugeru, tauī ava i lawana.

8

Ututuva damona

15 Ma God Noah i riwei i pa, 16 “Tam ma awam ma natunatum ana awawai waga ona oputawanei. 17 Ma ġamoġamo lawalawai anapui ma taravainaponei, kiu anapui, ġamoġamo au doa tetetei da ina vinatuna ma ina maġa da dobu ina vioai.”

18 Ma Noah awana ma natunatum ma awawai waga i opu-tawanei. 19 Ma ġamoġamo anapui, kiu ma ġamoġamo ġelauī au doa tetetei, ai au dam nununai nanare waga i opu-tawanei.

20 Ma Noah pulo aniapuna i voai BADA awarina ma ġamoġamo aiiai, kiu aiiai tagotagogi ava taputapuna i apui pulo aniapuna au tepana. 21 Ma maranai BADA pulo ġabuna i laġoni ma au nuanuana i pa, “A aramanei da rava melamelaiei ai nota i apoapoe. Wate dobu eġa ana viapoapoeni ma eġa melanai lawalawai anapui ana pupuna-melei me a kauēi nanare.

22 Ma maranai dobu e mamae
paewa ma tuaruta,
ubauba ma vibola,
bodu ma omra,
garewa ma madeġa,
maratom ma au pom,
ina mae-nonoa ma eġa ina kwa.”

9

BADA ana Parivainuaġana bagibagina Noah maiteni i kauēi

1 *Ma God Noah natunatum maiteni i viaiaini ma i riwei i pa, “Ona vinatuna ma ona vimaġaimi da dobu ona vioai. 2 Ana kauēi da ġamoġamo ġaeġae ma ġamoġamo tetetei, iana ma kiu, anapui ina rovoemi. Ma au urami ana terei da

☆ 9:1: Gen 1:28

ona vibadei. ³ Aiwai anapui lawalawai ami aniam. Modu anoi ma ai uana a veremi, wate marina aiwai anapuna a vereveremi ami aniam.

⁴ ✪—Wate vinoa taratarana ega ona ani, aubaina tara au orana lawana e maae, ona voterei da tarana ina toi tawanana ma muriai ona ani. ⁵ Ma mepa da gamogamo rava i viraġeni. Tau ana raubiwa, wate nanare rava, rava turana i viraġeni. Tau ana raubiwa.

⁶ ✪Tau rava a kauei me tau inana nanare, ma lamna aubaina Rava aiai i viragena, rava gelauna tauna ina viraġeni.

⁷ ✪Ma tam natunatum ina maġa da am epaepaia dobu ina maena-pai.”

⁸ Ma God **Noah** natunatuna maiteni i riwei i pa, ⁹ “Ona rautaniġana wei marina, Tau au parivainuaġana bagibagina taumi ami epaepaia maiteni a kaukauei. ¹⁰ Ma gamogamo lawalawai anapuna, kiu ma gamogamo numei ma moduei ma anapui wagei i opuopu, ma gamogamo anapui muriai au dobu ina mae. ¹¹ Wei riwanei au parivainuaġana bagibagina taumi maiteni a terei da ega melanai ututuva gelauna ana paritawanana-meleiai au dobu da purapura lawalawai ina vipupui.”

¹² Ma God i riwa, “Parivainuaġana bagibagina a kaukauei taumi ma anapui lawalawai maiteni anapui muriai e nenei. Wei parivainuaġana matairana wenanare: ¹³ Warilolo au apau ana terei da ina vimataira da tau au parivainuaġana bagibagina a terei tau ma taumi ma anapui lawalawai au dobu maemaei. ¹⁴ Maranai mara e ġuvaġuvai ma warilolo au apau e eġaega, ¹⁵ lamna ina vieġeu da au parivainuaġana bagibagina tau ma taumi ma anapui lawalawai au dobu. Ma ega melanai ututuva lawana ina vipupui.”

11

Babel ana numa ġeġe dewadewana

¹ Au naona rava anapui au dobu pona tagogi ma riwa tagogina i bababaniei. ² Nai maranai rava i vaġavaġai nae au maramatanei ma wapu au ġaegaena i ġeta au **Shinar** * ma kampa i mae.

³ Ma i babani vivira i pa, “Ona nei, doa tana vaia ma brik tana pasi ma tana apui da ina bagibagi.” Ma nanare ai numa brikiei i voai ma koltei i ampasi.

⁴ Ma tau i riwa, “Ona nei melagai ġaegaena tana voai tauta aubaita ma numa ġeġe dewadewana tana voai da ina ġae au mara da wavata tana kauei ma ega tana vilamoneta dobu au anapuna.”

⁵ Anina ma BADA i ġairai da ravai melagai ġaegaena ma numa ġeġe dewadewana i voavoia ita inani. ⁶ Ma BADA i riwa i pa, “Wei tau rava tagogi ma pona tagogina e bababaniei. Wei lamna karena, aburuna ava aiwai ai au nota anapuna ina kauana-paiei. ⁷ Ona nei tana ġaira da noi ravai ai pona tana vinua-raġaraġai ma ina babani labalababa.”

⁸⁻⁹ Anina ma BADA rava anapui ai pona i vinua-raġaraġai ma i vilamonei dobu au anapuna, lamna aubaina nai melagaina i ġorei **Babel**.† Ma melagai ġaegaena voana i voterei. BADA tau i vilamonei dobu au anapuna.

12

BADA, Abram i kwatuei

✪ **9:4:** Lev 17:10-14 ✪ **9:6:** Exo 20:13; Gen 1:26 ✪ **9:7:** Gen 1:28 * **11:2:** Babilon au paratana. † **11:8-9:** Babel Nonorana me Hebrew ponanei nuaraġaraġa.

¹ ✨ BADA Abram i riwei i pa, “Am dobu, am rava ma amam ana dam ravai ma netawanei ma ma nae dobu ana viatataiem kampa ma mae.

² Ma am epaepaia ai dam ana viratai,
ma ana viaiainim,
ma ana kauēi da wavam ina rata,
ma tamei viaiaina ina nei rava awarii.

³ Ma aiai i viaiainim, tau ana viaiaini,
ma aiai i parivai-apoapoenim, tauna ana parivai-apoapoeni,
ma tamei dam anatapui au dobu ana viaiaini.”

⁴⁻⁵ Ma BADA i ririweia nanare, Abram awana Sarai ma maiana Lot* Haran i opu-tawanei, Abram ana madeġa 75. Ai purapura, ai gamoġamo ma ai laralaraga ma i vomairi Canaan aubaina. ⁶ I ġeta Canaan ana au parata ma i verautua da au gabu vinevinena, Shekem melagaina ġaeġaena au ririvana. Ma kampa au Moreh† ai ġaeġaena au ġouna i raugaravu. (Nai maranaina mai Canaan, nai au dobuana i mamae.) ⁷ ✨ Kampa BADA i viatataeana-melei ma i riwa i pa, “Wei dobuana Canaan am epaepaia ana verei.” Ma Abram pulo aniapuna, i voai BADA awarina ma pulo i apui. Mepa BADA i viatataeana-melei lamna au gabuna aniamapu i voai.

13

Abram ma Lot i vilamonei

⁵ Maranai Lot, Abram maiteni i vaġavaġai, Lot maiteni ana ġamoġamo maġamaġau ma ana numa ravai ma ana tauvilaraga. ⁶ Ma tau i ai ġamoġamo i maġa guratana ma gabu eġa tagotagogina da anatapui ita ġamoi, ^{7a} Ma lamna aubaina eġa tagotagogina da tau i ita mae-gogona.

⁸ Anina ma Abram Lot i riwei i pa, “Ma rautaniġana, tauta tara tagogi ma eġa tana viparipariniġai ma ata taunola avena ita viġaiġaiawa vivira. ⁹ Weka tana vilamoneta ma ata naei tana nae. Doa au naota e inainanai. Metauna e ġoġoġoi ma nae ma kampa ma mae. Mepa da tam ma nae au oiena, tau ana nae au kelakela. Mepa da tam ma nae au kelakela, tau ana nae au oiena.”

¹⁰ Anina ma Lot matana i tawanei da waira Jordan wapuna ma Zoar melagaina au paratana. Ma i ’nanai da waira i maġa ma doa maumaurana me BADA ana peipei,* me doa maumaurana au Egypt. (Nai marana BADA eġa Sodom ma Gomorah ita vipupui.) ¹¹ Ma Lot waira Jordan wapuna i vinei tauna aubaina ma i nae au maramatanei. Tau i nanare i vilamonei. ¹² Abram au Canaan i mae ma Lot Sodom au ririvana i mae. ¹³ Ma mai Sodom ai lawana i apoapoe kaua ma ġo’apoapoe i kaukauei BADA au matana.

¹⁴ Ma Lot Abram i netawanei ma muria BADA Abram i riwei i pa, “Mepa u mamae lana, matam ma tawanei au lavaratei ma au rauanaġei ma madeġa e gogogolana ma mepa madeġa e neneulai. ¹⁵ ✨ Dobu anatapuna e inainanai tam ma am epaepaia ana vere-nonoemi. ¹⁶ Ma am epaepaia ana kauēi me doa pokauna ma aiai da pokau e iaiavi lamna am epaepaia tagotagogina ina iavi. ¹⁷ Dobuna anatapuna taumi a vereveremi, ma nae ma dobuana ana manawa ma ana dabora ma babarani.”

✨ **12:1:** Act 7:2-3 * **12:4-5:** Abram ana tevera Haran natuna Lot. † **12:6:** Mai Canaan weka ai god morumoruna i vimae-ġaeġaeni. ✨ **12:7:** Act 7:5 * **13:10:** Eden peipeina, Gen 2:8. ✨ **13:15:** Act 7:5

¹⁸ Ma nanare Abram ana numagara i naiei Mamre ana ai gaeḡaena au gereḡerena au Hebron i mae ma kampa pulo aniapuna i voai ma pulo i apui BADA awarina.

14

Abram, Lot i vai-melei

¹¹⁻¹² Gulugulau 4 Sodom ma Gomorah ai purapura ma ai lam i kwalei. Abram maiana Lot au Sodom i mamae i vaia ma ana purapura maiteni i vaia ma i nae. ¹³ Abram tauna Hebrewei ma Mamre ana ai gaeḡaena au gereḡerena i mamae. Ai taniwagana wavana Mamre tauna Amoriei, varevareina Eskol ma Aner. Anatapui Abram ana tauagu, ḡavia au marana. Ma oroto tagogi ḡavia i rovoei da i rovo-nae ma i ḡeta Abram awarina ma i vibenabenamei. ¹⁴ Ma maranai Abram i nonori da tau maiana Lot i vaia. Tauna ana sorodia vinevinei ana au melagai tuputupuai 318 i kwatuei. Ma ḡaviḡaviai i votagoi da i ḡae au Dan. * ¹⁵ Waguvarai ana sorodia i ḡutai ma ḡaviḡaviai i viaḡaḡe da Damaskas i verautuini da au Hobah i ḡeta ma kampa i vovaiubai. ¹⁶ Purapura anatapui i vai-melei. Maiana Lot ma ana purapura ma waivine ma rava ḡelau.

Melkisedek, Abram i viaiaini

¹⁸ Melkisedek tauna Salem† ai gulau ma God AIDAMO TELARANA ana pirisi pulo tauapuina. Palawa ma wine i neiai, ¹⁹ ma Abram i viaiaini ma i pa, “God AIDAMO TELARANA mara ma dobu taukaueina, ina viaiainim.”
²⁰ Ma God AIDAMO TELARANA am ḡavia au uram i terei, lamna aubaina tana voepaepai.”
Ma Abram aiwai ana sorodia maiteni i tami i vitagogiei da ḡuta 10 i kauei. Ma ḡuta tagogi i votawanei ma Melkisedek i verei.

15

BADA, Parivainuaḡana bagibagina Abram maiteni i kauei

¹ Ma muriai BADA Abram ana au rauboni i riwei i pa, “Abram eḡa ma rovo. Tau am taugagalo am pulo gaeḡaena.”
²⁻³ Ma Abram i paribelei i pa, “Oo BADA God. Tau eḡa natunatu, ma am pulo eḡa ina voaguii. Tam eḡa natu orotona uta vereu ma lamna aubaina au irage au murina, Elesar au taunola Damaskasei au vigulau ina vaia.”
⁴ Anina ma BADA i riwaina-melei i pa, “Eḡa! Tauna am vigulau eḡa ina vaia, wate natum orotona tamei ina tupua, tauna am vigulau ina vaia.”
⁵ Anina ma BADA tauna i taravaina-opunei au doa ma i riwei i pa, “Ma ḡoutata au mara ma ubona ma inanai, mepa da tam tagotagogina da uta iavi. Lamna am epaepaia ina maḡa me ubona nanare. Eḡa ai ai tagotagogina da ina iavi.”
⁶ Abram, BADA riwana i vitumaḡanei ma lamna aubaina BADA i riwa da Abram rava jijimanina.

¹² Ma maranai madeḡa i neneulai ma Abram i matave-nuavuru kaua. Ma gimtona ma rovo gaeḡaena i nei ma i purui. ¹³ ✨Ma BADA i riwei i pa, “Wei ma aramana-kauei! Am epaepaia ina vitaomana au dobu ḡela ma kampa

* **14:14:** Lamna melagai gaeḡaena au lavaratei Canaan ana parata au gereḡerena. † **14:18:** Jerusalem. ✨ **15:13:** Exo 1:1-14; Act 7:6

ina vitaunola. Ma dobuna ravai* tau i rau-iviapoapoele da madeġa 400 ina kwa. ¹⁴ ✧ Wate muriai tau nai dobuna ravai ana kovoġi ma am epaepaia ina vipurapura kaua ma ina nememei. ¹⁵⁻¹⁶ Ma mai Amori† ai ġo'apoapoe ina rata guratana, ma nai maranaina ana kovoġi ma ana viaġaġana-opunei wei au dobuna. Ma lamna aubaina am epaepaia eġa ina nei laġilaġinai da kimta au vi-four-na. Wate tam, Abram ma magura kaua ma ana nuaubam ma iraġe ma ina doboim."

16

Sarai ma Hagar

¹⁻³ Abram au Canaan i mae madeġa 10 i kwa, awana Sarai aipoi ma eġa ita vinatuna. Sarai ana taunola wavinena Egyptei wavana Hagar. Ma Sarai Abram i riwei i pa, "BADA i viġaeu da eġa ata vinatuna. Ma nae au taunola maiteni ma matave, mepa da ina vinatuna, ma tevera ana vinatunei." Abram, Sarai ponana i voteletelei ma Hagar i vaia ma i viawane.

¹⁵ Ma Hagar i vinatuna da Abram natuna orotona i tupua. Ma Abram, natuna i viwawai Ishmael.

17

BADA ana mataira terenana

¹ Maranai Abram ana madeġa 99 ma BADA i vieġana-melei Abram awarina ma i riwei i pa, "Tau God VIVIREWAPANA KAUKAUANA.* Au naou ma babara ma kaua aiaina ava ma kauei ² da nanare au Parivainuagana bagibagina ana vovai-virewapani tau ma tam awarita ma am dam ana vimaġa-guratei."

³ Ma Abram i mae-ġaira au doa ma i raudune. Ma God Abram i riwei i pa, ⁴ "Tau au navanava au parivainuagana bagibagina tam maiteni wenanare: Ana kauei, da dam patarana maġamaġau tam ina viamanem. ⁵ Ma marina wavam Abram, † ana terevirai da Abraham;‡ aubaina marina ana kauei da dam patarana maġamaġau ina viamanem. ⁶ Ma ana kauei da am epaepaia ina maġa ma am damei gulau maġamaġau ina nei. ⁷ Au parivainuagana bagibagina ana vovai-virewapani, tau ma tam ma am epaepaia muriai e nenei da tau am God ma tau ai God. ⁸ ✧ Canaan dobuna taputapuna marina e mamae-gubai, tam am epaepaia maiteni ana vere-nonoemi aubaimi ma tau, tau ai God."

⁹ Ma God Abraham i riwei i pa, "Ma au parivainuagana bagibagina, tam ma am epaepaia maiteni ona voteletelei. ¹⁰ ✧ Wei taumi ami au navanava parivainuagana bagibagina ona voteletelei, ami nelara anatapui inii ina bori. ¹¹ Ma taumi inimi ona bori, lamna ata parivainuagana matairana. ¹² Roaroa melamelai nelarai i tupua ma au pom ⁸ au murina inii ona bori. Wei kauana ona kauei, natunatumi nelarai ma ami taunola natunatumi nelarai ma nelara anatapui am au numa e vivitaunola. ¹³ Riwa kaua, maranai roaroa nelarai i tupua am au dam bo maranai taunola o gimarai, tau au mataira lamna inii

* **15:13:** Mai Egypt. ✧ **15:14:** Exo 12:40, 41; Act 7:7 † **15:15-16:** Nai maranai, mai Amori ma mai Canaan au dobuna Canaan i mamae. * **17:1:** God vivirewapana kaukauana. Hebrew El-Shaddai. † **17:5:** Abram. Wei wavana nonorana Hebrew ponaiei anona viwavalatonana.

‡ **17:5:** Abraham. Wei nonorana me Hebrewi anona dam maġamaġau amai. ✧ **17:8:** Act 7:5

✧ **17:10:** Act 7:8

ona bori. Lamna au parivainuāgana matairana au tupuami ina mae-nonoa. ¹⁴ Wate aiai orotona nai matairana eġa au tupuana, lamna au parivainuāgana bagibagina i viaigai ma lamna aubaina tauna ina viravaġela.”

BADA, Sarai i parivainuāgani

¹⁵ God Abraham i riwei i pa, “Awam eġa ma ġorei Sarai, wate ma ġorei Sarah.
§ ¹⁶ Tau ana viaiaini ma natum orotona ina vitupui. Anina ma ana viaiaini da ina vidam ġaeġae aloi. Ma dam ai gulau maġamaġai taunei ina opu.”

¹⁷ Abraham i mae-peu ma i raudune ma i mutu-kaka ma au nuanuana i pa, “Amapo oroto ana madeġa 100 ma ina vinatuna bo? Ma Sarah ana madeġa 90 ma ina vinatuna bo?” ¹⁸ Ma Abraham God i riwei i pa, “Ma Ishmael menanare, uta viaiaini bo eġa?”

¹⁹ Wate God i riwa i pa, “Eġa! Awam Sarah natum orotona ina vitupui ma ma viwawai Isaac.^{*} Au parivainuāgana bagibagina tauna awarina ma ana epaepaia awarii ina mae-nonoa. ²⁰ Ma Ishmael aubaina, am nuabola a nonori. Ana viaiaini ma natunatuna ana vimaġai ma ana epaepaia ana vituai. Tauna dam 12 ai babada amai ma ana epaepaia ai dam ana vimaġai. ²¹ Wate au parivainuāgana bagibagina ana kauēi Isaac maiteni. Ma wei marana nanare, madeġa ġelauna Sarah, Isaac ina vinatunei.”

18

Nelara tonuġa i nei Abraham awarina.

¹ Au benai Abraham ana numagara au metaetana i kiakiala. ² I taepai ma nelara tonuġa i 'nanai i maimairi. Maranai i 'nananai i ruba da au naoi i mae-ġaira ma i raudune.

³ Ma i riwa i pa, “Au bada. Mepa da u notai da tau anina, eġa ma tutelareu.
⁴ Waira ana neiai da aemi ana oġai ma ona vilauvitau ai au ġouna. ⁵ Lam ana veremi da ina vovai-wirewapanimi ma muriai ona vaġai. Taumi o notaiu da o nei.”

Tau i paribelei, “Anina u ririweia ma kauēi.”

⁶ Anina ma Abraham laġilaġina i nae au numagara ma Sarah i riwei i pa, “Laġilaġina, am palawa aiaina baikena ma vaia ma palawa ma apui.”

⁷ Ma i ruba ma bulumakau orotona ġaubona i vaia da ana taunola i verei ma i vokaukauēi.

⁸ Anina ma Palawa ma mereki ma mereki ravi taputupui ma sia i neiai tau i awarii au ġou da i am ma tauna i mae-paini.

⁹ Tau i paridadana i pa, “Awam Sarah mepa?”

Tauna i paribelei i pa, “Tauna numagara au orana.”

¹⁰ Tau i tagogi Abraham i riwei i pa, “Riwa kaua da wei au marana nanare madeġa au ġelauna ana nenememei, lamna awam Sarah tevera orotona ina ġuni.”

Ma Sarah, ravai au muri numagara au metaetana, i rarautaniġana. ¹¹ Sarah ma Abraham i magura kaua ma Sarah ana vinatuna ana mara i kwa. ¹² Sarah i mutu-kaka ma i riwana-melei, “Tau ma awau a magura kaua ma au vinatuna ana mara i kwa. Ma amapo tagotagogina da duama ana morelanei bo?”

¹³ BADA Abraham i paridadanei i pa, “Aiwai aubaina Sarah i kaka ma i riwa, ‘Tau a magura kaua ma riwa kaua da ana vinatuna bo?’ ¹⁴ Aiwai i piripiri

§ 17:15: Sarai - Sarah: Wei wavai ruaġa anoi wavalatona natuna wavinena. God Sarai wavana vouna i verei da ita viataiaei da tauna dam ġaeġaena aloi. * 17:19: Isaac. Wei wavana Hebrewēi anona i kaka.

guratana BADA au matana? Me a ririwem nanare, ana nememei awarim wei marana nanare madeġa au ġelauna ma awam Sarah tevera orotona ina ġuni.”

¹⁵ Sarah i rovo ma i bovi ma i riwa i pa, “Tau eġa ata kaka.”

Tauna i paribelana i pa, “Eġa! Tam u kaka.”

Sodom ana virarautua

¹⁶ Maranai nelara tonuġa i vomairi da ita nae, Abraham tau i maiteni i nae da au etanai ita tuterei. Ma tau i 'nana ġaira au Sodom, ¹⁷⁻¹⁹ ma BADA ana au nota i pa, “Aiwai marina ana kauēi, eġa ana tere-ġovaġi Abraham awarina. Abraham ana epaepaia ina vidam ġaēġaena ma vivirewapanana ma taunei dam anatapui au dobu ana viaiaini. Tauna a vinei da natunatuna ina riwei ma tau natunatui ina riwei da BADA ana lawana ina vogaġaġoi da aiaina ma jijmanina, ina kaukauei da tau Abraham a paripari-vainuagania ana kauēi.”

²⁰ Ma BADA Abraham i riwei, “Tau, vikaruwaġawaġa maġamaġaui a nonori da Sodom ma Gomorah melagāii ravai ai ġo'apoapoe i rata guratana.

²¹ A ġaiġaira da ana inana i da wei vikaruwaġawaġana riwa kaua bo eġa.”

²² BADA Abraham maiteni i maimairi ma nelara ruaġa i nae au Sodom.

²³ Abraham i nei BADA awarina ma i riwa i pa, “Riwa kaua da rava aiaii ma vipupui rava apoapoei maiteni? ²⁴ Mepa da rava aiaii 50 au melagai, amapo melagaina ma vipupui bo? Ma rava 50 notaiei ma melagaina eġa ma vipupui? ²⁵ Lamna eġa ita ai, ma eġa ma kauēi. Tam eġa rava aiaii ma viraġeni rava apoapoei maiteni. Nai kauai e kaukauei rava aiaii awarii, kauana tagogina rava apoapoei awarii e kaukauei, eġateni! Tam rava anatapui au dobu tauretarena ma ma etarana-kauelai tapa?”

²⁶ BADA i riwa i pa, “Mepa da rava 50 aiaii ana nelaġai au Sodom, dobuna ana voterei tau i ai ġo'aiaii aubaina.”

²⁷ Abraham i paribelei i pa, “Au BADA tau am molaka, wate tau wei babanina a vikarei aubaina amapo ana paridadana me. ²⁸ Mepa da rava 50 aiaii ma 5 ina deġa, amapo melagaina ma vipupui bo?”

I riwa i pa, “Mepa da rava 45 kampa ana nelaġai lamna eġa ana vipupui.”

²⁹ Abraham i paridadana me i pa, “Mepa da rava aiaii 40 ava kampa u nelaġai?”

I riwa i pa, “Mepa da kampa 40, amapo eġa ana kauēi.”

³⁰ Abraham i riwa i pa, “Au BADA, eġa awariu ma ġaiawa ma vianineu da ana babani me, mepa da 30 ava kampa ma nelaġai?”

I riwa i pa, “Mepa da 30 ava ana nelaġai, amapo eġa ana kauēi.”

³¹ Abraham i riwa i pa, “Tau wei babanina a vikarei, mepa da 20 ava kampa ma nelaġai?”

I riwa i pa, “Mepa da 20 ana nelaġai lamna, eġa ana vipupui.”

³² Abraham i riwa i pa, “Au BADA, eġa awariu ma ġaiawa ma vianineu da mara tagogi ava ana babani me. Mepa da 10 kampa ma nelaġai?”

I riwa i pa, “Mepa da 10 ana nelaġai, amapo eġa ana vipupui.”

³³ Maranai BADA Abraham awarina i babani vorove, tauna i nae ma Abraham i nae ana au melagai.

19

¹ Ma raviraviai anela ruaġa au Sodom i ġeta, Lot melagai au metaetana i kiakiala.* Maranai Lot tau i 'nanai, i vomairi da i nae awarii ma i raudune.

² Ma i riwa i pa, “Au babada, tau ami taunola a nei, ona nei au au numa.

* **19:1:** Melagai, ġaimēi i gari-kwavirooi; ma metaeta tagogi bo ruaġa i tereterei. Weka i kiakiala gimara bo viboruboru ma i vivioġatara.

Aemi ona oġai ma ona matave. Maratomtomai ona vomairi da ami au aninae ona nae.”

Ma tau i paribelei i pa, “Eġa! Tauai weka au deba ana matave.”

³ Ma i riwana bagibagi da maiteni i nae ana au numa. Lot, palawa eġa yist[†] maiteni i apui ma tau i am.

⁴ Ma ita matave ma mai Sodom nelarai laralaragai ma magumaguri anata-pui i nei da numa i kwaipipini, ⁵ ma tau Lot i kwatuei i pa, “Nelara ruaġa wagu-varai i nenei awarim, tau mepa? Ma opuneiai awariai da ana viawawanei.”

⁶ Ma Lot i opu tau awarii ma au murina metaeta i gudui. ⁷ Ma i riwei i pa, “Au rava a vivibaġaimi, eġa wei kauai apoapoei ona kauai. ⁸ Ona rautaniġaneu, tau natunatu waivinei ruaġa, tau matatapu. Ana opuneiai awarimi da ami ġoana nanare ona kauai. Wei nelarai a neiai au numa lamna tau au taomana ma eġa aiwai awarii ona kauai.”

⁹ Ma Sodom nelarai i paribelei i pa, “Ma maeria! Tam dobu ġela ravam weka e mamae-gubai ma marina u ġoei da ma vibadabada. Marina ana viapoapoenakauem eġa me tau ruaġa!” Ma tau Lot au metaeta i dudu ratui da gudu ita rikai. ¹⁰ Wate nelara ruaġa numa au orana urai i tere-opune ma Lot i taina-ruiei awarii ma metaeta i gudui. ¹¹ Ma nelara anata-pui au metaeta matai i viaipotai mara tupona ava da eġa tagotagogina metaeta ita inana.

¹²⁻¹³ Anina ma nelara ruaġa Lot i riwei i pa, “Tauai marina wei dobuna ana pupuni. BADA, vikaruwagaġa maġamaġai i nonori wei melagaina ravai awarii ma Tauna, tauai i paritawanelai da dobuna ana pupuni. Am dam ravai ġelau weka e mamae bo eġa? Natunatum nelarai ma waivinei ma poipoiam ma am rava aiavo i melagai maemaiei; ma taravaina-opunei!” ¹⁴ Ma Lot i opu natunatuna ai ġopapara awarii ma i riwei i pa, “BADA marina dobuna ina pupuni. Laġilaġina, wei dobuna ona oputawanei!” Ma tau i notai da tauna i vivinama.

¹⁵ Ma mara karena i tereterei ma anela Lot i vivibaġai da ita volaġilaġina. Ma i riwa i pa, “Eġa ita ai da ma iraġe marana BADA wei dobuna ina pupuni. Laġilaġina awam ma natunatum maiteni ona opu.” ¹⁶ Wate Lot i tatavira. BADA i ġoei da Lot ita vilawani. Ma anela Lot awana maiteni ma natunatu urai i vojijini ma melagaiei i taravaina-opunei.

¹⁷ Marana melagai i opu-tawanei ma anela tagogi tau i riwei i pa, “Ona ruba ami lawana aubaina! Eġa au murimi ona inana ma eġa au wapu ona tumairi dadana. Ola aubaina ona ruba da ami lawana eġa ona vine-boai.”

²³ Ma madeġa i gogogo ma Lot ana numa ravai maiteni au melagai Zoar i ġeta. ²⁴ Lamna marana BADA salpa araratana marei i paritawana gaireiai me garewa, Sodom ma Gomorah melagai au tepai. ²⁵ Ma melagai, wapu, rava anata-pui ma aiwai gogogoi i aragibui. ²⁶ Ma Lot awana i vivimuri, i maetavirei ma i ravi-taputapu.

²⁷ Ma ubaubana boiboġi Abraham i vomairi ma i nae mepa BADA maiteni i bababani lana. ²⁸ Ma i 'nana ġaira Sodom ma Gomorah ma wapuna ana taputapuna ma kampa bau potopotona i 'nana i ġeġae. ²⁹ Marana God nai melagai ma wapuna i pupuni, tauna Abraham eġa ita notavai-nuavurui. Ma lamna aubaina God Lot i paritawana-opunei ma muriai nai melagaina i vipupui.

[†] 19:3: Eng. Yeast. [‡] 19:23: Hebrewei wava Zoar anona Aburu. [§] 19:24: Salpa lamna ġaima logologana. Maranaina e ararata, lamna i vibola kawa ma puġuna i apoapoei.

21

Isaac i tupua

¹ Ma BADA Sarah i viaiaini ma i paripari-vainuaḡani nanare i kauēi. ² Ma God mara i vinevineia nanare, Sarah i duama ma i vinatuna. Natuna orotona i tupua, Abraham i magura ma natuna i tupua. ³ Abraham natuna i viwavai Isaac. ⁴ Ma au pom 8 au murina Abraham natuna inina i bori me God i ririweia nanare. ⁵ Abraham ana madeḡa 100 maranai wei kauai i tupua.

Abraham, Hagar ma natuna Ishmael i paritawanei

⁸ Isaac i rata ma i viedai ma Abraham lam ḡaeḡaena i vokaukauei ma i am gogona. ⁹ Ma Sarah Ishmael i 'nanai Isaac i vivinamei. Ishmael lamna Abraham natuna ḡelauna, ana taunola Hagar Egyptei i ḡuniḡunia. ¹⁰ Ma Sarah Abraham i riwei, "Taunola wavinena ma natuna ma viopuni! Ega ata ḡoei da tauna am buderi ina vaia. Natu Isaac ainelana am buderi ina vaia."

¹¹ Abraham wei riwana i nonori ma i vinuabola kaua aubaina tauna natuna Ishmael. ¹² Wate God Abraham i riwei i pa, "Ega natum ma alona ma vinuabolei. Am epaia Isaac wavam ina mairiei. Aiwai Sarah i ririwem ma kauēi. ¹³ Wate am taunola wavinena natuna ana epaepaia ana vimaḡai ma ana dam ina rata aubaina tauna tam natum." ¹⁴ Ubaubanai boiboḡi Abraham tamaina i vokaukauei ma waira i ḡui ma Hagar i viavarai. Ma wavine natuna maiteni i paritawanei da i nelabalababa au mutulua.

22

BADA, Abraham ana tumaḡana i raudadani

¹ Madeḡa maḡamaḡa i kwa ma muriai God Abraham ana tumaḡana i raudadani. God i riwa i pa, "Abraham!" Abraham i paribelei i pa, "Tau weka!"

² Ma God i riwa i pa, "Natum tagotago Isaac nuanuam pouna, ma taravaini ma ona nae au dobu Moriah. Ma ola ana viatataem, kampa natum ma puloei aniamapu."

³ Mara i tom ma ubaubanai boiboḡi, Abraham i vomairi, ai i edari pulo apunana aubaina ma ana donki i vokaukauei. Ma ana taunola ruaga ma natuna Isaac i taravaini ma anatapui i nae gabu God i ririweiana kampa. ⁴ Tai i au pom tonuḡa i babara ma Abraham i taepai ma gabu aueia i 'nanai. ⁵ Ana taunola i riwei i pa, "Weka ona mae. Donki ona paini. Tau natu maiteni ana nae nore ma God ana vikorumei. Ma airuaḡa ana nememei awarimi."

⁶ Ma Abraham ai i tavana Isaac i viavarai. Tauna naipi ma ai mutuara i voai ma i negogona. ⁷ Tai i nena ma Isaac i riwa i pa, "Amau!"

Abraham i riwa, "Ee, ma babani natu!"

Isaac i riwa, "Ai ma ai mutuara awarita wate pulo aubaina sipu natuna mepa?"

⁸ Abraham i paribelei i pa, "Natu, God sipu ina vereta pulo aubaina." Ma airuaḡa i babara nae. ⁹ Maranai gabu God i ririweiana i ḡeta, kampa aniamapu ḡaimēi i voai ma ai i vatari. Ma natuna Isaac urana ma aena i raḡini ma aniamapu au tepana, ai i vatavataria kampa i vimataveni.

¹⁰ Abraham urana i viloloi da naipi i vaia da natuna ita viragei. ¹¹ Wate lamna maranaina BADA ana anela marei i riwa, "Abraham, Abraham!"

Abraham i paribelei, “Tau weka!”

¹² Ma BADA ana anela i riwa, “Eġa natum ma viraġeni! Eġa aiwai apoapoena awarina ma kauē! Tam natum tagotago eġa uta nuanei ma marina a aramanei da tam anina God e vivivirei.” ¹³ Abraham i taepai ma sipu orotona i ’nanai, donana ai raġaraġai potopotona au orana i tapaiei. Ma i nae ma sipu i viraġeni ma sia taputapuna i apui ana pulo God awarina, natuna epaiana.

¹⁴ Ma lamna aubaina wei dobuna i ġorei, “BADA ina verena.” Lamna marana da marina rava e ririwa, “BADA ana au ola ina verena.”

¹⁵ Ma BADA ana anela marei Abraham i ġorei ¹⁶ “BADA i riwa, ‘Tam u voteleteleu ma natum tagotago eġa uta nuanei. Tau wavauēi a paripari-vainuaġanīm da ¹⁷ anina ana viaiainim ma am epaepaia ana vimaġai me ubona au mara ma bubu au gera. Tau i ai ġavia ina vovaiubai ma ai melagai ina vaia. ¹⁸ ✧Ma am epaepaia wavaiei dam anatapui au dobu ana viaiaini. Tam u voteleteleu aubaina wei ana kauē.’” ¹⁹ Ma Abraham natuna maiteni i nae me ana taunola awari ma anatapui i nae me au Beersheba. Ma kampa i mae.

25

Esau ma Jacob i tupua

¹⁹ Wei lamna Abraham natuna Isaac ana virarautua. Isaac amana Abraham ²⁰ Isaac ana madeġa 40 ma Rebekah i ravaġi. Rebekah tauna Leban novuna aburuna; amai Bethuel. Tau i mai Aram au Padan-Aram i mamae. ²¹ Rebekah aipoi ma Isaac i raupari BADA awarina da awana ita voaġui. BADA ana pari i nonori ma Rebekah i duama. ²² Raġaraġa i vivitua au manawa aubaina Rebekah i nae ma BADA i vibaġai, “Aiwai aubaina wei e tuputupua awariu?” ²³ BADA i riwa i pa:

“Roaroa ruaġa au manawam ina vidam ruaġa,
ma vinatuna da dam ruaġa ma tau i ina viġavia vivira.
Tagoġi ina virewapana telara
ma magurina aburuna awarina ina vitaunola.”

²⁴ Ana vinatuna ana mara i ġeta ma riwa kaua da raġaraġa nelarai i ġuni. ²⁵ Natuevou opina lebalebarina ma inina ororona ma lamna aubaina i viwavai Esau.^{*} ²⁶ Natuna ġelauna i tuputupua turana au ae karena i vojijina ma i opu ma i viwavai Jacob.[†] Isaac ana madeġa 60 ma awana raġaraġa i vinatunei.

Esau, natuevou ana buderi i verenei Jacob awarina

²⁷ Maranai raġaraġa i vilaraga, Esau tauna rava aroarona. Wate Jacob rava genugenuanana ma au numa maemaena. ²⁸ Isaac ana ġoana ġaeġaena Esau, aubaina sia moduei i vunuvunui amna i ġoei. Wate Rebekah, Jacob i ġoana-kauē.

²⁹ Mara tagoġi Jacob gwada i vivitavi ma Esau i aroaro da i nei ma inina i garigari ma am i raġe-kaua. ³⁰ Ma Jacob i riwei i pa, “Tau am a iraġe kaua. Nai gwada lebalebarina ma taraġui da ana ani!” (Wenanare i riwa aubaina wava i verei Edom.[‡])

✧ **22:18:** Act 3:25 * **25:25:** Mai Hebrew ai pona, inina ororona nonorana me Esau.

† **25:26:** Mai Hebrew ai pona, Jacob anona ae karena i vojijini. Wei lamna awanaina, anona lamna amkwalakwalana. ‡ **25:30:** Mai Hebrew au pona, Edom anona Lebalebarina.

³¹ Ma Jacob i riwa i pa, “Tam natuevou, Mara muriai amata ana buderi voḡaeḡaena ma vaia. Marina ma riweu da am buderi tau ma vereu ma gwada ana verem.”

³² Esau i riwa i pa, “Tau am a iraḡe kaua ma natuevou buderina amapo eḡa ina voaguii, anina ma vaial!”

³³ Ma Jacob i riwa i pa, “Marina ma parivai-nuaḡaniu da am buderi tau ma vereu.” Ma Esau i parivainuaḡana da natuevou buderina Jacob ina verei.

³⁴ Ma Jacob gwada i taraḡui ma palawa da Esau i verei ma Esau i am ma i uma ma i vomairi da i nae. Wenanare i kauai lamna Esau ana buderi eḡa ita vinuabolei.

26

BADA i parivainuaḡana da Isaac ina viaiaini me Abraham

¹ Gomara ḡaeḡaena i nei au Canaan, me wariḡa Abraham ana au mara i tupua nanare. Ma Isaac ana dam maiteni i ḡaira au melagai ḡaeḡaena wavana Gerar, kampa mai Philistia ai gulau Abimelek i mae. ² Ma BADA Isaac awarina i eḡa ma i riwa i pa, “Eḡa ma ḡaira au Egypt, ma dobu ana riwem kampa ma mae. ³ *Weka ma mae-gubai, tam maiteni ana mae ma ana viaiainim. Wei dobuna anatapuna tam ma am epaepaia ana veremi. Ma Abraham aiwai a parivainuaḡani ana kauai aubaimi. ⁴ Am epaepaia ana vimaḡai, ai maḡa me ubona au mara ma wei dobuna anatapuna tauu ana verei. Am epaepaia awariei dam anatapui au dobu ana viaiaini. ⁵ Abraham ponau i nonori ma au babani ma au viararamana ma au tarawatu i voteletelei, lamna aubaina wei ana kauai am epaepaia aubai.” ⁶ Anina ma Isaac au Gerar i mae.

28

Muriai Isaac i nae da au Beersheba i mae. Maranai tauna i magura kaua (ma matana i oaoa) natuna orotona keikeina Jacob, amana i morui tauna i viaiaini me tauna natuevou. Maranai tuana Esau wei i nonori, tauna amlona i ḡaiḡai kaua ma i ḡoi da Jacob ita viraḡeni.

Isaac, Jacob i paritawanei Laban awarina.

¹ Isaac Jacob i kwatuei, i viaiaini ma i riwei i pa, “Eḡa au Canaan awam ma vaia, ² wate ma vomairi ma ma nelaḡilagiina au Padan-Aram, ḡoḡam Bethuel ana au dam ma kampa avum Leban natunatuna waivinei e mamae, kampa awam ma vaia. ³ Ma God VIVIREWAPANA KAUKAUANA am tavine ina viaiaini ma ina viuaim ma natunatum ina vimaḡai ma tam dam borui ḡaeḡaei ina viamanem. ⁴ *Ma tam am epaepaia maiteni ina viaiainim me Abraham i viaiaini nanare, da dobu marina e mamae-gubai, God Abraham i verevereia tam ma vibuderi.”

Jacob ana rauboni au Bethel.

¹⁰ Jacob Beersheba i netawanei ma i nenaie au Haran. ¹¹ Madeḡa i neulai ma gabu au tagogi,* i ḡeta ma i rauvirai da i matave ma ḡaima tagogi i vaia ma i viunutanei. ¹² Ma i rauboni da tete i nanai, karena au dobu ma damona au mara ma God ana anela i ḡeḡae ma i ḡaiḡaira. ¹³ *Ma BADA, au

* 26:3: Gen 22:16-18 * 28:4: Gen 17:4-8 * 28:11: Gabu vivivireina. * 28:13: Gen 13:14-15

ririvana i maimairi ma i riwa i pa, “Tau BADA, Abraham ma Isaac ai God, dobu e matamatave lana tam ma am epaepaia ana veremi. ¹⁴ *Ma am dam ana vimaḡai da me doa pokauna ma ai parata ana viratai au lavaratei, rau-naḡei ma karuwabuei. Ma am epaepaia maiteni taumiei rava anatapai au dobu ana viaiaini. ¹⁵ Ma notai da tau au ririvam a mamae ma ana painim am au vaḡai. Ma ana neiana-meleiaim wei au dobuna. Eḡa ana voterem da aiwai a parivainuaḡanim ana kauēi.”

¹⁶ Jacob i matave vomairi ma i riwa i pa, “BADA anina weka e mamae ma tau eḡa ata aramaneil!” ¹⁷ Jacob i rovo kaua ma i riwa i pa, “Wei dobuna i vinirovorovo ḡaḡa! Wei anina God ana numa, Mara ana metaeta.”

¹⁸ Ubaubana i boiboḡi Jacob i vomairi ma ḡaima i viviunutaneia i vaia ma i vitura-mairini da ita vimataira. Ma Olive monamonana i buloi ḡaima au tepana da i vovivirei God aubaina. ¹⁹ Dobuna i ḡorei Bethel† (Melagaina au naona i ḡoreḡorei Luz).

²⁰ Ma Jacob, BADA awarina i parivainuaḡana, “Mepa da tam au ririvau ma mae ma ma inana vaiteteu au vaḡai, lam ma gara ma vereu. ²¹ Ma lawalawaiu ana nememei amau awarina, lamna maranaina Tam tau au God. ²² Ma wei matairana a tereterei, weka ana viborumem, Ma aiwai u verevereu ana ḡimai da ḡuta 10 ma ḡuta tagogi ana veremelem.”

35

BADA, Jacob i viaiaini

⁹ Jacob, Padan-Aramei* i nememei au Bethel. God i eḡa me Jacob awarina ma i viaiaini ¹⁰ ma i riwei i pa: “Tam wavam Jacob,

wate marina eḡa ina ḡorei Jacob
ma wavam vouna Israel.†”

Ma i viwawai Israel

¹¹ *ma i pa:

“Tau God VIVIREWAPANA KAUKAUANA

Ma vinatuna guratana ma ma vimaḡaimi

Am epaepaia ina virava-ḡaeḡaei ma dam borui ḡaeḡaei awarime i ina tupua ma gulagulau maḡamaḡai ina viamanei.

¹² Dobu, Abraham ma Isaac a verei,
marina tam ana verem

ma am epaepaia

muriai wei dobuna ana verei.”

¹³ Ma God i babani vorovei ma i netawanei. ¹⁴ *God weka Jacob awarina i babani lamna matairana Jacob gana i vimairini. Ma au tepana wine i waḡi ana pulo‡ ma Olive monamonana i buloi,§ ¹⁵ Weka God Jacob awarina i babani ma lamna aubaina wei gabuna i ḡorei Bethel.*

☆ **28:14:** Gen 12:3; 22:18 † **28:19:** Wavana Hebrewi anona God ana numa. * **35:9:** Padan-Aram Wei dobuna Aram au wapuna au Mesopotamia. Haran lamna melagai tagogi wei au dobuna. † **35:10:** Jacob anona amkwalakwalana. Israel anona God maiteni i viḡaiḡaiawa.

☆ **35:11:** Gen 17:4-8 ☆ **35:14:** Gen 28:18, 19 ‡ **35:14:** Wine i puloei pulo ḡelau maiteni. Jacob mataira i kauēi da tauna i verena-melei God awarina. § **35:14:** Jacob wei gabuna i vovivirei God viborumana aubaina. *

* **35:15:** Bethel anona God ana numa.

Rachel ana iragē

¹⁶ Muriai Jacob ana dam maiteni Bethel i voterei ma i vaḡai, ma tau i uama i rata da au Ephrath ita ḡeta. Ma Rachel malana i vaia da ina vinatuna ma vinatuna i voiana-guratei ma ana iniviara i rata kaua. ¹⁷ Ma i voivoia ma iniviara i rata ma tauvipipiavao i riwa, “Eḡa ma rovo! Tevera orotona ḡelauna i tupual!” ¹⁸ Wate Rachel i'rairagē ma ana lavutu au damona ma tevera i viwavai “Ben-Oni.”† Wate amana i viwavai, “Benjamin.”‡ ¹⁹ Ma Rachel i 'ragē ma eta e nenaē au Ephrath (marina wavana Bethlehem) au ririvana i doboi. ²⁰ Ma Jacob gana i vimairini Rachel ana kokoaga au tepana da i vimataira. Matairana amadodo e mamae.

Isaac ana i 'ragē

^{22b} Jacob natunatuna nelarai 12:

²³ Leah natunatuna:

Reuben; Jacob ana natuevou

Simeon, Levi, Judah, Isakar, ma Zebulun.

²⁴ Rachel natunatuna:

Joseph ma Benjamin.

²⁵ Billah - Rachel ana taunola wavine natunatuna:

Dan ma Naphtali.

²⁶ Zilpah - Leah ana taunola wavine natunatuna:

Gad ma Asher.

Wei lamna Jacob natunatuna anapui au Padan-Aram i ḡuni.

²⁷ *Ma Jacob i nememei amana Isaac awarina au Mamre au Kiriath-Arba;

marina e ḡoreḡorei Hebron. Abraham ma Isaac wariaga wei dobuna i mae-gubai. ²⁸ Isaac i mae da ana madeḡa 180 ²⁹ ma i magura kaua, i lavutu tawanana ma iragē ma amamana i votaḡoi. Natunatuna Esau ma Jacob amai i doboi.

37*Joseph, tuatua maiteni ai virarautua*

¹ Jacob ana dam maiteni kampa i mae, wariaga amana weka i mae, mai Canaan ai au dobu.

² Wei lamna Jacob natunatuna maiteni ai virarautua.

Joseph tauna laraga ana madeḡa 17. Tauna tuatua maiteni, amai awawana Billah ma Zilpah natunatui, amai ana sipu ma *gote* i paipaini. Wate Joseph tuatua ai kaua apoapoe ḡelau i vibenabenamei.

³ Jacob ana au magura Joseph i tupua ma lamna aubaina natuna nuanuana i vai-kauei, eḡa me natunatuna ḡelau nanare. Ma gara girugirumana, maiana ḡaeḡaena i kauei ma Joseph i verei. ⁴ Maranai tuatua i 'nanai da amai Joseph i ḡoana-guratei eḡa me tauī, ma ai ora-apoapoe ai tevera awarina i rata ma eḡa ita bababani kaua awarina.

† 35:18: Ben-Oni lamna anona au iniviara natuna. Lamna anona au ḡoana bo au tauagu ḡaeḡaena.

‡ 35:18: Benjamin lamna anona au oiena natuna. ☆ 35:27: Gen 13:18

⁵ Waguvara tagogi Joseph i rauboni ma maranai tuatuaana ana rauboni i riwei, tau i ora-apoapoe i virata-guratei. ⁶ Joseph i riwa, “Ona rautaniġana ma au rauboni ana riwemi. ⁷ Anataputa au wapu *witi* ta bawabawai. Ma tau au bawa au pouna i mairi ma taumi ami bawa i kwaviviroi ma i raudunelei!” ⁸ Ma tuatuaana i riwa, “Tam u notai da ma vibada bo? Ma tam ma vibadelai bo?” Ma Joseph ana babani ma ana rauboni aubaina tau amloi i ġaiġai guratana.

Joseph i gimarei

¹² Mara tagogi Joseph tuatuaana amai ana *sipu* ma *gote* i taravaini ma i naiei au Shekem ma kampa i paini. ¹³ Ma Israel (wavana ġelauna Jacob) Joseph i riwei i pa, “Tuatuaam au Shekem sipu ma gote e paipaini. A ġoem da ma nae tau awari.”

Joseph i vianina ma i riwa, “Anina ana nae.”

¹⁴ Amana i riwa i pa, “Ma nae tuatuaam ma ġamoġamo ma i ‘nanai, tau anina bo eġa, ma ma nememei da ma riweu.” Ma Joseph i paritawane. Hebron wapuna i netawane ma i nae.

Maranai au Shekem i ġeta, ¹⁵ ma kampa au wapu i kwavikwaviro ma oroto tagogi tauna i ‘nanai ma i riwei, “Aiwai e baibaiei?”

¹⁶ Joseph i paribelei, “Tau tuatuaa a baibaiei, tau ai sipu ma gote e paipaini. Uta riweu tau mepa?”

¹⁷ Tauna i paribelei i pa, “Tau i nae. A nonori i bababani i pa, “Tana nae au Dothan.”

Anina ma Joseph tuatuaana i votaġoi da au Dothan i nelaġai.

¹⁸ Maranai tuatuaana matai i tawane ma Joseph i ‘nanai i nenei ma i aramane i da tauna. Muriai da ita ġetai tau ai oga i tarai da tauna ita viraġeni. ¹⁹ Tau i babani vivira i pa, “Taurauboni e nenei. ²⁰ Ona nei tana vunui ma waira dogona paipairana au orana tana tawana ġairei. Ma tana riwa da ġamoġamo moduei tauna i viraġeni. Ma tana inana ana rauboni mena ina ġoa.”

²¹ Wate Reuben ai ogatara i nonori, ma i ġoei da ana tevera ita galaloei ma i riwa i pa, “Eġa ana lawana tana waitawane.” ²² “Eġa tana viraġeni. Tana tawana ġairei waira dogona paipairana au orana weka au mutulua ma eġa tupuana tana vodadani.” Reuben wenanare i babani aubaina i ġoei da ana tevera ita naiana-melei amana awarina.

²³ Maranai Joseph i ġeta tuatuaana awarii, tauna i vojijini ma ana gara girugirumana i ġiġi-tawane. ²⁴ Ma i vaia ma i tawana ġairei waira dogona au orana.

²⁵ Ma tau i kiala da i amam ma i taepai da dam mai Ishmael i ‘nanai au Gilead da i nenaie au Egypt. Tau ai gimara lam anitavidagial ma bunama *mur** au kamel i vigerui.

²⁶ Judah varevareina i riwei i pa, “Aiwai aiaina tana vaia mepa da ata tevera tana viraġeni ma tana moru. ²⁷ Ona nei ma tana gimarei dam mai Ishmael awarii ma eġa urataiei tarana ina toi, tauna ata tevera, tara tagogi.” Ma varevareina i vianina. ²⁸ ✨Ma maranai taugimara mai Midian† i ġetai, Joseph

* **37:25:** MurMyrrh. Wei dobuna ravai ai bunama ġabuabuna ma ana nola i maġa. ✨ **37:28:** Act 7:9 † **37:28:** Buka taugirumana dam wawai ruaga i terei, mai Ishmael ma Midian, wate mepa da tau dam tagogi.

tuatuana tauna dogoei i taina-epai ma i gimarei mai Ishmael awarii maiana silva 20 ana ruva nanare ma tau i naiei au Egypt.

²⁹ Muriai Reuben i nememei da au dogo i 'nana ġaira, ma Joseph kampa eġa ma i vinuabola kaua ma ana gara i sikai. ³⁰ Ma i nae me ana roaroa awari ma i riwa, "Ata tevera kampa eġa. Aiwai ana kauiei?"

³¹ Anina ma tau i gote i vunui ma au tarana ana gara i virai. ³² Ma ana gara i naiei amai awarina ma i riwei i pa, "Tauai wei garana a nelaġai. Ma inana wei natum ġarinei bo eġa?"

³³ Amai gara i 'nanai ma i riwa, "Anina wei tau natu ana gara. Ġamoġamo ġaġaiawai natui i vunui. Oo natu! Ġamoġamo natu i uta-sikasikai."

³⁴ Ma Jacob i vinuabola kaua ma ana gara i sikai. Ma ġamoġamo opina i oteni ma natuna i moguei da nawaravi biaġa i kwa. ³⁵ Ana numa ravai i nae awarina da ita vinuabai. Wate tauna vinuabai i geduaiei ma i riwa i pa, "Ana tou ma natu ana moguei da au dogo ina tereġaireu ma ana nae mepa natu i nenelana." Ma natuna i touei.

39

Potiphar awana, Joseph i rauoġarei

¹ Dam mai Ishmael Joseph i ġairei au Egypt, ma Potiphar tauna i gimarai da ana taunola. Potiphar tauna Egyptei ma sorodia ai bada ġaeġaena. ² *BADA Joseph i mae-ratui ma i voaġui da anapuna aiaina i kaukabei ana bada aubaina. Tauna Potiphar ana au numa i mae. ³ Potiphar i 'nanai da BADA Joseph i mae-ratui ma i voaġui da aiwai anapuna i kauana-kauiei, ⁴ ma wei Potiphar i vinuiaiiei ma Joseph i terei da tauna aubaina ina nola, ma ana taunola numa au orana, ma ana purapura anapuna ina vibadei. ⁵ Nai marana da i nenai, Joseph awarinei ma BADA Potiphar ana numa orana ravai ma ana purapura anapui au numa ma ana au wapu i viaiaini.

⁶ Anina ma Joseph vaivai i verei da Potiphar ana purapura anapui i paini, ma ana bada ana nola da am ava ina paipaini.

Joseph i tupua da karawata ma inanana aiaina. ⁷ Kampa eġa ita mae-pora ma ana bada awana Joseph i 'nana rauoġarei ma i riwei i pa, "Ma nei tana matave."

⁸ Wate Joseph i geduai ma wavine i riwei i pa, "Ma i 'nana, tau au bada weka i tereu da a vivipaipai ma lamna aubaina tauna eġa aiwai numa au orana ina vinuabolei. Tauna ana purapura anapuna au urau i terei. ⁹ Tau au rewapana wei au numana nanare tauna, ma eġa aiwai ita nuanei anina tam ainelam. Menanare da kaua apoapoena ana kauiei da God au matana au ġoa ina apoapoe." ¹⁰ Wavine marana patapatai Joseph i rarauelari da maiteni ita matave, wate Joseph i gedugeduai ma i nene-tawanei.

¹¹ Mara tagogi Joseph i nae au numa da ita nola, ma kampa eġa taunola ġelau. ¹² Ma Potiphar awana i nae ma Joseph ana au kareko i voa ma i riwa i pa, "Ma nei tana matave!" Wate Joseph i ruba-opu au doa ma kareko wavine au urana i voterei.

¹³ Wavine i 'nanai da Joseph i ruba-opu ma ana gara au urana i voterei, ¹⁴ ma wavine ana taunola i kwatuei da i nei ma i riwa i pa, "Weka ona inanal Wei Hebroweina awau i neiai awarita, i vinameta. I nei awariu ma i goei da ita viawawaneu wate tau garara a vikarei. ¹⁵ Ma i nonori a garagarara ma i ruba-opu ma ana kareko i ruba-tawanei."

¹⁶ Ma wavine kareko i paini da awana i nememei au numa. ¹⁷ Ma wavine riwana tagogina awana i riwei i pa, "Wei Hebroweina tam u neiai awarita, i vinameta. I nei ma i goei da ita viawawaneu. ¹⁸ Wate maranaina a garagarara, tauna i ruba-opu ma ana kareko au rivivau i voterei."

¹⁹ Potiphar awana ana babana i nonori ma amlona i gāiḡai kaua. ²⁰ Anina ma tauna Joseph i vaia ma panipani au numana i tawana-ruiei, mepa gulau ana panipani e mamae ma kampa i mae.

Maranai Joseph au panipani-numana ²¹ ✧BADA Joseph i mae-ratui ma i viaiaini, lamna aubaina da panipani taupainina Joseph i vinuiaiāiei. ²² Ma tauna Joseph i terei da panipani ravai ita vibadei ma nola au urana i terei. ²³ Panipani taupainina ana nuabola eḡa aiwai, aubaina Joseph aiwai anatapuna i paipaini. Ma BADA tauna i mae-ratui ma i voagui da aiwai anatapuna i kauana-kauei.

40

Joseph, tau i ai rauboni anoi i vieḡei.

¹ Ma mara tagogi Pharaoh * ana *wine* taupainina ma palawa tauapuina babadai, i kauana-boai Pharaoh awarina. ² Pharaoh amlona i gāiḡai babadai ruaḡai awari. ³ Ma i vaia ma panipani au numana i terei mepa Joseph i mamae lana, sorodia ai bada ana au numa. ⁴ Sorodia ai bada wei ruaḡai i naiei Joseph awarina ma tauna ravai i paini. Tau i mae-guratana au panipani numana.

⁵ Waguvara tagogi babadai ruaḡai panipani au numana i rauboni. Ma ai rauboni anoi taputapunei ava.

⁶ Ma ubaubanai maranai Joseph i nei awari ma i 'nanai da tau i eḡa ita vinuiai. ⁷ Ma ruaḡai i paridadanei, "Aiwai aubaina naomi i peu?"

⁸ Tau i paribelei, "Tauai airuaḡa a rauboni ma eḡa aiāi da ai rauboni anona ita vieḡelai."

Joseph i riwa, "God ainelana rauboni e vieḡai. Ami rauboni ona riweu."

⁹ Anina ma *wine* taupainina ana rauboni Joseph i riwei, "Au rauboni au orana grape ḡoroḡorovana a inana i au naou. ¹⁰ Ma ḡoroḡorovana raḡaraḡana tonuḡa. Ma i raurugu ma i talai ma anona tapina i magura. ¹¹ Pharaoh ana aniuma kelakana a vovojijini ma grape a purai ma au kelaka a buloi da Pharaoh a veri."

¹² Ma Joseph tauna i riwei, "Am rauboni anona wei. Grape raḡaraḡana tonuḡa, anona lamna au pom tonuḡa. ¹³ Au pom tonuḡa au murina, Pharaoh ina tere-opunem ma am au nola ina tere-melem. Ma tam, Pharaoh ana aniuma kelakana au urana ina tere-melei, me au noana nanare. ¹⁴ Wate maranai wei gabuna u opu-tawanei ma aiwai anatapuna ina ai-me. Tau ma notaiu, am i viaiai ma kauei da au nuabola Pharaoh ma parivere i da panipani-numanei ina tere-opuneu. ¹⁵ Pharaoh ma riwei aiwai awariu i tupua. Mai Hebrew ai au

✧ 39:21: Act 7:9 * 40:1: Mai Egypt ai wavalatona i ḡorei Pharaoh. Wei lamna ana vaivai ma eḡa wavana.

dobu i daneneu ma weka i nei'aiu, wate tau eġa aiwai ata kauana-boai ma weka au dogo i tawaneu."

¹⁶ Ma palawa tauapuina i 'nanai da Joseph nuai'ai riwana i vieġai ma i riwa, "Tau nanare a rauboni. Palawa irigana tonuġa au kolau a terei. ¹⁷ Iriga au tepana, lamna palawa apuapunana tapuna ma tapuna Pharaoh aubaina, wate kiu i nei ma au kolau, au iriga palawa i amam."

¹⁸ Joseph i paribelei i pa, "Am rauboni anona wei. Iriga tonuġa lamna au pom tonuġa. ¹⁹ Aupom au vitonuina, Pharaoh panipani-numanei ina tere-opunem da uam ina borituini ma tupuam ai au tepana ina vitakei ma kiu ina nei ma vioam ina ani."

²⁰ Ma au pom au vitonuina, lamna Pharaoh ana tupua marana ma torela ġaeġaena i kauai, ana gabemani babadai aubaii. Ma ana *wine* taupainina ma palawa tauapuina panipani-numanei i tere-opunei ma i nei'ai Pharaoh awarina, ana gabemani babadai au matai. ²¹ Ana *wine* taupainina, ana au nola i tere-melei me au naona nanare. Ma tauna, Pharaoh ana aniuma kelakana au urana i tere-melei. ²² Wate ana sorodia i egari da ana palawa tauapuina uana i borituini ma tupana ai au tepana i vitakei. Joseph menanare rauboni i vivieġanei, nanare i tupua.

²³ Wate *wine* taupainina, Joseph nuanuana i vuru ma eġa ita vinua-notenotei.

41

Pharaoh ana rauboni

¹ Ma madegħa ruaġa i kwa, ma Pharaoh i rauboni da tauna waira Nile au adana i maimairi. ² Ma bulumakau 7 aiiai ma dododoi wairei i ġeta ma waira au adana gidagida i amam. ³ Ma bulumakau 7 apoapoei ma kirakiramai wairei i ġetai da bulumakau aiiai au ririvai i raumairiei waira au adana. ⁴ Bulumakau 7 apoapoei ma kirakiramai i vomairi da bulumakau 7 aiiai ma dododoi i lawana-pai. Anina, ma Pharaoh matana i kala.

⁵ Ma i matave me ma mara viruaina i rauboni da *witi* aina tagogi ma rovei 7 aiiai ma dododoi i 'nanai. ⁶ Anina ma *witi* rovei 7 muriai i gogogo wate rauanaġa i ravi da i jinajina. ⁷ Ma *witi* rovei jinajinai 7 i vomairi da *witi* rovei dododoi 7 i lawani. Anina ma Pharaoh matana i kala ma i aramanei da i rauboni.

⁸ Ubaubanai Pharaoh nuanuana i bolai ma riwa i paritawanei da rauboni tauvieġai ma nuaulaulai anatapui au Egypt i nei. Ma ana rauboni i riwei ma eġa aiiai ravana da ana rauboni anona ita vieġei.

⁹ Ma *wine* taupainina Pharaoh i riwei, "Amadodo ana rupena da tau a kauana-boai. ¹⁰ Mara tagogi tam amlom i ġaiġai palawa tauapuina ma tau awariu, da u paniai ma sorodia ai bada ana au numa a mae. ¹¹ Ma waguvara tagogi tauai tagotagogi ava a rauboni ma ai rauboni anoi taputapunei ava. ¹² Laraga Hebrewei kampa tauai maiteni, tauna sorodia ai bada ana taunola. Ai rauboni a riwei ma tauna ai rauboni anona i vieġelai ¹³ Ma tauna aiwai i ririweia nanarena i tupua. Tau u tere-meleu au au nola ma palawa tauapuina u viraġeni."

¹⁴ Ma Pharaoh, Joseph ana riwa i paritawanei ma panipani-numanei laġilaġina i nei'ai. Joseph i viamġari ma ana gara aiaina i oteni. Ma i naiei Pharaoh awarina.

15 Ma Pharaoh Joseph i riwei, “Waguvarai a rauboni ma eġa ai ai au rauboni anona ita vieġe. Wate rava i riwa da maranai tam rauboni e nononori, lamna anona e vivieġai.”

16 Joseph i paribelana, “Tau eġa tagotagogina, wate God am rauboni anona ina verem da oram ina viubai.”

25 Joseph i paribelei, i pa, “Oo bada, rauboni ruaġai anoi tagogina. God aburuna ava da aiwai ina kauei lamna gulau i viatataiei. 26 Bulumakau dododoi 7, ma witi rovei ai ai 7, lamna maura madeġana 7. 27 Bulumakau kirakiramai 7 muriai i nei, ma witi rovei jinajinai 7, lamna anona amapo madeġana 7 au orana gomara.

28 —Aiwai a ririweia, nanare ina tupua. God i viatataiem da aiwai ina kauei. 29 Madeġa 7 au orana, lamna maura ġaeġaena Egypt au anatapuna. 30 Wate au murina, gomara ġaeġaena ina mae da madeġa 7 da Egypt ana maura marana rava nuanuai ina vuru ma gomara rava ina vipupui. 31 Gomara ina rata kaua da maura marana nuanuata ina vuru. 32 God i vianina da wei ina tupua ma eġa barana ina uama, lamna aubaina rauboni ruaġa i verei.

33 —Au bada, tam, oroto nuaulaulana ma notanotana uta vinei da Egypt ita vibadei. 34 Wei uta kauei, babada uta terei Egypt au anatapuna da tuaruta au marana ġuta vi-five-na ita vaia madeġa 7 maura au marana. 35 Ma rewapana ma verei da au maura, tau lam ina tami da au anara ina vidamni ma ina paini. 36 Wei lamii ina tereriei rava aubaii maranai madeġa 7 gomara au Egypt ina nei. Ma wei taunei, mai Egypt eġa am ina iraġe.”

37 Anina, ma Pharaoh ana gabemani maiteni oga-tarana i vianinei. 38 Ma i riwei i pa, “Mepa rava ġelauna tana nelaġai me Joseph ma God Aruana tauna au orana e mamae?”

39 Anina ma Pharaoh, Joseph i riwei, “God wei anatapuna i viatataiem, eġa ai ai ġelauna nuaulaulana ma notanota kauana me tam. 40 ✧ Tam ana terem da au dobu ma vibadei ma au rava anatapui am riwa ina voteletelei. Tau Pharaoh, ma am rewapana tau ainelau au rewapana eġa ina ġetawanei.”

41 Ma Pharaoh i riwa, “Marina tau a vinem da Egypt anatapuna ma vibadei.” 42 Ma Pharaoh au urana ana vigulau *ringna* i votawanei ma Joseph au urana i terei,* ma gara maiana ġaeġaena i vioteni ma sein goldei au uana i tere-taġonei.

45 Ma Pharaoh Joseph wava Zaphenath-Paneah,† i verei ma mai On ai pirisi Potiphera ‡ natuna guguinina Asenath, Joseph i verei da awana. Anina ma Joseph, dobu Egypt i vibadei.

46 Joseph ana madeġa 30 ma wei vibadana i vaia. Ma Joseph, Pharaoh i netawanei ma Egypt i naeni ma i tuvirevirei. 47 Maura ġaeġaena i nelaġai madeġa 7 au orana. 48 Joseph ai maura ġelau i tami maura madeġana 7 au orana au Egypt, ma au melagai nununai i tere-kauei ma i paini. Melagai anatapui ai lam au anara i terei. 49 Joseph lam i vidamni da olana i mairi me bubu au gera ma iavana i kauana-avei aubaina lam i rata dewadewa.

✧ 41:40: Act 7:10 * 41:42: Mataira da Joseph, Pharaoh ana rewapanei ma ana riwei i nolanela.

† 41:45: Safenat-panea Egypt ai ponei anona God i bababani ma i lawana. ‡ 41:45: On Wei lamna dobu wavana, ma wavana ġelauna lamna Heliopolis. Wei au dobuna rava, madeġa i raudunelei.

⁵³ Ma maura madeġana 7 au Egypt au damona i ġeta. ⁵⁴ ✧Ma gomara madeġana 7 i raukarei, me Joseph i ririweia nanare. Gomara dobu au anatapuna, wate Egypt au anatapuna lam i mamae. ⁵⁵ Maranai mai Egypt raumolaġau i vikarei, tau Pharaoh i vibaġai lam aubaina. Ma tau i riwei da ita nae Joseph awarina ma tauna aiwai i ririweia ita kauē.

⁵⁶⁻⁵⁷ Maranai gomara Egypt anatapuna i vaia, Joseph anara i votawatawanei ma lam mai Egypt awari i ġimarei. Anina ma gomara i rata kaua dobu au anatapuna da rava anatapui i nei Joseph awarina au Egypt lam ġimarana aubaina.

42

Jacob, natunatuna i paritawane i au Egypt

¹ Ma au Canaan Jacob i nonori da au Egypt lam ma natunatuna nelarai i riwei, "Aiwaina da o mamae labalababa? ² ✧Anina ona rautaniġana! A nonori da lam au Egypt. Ona ġaira kampa ma aubaita lam ona ġimarai da tana lawana ma eġa tana iraġe."

³ Anina ma Joseph varevareina ten i ġaira au Egypt da lam ita ġimarai. ⁴ Wate Jacob eġa Joseph ana tevera oiena Benjamin ita paritawane i aubaina i rovo mepa da aiwai apoapoena awarina ita tupua. ⁵ Tau i rava ġelau i maiteni i nae au Egypt da lam ita ġimarai aubaina gomara ġaēġaena dobu Canaan maiteni i vaia.

⁶ Joseph i vibada ġaēġaena au Egypt ma tauna lam i ġimagimarei dobu anatapui rava i awari. Varevareina i ġetai ma Joseph au naona i mae-ġaira au doa ma i raudune. ⁷ Joseph tau i 'nanai ma maratagogi i aramane i da tau aiavo i ma i kauana-melei da apamina tau eġa ita aramane. Ma riwa bagibaginei i vitara-virevirei, "Taumi meiei o nei?"

Tau i paribelei, "Tauai Canaan i a nei da lam ata ġimarai."

⁸ Joseph tuatwana i 'nanai da i aramane, wate tau ai tevera i vinua-nainei. ⁹ ✧Ma ana rauboni wariġana i notai ma i riwei, "Taumi i paritawanemi da ai dobu ana ġokokokara ota inana i bo."

¹⁰ Tau i paribelei, "Oo bada eġa! Tauai am laralaraga a nei da lam ana ġimarai."

²¹ Ma tau i babani vivira, "Nai maranaina ata tevera ana ora-viarana agu i toutouei awarita ma, eġa tata rau-nu'apoapoelei. Tauta ata wavu lamna kovoġana marina ta vaivaia."

²² ✧Reuben i paribelei, "Nai maranaina a riwemi, 'Eġa ata tevera ona vodadani!' Wate taumi eġa ota rautaniġaneu. Marina ata tevera tarana kovoġana ta vaivaia." ²³ Joseph Egypt ponane i i bababani ma rava ġelauna tau ai ponei i paripari-verei. Wate tau eġa ita aramane i da Joseph ai babani i nononori.

45

Joseph i vieġana-melei

4 Joseph varevareina i riwei, “Ona nei au geregereu.” Ma tau i nei au geregerena. Ma i babani, i pa, “Tau ami tevera Joseph, mai Egypt awari o gimareu. 5 Wate ega orami ina bolai, ma ega ami rava maiteni tau o gimareu aubaina ona viamparihari. Wate God au naona i paritawaneu da rava ata vilawani. 6 Wei gomarana dobu e viviapoapoeni marina madega ruaiga i kwa. Wate madega five gelauna e mamae da ega tana ipi bo tana tuaruta. 7 God i aipari-tawaneu da taumi ma ami dam ravai maiteni ata vilawanimi, ma ami dam avena ita pupu. 8 Ma ega taumi weka ota paritawaneu wate God, ma tauna i tereu da Pharaoh ana taunola ai bada gaegaena ma ana numa ma aiwai anatapuna au Egypt a vivibadei. 9 *Marina laquila ona nae me amau awarina ma ona riwei, ‘Natum Joseph wenanare i riwa, God i tereu da Egypt anatapuna a vivibadei, ma tam laquila ma gairai awariu. 10 Tam au gegereu ma mae au Goshen; ma nanare natunatum ma googoga ma am gamogamo ma aiwai anatapuna garimei. 11 Gomara madegana five amapo e mamae, aubaina tau lam ana verem. Mepa da wei ega ana kauai tam ma am dam ma am laraga ma am gamogamo anatapui ina vinuapoapoe ma ina raumolagau.”

25 Anina ma Joseph tuatuna Egypt i opu-tawanei ma i nae me amai Jacob awarina au Canaan. 26 Ma tau Jacob i riwei, “Natum Joseph lawalawaina e mamae, ma tauna marina Egypt e vivibadei.” Jacob i vinuanaina ma nai babani ega ita vitumageai.

27 Wate tau aiwai anatapuna Joseph i ririweia amai i parivere. Ma Joseph ana anigeru i paritawanei da Jacob ita vigeru da ita naiei au Egypt. Maranai wei i ‘nanai, Jacob ana nota i nememe. 28 I pa, “Tau marina a aramanei da natu lawalawaina e mamae, ma ana nae da ana inanai ma muriai da ana ira.”

46

Jacob, natunatuna ma googoga maiteni i nae au Egypt.

1 Anina ma Jacob garinei anatapuna maiteni i nae au Egypt. Ma au Beersheba i geta, ma kampa pulo i apui amana Isaac ana God awarina. 2 Ma waguvarai God rauboniei awarina i babani i pa, “Jacob! Jacob!”

Ma tauna i paribei, “Tau weka.”

3 God i riwa, “Tau God, amam ana God. Egypt gairana ega ma rovoei, aubaina tau am epaepaia ai dam boruna ana vimagai kampa. 4 Tau maiteni tana nae au Egypt ma am epaepaia ana neiana-meleiai wei au dobuna. Joseph amapo au ririvam, maranai ma ira.”

5 Jacob, Beersheba i voterei, ma natunatuna nelarai amai i vojijini, ma anatapui awawai ma natunatui maiteni, au anivigeru Pharaoh i paripari-tawaneiana i geru. 6-7 *Ai gamogamo ma gariei anatapuna au Canaan i vaivainia i naiei au Egypt. Anina ma Jacob, natunatuna nelarai ma waivinei ma googoga ma ana numa ravai anatapui i nae au Egypt.

28 Jacob Judah i aiparitawanei au Egypt da Joseph ita riwei da au Goshen ita nebelei. Maranai i geta. 29 Joseph ana chariot i gerui ma i nae au Goshen.

Maranai amana i nebelei, i taragwabai ma i tou guratana. ³⁰ Jacob Joseph i riwei, “Naom a inana ma a aramanei da tam lawalawaim, marina ana nuaubau ana iraḡe.”

48

Jacob, Ephraim ma Manasseh i viaiaini

¹ Wei kauai au murina, rava Joseph i riwei, “Amam i doria.” Anina ma natunatuna Manasseh ma Ephraim i taravaini ma i nae amana da ita inana.

² Rava tagogi Jacob i riwei, “Natum Joseph i ḡetai da ina inanaim.” Jacob doridoriana ma i voguratei da i vomairi ma ana animatave au tepanai i kiala.

³ ☆ Anina ma Jacob natuna Joseph i riwei, “God VIVIREWAPANA KAUKAUANA awariu i eḡa au Luz (Bethel) au Canaan ma i viaiainiu. ⁴ Ma i riweu, ‘Natunatum ana vimaḡai ma am epaepaia ai dam ana viratai; wei dobuna am epaepaia ana verei da ina viḡariana-nonoei.’

⁵ –Ma lamna aubaina ḡoḡoḡau ruaḡa Manasseh ma Ephraim au Egypt tuputupuai muriai da a nei; lamna tau ana vaia da natunatu me natunatu Reuben ma Simeon. ⁶ Roaropa muriai e tuputupua lamna tam ḡarime; ma ai buderi Ephraim ma Manasseh awariei ina vaia.”

¹³ Anina ma Joseph natunatuna ruaḡa i neiai Jacob awarina, Ephraim amana au oiena lamna Jacob au kelakelauna ma Manasseh amana au kelakelauna lamna Jacob au oiena ¹⁴ Wate Jacob uraoiena i tere-taḡonei ma Ephraim au kolana i terei avena da tauna umau, ma ura-kelakelauna i tere-taḡonei da Manasseh au kolana i terei avena da tauna natuevou. * ¹⁵ Anina ma Joseph† i viaiaini i pa,

“God. Tam Amau Isaac ma ḡoḡau Abraham ai God, God taupainiu au lawana au anatapuna,

¹⁶ Ma am anela taugaloeu au anatapuna wei roaroi ma viaiaini!

Ma wavau ma amamau wavai awarii ina mae-nonoa ma a raraupari da ai dam ma viratai au dobu.”

¹⁷ Wate maranai Joseph i ’nanai da amana aiwai i kaukauei ma tauna eḡa ita vinuai; ma amana urana Ephraim au kolana ita vaitawane ma Manasseh au kolana ita terei. ¹⁸ Joseph amana i riwei, “Amau eḡa nanare. Wei tauna natuevou uraoiem au kolana ma terei.”

¹⁹ Wate Amana i riwa, “Natu! Tau a aramanei aiwai a kaukauei. Manasseh maiteni ana dam ina rata kaua. Wate ana tevera wavana ina rata ma ana dam ina rata dewadewa eḡa me tuana.” ²⁰ Anina ma Jacob roarora nai marana i viaiaini i pa,

“Mai Israel wavam ina latoni maranai e viviaiana, tau i riwa,

“Tauai a raraupari da God ina viaiainim me Ephraim ma Manasseh i viaiaini nanare.”

☆ 48:3: Gen 28:13-14 * 48:14: Tau i nota da au oiena kialana lamna kaua bo nota ḡaeḡaena ma eḡa me au kelakelauna kialana nanare. Lamna aubaina Jacob nimana au oiena tevera au kolana i tereterei tauna amapo viaiaina ḡaeḡaena ina vaia eḡa me ḡelauna nanare. Lamna aubaina Joseph i baiei maranai Jacob nimana au oiena tevera umauna au kolana i terei. † 48:15: Maranai Jacob ḡoḡoḡana i viaiaini, tauna Joseph i viaiaini.

Wenanare lamna Ephraim wavana i ailatoni ma muriai Manasseh wavana.

²¹ Ma Israel, Joseph i riwei, “Tau aburuna ava da ana iraḡe. Wate God awarim ina mae da ina naiana-melem au Canaan, amamam ai au dobu.”

49

Jacob, Judah i viaiaini

⁸ “Judah, varevareim ina voepaepaim,
ma amam natunatuna ina raudunelem
aubaina tam am ḡavia au uai ma voa ma ma vovaiubai.

⁹ Judah natu, tam me lion natuna,
ana sia i am vorovei da i amruruna ma e matamatave,
eḡa ai ai ana matave ina viapoapoeni!

¹⁰ Gulau ana jiḡona Judah ina vojijini
ma ana epaepaia ina vibada nonoa,
anina da jiḡona taniwagana ina nei
maranaina dobu anatapui ravai tauna ina raudunelei ma ina viborumei.”

³³ ✧ Ma Jacob natunatuna awarii i babani vorovei, ma tauna ana au animatave i rauvirai ma i raḡe.

50

Joseph, tuatuaana i vinuaubai

¹⁵ Ma maranai Jacob i raḡe, Joseph tuatuaana i rovo ma i riwa, “Mepa da Joseph amlona ina ḡaiḡai ma ina raubiwa, kua apoapoena awarina ta kau ei aubaina.” ¹⁶ Ma lamna aubaina riwa i paritawanei Joseph awarina i pa, “Amata maeninai ma wenanare i riwelai i pa, ¹⁷ Joseph wenanare ona riwei, “Tuatuaam kua apoapoe kaukauana awarim i kau ei. Wate a ḡoei da ai kua apoapoe ma nota-tawanei.” “Tauai amam ana God a vovoepeapai, ma a vivibaḡa-guratem da ai ḡo’apoapoe ma nota-tawanei.” Maranai Joseph wei riwana i nonori tauna orana i viara kua ma i tou.

¹⁸ Anina ma tuatuaana i nei ma au naona i mae-peu ma i riwa, “Ma inanaiai tauai am taunola a nei.”

¹⁹ Wate Joseph tau i wenanare i riwei, “Tau eḡa ona rovoeu, tau eḡa God da ana kovoḡimi. ²⁰ Wariḡa o ḡoei da ota viapoapoeniu wate God i virai da aiaina i kau ei da rava maḡamaḡai ina vilawani ma eḡa ina pupu. ²¹ Anina, eḡa ona rovo! Tau ana painimi, natunatumi maiteni.” Ma nanare i babani da orai i rau ei.

Exodus Oputawanana

Jacob dam gaeḡaena i vitupui au Egypt

¹ Jacob natunatuna ana awawai ma natunatui anapui maiteni i ḡaira au Egypt. Taui wavai wenanare: ² Reuben, Simeon, Levi, Judah; ³ Isakar, Zebulun ma Benjamin; ⁴ Dan, Naphtali, Gad ma Asher. ⁵ Jacob natunatuna ma ḡoḡoḡana nelarai, anapui ai maḡa 70 i ḡaira, Joseph au Egypt maemaena maiteni i 'avi.

⁶ Muriai Joseph ma varevareina ma nai kimtana i 'raḡe-pai, ⁷ *Wate ai epaepaia - mai Israel, i vinatuna guratana da dam ḡaeḡaena i vitupui ma Egypt anapuna i vioai.

Pharaoh mai Israel i rau-iviapoapelei

⁸ *Madēḡa maḡamaḡau i murina Pharaoh vouna i vibada au Egypt, ma Joseph ma aiwai i kauēi eḡa ita aramanei. ⁹ Pharaoh ana rava i riwei, "Ona inana, mai Israel i maḡa guratana ma i virewapana kaua eḡa me tauta. ¹⁰ *Tauta tana viogata da menanare tana kauanei da ai vinatuna eḡa ina rata guratana. Ma mēpa da wei eḡa tana kauēi ma maranai ḡavia ina nei, ma taui ḡavia maiteni ina vitagogiei da ina viḡavieta, ma ina opu-tawaneta."

¹¹ Ma nola babadai i terei da mai Israel nolei i vunuvunui. Wei babadai mai Israel i egari da taon ḡaeḡae ruāḡa i voai wavai Pithom ma Rameses, ma kampa Pharaoh ana lam ma purapura ḡelau i vidamni. ¹² Mai Egypt amapo da taui i rau-iviapoapelei, wate mai Israel amapo da i vivinatuna ma ai dam i rarata au Egypt. Ma lamna aubaina mai Egypt mai Israel i rovoei. ¹³⁻¹⁴ Ma taui mai Israel i egari da nola vivitaina i kaukauei ma i vinuapoapoe. Ma brik i kaukauei ma doa i gwadai da brik anipasina, ma wapu nolai maiteni i kaukauei. Mai Egypt nolei mai Israel i vunuvunui ma eḡa ita rau-nuapoapelei.

²² *Pharaoh ana rava i riwei, "Maranai wavine Hebrewei tevera orotona i ḡuni, teverana au waira Nile ona tawanei. Wate maranai tevera wavinena i tupua, ona voterei da ina mae."

2

Moses i tupua

¹ Maranai wei kauai i tuputupua, oroto tagogi Levi ana damei ma wavine ana damei i ravaḡi, ² *wavine i raumanawa ma natuna orotona i ḡuni. Ma wavine i 'nanai da natuna inanana aiaina i tupua, ma natuna i tere-govaḡi da nawaravi tonuḡa i kwa. ³ Wate eḡa tagotagogina da ita teregovaḡa-nonoēi ma iriga waira modunei* voavoana i vaia ma koltei gavogavo i pasi-tomeni da waira eḡa ina rui. Ma tevera au iriga i poai ma waira modui au orai i terei au waira Nile. ⁴ Tevera tuana wavinena aueia i mae ma ana tevera i vineneḡaneia da ita inana awarina aiwai ita tupua.

* 1:7: Act 7:17 * 1:8: Act 7:18 * 1:10: Act 7:19 * 1:22: Act 7:19 * 2:2: Act 7:20 * 2:3: Papyrus

⁵ Ma Pharaoh natuna gugunina i ġairai da ita toa. Ma ana taunola waivinei waira au adana i bababara-nae. Pharaoh natuna iriga i 'nanai modu au orana ma ana taunola i paritawanei da irigana ita neiai. ⁶ Maranai Pharaoh natuna iriga i votawanei ma tevera i toutou i 'nanai, nuanuana i bolai ma i riwa, "Wei mai Hebrew natui."

⁷ Tevera tuana wavinena i nae ma Pharaoh natuna i vibaġgai, "Anina bo eġa da ana nae ma tataovao Hebrew ana baiei da tevera ina viġuġui ma ina ġamoi?"

⁸ Wavine i vianina ma i riwa, "Anina, ma nael!" Ma tevera i nae ma alo oina i taravainiai. ⁹ Ma Pharaoh natuna wavinena i riwei, "Wei teverana ma viġuġui aubaiu ma ana vimaieiem." Ma wavine teverana i naiei ana au numa ma i ġamoi.

¹⁰ *Ma tevera i eda ma i naiei Pharaoh natuna awarina ma tauna i vaini da natuna. Ma Pharaoh natuna i riwa, "Au waira a sinaepai." Lamna aubaina ana viwavai Moses.[†]

Moses ana rovona Egypt i ruba-tawanei.

¹¹ *Maranai Moses i vilaraga, ma i nae da ana rava oina ita raugenari, ma i 'nanai menanare mai Egypt ana rava i egari da i nolanola ma i rau-iviapoapoelei, ma i 'nanai Egyptei Hebrew i vunuvunui. ¹² Moses i 'nana viravira ma eġa aiai ita inana, anina ma Egyptei i viragēni ma au bubu i doboi.

¹³ Ma marana i tom Moses i naeme, da ana rava ruaġa i viġaġgaiawa i 'nanai ma ġaiawa tauvikareina i riwei, "Aiwai aubaina turam Hebrew e raviravi?"

¹⁴ Ma orotona i riwa, "Aiai i terem da ma vibelalai bo ma rauetaralai? Tam ma viragēniu me Egyptei u viragēni nanare bo?" Kampa Moses i rovo ma i riwa, "Rava boibogi i aramanei tau aiwai a kauel." ¹⁵ *Pharaoh wei riwana i nonori ma i ġoei da menanare Moses ina viragēnanei, wate Moses Egypt i ruba-tawanei ma i nae au Midian ma waira dogona au adana i kiala.

3

Moses kampa mai Midian ai pirisi pulo tauapuna maiteni i mae, ma natuna Zippora i ravagi.

God Moses awarina i babani

¹ Moses poiana Jethro ana sipu ma gote i ġamoġamoi - Jethro lamna mai Midian ai pirisi pulo tauapuna. Mara tagogi Moses ġamoġamo i naiei au mutlua au ġia dewadewana ma au Sinai i ġeta, God ana au ola. ² *Kampa BADA ana anela Moses awarina i eġa, inanana me ai menamenana, ai rugurugui au orana da i ġeġae. Moses ai i lebalebara i 'nanai wate aina ruguruguna maiteni eġa ita ararai. ³ Moses i vinua-notanota, "Wei lamna aiwai? Aiwai aubaina ai e lebalebara wate ai eġa ita ararai? Ana nae au ġereġerena ma ana tuvirevirei."

⁴ Maranai BADA i 'nanai da Moses i nenei au ġereġere da ita tuvirevirei, God ai menamenana au orana Moses i ġorei, "Moses! Moses!"

Ma i paribelei, "Ee, Tau weka."

⁵ BADA i riwa, "Eġa ma neguratanai. Wei gabuna au tepana e maimairi lamna doa vivivireina, lamna aubaina am ae uma ma votawanei. ⁶ Tau amamam Abraham ma Isaac ma Jacob ai God." Maranai Moses wei babanina i nonori i rovo kaua ma naona i tere-ġovaġi da avena God naona ita inana.

* 2:10: Act 7:21 † 2:10: Moses Au Hebrew ponana ana nonora me sinaepai. * 2:11: Act 7:23-28 * 2:15: Act 7:29 * 3:2: Act 7:30-34

⁷ Anina ma BADA i riwa, “A inanai menanare mai Egypt natunatu e rarau-iviapoapelei. Ma ai tou agu aubaina i ġetai awariu da vidadabadai awarii ata vaitawanei. Menanare e vinua-apoapoenei a aramanei. ⁸ Lamna aubaina a ġairai da natunatu Egypt awari ana vaitawanei ma ana opunei da dobu wapuna ġaēgaena ma doana maumaurana ina maeni. Kampa marina mai Canaan, mai Hitti, mai Amori, mai Perisi, mai Hivi ma mai Jebus e mamea. ⁹ Ai tou a nonori. A inanai menanare mai Egypt tau i rarau-iviapoapelei. ¹⁰ Tau a paripari-tawanem, marina ma nae vidadabadana Pharaoh awarina da mai Israel au Egypt ma taravaina-opunei.”

¹¹ Wate Moses i riwa, “Tau aiai da ata nae Pharaoh awarina ma mai Israel ata taravaina-opunei?”

¹² Ma God i paribelei, “Tau tam maiteni ana mae. Maranai ravai Egyptei ma taravaina-opunei. Taumi wei au olana ona rauduneleu. Lamna ina vimataira da Tau a pari-tawanem.”

¹³ Wate Moses i riwa, “Maranai ana nae au rava awarii ma ana riwei, ‘Amamata ai God i paritawaneu awarimi.’ Ma tau i paridadaneu, ‘Tauna wavana aiai?’ Ma aiwai ana riwei?”

¹⁴ God Moses i riwei, “TAU MAEMAE-NONOAU.* Wei mai Israel ma riwei, Tauna wavana, TAU MAEMAE NONOAU. i paritawaneu awarimi. ¹⁵ Mai Israel ma riwei, ‘TAU BADA, amamami ai God, Abraham, Isaac ma Jacob ai God, tauna i paritawaneu awarimi.’

–Wei Tau wavau Maemae-Nonoana, kimta anatapui wenanare wavau ina ġorei.”

Wei au murina Moses i naeme poiana ana au dobu, ma i nae au Egypt. Ma kaula anatapui i tuputupua tuana Aaron ma Israel babadai i riwei. Ma Moses ma Aaron i nae Pharaoh awarina ma i riwei, “BADA i paritawaneiai awarim da ata riwem da natunatuna mai Israel ma vianinei da ina opu au mutulua da pulo ina apui tauna awarina.”

Egypt gulauna i riwa, “Tau eġa ana vianinei da nanare ina kauwei. Tau i eġa aiwai ġelauna ina kauwei ma ina nola.”

Ma God kaula maġamaġauna aniba ma vi'nirovorovoi i kaukauei mai Egypt awarii, wate Egypt ai gulau amapo da i viviġa. Waira i vitara wate amapo da Egypt ai gulau kolana i vobagibagi. Mai Egypt ai ġamogamo i vi'rairagelana ma mai Egypt tupuai paramaitua i oai, Wate amapo da mai Egypt ai gulau eġa mai Israel ita voterei da ita nae.

11

Moses, natuevou au Egypt ai iraqe i vinolenolei

¹ Ma BADA Moses i riwei, “Anivinuabola tagogi ava ana neiai Pharaoh ma Egypt awarii. Ma au murina tauna ina voteremi da ona nae ma lamna maranaina ina viaġaġana-opunemi. ² Ma nae ma mai Israel ma riwei, ‘Anatapumi ona nae ma mae-turami Egyptei ona vibaġai da ai via goldei ma silvei

* **3:14:** Pona Hebrewi, *Tau maemae-nonoau* nonorana me *Yahweh*. Vipanipani au Babilon i kwa ma mai Jew i nememei au murina, tau i vitumaġana da wava *Yahweh* lamna vivivireina ma eġa aiai ina latoni. Aubaina da ai au buka giruma ġaēgaei wei wavana i girumi da eġa melanai ina latoni ma *Adonai* (bada) i latolaton i epaiana. Ma riwa BADA muomuonei i girumi lamna God wavana.

ina veremi.” ³ BADA i kauēi da mai Egypt mai Israel i vivirei. Pharaoh ana gabemani babadai ma rava anatapui au Egypt Moses i vivirana-kauēi.

⁴ Ma Moses i nae ma Pharaoh i riwei, “BADA e ririwa, ‘Nubautuva nanare tau Egypt anatapuna ana babarani. ⁵ Natuevou nelarai au Egypt anatapui ina iraḡe, Pharaoh natuevouna orotona, amana ana epaepaia, awarina ina vikarei, ma ina ḡaira da taunola awarina ina ḡeta, waivine*witi* taugudaina natunatui maiteni. Ḡamoḡamo natuevou anatapui ina iraḡe. ⁶ Ma dobu Egypt au anatapuna tou ḡaeḡaena ina ḡae, rorova eḡa nanare ma eḡa melanai nanare ina tupua me.’ ⁷ Wate eḡa aiwai apoapoena mai Israel awari ina tupua, eḡa auou tagogi, rava tagogi, bo ḡamoḡamo ina ḡawaēi. Ma kampa ona aramanei da TAU BADA, mai Israel ma mai Egypt awariei a vivilamonei. ⁸ Am gabemani babadai anatapui ina ḡairai awariu ma au naou ina mae-ḡaira ma ina raudune ma ina riwa, ‘Laḡilaḡina ma ruba-nae am rava tauvotaḡotaḡoim anatapui maiteni.’ Lamna au murina tau ana nae.” Moses meji orana i oai ma Pharaoh i netawanei.

⁹ BADA Moses i riwei, “Pharaoh tam eḡa ina rautaniḡanem. Wenanare ina tupua da tau kaua babai ana kauēi au Egypt.” ¹⁰ Moses ma Aaron kaua ḡaeḡaei ma babai i kauēi Pharaoh au matana wate BADA Pharaoh orana i vibadoi da mai Israel eḡa ita paritawanei.

12

Raḡona karena

¹ BADA, wenanare i babani Moses ma Aaron awarii au Egypt, ² **“Marina da e nenai wei nawaravina lamna nawaravi tagogi ma weka ona vikarei da ami madeḡa ona iavi. ³ Ona vinolanola mai Israel anatapui awarii, ‘Au pom ^{v_i-10⁻na} wei au nawaravina oroto tagotagogi ava sipu ḡaubona bo *gote* ḡaubona ina rautani ana numa ravai aubai. Ḡamoḡamo tagogi numa tagogi aubaina.’ ⁴ Mepa da numa tagogi ana rava i viruaḡa ma sia i rata guratana, lamna mae-turai maiteni sia ina ḡutai rava ai maḡa ma ai am ana au ruva nanare. ⁵ Ḡamoḡamo e rarautani lamna orotona ma ana madeḡa tagogi ma aiaina eḡa ana apoapoe aiwai. ⁶ Ona ḡamo-kauēi da au pom ^{v_i-14⁻na} wei au nawaravina. Ma maranai madeḡa e arearere, mai Israel anatapui ai ḡamoḡamo ina virāḡeni. ⁷ Metauna au numana sia e aniani kampa tara ina taraḡui ma metaeta au tepana, au gabaurina ma au ririvana ina pasi-naiei. ⁸ Waguvaranaina tagogina tau siana ai moniana au tepana ina apui, ma palawa eḡa *yist* maiteni ma sipeni vivigorai maiteni ina ani*

¹¹ Anatapumi wenanare ona am, vaḡai vigara ona vigarei: Ami ae uma ona oteni, ami jḡona au urami, Ma ona am laḡilaḡina. Wei lamna BADA ana Raḡona torelana.

¹² –Wei waguvaraina, Tau Egypt ana naeni ma ḡamoḡamo da rava natuevou ororotoi anatapui ana virāḡeni, ma Egypt ai god anatapui ana tuvaidoedoei. Tau BADA. ¹³ Wate tara au metaeta ina vimataira da taumi kampa o mamae. Ma maranai wei matairana ana inanai, ana raḡonimi. Ma eḡa aiwai apoapoena awarimi ina tupua maranai mai Egypt ana kovōḡi, ¹⁴ Wei

* **12:2:** Ai madeḡa iavana (Calenda) weka i vikarei

torelana ona nota-nonoei madeġana patapatana, da TAU BADA aiwai a kauēi nu-anuami eġa melanai ina vuru. Ami epaepaia anatapui wei marana ina vivirei ai mara au anatapuna.”

Palawa eġa yist maiteni ana torela

¹⁵ “Au pom 7 au orana Palawa eġa yist maiteni ona ani. Ma torela au karena, au numa yist anatapui ona tawanei. Aiāi da palawa yist maiteni i apui ma i ani, wei ravana anina da mai Israel ai damei ona viopuni. ¹⁶ Au pom tagogi torela au karena ona vitagogiemi ma nanare torela au damona, ma BADA ona voepaepai ma ona viborumei. Wei au marai eġa aiāi ina nola dadana, Wate ami lam ava ona lauvoa.

¹⁷ —Taumi palawa eġa yist maiteni torelana ona kauēi da eġa nuanuami ina vuru aubaina wei au marana, mai Israel au Egypt a taravaina-opune. Am epaepaia wei torelana ina kaukauēi madeġana au patapatana.”

Raġona

²¹ Ma Moses Israel dam nununai babadai i kwatuei ma i riwei, “Ona nae ma sipu bo gote natuna orotona ona vunui ma ami numa ravai maiteni Raġona torelana ona ani. ²² Rugurugu ona turautuvi sipu au tarana au aboma ma ami numa metaetana au tepana ma au adana ona pasi. Ma eġa aiāi numa ina oputawanei da ubaubanai. ²³ Ma waguvarai BADA Egypt anatapuna ina naeni ma mai Egypt ai natuevou ina virāġeni. Wate maranaī fara ina inanai metaeta au tepana ma au adana, BADA wei numana ina raġoni ma iraġe-anelana ina viġaei da eġa ina rui da ina virāġenimi.

²⁴⁻²⁵ —Ma maranaī BADA dobu i paripari-vainuāġanimi ona ġeta, taumi eġa nuanuami ina vuru da madeġana patapatana Raġona torelana ona kaukauēi. Taumi natunatumi maiteni wei tarawatuna ona vojijina-nonoei. ²⁶ Maranaī natunatumi ina paridadana, ‘Wei torelana anona aiwai?’ ²⁷ Ma taumi ona paribelei, ‘Wei torelana lamna Raġona vieġualau pulona BADA awarina, aubaina wariāġa au Egypt BADA mai Israel ai numa i raġoni, ma mai Egypt ai natuevou i pupuni, ma tauai natunatuiaī i voterei.” Ma mai Israel i mae-ġaira au doa ma BADA i raudunelei. ²⁸ Ma mai Israel i nae ma BADA aiwai Moses ma Aaron i riweia i kauēi.

Natuevou nelarai i 'raġe

²⁹ Waguvarai nubautuva BADA natuevou nelarai anatapui i virāġeni au Egypt. Pharaoh natuna, ana epaia awarina i vikarei, ma i ġaira da panipani ai natuevou nelarai awari. Ma ġamoġamo ororotoi natuevou anatapui maiteni i pupuni. ³⁰ Waguvara au pouna Pharaoh ma ana gabemani babada ma mai Egypt anatapui i vomairi. Numa tagotagogi ava au Egypt tevera tagogi i 'raġe, ma tou ma tarakwatu ġaeġaena i ġae. ³¹ Pharaoh wei waguvaraina Moses ma Aaron ai riwa i paritawaneī da i nei awarina ma i egari, “Ami rava mai Israel maiteni ona vomairi ma au dobu ona oputawaneī! O vivibaġei nanare ona nae ma ami BADA ona voepaepai! ³² Taumi ami ġamoġamo anatapui ona vaia ma ona opu, ona nae, wate ami God ona vibaġai da ina viaiainiu.”

³³ Mai Egypt anatapui mai Israel i egari da ina vipaparana ma Egypt ina oputawaneī ma i riwa, “Mepa da eġa ona nae tauai anatapuiāi ana iraġe.”

³⁷ Mai Israel dobu Rameses i netawaneī ma i babara-nae au Sukoth. Nelara anatapui 600,000 nanare, waivine ma roaroa eġa ita iavi. ³⁸ Patara ġaeġaena

ġelauna i vomairi mai Israel maiteni. Tau i ġamoġamo boruna ġaeġaena maiteni i nae. ³⁹ Maranai mai Egypt i viaġaġana-opunei tau i eġa ai tamaina ita vokaukauei ma laġilaġina i opu, tau i palawa pasipasi nonoana eġa i yist maiteni i vaia ma palawa bagibagina i apui.

⁴⁰ ✧ Mai Israel madeġa 430 i mae au Egypt.

Raġona torelana ana tarawatu

⁴³ Ma BADA Moses ma Aaron i riwei, Raġona torelana ana tarawatu wenanare: Dobu ġela wei torelana eġa ina ani.

⁴⁴ Ami taunola gimagimarana ma inibori i vaia wei torelana ina ani.

⁴⁵ Taomana ma taunola maia aubaina e nolanola tau i eġa ina ani.

⁴⁶ Raġona sipuna numa tagogiava au orana ona ani, ma eġa sia aiwaina ona opunei au doa ma gelamina eġa ona gai.

⁴⁷ Mai Israel anatapu i Raġona torelana ina ani.

13

Natuevou vovivirana

¹ BADA Moses i riwei, ² “Natuevou nelarai au Israel anatapu i ona vovivirei Tau awariu. Roaroa ma ġamoġamo natuevou i ororotoi au Israel anatapu, Tau ġariuei.”

Moses mai Israel i riwei, ¹¹ “BADA ina ruiemi mai Canaan ai au dobu ma dobu ina veremi, noinoimi i paripari-vainuaġani nanare. ¹² Natuevoumi nelarai ma ami ġamoġamo natuevou i ororotoi anatapu BADA ona verei, ¹³ Wate sipu orotona BADA ona verei ma awarina *donki* natuevouna ona gimara-melei, ma mepa da eġa ona gimara-melei, lamna *donkina* uana ona gomui. Taumi natunatumi nelarai natuevou i ona gimara-melei.

¹⁴ –Ma mara au murina, natunatumi ina vitara-viravira, ‘Aiwai aubaina wei ta kaukauei?’ Tam ma paribelei, ‘BADA urana vivirewapananei i taravaina-opunelai, panipani numanei au Egypt. ¹⁵ Pharaoh orana i bagibagi ma eġa mai Israel ita voterei da ita nae. Lamna aubaina BADA natuevou anatapu i Egypt i virageni, rava ma ġamoġamo anatapu. Lamna aubaina tau ġamoġamo natuevouna BADA a vereveri ma natuevou orotona a gimagimara-melei.’ ¹⁶ Wei gimara melanana lamna me mataira au uram ma au muruam e oteoteni ma wei e vivimataira da BADA urana vivirewapananei Egypte i taravaina-opunelai.”

²⁰ Mai Israel Sukoth i voterei ma mutulua au giana au Etham i mae-gubai. ²¹ Ma marai BADA i vnao me apau maimairina ma waguvarai BADA i vnao me tuatua araratana maimairina ma lalalainei tau i rau-etaraveni. Ma lamnei, tau marai ma waguvarai i bababara.

14

Pharaoh mai Israel i viaġaġana-opunei

⁵ Maranai riwa i ġeta Pharaoh awarina, da mai Israel i ruba. Pharaoh ana gabegabemani maiteni ai nota i virai ma i riwa, “Tauta aiwai ta kau? Ma ata

taunola ta voterei da i nepai!” ⁶ Anina ma Pharaoh ana chariot i vokaukauei, ma ana sorodia i vaia ma i nae. ⁷ Ana sorodia anataupui 600 vinevinei ai au chariot i geru, ma chariot gelaui au Egypt maiteni i nae. ⁸ BADA, i kauei da Pharaoh, Egypt ai gulau nuanuana i vopotai ma mai Israel i viaḡaḡana-taḡoei, Mai Israel ana tepatorai i nena. ⁹ Mai Egypt ana sorodia i viaḡaḡa, Pharaoh ana horse ma chariot anataupui ma horse babadai ma ana sorodia anataupui, maiteni i viaḡaḡa da au gera i mamaelana, i votani dobu Pi-Hahiroth, Baal-Sephon au baba ḡelauna.

¹⁰ Maranai Pharaoh i tuturiai, mai Israel i taepai da i 'nanai ma i rovo kaukau da orai i sisi, ma BADA awarina i garara agu aubaina. ¹¹ Ma mai Israel Moses awarina amloi i ḡaiḡai i pa, “Au Egypt eḡa kokoaga da u taravainapunelai da weka au mutulua ana iraḡe bo? Aiwai u kauei awariai? ¹² Tauai au Egypt a riwem, ‘Ma voterelai ma ana mae ma Egypt ai taunola!’ I ai kaua da tauai ata mae Egypt ai panipani, ma eḡa au mutulua ata iraḡe.”

¹³ Moses ana rava i paribelei, “Eḡa ona rovo! Ona mairi jijina ma ona inana menanarena BADA ina vilawanimi amadodo. Mai Egypt amadodo o inainanai eḡa melanai ona inana-melei. ¹⁴ BADA aubaimi ina viḡavia. Taumi ona mae-genuatau.”

Israel boga au pouna i babara damana

¹⁵ Ma BADA, Moses i riwei, “Aiwai aubaina awariu agu e toutouei? Mai Israel ma riwei da ina vidagu. ¹⁶ Am jiḡona ma voepai da ma viloloi boga au tepana ma boga ina vilamonei, ma mai Israel boga au pouna doa au alalana ina babara damana. ¹⁷ Tam ma raubiga, Tau mai Egypt a vitepatorai da mai Israel ina viaḡaḡei. Maranai Pharaoh ana vovaiubai, ana sorodia, chariot ma ana horse sorodiai, rava Tau ina voepaepaiu. ¹⁸ Tau Pharaoh ana vovaiubai, ana chariot ma ana horse sorodiai da mai Egypt ina vivivireu ma ina aramanei da TAU BADA.”

¹⁹ Anina ma God ana anela, mai Israel ai eta tauravenia i nae ma mai Israel au muri i mairi. Ma apau maimairina au naoi i nei ma tau i muri i mairi. ²⁰ Apau mai Israel ma mai Egypt au poui i mairi, ma maranai au i pom, apau lalalaina mai Israel i verei ma mai Egypt au waguwaguvareina i mae. Ma lamna aubaina mai Israel ma mai Egypt ai au gabu i mae-genuatau.

²¹ Moses ana jiḡona i viloloi boga au tepana ma BADA kariwabu ḡaeḡaena i paritawanei, ma boga i vilamonei, kariwabu i ruba da mara i tom da doa boga au pouna i alala. ²² Ma mai Israel boga i damani doa au alalana, Ma boga olana i mairi au oiei ma au kelakelau.

²³ Anina ma mai Egypt, Pharaoh ana horse gelaui, chariot ma taurubeina mai Israel i votaḡoi da au boga i rui, mai Israel au murii. ²⁴ Ubaubanai boibogi BADA apau maimairina ma ai tuatwana araratana au orana ma i 'nana ḡaira ma mai Egypt i viaiḡoaḡoi. ²⁵ Ma chariot ana aniruba i viapoapoeni da ruba i kauana-avei. Ma mai Egypt i riwa, “BADA mai Israel e vovoagui, ma e viviviḡavieta, lamna aubaina tana ruba-tawanei!”

²⁶ Ma BADA Moses i riwei, “Am jiḡona ma viloloi boga au tepana da boga ina nememei, mai Egypt au chariot ma sorodia horse au tepana anataupui ina puru-pai.” ²⁷ Madeḡa i ḡoḡoḡo ma Moses urana i viloloi boga au tepana, ma laḡilaḡina boga i naeme ana au gabu. Mai Egypt ita ruba wate BADA tau

au boga i viorereni. ²⁸ Boga i naeme ana au gabu ma mai Egypt sorodia anatapuina i ruirui au boga i monu. Eġa aiai tagogi ita lawana.

³¹ Maranai mai Israel i 'nanai da BADA wei kauana vivirewapanana i kauai mai Egypt awarii, tau'i BADA i virirana-kauai ma i vitumaġanei ana taunola Moses maiteni.

15

Moses ana wela

¹ Anina ma Moses mai Israel maiteni wei voepaepa welana i ravi BADA awarina:

Tau ana wela BADA awarina ma ana voepaepai, aubaina ana ġavia i vipupui, ma horse ma chariot taugeruii au boga i viorerena-naiei,

² BADA au rewapana ġaeġaena, ma welei ana voepaepai;

Tauna i vilawaniu Tauna au God ma ana voepaepai, Amamau ai God ma lamna aubaina ana vimae-ġaeġaeni ma ana voepaepai.

³ Tauna wavana BADA.

Tauna ġavia ravana.

⁴ Pharaoh ana chariot ma ana sorodia au boga i viorereni; Ana sorodia vinevinei au Boga Lebalebarina i monui.

⁵ Gabinou i wanaiwaġi da tau'i purui; ma i monu boga au gabaurina me ġaima.

⁶ Oo BADA ura-oiem vivirewapana kaukauana, ura-oiem am ġavia e viviaimutumutui.

⁷ Tam ġeġetelaram ma tau'i viġaviem u vovaiubai.

Am meji araratana u paritawanei da tau'i aragibui me ai ragorago.

⁸ Boga au tepana u uvena ma boga olana i mairi, i mairi genuatau me biribiri, ma gabinou i alala.

⁹ Am ġavia i riwa, "Ana viaġaġei, ana vojijini, ai purapura ma ai maura anatapui ana ġutai, ma aiwai a ġoeġoei ana vaia, Au sod ana lavui ma ana vipupui."

¹⁰ Wate lavutumei u uvena, ma gabinou tau'i purui; i monu me ġaima rabama au ġaeġaena.

¹¹ BADA, mepa god ġelau me tam bo eġa? Eġateni! Tam anina vivivirem, am rewapana i rata dewadewa da tauai a rovorovoem, Tam kaua babai ma virewapanai taukaueina.

¹² Tam uraoiem u viloloi, ma doa am ġavia i lawani.

¹³ Am rava u vamelei ma u rauetaraveni am nuavaina patupatutunei, Ma am rewapanai u taravaina-naiei am au animae vivivireina.

¹⁴ Dobu ġelau wei riwana i nonori ma orai i sisi kaua. Mai Philistia orai rovo ina vioai.

- 15 Edom gulagulau i rovo kaukaua,
Moab nelara rewapana ini ina sisi.
Canaan maemaei anatapui inii i wanagwada.
- 16 Rovo gaegeaena anatapui orai i oai,
 uram ana rewapanei tau i mairi kwakwa me kokoitau,
 ma am rava ina verautua BADA,
 da ravai u vaivai-melei ina verautua.
- 17 BADA ma taravaina da am au ola ina raunuma,
 Gabu u vinevineiana,
 tam uramei voavoaina.
- 18 BADA ina vibada nonoa.

19 Mai Israel doa au alalana i babara damana. Wate maranai mai Egypt ai horse ma ai chariot taugerui i rui au boga, BADA waira i neiana-meleiai da anatapui i purui *Lamna aubaina Moses ana rava maiteni wei welana i ravi.*

Miriam ana wela

20 Peroveta Miriam, Aaron novuna tambourine i vaia ma waivine anatapui, tauna i votaḡotaḡoi ma tambourine i vikalokaloei ma i ara. 21 Miriam wei welana i ravi, “Tana raua BADA awarina, aubaina tauna gavia i vilamolamonei ma horse ma chariot taugerui au boga i viorereni.”

Waira viviḡorana i aii

22 Anina ma Moses mai Israel i taravaini da Boga lebalebarina i netawanei ma i nae au Shur mutuluana. Aupom tonuḡa au mutulua i babara wate waira eḡa ita nelaḡai. 23 Maranai au waira vuvura Marah i ḡeta da ita uma wate wairana umana i viḡora da eḡa ita uma, lamna aubaina wei dobu wavana Marah.* 24 Ma rava Moses awarina i pariḡai i pa, “Aiwai tana umai?”

25 Anina ma Moses i paritou BADA awarina agu aubaina, ma BADA ai tupona i viataie. Ma wei aina i tawanei au waira ma waira i viaini aniuma aubaina.

Nai au gabuna BADA ana tarawatu rava i verei ai lawana aubaina, ma ai votelatela i raudadani. 26 BADA i riwa, “Mepa da riwau ona nonora-kauei ma kaua aiiai ona kauei au matau ma riwau anatapuna ona voteletelei, da kovoḡa mai Egypt a vereverei, eḡa ana veremi. Tau BADA tauvilawanimi.”

27 Muriai tau i nei au Elim kampa vuvura 12 ma mutulua ai me pa 70 i maimairi ma kampa waira au adana i mae mara aburuna.

16

God Israel lam i verei

1 Anina ma mai Israel Elim i netawanei ma i nae au mutulua wavana Sin, wei dobuna lamna Elim ma Sinai au poui. Egypt i opu-tawanei nawaravi tagogi ma wiki ruaḡa i kwa ma wei au dobuna i ḡeta.* 2 Mai Israel Moses ma Aaron awarii i ḡaiḡaiawa. 3 Ma i riwei, “BADA boiboḡi au Egypt ita viraḡeniai! Kampa sia nauai a kiala kwaviviroi ma ai ḡoanei a amam, wate taumi o taravaina-opunelui au mutulua da am-iraḡe ana iraḡelei.”

4 Anina ma BADA Moses i riwei, “Lam marei ana paritawana-ḡaireiai me garewa. Au pom patapatana rava ina opu ma lam au pom tagogi ruvana ava ina vaia. Wei taunei rava ana raudadani da riwau bagibagina ina voteletelei bo eḡa.” 5 Au pom $v_i - 6^- na$ au pom ruaḡa ruvana ina tami da ina vokaukauei.

* **15:23:** Au Hebrew pona Mara nonorana me viḡora. * **16:1:** Mai Israel au pom 15 nawaravi tagogi (madeḡa weka iavana i vikarei) ma Egypt i opu-tawanei.

11 BADA Moses i riwei, 12 “Mai Israel ai ġaiawa a nonori. Ma riwei, ‘Raviraviai taumi sia ona ani, ma ubaubanai lam ona maurei.’ Ma lamna maranai ona aramanei da Tau BADA ami God.”

13 Raviraviai kiu iviki boruna i nei da tau i maemae lana gabuna i vioai. Ma ubaubanai ġelauna doa anapuna turuvani i vioai. 14 Maranai turuvani i paira ma purapura avavai me palawa nanare doa au tepana i mae. 15 Maranai mai Israel wei purapurai i ‘nanai ma i vinuanaina ma i vitaravira vivira i pa, “Wei aiwai?”

Ma Moses rava i riwei, “Wei aniam BADA i veremi.” 16 BADA riwana bagibagina lamna wei, “Rava tagogi lam ana au ruva ina tuarui. Nau muomuoi ruaġa^f ruvana ona tuarui, rava tagogi au numa aubaina.”

17 Aiwai i ririweia nanare mai Israel i kauei, ġelau ruva ġaeġaena i tami ma ġelau ruva aburuna i vaia. 18 Wate maranai i ruvai ma i ‘nanai da rava anapui ruva i vaia da tagotagogina, Tau i ruva ġaeġaena i tami eġa aiwai ita mae-terei ma tau i aburuna i tami ma i nelaġai da lamna tagotagogina tau aubaii. Numa nununai ravai lam ruvaruvana i vaia.

19 Anina ma Moses i riwa, “Eġa aiwai lam ina tereriei da au maratam aubaina.”

20 Wate rava ġelau Moses eġa ita rautaniġane i lam ġelau i tereriei ma ubaubanai motamota lam i oai ma i bova, ma Moses amlona i ġaiġai tau awarii.

21 Ubaubanai patapatana tau lam ai au ruva i tuarui, ma maranai madeġa i vibola ma lam i viwaira da i amoa. 22 Ma au pom ^v_{i-6}^{-na} tau i pom ruaġa ruvana nanare i tuarui, ma melagai babadai i nei da Moses i pariverei. 23 *Moses tau i riwei, “BADA riwa bagibaginei wenanare i riwa, ‘Maratom lauvitau vivireina Sabate ana mara, Tau aubaii. Aiwai apuna o ġoeġoeia amadodo ona apui ma aiwai vitavana o ġoeġoei amadodo ona vitavi. Ma aiwai i mae-terei, ona tereriei au maratam aubaina.”

24 Ma tau lam i tereriei ma eġa ita bova ma ita motamota me Moses i ririwa nanare, 25 Moses i riwa, “Wei lamna amadodo ona ani, aubaina amadodo Sabate, lauvitau ana mara vivivireina i terei BADA aubaina. Ma amadodo amapo lam au doa eġa ona nelaġai. 26 Au pom 6 lam ona tuarui, wate au pom ^v_{i-7}^{-na} Sabate, amapo lam eġa ona nelaġai.”

27 Ma au pom ^v_{i-7}^{-na} rava ġelau i opu da lam ita tuarui wate eġa aiwai ita nelaġai. 28 Anina ma BADA, Moses i riwei da rava i riwei i pa, “Mara biġa au tarawatu ma au viaramana ona rau-aġaiġaiei? 29 Ona notai da Tau BADA, Sabate a veremi, ma au pom ^v_{i-6}^{-na} lam a veremi da au pom ruaġa aubaina. Ma rava anapui au numa ita mae ma avena ita opu.” 30 Ma au pom ^v_{i-7}^{-na} rava i vilavitau. 31 Rava mai Israel wei lamna i ġorei “*manna*.”

35 *Ma mai Israel manna i amam da madeġa 40 i kwa. Tau manna i amam da Canaan ana au parata i ġeta.

17

Waira kirei i opu

1 *Mai Israel mutulua Sin i netawanei, ma mepa BADA i ririweia nanare kampa i mae-nae. Tau au Rephidim i rauġaravu, wate kampa eġa waira da

^f 16:16: Hebrew ai ponei 1omer ana ruva lamna 2 Ltr ruaġa wei lamna ruva tagogi ana ruva.

* 16:23: Exo 20:8-11 * 16:35: Jos 5:12 * 17:1: Num 20:2-13

rava ita uma. ² Anina ma tau Moses maiteni i viparipariniḡai i pa, “Waira ma verelai da ana uma!”

Ma Moses i paribelei, “Aiwai aubaina o paripariniḡai? Aiwai aubaina BADA o raudadani?”

³ Wate rava nuanuai i arelana-kauei waira aubaina ma Moses i eni i pa, “Aiwai aubaina Egyptei u tere-opunelai da natunatuiai ma ai ḡamoḡamo maiteni nuarelana ana iraḡelei?”

⁴ Ma Moses i paritoutou BADA awarina i pa, “Aiwai ana kauei wei ravai awarii? Tau i ḡaime marina ina virāḡeniu.”

⁵ BADA Moses i paribelei, “Israel babadai ḡelau i taravaini ma kwapu taunei Nile u raviravia ma vaia ma ma vinoa. ⁶ Tau kampa au naom au kira ana maimairi au Horeb. Kira ma ravi da waira ina opu da rava ina uma.” Ma Moses nanare i kauei Israel babadai au matai. ⁷ Moses wei dobuna i ḡorei Massah * ma Meribah, † aubaina weka mai Israel Moses maiteni i viparipariniḡai ma BADA i raudadani maranai i riwa, “BADA weka tauta maiteni bo eḡa?”

Mai Israel ma mai Amalek i viḡaiḡaiawa

⁸ Mai Amalek i nei ma Mai Israel maiteni i viḡaiḡaiawa au Rephidim. ⁹ Moses Joshua i riwei, “Rava ma vinei da ona nae mai Amalek maiteni ina viḡaiḡaiawa. Au maratom tau ola au tepana ana mairi ma God ana kwapu ana vovojjini.”

¹⁰ Ma Joshua mai Amalek maiteni i viḡaiḡaiawa me Moses i ririweia nanare. Moses, Aaron ma Hur i ḡae ola au tepana. ¹¹ Maranai Moses urana ana kwapuna i voepai mai Israel i vivirewapana wate maranai urana i teretere-ḡairei mai Amalek i vivirewapana. ¹² Moses urana i garigari ma Aaron ma Hur ḡaima i neiai da i terei ma au tepana Moses i kiala. Aaron ma Hur, Moses au ririvana i mae, tagogi au navanavana ma ḡelauna au navanavana ḡelauna ma urana i voepai ma i vojijini da madeḡa i neulai. ¹³ Ma Joshua ana sorodia maiteni Amalek ai sorodia sodiei i vovaiubai.

18

Jethro poiana Moses i raugenari

¹ Moses poiana Jethro, mai Midian ai pirisi pulo tauapuna i nonori aiwai anatapuna BADA i kaukaueia Moses ma mai Israel awarii; ma menanare Egyptei i taravaina-opunei.

⁵ Moses poiana - Jethro, Moses awana ma natunatuna nelarai ruaḡa i nei da Moses ita raugenari au mutulua. Weka Moses ana rava maiteni i rauḡaravu God ana ola au ḡereḡerena. ⁶ Jethro riwa i paritawanei Moses awarina da tau i nenei. ⁷ Ma Moses i opu da poiana ita nebelei. Tauna i mae-ḡaira ma poiana i raudunelai ma i vigia-laḡolaḡonei. Tau i vieḡualau vivira ma i rui Moses ana au numagara. ⁸ Ma BADA aiwai i kaukaueia Pharaoh ma mai Egypt awari mai Israel aubai; ma apoapoe anatapui au eta i nebelei; ma menanare God tau i vilawani; anatapui poiana i pariverei. ⁹ Ma Jethro nuanuana i ai kaua

* 17:7: Hebrew ponanei, Massah anona raudadana † 17:7: Pona Hebrew, Meribah anona viparipariniḡai

maranai i nonori menanare BADA aiwai anatapuna aiiai i kauēi mai Israel aubai maranai Egypt urai vivirewapanana awarīe i tere-opunei.

¹⁰ Jethro i riwa i pa, “Voepaepa BADA awarina. Tauna Pharaoh ma mai Egypt awarīe i vai-tawanemi. Ee, Egypt urai vivirewapanana awarīe i vai-tawanemi. ¹¹ Marina a aramane da BADA i ġetelara eġa me god ġelau nanare. Aubaina BADA ġoġogulagulai mai Egypt ai kaua apoapoe mai Israel awarīe aubaina i kovoġi.”

Jethro Moses i vinua-terenei

¹³ Ma marana i tom, Moses ana au anikiala i kiala da ita rauetara. Ma rava Moses i mairi-kwaviroi ma i vipaipai ubaubanai da madeġa i ġaira. ¹⁴ Maranai Jethro i nanai aiwai anatapuna Moses i kaukauēi rava aubai. Tauna i vitara-viravira i pa, “Wei aiwai rava awarīe e kaukauēi? Aiwai aubaina ainelam wei e kaukauēi, ma wei ravai e maimairi pompom da am riwa ita nonori?”

¹⁵ Moses i paribelei i pa, “Tau wei a kaukauēi aubaina rava e nenei awariu da ita aramane aiwai God e ġoēġoei da ita kauēi. ¹⁶ Maranai rava ruaġa e viviamparipari. Tau i nenei awariu da a teretere-vaijijimani; ma God ana riwa ma ana tarawatu a ririwei.”

¹⁷ Moses poiana i riwa i pa, “Aiwai tam e kaukauēi lamna eġa ita ai. ¹⁸ Nola e kaukauēia i vitai kua da tam ainelam eġa tagotagogina uta kauēi. Tam ma rava ona voirairaġe. ¹⁹ Ma rautaniġana ma ana vinuaterenem; ma God awarim ina mae. Tam anina da rava ma raviepaiai God au naona ma ai viamparipari ma neiai awarina. ²⁰ God ana parivai-araramana ma ana tarawatu ma viaramani ma tau i viatataiei da menanare ita maenei ma aiwai ita kauēi. ²¹ Wate am patara awarīe nelara ġelau araramanī ma God e viviborumei ma eġa amkwalakwalai ma vinei da rava ina vibadei: ġelau rava 1,000 ina vibadei; ma ġelau rava 100; ma ġelau rava 50; ma ġelau rava 10 ina vibadei. ²² Tau i rava ai viamparipari ina tere-vaijijimani. Wate aiwai da i piripiri, ina neiai awarim. Tau i voaguim da am vita ina avarai ma ina votelatēi. ²³ Mepa da God i ririweia ma kauēi amapo eġa ma voirairaġe ma rava anatapui ana nuaiiai ina nae ai au numa.”

²⁴ Moses, poiana i rautaniġane i aiwai anatapuna i ririweia i kauēi ²⁵ Ma Moses mai Israel araramani i vinei da rava 1,000 i vibadei, ma 100, ma 50 ma 10 i vibadei. ²⁶ Wei babadai, rava ai viamparipari i teretere-vaijijimani ma aiwai da i piripiri i neneiai Moses awarina. Ma kua telatēi i teretere-vaijijimani.

²⁷ Anina ma Moses, poiana Jethro i viegualaei, ma Jethro i naeme ana au dobu.

19

BADA i vieġana-melei au ola Sinai

² Mai Israel Rephidim i netawane da i nae au mutulua wavana Sinai. Ma kampa ola au karena i rauġaravu.

³ Ma Moses i ġae au ola da God ita nebele. Ma BADA ola au tepana ma Moses i ġorei i pa, “Wei mai Israel Jacob noinoina ma riwei.

4 – Taumi matamiei o inanai aiwai mai Egypt awarii a kauēi ma me manubada natunatuna au papena e avavarii nanare a avaraimi ma a neiana-melemi awariu. ⁵ *Mepa da ona voteleteleu ma au parivainuagana bagibagina ona vojijina-kauēi, lamna dam anapui au dobu awariei taumi ana vinemi nuanuau poua. Avena da dobu anapuna Tau gariuei. ⁶ Wate taumi aubaiu ona vipirisi, ma ami dam ona vovivirei tau ainelau aubaiu, wei babani mai Israel ma riwei.”

⁷ Ma Moses i gaira me ma dogadogara i kwatuei ma aiwai anapuna BADA i ririwei i pariverei. ⁸ Ma rava anapui i paribelana gogona i pa, “Tauai aiwai anapuna BADA i ririwei ana kauēi.” Ma Moses ai paribelana i gairana-melei BADA awarina.

⁹ BADA, Moses i riwei, “Tau apau potopotona au orana ana nei, da rava ina nonoriu Awarim ana bababani da ina vitumašana-nonoem.” Anina ma aiwai rava i ririwei Moses BADA i riwei.

¹⁰ Ma BADA Moses i riwei, “Ma gaira ma rava ma voagui amadodo ma au maratou da orai ina oḡai da tau ina viborumeu. Ma ai gara ina oḡai. ¹¹ Ma ina vokaukaua au pom vitonuina aubaina. Nai maranaina Tau ana gairai au Ola Sinai, rava anapui au matai. ¹² Parata ma tere-kwaviuiro i ola. Ma riwa bagibaginei ma riwei ma pa, ‘Ona inana-kaua da eḡa au ola ona gae bo ola ona tapedadani. Aiai da ola i tapedadani ina iraḡe.’ ¹³ Mepa da rava bo gamoḡamo wei paratana i voraḡoni, taumi eḡa nai ravana bo gamoḡamona ona vodadani wate gaimēi bo aierei ona viraḡeni. Wate maranai taure ponana i rarata lamna rava ina gae au ola.”

¹⁴ Ma Moses olei i gaira memēi ma ana rava i riwei da orai i vokaukauēi da God ina viborumei ma ai gara i oḡai. ¹⁵ Ma i riwei, “Ona vokaukaua mara vitonuina aubaina, marina da nai marana eḡa ona viawawana.”

¹⁶ Ubaubanai au pom vitonuina, waiparara, namanamara ma apau potopotona ola i purui, ma taure i tou. Maratagōgi rava anapui kampa i mamae i rovo kaukaua ma i sisi. ¹⁷ Ma Moses rava i ravana-opunei da God ita nebele. Tau i ola au karena i mairi. ¹⁸ BADA ai araratanei i gairai ola Sinai au tepana. Ma bau potopotona olana i puru-pai. Bau kampa i gēgē me modu potopotona e ararai nanare, ma olana anapuna i vigugui. ¹⁹ Ma taure ponana i rarata. Ma Moses i babani ma God i paribelei ponana nonorana me waiparara. ²⁰ BADA i gairai ola Sinai au tepana ma Moses i kwatuei da ita gēi ola au tepana. Ma Moses i gae.

20

God ana tarawatu 10

¹ Ma God i babani ma wei riwai i latoni,

² TAU BADA ami God, panipaniei au Egypt a taravaina-opunemi.

³ Taumi eḡa god ḡelau i raudunelei, Tau ainelau ona raudunelei.

⁴ Taumi eḡa aiwai au mara bo au dobu au dobu au orana dobu au gabaurina kokoitau i kauēi da ona raudunelei. ⁵ * Taumi eḡa kokoitau i raudunelei bo ona viborumei, aubaina TAU BADA ami God ununurana. Ma tau i gedugeduaieu ana kovoḡi da kimta au *vi-4-na*. ⁶ Wate tau aiavo i nuanuau e vaivaini ma au tarawatu e vovojijini au nuavaina maema-nonoana ana verei da kimta tausana nanare.

- 7 Taumi eġa BADA ami God wavana ona vinamei. Aiai da BADA wavana e vivinamei ina kovoġi.
- 8 *Sabate eġa nuanuami ina vuru ma ona notanotai ma ona vovivirei tau awariu. 9 Aupom 6 ami nola ona kauei. 10 Wate au pom ^{vi-7-na} lamna Sabate, lauvitau marana, i vovivirei BADA ami God aubaina. Wei au marana eġa aiai ina nola: eġa tam, natum orotona bo wavinena, am taunola orotona ma wavinena, bo am ġamoġamo, ma dobuġela ravai awarim e mamae. 11 *Aubaina au pom six au orana BADA mara ma dobu i kauei; boga ma anatapui au orana. Wate i vilauvitau au pom au ^{vi-7-na}. Lamna aubaina BADA Sabate i viaiaini ma i vovivirei.
- 12 *Amam ma alom ma vivirei, da am lawana ina manawa au dobu, BADA am God e vereverem.
- 13 *Eġa ma virageġa.
- 14 *Eġa ravaġela awana ma viawawanei.
- 15 *Eġa ma danene.
- 16 *Eġa ma viwavu-moru
- 17 Eġa ravaġela ana numa ma vikwinei. Eġa ravaġela awana ma vikwinei, bo ana taunola orotona bo wavinena, ana bulumakau, ana donki, bo aiwai ġelau i ġarinei.

21

Rau iviapoapoe ai Tarawatu

- 12 “Aiai rava ġelauna i ravi da i virageġi, nai ravana ina virageġi. 13 *Wate mepa da i vunu-boai da i virageġi. Tauna ina ruba dobu a vinevineia kampa. 14 Wate rava i vioga da i virageġa, ma ana lawana aubaina i ruba pulo au aniapuna, ravana ina taravaina-opunei ma ina virageġi.
- 15 —Aiai amana bo alona i ravi, nai ravana ina virageġi.
- 16 —Aiai da rava ġelauna i danenei da i gimarei bo awarina ma i nelaġai, nai ravana ina virageġi.
- 17 *—Aiai da amana bo alona e parivai-apoapoeni nai ravana ina virageġi.”

22

Tarawatu am lawana aubaina

- 16 “Mepa da oroto wavine matatapu i gwalai da i viawawanei, ma eġa aiai wei wavinena ita rautani da ita ravaġi. Nai orotona wavine mataopana ina vimaiei ma ina ravaġi. 17 Wate mepa da amana i viġa, lamna maranai oroto matatapu ana mataopa ina vimaiei wavine amana awarina. 18 *Aiai wavinena e paraparauma lamna ina virageġi.
- 19 *—Aiai ġamoġamo i viawawanei lamna orotona ina virageġi.
- 20 —Aiai pulo i apui god ġelauna awarina ma eġa tau BADA awariu lamna nai ravana ina virageġi.
- 21 —Eġa dobuġela ravai ona ġoa-boai, ona notai da taumi mara tagogi o mae dobuġela ravami au Egypt.

22 —Eġa kaikaiababa ma kedakeda ona ġoa-boai. 23 Mepa da nanare ona kauē ma tauī ina tou awariu agu aubaina, Tau BADA, ai tou anina ana nonori ma ana voagui. 24 Ma Tau ana meji guratana ma ġavia au orana ana viraġenimi. Awawami ina vikaiaababa ma natunatumi eġa amamai.

25 —Mepa da mane u unelei molamolakana awarina, lamna eġa mane ġelauna au tepana ma vibaġei. 26 Mepa da rava ġelauna ana kwama u vaia da manena ina veremelem ma muriai ma vere-melei, ana kwama ma vere-melei muriai da madeġa ina ġaira. 27 Kwamana lamnei e purupurui da inina e vivibola. Bo aiwai ġelauna e mamae da ina vipuruei? Mepa da kwama eġa uta veremelei ma tauna awariu i tou agu aubaina ma Tau ana paribelei aubaina Tau rau-nuapoapoeu.”

23

Rau-nuapoapoe

1 *Eġa riwa moru ma vituai. Ma eġa au numa-etara moruei kaua apoapoe ravana ma voagui. 2 Eġa patara ma ġovaivaitei ma ġo'apoapoe ma kaukauei. Maranai au numa etara e maimairi eġa moruei ġo'apoapoe patarai ma voagui.

24

Israel BADA ana parivainuaġana i vianinei

3 Moses i nae mai Israel awari ma BADA ana viararamana ma ana tarawatu anatapuī i riwei ma rava anatapuī pona tagoġinei i paribelei i pa, “Tauai BADA aiwai i ririwei anatapuina ana kauēi.”

4 Ma Moses, BADA aiwai i ririwei anatapuina i girumi. Ubaubanai boiboġi i vomairi ma pulo aniapuna i voai ola au karena ma ġaima ġaeġae 12 i vimairini Israel ana dam 12 i vimatairei. 5 Anina ma Israel laralaragai i paritawanei da ġamoġamo i vununaiei ma pulo i apui BADA awarina ma bulumakau ġelau i vunui da ai viturana ma mae-kaua pulona. 6 Moses ġamoġamo tarai navanavana i ġunaiei au aboma ma navanavana ġelauna pulo aniapuna au tepana i voiwaiwaġi. 7 Ma parivainuaġana bagibagina bukana i vaia ma rava awarii i 'avi. Tauī i paribelei, “Tauai aiwai anatapuina BADA i ririwei ana kauēi, ana babani ana voteletelei.”

8 *Ma Moses aboma i vaia ma tara i voiwaiwaġi rava au tepai. Ma i riwa i pa, “Wei taranei ata tarawatu i vovai-virewapani ma i vianinei.

—Maranai BADA tarawatu i veremi, Tauna parivainuaġana bagibagina taumi maiteni i kauēi.” 12 BADA, Moses i riwei, “Ma ġei awariu au ola ma weka ma mae, ma ġaima dabadabai ruaġa au tepai, riwau ma au tarawatu a girugirumia ana verem da mai Israel ma viararamani.”

13-14 Ma Moses ana taunola Joshua maiteni i vokaukua da ita ġae au ola. Ma Moses babada awarii i babani i pa, “Weka ona painiai da ana opu-memei. Aaron ma Hur e mamae, mepa da ami paripariġai aiwai da ona nae awarii.”

15 Ma Moses i ġeġae au ola ma apau ola i purui 16 Ma BADA ana boruma i peu au ola Sinai. Ma au pom six apau ola i purui, ma au pom au ^{vi-7}na BADA apau au orana ma Moses i ġorei. 17 Mai Israel i taepai ma ola au tepana BADA ana boruma i 'nanai me ai arata ġaeġaena ai menamenana ma bauna

potopotona. ¹⁸ Ma Moses i ġae au ola ma apau au orana i rui. Ma au ola i mae au pom 40 ma waguvarai 40.

25

God ana numagara vivivireina

God Moses i riwei da rava ita pariveri da ai ġoanei ita verena, kaua maġamaġaui da God ana numagara vivivireina aubaina.

⁸ “Rava Numa Gara Vivivireina ina voai, da tau maiteni ana mae. ⁹ Numa gara ma orana purapurai ana viatataiem nanare ona voai.”

Parivainuagana bokisina

¹⁰ “Ma bokisi ai *acaciei* ina voai, ana manawa 110 cm, ma ana dabora 66 cm, ma ana ġae 66 cm. ¹¹ Ma gold aiainei ma viaitani au orana ma au doa, ma au tepana ana via goldei ma tere-kwaviviroi. ¹² Ma ana loji 4 ma vokaukauei ma au aena 4 ma terei; ma au baba ġelauna loji ruaġa ina mae ma au baba ġelauna loji ruaġa ina mae. ¹³ Ma ai *acaciei* anipawe ma kauei, ma goldei ma viaitani. ¹⁴ Ma anipawe au loji bokisi au babana ma raviai, da ina pawei. ¹⁵ Anipawe au loji ina mae, eġa ina taina-lavui. ¹⁶ Ma au tarawatu ġaima dabadabai ruaġa au teji a girugirumia bokisi au orana ma terei.

¹⁷ –Ma uġu*, gold aiainei ma kauei, ana manawa 110 cm, ma ana dabora 66 cm. ¹⁸ Ma Cherub ruaġa ma kauei gold gudagudane i ma uġu au giana ruaġa ma terei. ¹⁹ Ma Cherubim ġelauna au ġia ġelauna ma Cherubim ġelauna au ġia ġelauna ma kauei da uġu maiteni ina vitagogi. ²⁰ Ma Cherubim papei au aidamo ina viloloi, ma ina vinao vereverena, da ġo'apoapoe tauvaitawaneina uġuna ina gagaloei. ²¹ Uġu au tepana ma terei, ma ġaima dabadabai ruaġa bokisi au orana ma terei. ²² Ma uġu au tepana, Cherubim ruaġa au poui kampa tana vinenebelana da au tarawatu ana verem rava mai Israel aubaii.”

28

Ma God nanare Moses i riwei da wei purapurai i voai, kepaġepa vinevinena ma incense aniapuna goldei, ma rampa anivovijjinana rampa seven aubaii. Ma i viararamani menanare BADA ana numagara vivivireina ina voai ma au orana gara ġamoġamo opinei ina babalaragi da gabu ruaġa, ma gabuna ana gari ina kauei da wei gabuna ina gari-kwaikwaipipini. Ma wate maiteni i riwei da pulo aniapuna bronzei, ma aboma ġaeġaena ina kauei anioġa aubaina.

Pirisi ai gara

¹ Ma God i riwa, Tuam Aaron natunatuna Nadab, Abihu, Eleasar ma Ithamar maiteni mai Israel awariei ma tereriei. Ma ma viaiaini da Tau aubaiu ina vipirisi pulo tauapuina. ² Ma pirisi ana ġara vivivireina ma popoi vareim aubaina da inananana ina vinualaulauna ma rava ina vivirei, ³ Rava rarau-ġaroġaroi ma nuaulaulai, ma ġoreiai da Aaron ana pirisi garana ina popoi da ina oteni ma ina viaiaini da aubaiu ina vipirisi.

31

God ana numagara taukaueina

* **25:17:** uġu ġo'apoapoei e viviaitani

¹ Ma BADA Moses i riwei, ² “Ma inana, Tau Besalel, Judah ana damei a vinei, tauna Uri natuna, ma Hur gōgana, ³ ma Aruau Vivivireina a verei. Ma nuaulaulaula ma nota ma aramana a verei da rau-garogaro anapui awari tauna tagotagogina. ⁴ Tauna tauraugarogaro amai, *Gold*, *Silver* ma *Bronze* taunoleina aiaina. ⁵ Tauna i ai kaua gāima e boribori ma e laḡalaḡai, ma amtai awarina. Tauna rau-garogaro anapuna awarina tagotagogina. ⁶ Ma nanare Oholiab a vinei, tauna Ahisamak natuna, Dan ana au dam da ana tauagu. Ma nanare tauraugarogaro nuaulaula ma aramana a verei da aiwai anapuna a ririwem ina kauai. ⁷ Numagara Vivivireina ma parivainuaḡana bokisi ma uḡu ma numagara ana purapura: ⁸ kepaḡepa ma ana purapura; rampa gold aiainei ma purapura ḡelau ma incense aniapunana. ⁹ Pulo aniapuna ḡamoḡamo taputapuna apuna aubaina. ¹⁰ Ma gara vidualaulaunai ina popoi, gara vivireina ina popoi Pirisi Geḡetelara Aaron aubaina ma natunatuna pirisi nolana aubaina aubaii, ¹¹ monamona viaiaina aubaina ma incense BADA ana numa aubaina. Tauraugarogaro wei purapurai ina raugarogaro mei a ririwei nanare.”

32

Bull natuna goldei

¹ ✧ Maranai rava i ‘nanai da Moses barana i uama au ola, tau i nei Aaron awarina ma i riwei, “Ma nei ma god ma voai da ina painita. Wei ravana Moses, Egypte i neiaita weka, eḡa ata aramanei aiwai i tupua awarina.”

² Aaron i paribelei, “Awawami ma natunatumi waiveinei ma nelarai ai loji goldei ona nei ai awariu!” ³ Anina ma rava anapui ai loji i votawatawanei ma i nei ai Aaron awarina. ⁴ ✧ Tauna i vaia ma ai au menamenana i apui da i wanagwadai ma bull natuna kokoitauna i voai. Maranai rava wei i ‘nanai ma i riwa, “Oo mai Israel wei ami god, Egypte i tere-opunemi.”

⁵ Maranai Aaron wei i ‘nanai ma pulo aniapuna i voai bull au naona ma i vinolanola i pa, “Au maratom tana torela BADA aubaina.” ⁶ Ma Ubaubana boiboḡi rava i vomairi da ḡamoḡamo taputapuna i apui ma viturana maiteni pulona i terei. Muri ai i kiala da i am gogona ma i uma-bua guratana da i kaua labalababa.

⁷ Anina ma BADA Moses i riwei, “Ma gāira ma am rava Egypte i tere-opuneei. Tau i geduaieu ma kaua apoapoena i kauai. ⁸ Tau i me marana au tarawatu i geduaiei ma bull natuna kokoitauna i kauai. Ma i raudunelei ma pulo i apui awarina ma i riwa, ‘Wei ami god, Oo Israel, Egypte i tere-opunemi.”

⁹ Ma BADA Moses i riwei, “Wei ravai a inanai ma a aramanei tau i kolai bagibagii, ma nuapoui eḡa. ¹⁰ Ma votereu da au meji ana vikwai tau i awarii ma ana pupuni. Ma tam Moses ana terem da am epaepai maiteni dam patarai ḡaēgaena ona vitupui.”

¹¹ Wate Moses God i vīgigimanei i pa, “Oo BADA am rewapana ḡaēgaenei am rava Egypte i tere-opuneei lamna aubaina eḡa am rava awarii ma meji ma ma pupuni. ¹² Mepa da ma pupuni, Mai Egypt ina riwa, ‘Ana nota apoapoena maranai i tere-opuneei da au ola anapui ita pupuni.’ Meji avena, oram ina uba, ma eḡa ma vipupui. ¹³ ✧ Am taunola Abraham, Isaac ma Israel ma notai, tam wavamei u parivainuaḡani, ‘Tau am epaepai ana vimaḡai me ubona au mara

ma wei dobuna a paripari-vainuaġani ami epaepaia ana vere-nonoei.”¹⁴ Anina ma BADA orana i uba ma eġa apoapoena ita neiai awarii.

¹⁵ Ma Moses i ġaira me, au urana ġaima ruaġa dabadabai. God ana tarawatu wei ġaimai au naoi ma au murii i girumi. ¹⁶ Ġaima dabadabai lamna God ana kaua. Tauna ainelana i girumi.

¹⁹ Maranai Moses i turiai mepa rava i rauġaravu ma bull natuna goldei i 'nanai i maimairi ma rava i arara i 'nanai. Tauna meji orana i oai ma ġaima dabadabai ruaġa i viorereni au doa. I viaigimagimai ola au karena. ²⁰ Moses bull natuna goldei i vaia ma i apui ma i tutu-gwadagwadai da i vipokau ma au waira i tawanei ma mai Israel i egari da i uma.

²¹ Ma Aaron i riwei, “Rava aiwai i kauai awarim da u kauai da kaua apoapoe kaukauna i kauai.”

²² Aaron i paribelei, “Au bada eġa ma ġaiawa, rava ai kaua u aramanei, kaua apoapoe ai ġai. ²³ Ma i riweu, ‘god ma kauai da ina ravenita. Ma wei ravana Moses, Egyptei i tere-opunelai, tauai eġa ata aramanei aiwai awarina i tupua.’

²⁴ Lamna aubaina rava a riwei, ‘Aiaia awarina via goldei ona votawanei ma i vereu.’ Ma ai au menamenana a tawana-ruiei ma wei bull natuna i opui!”

²⁵ Moses i 'nanai da Aaron eġa tagotagogina da rava ita vibadei, ma ana ġavia ai anivinama i kauai. ²⁶ Lamna aubaina ai rauġaravu au metaetana i mairi ma i garara, “Aiai da BADA au murina, ona nei awariu!” Ma Levi ana dam i nae Moses au murina.

²⁷ Ma Moses tau i riwei, “BADA, Israel ana God e ririwa. Nelara *sod* ona lavui ma ona nae ġaravu au giana da ona nenememei ma dam turam ma vareim ma mae-turam ma viraġeni.” ²⁸ Levi ana dam Moses i voteletelei ma nai au marana nelara 3,000 i viraġeni. ²⁹ Ma Moses i riwa, “Amadodo BADA taumi i voviviremi ma i viaiaimidi da aubaina ona vipirisi pulo tauapuina, aubaina taumi BADA o voteletelei da natunatumi ma varevareimi o viraġeni.”

³⁰ Ma maratomma Moses rava i riwei, “Taumi ġo'apoapoe ġaeġaena o kauai wate ana ġae BADA awarina da ana kauana dadanei da ami ġo'apoapoe ina nota-tawanei.”

³¹ Anina ma Moses i ġae me BADA awarina ma i riwa, “Au rava kaua i apoapoe ġaġa i kauai. Tau i ai god goldei i kauai ma i raudunelei! ³² Wate marina BADA a vivibaġaim da ai ġo'apoapoei ma nota-tawanei ma mepa da eġa lamna avena ma wavau am au buka ma boa-tawanei.”

³³ Ma BADA Moses i paribelei, “Aiavoi ġo'apoapoei i kauai awariu, Tau wavai au buka ana boai. ³⁴ Marina ma nae, rava ma naiei dobu a ririweia ma au anela ina ravenim. Wate mara ina ġeta da ana kovoġa, tau i ai ġo'apoapoe aubaina ana kovoġi.”

³⁵ Ma BADA doria apoapoenei rava i kovoġi aubaina tau i god bull natuna Aaron i voai i raudunelei.

34

Ġaima ruaġa

¹ BADA, Moses i riwei, “Ġaima ruaġa dabadabai ma bori inanana me ruaġa u wamawamaia, ma au tepana riwana tagogina ana girumi me au naona.

² Ma vokaukaua ma ubaubanai ma ġei ola Sinai au tepana ma nebeleu.”

⁴ Ma Moses, ġaima ruaġa i bori me au naona nanare. Ubaubanai boiboġi ġaimai i voai ma i ġae au ola BADA i ririwei nanare. ⁵ Ma BADA apauei i ġairai ma

au ririvana i raumairiei, ma wavana i latoni, "BADA!" ⁶ *Ma Moses au naona i babara ma i viḡoreḡore, "TAU MAEMAE NONOANA! Tau rarau-nuapoapoeu ma iviu aiaina, tau eḡa laḡilaḡina amlou ita vogaigai. ⁷ Au nuavaina maemaena ina mae au rava awarii da kimta tausana ina kwa ma kua apoapoe, mae-gaeḡae ma ḡo'apoapoe ina nota-tawanei. Wate tauna eḡa kua apoapoe taukauei ita inana-tawanei, natunatui ma ḡoḡoḡai, amamai i kaukauei kovogana e vaivaia da kimta vitonuina da vi-four-na."

⁸ Moses maratagogi i mae-peu au doa ma BADA i viborumei. ⁹ I riwa, "Au bada mepa da riwa kua da tam nuanuau u vaia, a vivibaḡaim da uta vinoa ma tata nae. Wei ravai orai badobadoi, wate ai kua apoapoe ma ai ḡo'apoapoei ma nota-tawanei, ma ma vai-meleiai am buderi."

Parivainuaḡana bagibagina i ravivouini

¹⁰ BADA, Moses i riwei, "Ma rautaniḡana! Au parivainuaḡana bagibagina tam maiteni a kaukauei am patara Israel maiteni. Ma au matami kua ḡaeḡae aniba kauai ana kauei. Eḡa melanaī ai ai wenanare ita kauei au dobu. Rava anatapui au ririvami e mamae, au rewapana ina inanai da tau, BADA kua ḡaeḡae ana kauei aubaimi."

²⁸ Moses kampa i mae BADA maiteni au pom 40 ma waguvarai 40, eḡa ita am ma eḡa ita uma nai au marana. Ma BADA ḡaima au tepana parivainuaḡana riwai - Tarawatu 10 i ḡirumi.

Moses naona i lalai

²⁹ Moses ḡaima ruaḡa au tepai parivainuaḡana riwai i vinimavoei ma ola Sinaiei i ḡairai. Wate eḡa malana ita vaia da naona i lalalai aubaina tauna BADA maiteni i babani. ³⁰ Aaron ma Israel patarai i 'nanai da Moses naona i lalalai ma awarina naena i rovoei. ³¹ Wate Moses tau i ḡorei, ma Aaron ma dogadogara i nei awarina, ma awarii i babani. ³² Ma mai Israel i riei Moses awarina ma tarawatu ola au tepana i vereverei rava i pariverei.

³³ Moses naona garei i purui maranaī awari i babani-vorovei. ³⁴ Maranaī Moses e ruirui au numagara da BADA maiteni ina babani, ḡarana naona i purupurui lamna, e vovotawanei. Ma e opuopu memei ma BADA aiwai i riwei mai Israel e paripariverei, ³⁵ ma mai Israel, i 'nanai da Moses naona i lalalai. Lamna maranaī Moses naona i puru-melei da ina rui me da BADA awarina ina babani.

40

Ma Moses rava i vibaḡai numa voa purapurai BADA ana numa ḡara vivivireina voana aubaina, ma wate purapura vivivirei numa au orana bada vimae-ḡaeḡaenana aubaina, ma pirisi ai ḡara popona aubaina, ma rava i amverena da tagotagogina da nola ita vikwai. Bezalel ma Oholiab ma rava nolanolai nelara ma waivine wei purapurai i kauei me BADA i ririwei nanare.

Numa ḡara vivivireina i vikwai

¹ Ma BADA Moses i riwei, ² "Au Numa Gara Vivivireina ma vimairini aupom tagogi, madeḡa au vouna. ³ Tarawatu 10, Parivainuaḡana bokisina au orana ma poi, ma au naona anitereḡaḡara ma teretaḡonei da numa ḡarana ina babalaraḡi. ⁴ Teibol ma ruiei ma au tepana aiwai i kaukauei aubaina ma terei. Ma rampa anivojijinana ma ruiei, ma rampa ma terei ⁵ Ma incense aniapuna goldei ma terei bokisi au naona ma anitereḡaḡara ḡelauna ma terei da BADA ana numa ḡara vivivireina ina gudui. ⁶ Numa ḡara au metaetana,

* 34:6: Exo 20:5-6; Deu 7:9-10

au doa, pulo aniapuna ma terei. ⁷ Anirauoġa numa gara ma pulo aniapuna au poui ma terei ma waira ma vioai. ⁸ Numa gara ma pulo aniapuna anitereġaġara ma tere-kwaviviroi da dobuna ma gari. Ma au anirui anitereġaġara ma vidawei.

⁹ —Ma oil viaiainana ma vaia ma numa gara ma purapura anatapui au orana ma buloi ma ma vovivirei da vivivireina. ¹⁰ Ma pulo aniapuna ma ana purapura maiteni ma buloi ma ma vovivirei da vivivireina. ¹¹ Anioġa abomana ma ana animairi maiteni ma buloi ma ma vovivirei da vivivirei.

¹² —Aaron natunatuna ma neiai numa gara vivivireina au metaetana ma wairei ma oġai. ¹³ Ma Aaron pirisi ana gara vivivireina ma vioteni ma oilei ma vovivirei da aubaiu ina vipirisi pulo tauapuina. ¹⁴ Ma natunatuna ma neiai ma pirisi pulo tauapuina ai gara ma vioteni. ¹⁵ Ma ma buloi me amai u buloi nanare da ina vipirisi pulo tauapuina. Wei viaiainana Aaron ana epaepaia i vovivirei da mara nonoa kimtana patapatana awari ina vipirisi pulo tauapuina. ¹⁶ Moses anatapuna i kauana-paiei me BADA i ririwa nanare.

¹⁷ —Anina ma madeġa au viruaina au pom tagoġi nawaravi tagoġi, tui numa gara vivivireina i vimairini. ¹⁸ Moses dogo i ġarai ma tuatua i tonei ma terewaba ma anitapejijinana i ragini. ¹⁹ Ma gara ġamoġamo opinei i ġauġauri au tepana i ebani, BADA i ririwei nanare.”

²⁰ Anina ma Moses ġaima dabadabai ruaġa bokisi au orana i terei. Ma anipawe loji au orana i vionaġi bokisi au adana, ma uġuna i viaitani. ²¹ Ma bokisi i ruiei God ana au numa gara vivivireina ma anitereġaġara i terei da bokisi i mae-ġaġari, BADA i ririwei nanare.

²² Ma nanare teibol i ruiei God ana au numa gara, anitereġaġara i mae ma au doe, au laubadei i terei ²³ ma teibol au tepana palawa i pulopuloei BADA awarina i terei, BADA i ririwei nanare.

²⁴ Rampa aniterenana i vaia ma au numa gara teibol au naona, au babaġela au rauanaġei i vikialai. ²⁵ Ma rampa i apui BADA awarina, me i ririwei nanare.

²⁶ Incense aniapuna goldei anitereġaġara au naona i terei numa gara vivivireina au orana. ²⁷ Anina ma au tepana incense ġabuġabui i apui, BADA i ririwei nanare. ²⁸ Ma anitereġaġara i terei da aninae au numa gara vivireina i gudui.

²⁹ Pulo aniapuna BADA ana numa gara vivivireina au metaetana. Au tepana ġamoġamo ma palawa i apui me BADA i ririwei nanare.

³⁰ Ma aboma ġaegaena numa gara ma pulo aniapuna au poui i terei, ma au orana waira i waġi anioġa aubaina, ³¹ ma kampa Moses ma Aaron ma natunatuna urai ma aei i oġai. ³² Tui aei ma urai e oġaoġai maranai e ruirui au numa gara bo e nenae pulo au aniapuna.

³³ Ma Moses Numa gara ma Pulo aniapuna i gari-kwaviviroi. Ma anitereġaġara i terei au anirui. Anina ma Moses ana nola i kwa.

BADA ana Numa Gara Vivivireina viborumana

³⁴ *Ma apau BADA ana Numa Gara Vivivireina i purui ma ana boruma numana i vioai. ³⁵ Apau numa gara vivivireina au tepana i kiala ma BADA ana boruma numana i vioai ma lamna aubaina Moses eġa tagotagogina da ita rui. ³⁶ Ma apau i vovoepa lamna maranai mai Israel ina vaġai au dobuġela. ³⁷ Ma mepa da apau eġa ita voepa lana tui eġa ina nae. ³⁸ Maranai mai Israel e vaġavaġai, BADA ana animae apau au orana numa gara vivivireina au tepana ma waguvarai tauna ai apau au orana e ararata.

Leviticus Levi ai kua

Wei bukana wavana Leviticus, aubaina Levi ana dam e bababaniei. Tau pirisi pulo tauapuna i vovoagui. Ma BADA ana Numa Gara Vivivireina i paipaini.

Pulo taputapuna apuna

¹ BADA au Numa gara Vivivireina ma Moses i kwatuei ma i riwei i pa, ² “Wei au pariverena pulo apunana aubaina. Mai Israel ma riwei ma pa, ‘Ai ai da BADA awarina gamoġamo e apuapui, lamna bulumakau tagogi bo sipu bo gote i gamoġamoi ina neiai ana pulo.

³ —‘Mepa da gamoġamo taputapuna e apuapui am pulo, ma inana da gamoġamo orotona aiaina ma eġa ana apoapoe aiwai. Ma neiai Numa gara Vivivireina ana au anirui, da BADA ina vianinem.’ ⁴ Ma uram gamoġamona au kolana ma terei, wei e vivimataira da gamoġamo i raviepaiaim da ina iraġe am ġo’apoapoe ina oġa-tawanei. ⁵ Ma bulumakau BADA au naona ma virage ni, ma pirisi Aaron natunatuna tara, ina neiai da pulo aniapuna au adana ina voiwaiwaġa-naiei. ⁶ Anina ma Gamogamo ma opai ma ma api. ⁷ Ma Aaron natunatuna, ai ina viviri pulo aniapuna au tepana. ⁸⁻⁹ Tau sia apiapina ai araratana au tepana ina terei da ina arai, kolana da monamona maiteni. Wate amoamo da ganigani ma sia aei wairei ina oġai, ma pirisi siana anapuna ina apui. Wei pulona apuapunana lamna ġabuna aiaina BADA ina vinuaiaini.”

Wate God Moses i riwei da rava sipu bo gote, gabubu bo bunebune ita puloei me pulo e apuapui nanarena. Tauna wate Moses i riwei da menanare wei ina puloana-nei.

3

Vieġualau pulona

¹ BADA Moses awarina i babani i pa, “Ai ai da nuauba amna aubaina ana pulo bulumakau e apuapui, ma inana-kauei da burumakauna orotona bo wavina, aiaina ma eġa ana apoapoe aiwai. ² Ma urana gamoġamo au kolana ina terei ma ina virage ni Numa Gara Vivivireina ana au anirui. Ma pirisi Aaron natunatuna tara pulo aniapuna au adana ina voiwaiwaġa-naiei. ³⁻⁴ Ma amoamo monamona ava ma kaina monamona ma ganigani ana monamona, pirisi ina verei da ina apui nuauba pulona. ⁵ Ma Aaron natunatuna wei monamonai sia taputapuna e ararai au tepana ina terei ma ina apu-tagogiei, pulo aniapuna au tepana. Wei amgogona pulona ma ġabuna i ai kua BADA awarina.”

Ma gamoġamo taupuloina ana numa ravai maiteni ma ai rava ġelau sia maeterenai e aniani. Wei lamna BADA ana babani bulumakau aubaina ma riwana tagogina sipu ma gote aubaii amgogona pulona.

13

Opi dorianana tarawatu

¹ BADA Moses ma Aaron i riwei i pa, ² “Mepa da ai ai kero bo paramaitua i vaia bo opina i lebara ma e notanotai da wei kerona e viviopidoriana, lamna ana rava tauna ina naiei pirisi Aaron bo natuna tagogi awarina. ³ Pirisi kero vioana ina inana. Mepa da apara au kero e vivimairiana i arapoira ma dogona

i ġaira lamna opidoriana. Ma pirisi ina riwa da tauna eġa aiaina BADA au matana.

45 —Rava ai ai opidoriana i vaia, tauna gara wanasikasikana ina oteni, aparana eġa ina jinai ma naona ina purui ma ina kwatu ina pa, ‘Tau eġa ai ai! Eġa ona nei au ririvau!’ 46 Maranai dorianana awarina e mamae lamna tauna anina miramirana, Tauna ainelana ina mae au tano.”

17

Tara ana tarawatu

10 ✧ Ai ai Israelieina bo jentail maiteni o mamae, sia taratarana e aniani, BADA tauna ina mae-puputei ma ana rava awariei ina bori-tawanei. 11 Ai wai anatapui da lawalawai ai lawana au tarai e mamae ma lamna aubaina BADA i riwa da tara pulo au aniapuna ona voiwaiwaġi da rava ai ġo’apoapoe ina vaitawanei. Tara lamna lawana, ma lamnei ġo’apoapoe e vaivai-tawanei.

18

Viawawana ana tarawatu

1 BADA Moses i riwei i pa, 2 “Mai Israel awari ma babani ma ma riwei, ‘TAU BADA ami God.’ 3 Mai Egypt ai kua eġa ona ġovaivaitei, Wariġa kampa o mae, marina a taratara-vainanaieimi au Canaan ma ai kua eġa ona ġovaivaitei. Eġa ai lawana ona votaġotaġoi. 4 Taumi au tarawatu ona voteletelei ma riwau ona votaġotaġoi. Tau BADA ami God. 5 Mepa da au tarawatu ma riwau ona voteletelei taumi lawana ona nelaġai. TAU BADA a riwa.”

6 TAU BADA wei au babani bagibagii a vereveremi, “Eġa ai ai novuna bo vareina ina viawawanei.

19 —Maranai wavine nawaravi i vunui tauna miramirana, eġa maiteni ma viawawana.

20 —Eġa oroto ġelauna awana maiteni ma viawawana, lamna tam u vimira-melem.

21 —Natunatumi eġa ona puloei god Molek* awarina, aubaina TAU BADA ma vinimala e neineiai awariu.

22 —Eġa ai ai orotona, oroto ġelauna ina viawawanei, me oroto waivine e viawawanei, wei lamna ġo’apoapoe kaukauana God au matana.

23 ✧ —Eġa ai ai orotona ġamoġamo ina viawawanei bo wavine ina verena-melei da ġamoġamo ina viawawanei. Mepa da wei u kau ei tam u vimira-melem.

24 —Eġa wei kau ai ona kau ei da ina vimiramiraimi. Dam au Canaan maema ei anatapui wei kau ai i kau ei ma i vimira-melei. Lamna aubaina ana viaġaġana-pune ma taumi ona rui.”

19

Apoapoe terevai-jijimanina riwai

1 Ma BADA Moses i riwei i pa, 2 “Dam Israel anatapui ma tuarui ma ma riwei, ‘Taumi lawana vivivireina ona maeni. Aubaina Tau BADA ami God vivivireiu.’

✧ 17:10: Gen 9:4 * 18:21: Molek lamna mai Ammon ai god ✧ 18:23: Exo 22:19

¹⁷—Eġa oram ina raviapi ai kua apoapoena ravana awarina, wate maiteni ona kiala da kua ona tere-vaijijimani, da eġa ġo'apoapoe ona kauēi.

¹⁸☆—Eġa ma raubiwa am rava awarii, eġa aiai ma ġoaġaie, wate rava turam nuanuam ina vaia me tam nuanuam e vaivai-melei. TAU BADA.”

20

Konaġa riwana

⁶ Aiai ravana i ġoei da kua anoi ita aramanei, lamna Tau ina vibaġaiu. Eġa vinuaterena aubaina ina nae konakonaġa awarii ina bababani. Mepa da aiai wei i kauēi, nai ravana ana mae-puputei, ma au rava awariei ana viopuni.

24

Vimaimaia riwana

¹⁹ Mepa da aiai turana i vikeroi, aiwai i kaukaueia awarina nanare ina kauēi.

²⁰ Mepa da gelama i viaigai, gelamina tagogi ina wanagai, mepa da mata tagogi i viapoapoeni, matana tagogi ina apoapoei. Mepa da ivo tagogi i viaigai, ivona tagogi ina wanagai. Aiwai keron rava ġelauna i verei, tauna nanare ina kero.

²¹ Aiai ravana ġamoġamo i viraġeni ina vimaiei, wate aiai da rava i viraġeni, tauna ina iraġe. ²² Wei tarawatuna taumi anatapumi aubaimi, mai Israel ma dobu ġela ravai, aubaii TAU BADA ami God.

Numbers Au Mutulua

Pariverena

Wei bukana wavana *Numbers*, aubaina au kapita 1 da kapita 4 e ririweta da Israel ana dam 12 ma ai dam nelara biaga sorodia. Wei bukana nanare Mai Israel ai mae au mutulua madega 38 i kwa, ma aiwai i kaukauei bo ai babara au Sinai i vikarei da i nae au Canaan lamna e bababaniei.

6

Aaron natunatuna maiteni ai Viaiaina

²² BADA Moses i riwei i pa, ²³ “Aaron ma natunatuna ma riwei da wenanare mai Israel ina viaiaini ina pa,

²⁴ BADA ina viaiainimi
ma ina gagaloemi.

²⁵ BADA ivina ina ai awarimi
ma ina paina-kauemi.

²⁶ BADA ana nuaiaina ina mae-tavirei awarimi
ma nuauba ina veremi.”

²⁷ Ma nanarena, maranai Aaron ma natunatuna Tau wavauei mai Israel e viviaaini, ma Tau ana viaiaini.”

13

Taurauivu Canaan i tuvirevirei

¹ BADA Moses i riwei i pa, ² “Mai Israel ai dam 12 au orai rewapana tagotagogi ava ma vinei, da ma paritawanei da Canaan dobuna ina ivui, wei dobuna mai Israel a vereverei.”

³ Ma BADA i ririweia nanare Moses i kauei. Mai Israel ai dam 12 babadai i paritawanei. Tau i garavu au mutulua Paran i voterei da i nae au Canaan.

¹⁷ Maranai Moses ravai i paritawanei da dobuna ita ivui ma i riwei i pa, “Au Negev ona virautua da dobu violaolana ona naeni da au navanava gelauna.

¹⁸ Dobu ona tuvirevirei, ma ana patara ona inanai menanare, rava ai maga ma ai rewapana bo ai gokokokara? ¹⁹ Doa maumaurana bo ega? Ai melaagai ona tuvirevirei, garigarina bo e mamae lota? ²⁰ Doa maumaurana bo ega? Ai e gogogo bo ega? Ma ona kaunana-guratei da ai anoi gelau ona purai da ona neiai.”

²¹ Anina ma tau i dobuna i naeni, au mutulua Zin* i vikarei ma dobuna i naeni da au gia dewadewana au Rehob, wei lamna Lebo Hamath au geregerena.

Taurauivu i nememei

²⁵ Au pom 40 taurauivu dobu i tuvirevirei ma i nememei, ²⁶⁻²⁷ I nei Moses, Aaron ma Israel patarai awari au Paran mutuluana au Kadesh ma ai anoi au dobuna i vaivaia i viatataiei. Ma i pariverei i pa, “U paritawanelai da dobuna a ivui, marina grape ana gou marana ma a inanai da ani ipi gabuna aiaina ma doa maumaurana, ma aina anoi gelau a neiai da ona inanai. ²⁸ Wate kampa rava gaiagaiwai e mamae, ma ai melagai i rata kaua ma i gari-kwavirovi

* **13:21:** Wei lamna dobu gaegaena Negev au paratana i vikarei da i nae da ola Hermon au geregerena ma Hamath melagaina.

da eġa ġavia ina rui. Ma kampa mai Anak a inanai. ²⁹ Mai Amalek au mutulua Negev e mamae, ma mai Hitti mai Jebus ma mai Amori au ola e mamae ma mai Canaan au gera, Jordan wairana au ririvana e mamae.”

³⁰ Ma Caleb, rava i riwei da i genuana ma i riwa i pa, “Tana nae dobuna ravai tana virubai ma dobuna tana vaia!”

³¹ Wate taurauivu maiteni i ġeġae i pa, “Eġa! Ravai i virewapana kaua eġa me tauta. Eġa tana viġaviei.” ³² Ma nanare tau nai dobuna ana apoapoe riwana i vibabarai mai Israel awari i pa, “Nai eġa ani ipi doana aiaina ma rava manamanai ma ġaiġaiawai kampa e mamae. ³³ Ma kampa rava ġaiġaiawai Mai Nephili† a inanai (Mai Anak noinoi) tauai a inana-meleiai lamna me kapau ma nanare tau i matai lamna tauai me kapau.”

14

Mai Israel Moses ma Aaron i viġaviei

¹ Ma nai waguvaraina rava anatapui i tou mara. ² Tau anatapui Moses ma Aaron i viġaviei i pa, “Airake au Egypt ata iraġe ota! Bo weka au mutulua.

³ Aiwai aubaina BADA e nainaieta wei au dobuna da ravai sodei ina viraġenita ma awawata ma natunatuta ina pani-naiei. I ai kaua da tata wanaviraita au Egypt.” ⁴ Ma tau i babani vivira i pa, “Bada tana vinei da ina naiana-meleta au Egypt.”

⁵ Anina ma Moses ma Aaron i mae-ġaira da naoi au do Israel patarana au matai. ⁶ Nun natuna Joshua ma Jephune natuna Caleb ruaġai, tau i maiteni dobu i tuvirevirei, ai gara i sikai, ⁷ ma mai Israel anatapui i riwei, “Dobuna anatapanana a naeni ma a tuvirevirei ma dobu maumaurana. ⁸ Mepa da BADA nuanuana ina ai awarita ma ina ruieta dobuna maumaurana awarina, weka sia ma lam eġa anibaiana. ⁹ Wate BADA eġa ona viġaviei. Ma ravai dobuna e maemaeni eġa ona rovoei, tana viaġaġana-opunei. Tau i ai agu eġa. Tauta BADA maiteni ta mamae! Ravai eġa ona rovoei!”

¹⁰ Mai Israel Caleb ma Joshua ġaime i ita viraġeni wate BADA ana borumana i eġa numagara au tepana.

God Moses i riwei da ita wanavirai ma ana rava ita taravaina-naiei au mutulua da etanai e nena au *Boga lebalebarina ita naeni*.

God i riwa da rava ina kovog'i

²⁶ BADA Moses ma Aaron i riwei, ²⁷ “Wei ravai apoapoe ai beura awariu a nonora, iauiei! Mai Israel ai pariviravira awariu a nonori.” ²⁸ Wenanare ma paribelei, “BADA i riwa, Tau wavauei a ririwa da aiwai o vivibaġei, nanare ana kauiei.” ²⁹ Taumi au mutulua tupuami urabovai ina nae. O pari-virevireu aubaina taumi ami madeġa 20 ma e ġeġae ona iraġe. ³⁰ A parivainuaġami da wei au dobuna ota mae wate eġa ai ai tagogi wei au dobuna ina rui anina Jephune natuna Caleb ma Nun natuna Joshua.

³¹ Ma o ririwa da natunatumi ina vaia ai panipani, wate tau i kampa ana ruieta da dobuna o gedugeduaieia ina maeni. ³² Wate taumi patarami tupuami au mutulua ina bova-nae. ³³ *Eġa ota vipatutu ma lamna aubaina natunatumi ina vinuapoapoe au mutulua ma ina kovog'i da ina viġamoġamo-nae da madeġa 40 ina kwa nai maranaina taumi kinta magurimi ona iraġe-pai. ³⁴ Aupom

† **13:33:** Mai Nephili eġa tata aramana-kauiei, wate tau i rava gogogobui. Gen 6:4 e ririweta da tau i meiei i nei. * **14:33:** Act 7:36

40 dobuna o tuvirevirei lamna aubaina ana kovoġimi da madeġa 40, au pom tagogi maiana madeġa tagogi. Ami ġo'apoapoei aubai au kovoġa malana ona vaia. ³⁵ TAU BADA, A riwa! Tau wei ana kauē taumi ġo'apoapoe ravami anapapumi awarimi. Ami rava maiteni o vitagogiemi ma o viġavieu. Taumi anapapumi au mutulua ona kwa, taumi weka ona iraġe.

20

Miriam i 'raġe

¹ Nawaravi au vouna mai Israel anapapui au mutulua Zin i ġeta ma au Kadesh i rauġaravu. Weka Miriam i 'raġe da i doboi.

Mai Israel Moses maiteni i viparipariniġai

² *Kampa Waira eġa ma lamna aubaina tau i vitagogiei ma Moses ma Aaron ai ġavia i vomairi, ³ ma Moses maiteni i viparipariniġai i pa, "Rorova varevareiai maiteni ata iraġe tagogi BADA au matana!" ⁴ Aiwai aubaina BADA ana rava u neiai au mutulua ana ġamoġamoi da ina iraġe ⁵ Aiwai aubaina Egypte i tere-opunelai ma u neiai wei dobuna apoapoena awarina? Weka eġa ani ipi doana aiaina da witi da damala aina bo grape warami bo Pomegranates aina ina gogo, ma eġa waira aniuma!

⁶ Moses ma Aaron, patara i voterei ma i nae BADA ana numagara au metaetana ma i mae-peu au doa ma i raudune. Ma BADA ana borumana i eġa. ⁷ Ma BADA Moses i riwei, ⁸ "Am jiġona ma vaia ma tuam Aaron maiteni rava ona vitagogiei. Ma au matai kira awarina ma babani ma ana waira ina veremi. Nanare waira kirei ina opu da Israel patarana ina uma ai ġamoġamo maiteni. ⁹ Anina ma Moses jiġona BADA au naona i vaia, i ririwei nanare."

Moses kira i ravi

¹⁰ Ma Moses ma Aaron dam Israel i vitagogiei kira au naona ma Moses i riwa, "Ora potapotami! Ona genuana! Tauai waira kira au orana ana terepuniai aubaimi!"

¹¹ Ma Moses ana jigona i voepai ma kira i ravi mara ruaġa. Ma waira ġaeġaena i ruba-opu da rava ma ġamoġamo i uma.

¹² Anina ma BADA, Moses ma Aaron i riwei, "Taumi eġa ota vitumaġana-kauē da Tau vivivireu ami dam Israel au matai, ma lamna aubaina taumi eġa wei ravai ona ruiei dobuna a vereveremiana awarina."

Aaron i 'raġe

²³ Au ola Hor, Edom ana au parata, kampa BADA Moses ma Aaron i riwei, ²⁴ "Taumi riwau o rauaġaiġaiēi au Meribah ma lamna aubaina, dobu mai Israel a verevereia, Aaron kampa eġa ina rui. Tauna noinoina ina votaġoi. ²⁵ Aaron ma natuna Eleasar ma taravaia ma ma ġaei au ola Hor. ²⁶ Kampa Aaron ana pirisi garana ma votawanei ma natuna Eleasar ma vioteni. Aaron kampa ina iraġe ma noinoina ina votaġoi."

²⁷ Moses BADA i ririwei i kauē. Taui ola i ġaeni, mai Israel anapapui au matai. ²⁸ Moses Aaron ana pirisi garai i votawanei ma natuna Eleasar i vioteni. Ma kampa ola au tepana Aaron i 'raġe. Ma Moses ma Eleasar i ġaira memei.

²⁹ Maranai patarana i aramanei da Aaron i 'raġe ma i touēi da au pom 30.

21

Mota bronzei i kauēi

⁴ Tauī ola Hor i netawanei ma boga lebalebarina etanaina i vaia da Edom ita vorei. Au etanai rava amloi i ǵaiǵai aubaina ai vaǵai i manawa, ⁵ ma Moses ma God i eni i pa, “Aiwai aubaina Egyptei o taravaina-opunelai da au mutulua ana iraǵe? Ai lam eǵa! Ai waira eǵa! Ma wei lam tagogina manna a amgeduaiei.”

⁶ Ma BADA mota ǵaiǵaiawai i paritawanei awari ma maǵamaǵau i ani ma i raǵe. ⁷ Rava i nei Moses awarina ma i riwa, “Tauai ǵo’apoapoena a kauēi maranai BADA ma tam a parivireviremi. Ma raupari da BADA mota ina vaitawanei.” Ma Moses i raupari rava aubaii.

⁸ Ma BADA Moses i riwei i pa, “Mota ǵaiǵaiawana kokoitauna ma kauēi ma ai au damona ma raǵini. Maranai mota, rava aiāi i ani ma i taepai da mota kokoitauna i ’nanai, ma tauna ina lawana.” ⁹ ✧ Ma Moses mota bronzei i kauēi ma ai au damona i raǵini. Maranai mota aiāi i ani ma ravana i taepai da mota i ’nanai ma i lawana!

Au Ola Hor da i nae au Moab

¹⁰ Mai Israel i nae ma au Oboth i rauǵaravu. ¹¹ Ma Oboth i netawanei ma i nae au Iye-Abarim i mae, wei lamna mutulua, Moab au naona au maramatanei.

¹² Kampa da i nae Zered au wapuna i rauǵaravu. ¹³ Ma wei dobuna i netawanei ma i nae waira Arnon au baba ǵelauna au mutulua mai Amori ai au parata. (Moab ma Amori ai dobu au poui wei wairana e viviparata).

Mai Israel, gulau Sihon i vovaiubai

²¹ Ma mai Israel taupariverena i paritawanei da Sihon mai Amori ai gulau i pariverei i pa, ²² “Tauai a ǵoei da am au dobu ata verautua. Tauai eǵa ana deǵa ami au wapu bo grape wapuna, bo ami au waira dogona waira ana umai. Tauai gulau ana au etanai ava ana babara da am dobu paratana ana opu-tawanei.”

²³ Wate gulau Sihon mai Israel eǵa ita vianinei da ana au dobu ita verautua. Ma ana sorodia anatapui i tami ma i nae au mutulua da Israel ita nebelei. Au Jahas i ǵeta da Israel maiteni i viǵaiǵaiawa. ²⁴ Wate mai Israel i viREWAPANA ma gulau Sihon i viubai ma ai dobu waira Arnon i ǵae da waira Jabok ana parata i vaia, wei kampa mai Ammon au dobu e viviparata. Mai Ammon ai parata i gagaloana-kauēi ma lamna aubaina mai Israel eǵa ai au dobuna ita rui. ²⁵ Ma mai Israel i viǵavia da, mai Amori ai melagai i vaipai da i maeni, taon Heshbon ma melagai ǵelau kampa maiteni i vaia.

Mai Israel gulau Og i vovaiubai

³¹ Nanare mai Israel mai Amori ai dobu i vaia ma kampa i mae ³² Ma Moses tauivu i paritawanei da Jaser taon i tuvirevirei, ma muriai mai Israel i nae ma ai melagai anatapui i vaia ma mai Amori kampa maemaēi i viǵaǵana-opunei. ³³ Ma mai Israel i vira ma etanaiei i ǵae au Bashanei. Ma Bashan ai gulau Og ai sorodia anatapui maiteni i opui da tauī i nebelei au Edrei. ³⁴ Ma BADA Moses i riwei i pa, “Eǵa tauna ma rovoei, aubaina tauna, ana rava anatapui, ma ai dobu maiteni au uram a tereterei. Aiwai u kauēi Amori ai gulau Sihon awarina, au Heshbon taon, nanare gulau Og awarina ma kauēi.” ³⁵ Ma gulau

Og i viragēni natunatuna nelarai ma rava anatahui i viragēna-pai, ega aiiai ita mae. Ma mai Israel dobuna i vaia da ai dohu.

22

Balaam Israel gaḡalana i geduaiei

¹ Ma mai Israel i vomairi da Moab au wapuna, Waira Jordan au adana i raugaravu, ma au baba gēlauna Jeriko taon. ² Ma mai Israel aiwai i kauēi mai Amori awari, Zippor natuna Balak anatahui i 'nana-pai. ³ Mai Israel i maḡa kaua ma lamna aubaina mai Moab i rovo kaukaua, rovo ita iragēlei. ⁴ Ma mai Moab mai Midian babadai i riwei i pa, "Aburuna ava ma wei patarana aiwai anatahui au ririvata ina pupuna-pai, me bulumakau au wapu modu e amam."

⁵ Anina ma Moab ai gulau Balak, Beor natuna Balaam ana riwa i paritawaneī au Pethor, waira gaēgaena wavana Euphrates au ririvana. Ana riwa wenanare, "Dam tagogi Egypte i opu, ma dohu anatahui e vaivaia ma marina au ririvau i raugaravu. ⁶ Tau i viwapana kaua ega me tau, ma nei ma ravai ma parivai-iviapoapoeni, mepa da tau ravai ana vovaiubai ma wei dobunēi ana viagaḡana-opunēi. Aramaneī da maranai tam rava e viviaiani tauna viaiaina e vaivaia ma maranai u parivai-apoapoeni tauna ina apoapoe."

⁷ Ma Midian ma Moab babadai mane i vaia Balaam vimaiana aubaina ma i vomairi. Ma i gēta Balaam awarina ma Balak ana riwa i pariverēi. ⁸ Balaam ravai i paribelei i pa, "Weka ona matave ma au maratom BADA aiwai ina riweu ana pariveremi." Ma babadai kampa Balaam maiteni i mae. ⁹ God i nei ma Balaam i vitara-virevirei i pa, "Aiavoī i nei awarim?"

¹⁰ Balaam i paribelei, "Zippor natuna Balak, Moab ai gulau wei riwana i paritawaneiai i pa, ¹¹ 'Ma rautaniḡana dam gaēgaena Egypte i opui ma dohu anatahui e vivioai. Ma nei ma aubaiu ravai ma gaḡalei, da maiteni ana viḡaiḡaiawa ma ana viagaḡeī da ina vinelana."

¹² Wate God Balaam i riwei i pa, "Ega maiteni ma nae. Ega wei ravai ma gaḡalei aubaina Tau au viaiaina awarii."

¹³ Ubaubanaī Balaam i nae ma Balak ana taupariverena i riwei, "Ona nae me ami au melaḡai! BADA ega ita vianineu da maitemi tana nae."

¹⁴ Ma Moab babadai i nae me ai bada Balak awarina ma i riwei i pa, "Balaam ega ita goei da ita nei."

Anina ma Balak babada gaēgaēi i paritawaneī Balaam awarina. Ma i riwei da pulo gaēgaena ita verei mepa da tauna ita nei da mai Israel ita gaḡalei. Ma marina God Balaam i riwei da babadai maiteni ita nae Balak awarina ma God aiwai i riwei lamna ava ita kauēi.

²¹ Ma ubaubanaī Balaam i vomairi ana donki i vokaukauei ma Moab babadai maiteni i nae. ²² Wate God amlona i gaḡai kaua da Balaam i nenaē, ma ana anela i paritawaneī da ana etanai i mae-tomeni. Balaam donki i gerui ma ana taunola ruaḡa maiteni i nenaē. ²³ Ma maranai donki BADA ana anela i 'nanai ana sodna au etanai i maimairi ma i tawana-ruēi au ririva. Balaam donki i kwakwapui da ita opu me au etanai.

²⁴ Ma BADA ana anela etanai ḡuriguririna i mae-potai, Grape ḡoroḡorovai epaepana ruaḡa ḡaimēi i garigarai au poui. ²⁵ Maranai donki BADA ana anela i 'nanai ma ita deḡa lamna Balaam aena au gari i viairaturatui. Ma Balaam donki i kwapu-melei. ²⁶ Ma BADA ana anela i nae ma etanai au ḡuriguririna i mairi, weka ega gabu ita mamae-dadana da tau i ita deḡa. ²⁷ Maranai donki

anela i 'nanai, i mae-ġaira da i kiala, Balaam amlona i ġaiġai kaua ma ana jiġonei donki i kwapui.

²⁸ Anina ma BADA donki gamona i votawanei da i babani i pa, "Aiwai apoapoena a kauai awarim da mara tonuġa u kwapuui?"

²⁹ Balaam donki i riwei i pa, "Tam u vikalokaloew me bua! Awariu sod lamna marina ata virarġenim."

³⁰ Ma donki Balaam i riwei i pa, "Tau donkina tagogina marana patapatai u gerugeruii bo? Wenanare a kauana dadanei awarim bo eġa?"

Balaam i riwa, "Eġa!"

³¹ Ma BADA Balaam matana i vikalai da ana anela i 'nanai ana sodna i maimairi au etanaġi. Ma i mae-ġaira au doa ma i raudune.

³² Ma BADA ana anela i riwa i pa, "Aiwai aubaina am donki mara tonuġa u ravi? Ma nonori am vaġai lamna eġa aiaina, Tau a nei da ata viġaem.

³³ —Mara tonuġa am donki i 'nanaiu ma mara tonuġai i deġeu. Mepa da eġa, lamna tau ata virarġenim ma donki ata voterei."

³⁴ Ma Balaam BADA ana anela i riwei i pa, "A kauana-boai. Eġa ata aramanei da tam au etanaġi u maimairi da uta viġaeiu. Marina mepa da u notai da eġa ita ai au matam, tau ana nae me."

³⁵ BADA ana anela i riwa i pa, "Ravai maiteni ma nae, wate aiwai ana riwem lamna ava ma latoni." Anina ma Balaam, Balak ana babadai maiteni i nae.

23

Mara tonuġa Balak pulo i apui Balaam ana god awarina da mai Israel ita ġaġalei. Wate marana patapatai Balaam eġa mai Israel ita ġaġalei. Ma God aiaina ita kauai mai Israel awarii lamna ava i babaniei. Balaam mara 4 God ana babani mai Israel awarii i babaniei. Wei lamna ana babani viruaina.

¹⁸ Ma Balaam wei riwana i riwei i pa,
"Balak, Zippor natuna ma vomairi;

ma Ma rautaniġana kaua.

¹⁹ God eġa rava ota, Tauna eġa ita morumoru.

Bo ana nota ita viravirai.

Tauna aiwai i babaniei,

nanare ina tupua

Aiwai i parivainuaġani;

nanare ina kauai.

²⁰ I riweu da wei ravai ana viaiaini;

maranai God e viaiaina, tau eġa tagotagogina da ana virai.

²¹ BADA ai God

taui maiteni e mamae, ma taui e vovoepeapai da Tauna ai gulau.

Tauna eġa nuabola bo apoapoe ita neineiai Jacob ġoġoġana - mai Israel awari.

²² God taui Egypte i tere-opunei,

Aubaii i viġavia me bulumakau moduei.

²³ Eġa ai ai Israel ina ġaġalei,

bo ina baravui.

Marina rava ina riwa,

'Ona inanai God aiwai i kauai mai Israel aubai.'

²⁴ Mai Israel lamna me Lion vivirewapanana.

E vovomairi da ana ġavia e vivirarġeni

ma tarana e umaumai,

Anina ma ina rauvirai da ina matave."

24

Anina ma Balaam mara vi-four-na God riwana i babaniei, i pa:

17 “God i viatataieu da rava muriai e nenei,
a inanai wate eġa laġilaġina ita nenei,
Jacob ana damei gulau ana jiġona

Ana borumana me ubona gamrina Israeliei e opuopu.
Moab muruai ma Seth natunatuna
anatapui kolaġi ina viaigwadagwadai.

18 Ana ġavia Edom ina vovaiubai
ma ai dobu ina vaia,
ma mai Israel ina virewapana guratana.

19 Gulau, Jacob ana damei ina nei
ma mai Moab mae-tereterei ai au melagai ina pupuni.”

25

Mai Israel, Baal i raudunelei

1 Maranai mai Israel au Shittim i mamae, nelara i vikarei da Moab waivinei i viawawanei. 2 Wei waivine, nelara i riwei da i nei da ai god awarii puloi i apuapui.* Ma anatapui i am gogona ma ai godna i raudunelei. 3 Wei kauanei mai Israel Baal-Peor i voepaepai ma lamnei BADA ana meji i vikalai.

4 BADA Moses i riwei i pa, “Babadai anatapui ona vaia ma madeġai BADA au matana ona viraġena-naiei, da tau au meji awarimi ina dauva.”

5 Ma Moses Israel babadai i riwei i pa, “Taumi tagotagogi ava ami au dam anatapui da Baal-Peor i raudunelei ona viraġeni.”

6 Moses ma Israel patarana BADA ana numa gara au metaeta i toutou, ma au matai oroto Israeliei wavine Midianei i taravaina-ruiei ana au numa gara. 7 Maranai Aaron ġoġana pirisi wavana Phineas wei kauana i ‘nananai, boru i voterei ma pawasi i lavui, 8 ma Israel iei i votaġoi da ana au numa gara ma pawasiei uporana i tonai da wavine au uporana i opu-vivira. Ma doriana apoapoena au Israel i kwa. 9 Wate wei gimna rava 24,000 i viraġeni.

10 BADA Moses i riwei i pa, 11 “Aaron ġoġana pirisi Phineas au meji mai Israel awari i viubai; da tau i eġa ata pupuni aubaina tauna ana nota me tau au nota, rava eġa god ġelau i viraġeni ina voepaepaei anina Tau ava. 12 Lamna aubaina tauna ma riwei da maiteni parivainuagana bagibagina ana kau i da ata ruaga tana viturana vivira. 13 Tau aubai i viraġeni i viraġeni nonoa.”

27

God Joshua i vinei

18 *Muriai BADA Moses i riwei i pa, “Aruau Nun natuna - Joshua awarina, lamna aubaina ma taravaini ma uram au tepana ma terei da ma vovivirei au nola aubaina. 19 Ma naei Pirisi Eleasar awarina, Israel patarana anatapui au matai ma ma viaiaini da ina raviepaieim. 20 Ma vovai-virewapani da Israel patarana tauna ina rautaniġanei. 21 Tauna Pirisi Eleasar maiteni ina nola da

* 25:2: Wei kau i lamna god ġelau i raudunelei, ma lamnei Moab waivinei ai vitumaġana nanare i eraerawa. Maranai Israel nelarai wei waivinei maiteni i viviawawana, tau i ai god Baal i raudunelei ma i vovoaġi da ai dobu ita viaiaini da ita maura. ☆ 27:18: Exo 24:13

ġaima e ġoreġorei *urim*, * awarinei au nota ina vaivaia. Wei taunei Eleasar, ma Joshua ina agui Israel ai au lawana.”

²² Ma BADA aiwai i ririwei, Moses nanare i kauei. Joshua i taravaini ma Pirisi Eleasar ma Israel patarana au naoi i vimairini. ²³ Ma urana au tepana i terei ma i vinei da ana raviepaia.

33

God mai Israel i egari da Canaan ina vaia

⁵⁰ Mai Israel Moab au wapuna, waira Jordan au ririvana i mamae ma, mai Jeriko au baba ġelauna. Ma BADA Moses i riwei, ⁵¹ “Wei riwai mai Israel ma riwei, ‘Maranai Jordan o damani da au Canaan, ⁵² Dobuna taumaenina anatapui ona viaġaġana-opunei. Ai gana da ai kokoitau anatapui ona rika-viamoamoai. ⁵³ Dobu a veremi ona vaia, ġariemi da ona maeni. ⁵⁴ Doa ona ġutai dam damai awarii, au ġaima ina viatataiemi nanare. Doa vounaina dam vounaina ona verei ma dam voaburuna nanare ana ġuta voaburuna. Wate ġaimi ana pariveremi metauna damna, metauna doana ina vaia. Dam anatapui doa ina vaia.

⁵⁵ —‘Wate mepa da nai dobuna taumaenina eġa ona viaġaġana-opunei ma o vianinei da ina mae, tui lamna me vunavuna au matami bo donadona au ririvami maemaena, ma wei vita ġaeġaena ina veremi wei au doana. ⁵⁶ Mepa da ravai eġa ona viaġaġana-opunei. Lamna taumi ana pupunimi me a viogei da tui ana pupuni.”

35

Anigagalo melagii

⁹ Ma BADA Moses i riwei i pa, ¹⁰ “Mai Israel ma riwei, ‘Maranai Waira Jordan o damani da au Canaan o rui, ¹¹ melagai ġelau ina vinei da rava ai anigagalo. Maranai rava turana i vunu-boai da i ‘rage, tui weka ina ruba da ina gagaloei.’ ¹² Ona riwei, ‘Weka ma mae da raubiwa ravai eġa ina vodadanim ma rauetara ma paini.”

* **27:21:** Urim lamna ġaima aburuna. Ma nai ġaemana pirisi e viviatataiei da God ana nota i ririweta. Tauta ega tata aramane 29-30 Exodus ma inana.

Deuteronomy Tarawatu Viruaina

Pariverena

Moses wei au *bukana* mai Israel i pariveri menanare ina kauanei maranai au Canaan ina rui da ina vaia da ina viġariei. Moses eġa maiteni au dobuna ina rui ma lamna aubaina i vitauririwei muriai da tauna ita irage. I parivainotai menanare God tau i Egypte i taravaina-opuneiai ma au mutulua i 'nana-vaitetei. I riwana-melei menanare God ina voteletekana-kauai maranai i rui au Keinan.

Mai Greece ai ponei, wei *bukana* wavana* anona Tarawatu Viruaina, aubaina Moses marina mara viruaina God ana tarawatu mai Israel e vereveri. Wei lamna eġa tarawatu vouna bo tarawatu tapuna ma tagogina.

4

Moses mai Israel i egari da God ina voteletelei

¹ Ma Moses, Israel i riwei i pa, "Mai Israel Ona rautaniġana kaua! Au Tarawatu ma au viararamana anatapui ona votelatelana-kauai da ona lawana da BADA, noinoita ai God, dobu i vereveremi, ona vaia da ina viġarimie. ² BADA ana tarawatu a ririwemi, eġa tarawatu ġelau i tepana ona viruini ma eġa ona vaitawanei. Anina ona voteletelei."

⁶ Tarawatu i ona vojġina-kauai da dam ġelau i ami nuaulaula ma ami aramana ina inana. Ma tarawatu ina nonori ma ina riwa, "Riwa kaua da dam Israel lamna dam nuauaulaula ma araramani. ⁷ Ata BADA au ririvata ma e vovoaguita maranai ta raraupari awarina. Metauna damna ġelau, ġaeġae bo muomuoi, ai God nanare ai rava awarii e kaukauei. ⁸ Tarawatu i aia i ma ġijmani anatapui amadodo a ririwemi, Eġa mepa dam ġelauna aburuna bo ġaeġaena ana tarawatu ġijmanina me wei."

³²⁻³⁴ Maranai BADA urana vivirewapananei Egypt ei i tereopunemi, tauna kaua babai ma viwapanai i kauai. Mai Egypt i vipupui aubaimi. Ma i vainimi da natunatuna, ma au ola Sinai o nonori awarimi i babani, ma o nonori ai menamena au orana ma awarimi i babani, ma lawalawaimi o mae! Wenanare wariġa i tupua dadana awarii bo eġa? Eġa! Ona nae me da au karena, maranai God oroto ma wavine i kauai da marina; ma dobu au giana da dobu ġela au giana ona baiei. Kaua wenanare aniba i tupua-dadana bo eġa?

³⁹ Amadodo ona aramanei ma eġa melanai nuanuami ina vuru da BADA lamna God au mara ma au dobu. Eġa god ġelauna ita mamae. ⁴⁰ Ana tarawatu amadodo a vereveremi anatapuna ona voteletelei. Da aiwai anatapuna ina ai taumi ma ami epaepaia au murimi ma ami mae ina manawa wei au dobuna BADA e verevere-nonoemi.

6

BADA ami God nuanuami ina vaia

^{4*} "Ona rautaniġana Oo Israel! BADA ata God, Tauna ava BADA. ^{5*} Nuanuami ina vaia orami anatapunei ma aruami anatapunei, ma ami rewapana

* :: Deuteronomy ✧ 6:4: Mrk 12:29 ✧ 6:5: Mrk 12:30

anatapunei. ⁶ *Wei tarawatuna amadodo a vereveremi ona vojijina-kauei. ⁷ Natunatumi ona viararamani. Ona babaniei maranai o viboruboru numa au orana bo o bababara-nae, bo muriai da ona matave bo o matave-vomairi.”

7

BADA ana rava vinevinei mai Israel

¹ *Ma Moses mai Israel i riwei, “Maranai BADA ami God i ruiemi dobuna i vereveremiana; Tauna au naomi ami ġavia anatahui ina viaġaġana-opunei: mai Hitti, mai Girgash, mai Amori, mai Canaan, mai Perisi, mai Hivi, ma mai Jebus. Dam seven ġaeġaei ma vivirewapana kauai eġa me taumi. ² Ma maranai BADA ami God tui au urami i terei ma o vovaiubai lamna taumi wei ravai ona pupuni. Eġa maiteni aiwai babanina ona kauei; ma eġa ona rau-nuapoapoelei. ³ Eġa awarii ona tavine. Eġa natunatumi guguinii bo laragai ona verei da ina ravaġi. ⁴ Aubaina natunatumi ina raveni da BADA ina voterei ma god ġelau i raudunelei. Ma BADA ana amloġaiġai awarimi ina nei ma ina pupunimi. ⁵ Wenanare awari ona kauei. Ai pulo aniapuna ona viairikarikai ma ganai ona viaigwadagwadi; ma Asherah kokoitau i ona viaigaiġai ma ai au menamenana ona apui. ⁶ *Aubaina BADA taumi i vinemi ma i viaiainimi Tauna aubaina. BADA rava maġamaġau au dohu ma taumi i vinemi da ġarinei.

⁷ —Ma BADA eġa ita rauoġarem ma ita vinem aubaina taumi dam patarana ġaeġaena, eġa me dam ġelau. Riwa kaua da taumi dam aburuoia au dohu. ⁸ Wate BADA nuanuami i vaia ma parivainuagana bagibagina noinoimi maiteni i kauei. Ma lamna aubaina urana virewapananei panipani au orana i vai-melemi, Pharaoh - mai Egypt ai gulau awarina. ⁹ *Ona aramana-kauei da BADA ami God. Tauna ava God ma tauna God vipatutuna ma aiwai e ririwei e kaukauei. Tui da nuanuana e vaivaia ma ana babani e vovoteletelei, Tauna tui nuanuana e vaivai-kauei ma e viviaiaina-kauei i parivainuagani nanare da kimta tausani. ¹⁰ Wate taumi da BADA o rauaġaiġaie; Tauna eġa ina volatlatemi ma ina pupunimi. ¹¹ Nanare taumi ona inana-kauei da tarawatu ma viararamana anatahui amadodo a vereveremi ona vovoteletelei.”

8

BADA ami God eġa nuanuami ina vuru

² Moses ana rava i riwei i pa, “Nuanuami eġa ina vuru; menanare BADA ami God au mutulua i ravenimi da madeġai 40 da volaġota ota aramanei ma orami ana rewapana ita inana. Ma ita aramanei ana tarawatu ona vovoteletelei bo eġa. ³ Ee nanare! I vaimiraġenimi da o volaġota ma mannei i viambagibagim. Amamami maiteni manna o vinuanainei; eġa mepa ota amdadani. I kauei da ita viararamanimi da rava eġa lam ava awarinei ita mamae, wate riwa anatahui BADA gamonei e opuopu.

¹² —Maranai o amam kaua, ma numa aiiai o maemaeni, ¹³ ma maranai ami bulumakau ma sipu borui e maġamaġa, ma e vivipurapura; ma e maumaurakau. ¹⁴ Ona inana-kaua da eġa ona mae-ġaeġae, ma nuanuami ina vuru! Da BADA menanare Egypt ei panipani au dobuna i tere-opunemi. ¹⁵ I taravainaiemi au mutulua ġaeġaena ma vi'nirovorovona mota ġaiġaiawai ma tanara

ai dobu. Dobu paipairana ma eġa waira. Wate i kauēi da kira i ravi ma waira i ruba-opu taumi aubaimi. ¹⁶ Au mutulua *manna* i veremi da o am; amamami nai lamna eġa ita am-dadani. Wei lamnei i raudadanimi da ota volaġota; da au damona ami lawana ita ai. ¹⁷ Ona inana-kaua da eġa au nuanuami ona riwa, 'Tauai ai rewapanēi ma ai egolei a vipurapura ma a maura.' ¹⁸ Wate BADA am God eġa nuanuami ina vuru aubaina tauna tepanēi ta maumaura, ma lamnei parivainuaġana bagibagina noinoimi maiteni i kaukauei e rarauano."

11

God aiwai i kaukaueia ona notai

¹⁸ ✧ Moses mai Israel i riwei, "BADA riwana eġa nuanuami ina vuruvuru ma ae-tuġuna ona rereġi. Ona girumi da au urami ona raġini ma ġelau i mu-ruami ona raġini ami mataira. ¹⁹ Natunatumi ona viararamani, ona babanēi: ami au viboruboru bo maranai o bababara bo o vililauvitau ma maranai o vovobagibagi.

²⁶ —Ona inana! Au naomi viaiaina ma kovoġa a tereterei, ma tam am ġoana. ²⁷ Marina BADA ami God ana tarawatu a vereveremi. Mepa da Ona votaġotaġoi; tauna ina viaiainimi. ²⁸ Mepa da ana tarawatu ona geduaiei ma ona maetaviremi ma god ġelau ina viborumei; BADA ina kovoġimi. ³² Lamna aubaina tarawatu ma viararamana a vereveremi, ona kauana-kauēi da ona voteletelei."

17

Gulau vinena

¹⁴ ✧ "Maranai BADA ami God dobu e vereveremia o ruiruiana, ma o vaia, ma numa o voanaiei da o maeni. Ma ona riwa, 'Dam ġelau ai gulau e mamae ma tauta menanare?' ¹⁵ Ona inana-kauēi da BADA ami dam nununai awariei ami gulau ina vinevinei, ma eġa dobu ġela ravai ona vinei. ¹⁶ Ma tauna eġa ana horse maġamaġau i na ġamoi. Ma eġa rava ina paritawanei au Egypt da horse ina gimarai. Aubaina BADA i riwa da natunatumana eġa melanai ina naeme kampa. ¹⁷ ✧ Ma gulau eġa awawana ina maġa, ma eġa gold ma silver ina maurei da nuapouna ina vinua-raġaraġai. ¹⁸ Ma maranai i vigulau, tauna pirisi Levi ana damei maiteni ina kiala da nimanei tarawatu bukana ina giruma tauna aubaina. ¹⁹ Wei bukana au ririvana ina mae ma ina iava-nonoei ma lamnei BADA ina vivirei ma ana tarawatu ina vipatutuei. ²⁰ Ma lamnei eġa ina terepamei ma ana rava ina inana-ġairei bo eġa tarawatu ina mae-puputei ma ina deġa au kelakelauna bo au oiena. Ma tauna ma ana epaepaia ina mae gulau au Israel da kimta maġamaġau ina kwa."

18

BADA wei kauai i geduaina-kauēi

⁹ Maranai BADA dobu i vereveremiana o ruirui, eġa dobuna taumaeni ai kaua apoapoe ma vinimalamai ona ġovaivaitei. ¹⁰ ✧ Eġa melanai: aiai tam natum orotona bo wavinena ma verenei da pulo aubaina ina apui; bo ma vimata gangam, mataira aiwai ma inainanai ma muriai aiwai ina tupua, rava ma ririwei;

bo ma parauma;
bo ma gāgala;
bo ma wigwerigweri;

¹¹ Ma eāa konaāa bo arua maiteni ma babani bo arua ma gōrei da ina rui awarim.

¹² BADA tauī da wei kauai apoapoe e kaukauei, i geduaina-kauei. Ma lamna aubaina aburuna ava Tauna rava wei dobuna maemaei ina viagāgana-opunei au naomi. ¹³ Marana patapatana BADA ami God ona voteletelei. ¹⁴ Wei ravai barabaravui ma paraparaumi. Wate aburuna ava da ai doa anatapuna ona kwalei. Ma BADA ami God e viviāaemi da wei ravai eāa ai kaua ona gōvaivaitei.

God Peroveta me Moses ina paritawaneiai

¹⁵ *BADA ami God, Peroveta me tau ami damei ina paritawaneiai. Taumi nai ravana ona rautaniāaneī. ¹⁶ Aubaina taumi wei lamna o vivibaāei maranai o vitagogiemi ola Horeb au karena ma o riwa, “Eāa BADA ponana tana nonori bo ai gāeāena menamenana tana inana-melei da tana vi’raāgerāgelana.”

¹⁷ BADA i riweu, “Ai vibaāa i ai. ¹⁸ Tau ai damei peroveta ana terepai me tam nanare, Ma riwau au gamona ana terei, da aubaiu ina vitau-vibabani. ¹⁹ *Tauna wavauei ina jima, ma pariviravirai ana kovoāi. ²⁰ Wate maranai peroveta i mae-gāeāe ma e ririwa da wavauei e jimajima wate tau eāa babani ata verei, bo god gēlauai aubai e nolanolā, Nai perovetana ona viraāeni. ²¹ Mepa da o vinuanaina, ‘Menanare tana aramaneī da lamna eāa BADA ita babani?’ ²² Wenanare ona aramaneī. Maranai peroveta i babani BADA au wavaneī ma anona eāa ita tupua lamna nai babanina tauna ana babani ma eāa BADA. Lamna tauna ana vinuanotanota, nai ravana eāa ona rovoei.”

31

Joshua Moses i raviepaiai

⁷ Ma Moses Joshua i kwatuei da i nei. Ma Israel patarai au matai i riwei i pa, “Ma virewapana ma tepam ina tora. Tam wei patarai ma ruiei dobu BADA noinoim i verevereiana. Dobuna ma gūtai da Israel dam ma patai ma ma voagui da ina viāariei. ⁸ *BADA Tauoina awarim ina mae ma am etanai ina raveni. Eāa melanai ina netawanem bo ina voterem. Lamna aubaina eāa ma rovo bo oram ina peul!”

34

Moses i 'raāe

¹ Ma Moses Moab wapuna i netawaneī ma ola Nebo i gāeni da au tepa dewadewana e gōre-gōrei Pisgah, ma au navanava gēlaua lamna Jeriko. Weka au Pisgah BADA Moses dobu anatapuna i viatataieī, au Gilead i vikarei da i gāe au Dan. ² Ma dobu Naphtali, dobu Ephraim ma dobu Manasseh, dobu Judah, ma i nae da au Mediterranean bogana. ³ Ma BADA Moses mutulua e gōre-gōrei Negev i viatataieī; ma Jordan gaubana da i nae da au Jeriko da i nae da au uama Zoar melagaina. ⁴ *Ma BADA i riwa, “Wei dobuna lamna Abraham,

* 18:15: Act 3:22; 7:37 * 18:19: Act 3:23 * 31:8: Jos 1:5 * 34:4: Gen 12:7; Gen 26:3; Gen 28:13

Isaac ma Jacob a parivainuagāni da ‘ami epaepaipaia ana verei.’ A voterem da dobu matamei u inanai, wate au dobuna eḡa ma rui.”

⁵⁻⁹ Muriai Moses urana Joshua, Nun natuna au kolana i terei ma i viaiaini ma nuaulaula orana i ruini. Ma lamna aubaina mai Israel Joshua i voteletelei Moses i ririweia nanare. Ma BADA ana taunola Moses, i ‘raḡe mai Moab ai au dobu, BADA i ririwei nanare.

Joshua

Pariverena

Wei *bukana* e ririweta da menanare mai Israel i rui au Canaan da rava kampa maemaēi i vovaiubai. Ma nanare e ririweta da mai Israel menanare dobu i ġutanei ai dam 12 awari. Wei *bukanawavana* Joshua aubaina bukana au karena e ririweta da aiwai aubaina da Joshua i terei da mai Israel ai bada, maranai Moses i 'raġe.

BADA, Joshua i vinei

¹ Maranai BADA ana taunola Moses i 'raġe; ma Joshua, Nun natuna ma Moses ana tauagu i riwei, ² "Au taunola Moses i 'raġe. Marina mai Israel maiteni ona vokaukua ma Jordan ona damani da dobu a vereveremiana kampa ona ġeta. ³ Metaui dobu ae-lapalapami o terei, lamna ina viġarimiei, Moses wenanare a parivainuagani. ⁴ Ami dobu lamna mutulua Negev da Lebanon; au waira Euphrates (au maramatanei) da mai Hitti ai dobu anapuna da i ġaira madeġa e arearere lana Mediterranean au bogana. ⁵ *Eġa aiai ina vobelem bo ina viubaim am au lawana. Tau awarim ana mae, me Moses awarina a kaukauei nanare. Tau eġa melanai ana tere-ġairem bo ana voterem.

⁶ *—Parivainuagana bagibagina a kauēi wei ravai noinoii maiteni da wei dobu ana verei. Lamna aubaina ma virewapana ma tepam ina tora ma am rava ma ruiēi wei au dobu. ⁷ Anina ma virewapana ma tepam ina tora; ma nuanuam eġa ina vuru da tarawatu Moses i verem, anapuna ma voteletei. Ma ma vojijina-kauēi da awarina eġa ma deġa au oiem bo au kelakelaum da aiwai anapuna e kaukauei ina ai. ⁸ Marana patapatāi wei tarawatuna ma iaiavi. Ma marai da waguvarai ma vinua-notenotei; wei lamnei tarawatu anapuna ma aramanei. Mepa da wenanare ma kauēi lamna tam ma maura ma nuaiāi ġaeġaena ma nelaġai kaua au anapuna."

5

Raġona naona au Canaan

¹⁰ *Mai Israel au Gilgal i mae Jeriko au wapuna. Ma Aupom vi-14-na aubigai nawaravi naona tauri raġona torelana i apui. ¹¹⁻¹² *Ma ubaubanai ġelauna, raġona au murina, tauri witi au wapu i tuarui ma palawa dabadabai i apui ma i am. Ma ubaubanai ġelauna Manna raua i voterei, tauri wei lamna eġa ita am-melei, ma ai lam wapuei i tuarui. Mai Israel eġa manna ita am-melei, lam ai au doa au dobu Canaan i vaia da i amam.

24

Muriai Joshua ma mai Israel mai Canaan maiteni i viġaiġaiawa, dobu au giana da au giana. Ma dobuana ravai i viraġeni, wate ġelau i eġa ita viraġeni ma maiteni i mae. Muriai Joshua dobu i ġutai Israel ana dam twelve awari. Tauri i nae ma ai doa i maeni melagāi nonoana mai Canaan i voavoāia. Madeġa maġamaġai i kwa ma Joshua mai Israel i vitagogiana-melei.

Mai Israel i riwa da BADA ina vitaunolei

¹ Muriai Joshua dam anatapui i ġorei da au Shekem ita vitagogiei. Maranai kampa i ġeta Joshua, dogadogara, dam babadai ma melagai babadai i ġoreiai da ita nae BADA au naona ita mairi.

² Joshua rava anatapui i riwei i pa, “BADA mai Israel ai God e ririwa, ‘Wariaġa noimi Terah ma natunatuna Abraham ma Nahor waira Euphrates au baba ġelauna i mae, ma god maġamaġau i rarausunelei. ³ ✧Wate noimi Abraham nai dobunei a vaitawanei ma i naiei da Canaan doana ana tapuna a viatataiei, ma ana epeaipaia a vimaġai. Ma natuna Isaac a verei.

¹³ —“Tau dobu a veremi ana debagauna ma ana peipeina, doana eġa ota nolei ma taon gaeġaei a vereoimi, marina o maemaeni, eġa ota voai, ma grape ma olive o amam wate eġa, taumi ota paewi.’

¹⁴ —Lamna aubaina BADA ona voteletelei ma orami taputapunei ona vipatutu. Noinoimi god morumorui kokoitau, i rarausunelei au Egypt bo au waira Euphrates ona kwajiei au modu ma BADA ainelana ona viborumei.

¹⁵ Wate mepa da BADA viborumeina o geduaiei, lamna amadodo ona vine da noinoimi ai god waira Euphrates au baba ġelauna bo marina ravai ai au dobu o mamae mai Amori ai god ona nolei. Wate tau au numa ravai maiteni BADA ana viborumei.”

¹⁶ Ma rava i paribelei, “Tauai eġa melanai ai BADA ana voterei ma god ġelau ana viborumei. ¹⁷ BADA ata God tauoina au Egypt i tere-opuneta noinoita maiteni maranai au Egypt ta vilaraga. Ma kua vivirewapanai ma aniba i kauei au mataiai. Ma ai au vaġai manamanaina i painiai dam ġelau au poui da wei au paratana. ¹⁸ Mai Amori ma dam ġelau wei au dobuna i mamae wate BADA aubai ai ravai i viġaġana-opunei. Lamna aubaina tauai BADA ana borumei, aubaina tauna ainelana ata God.”

Judges Taurauetara

Pariverena

Wei au bukana Joshua ana irāge marana ma i nae da Samuel ana tupua marana e ririweta.

Vinevinena

Joshua au murina aiwai i tupua (Jdg 2:7-19).

2

Joshua au murina

⁷ Mai Israel BADA i viborumei maranai Joshua lawalawaina i mamae ma i 'raḡe ma kimtana magumagurii biāga i mamae i 'raḡe-pai, wei ravai BADA kaua ḡaeḡae i kauēi i vimatamatei.

⁸ Nun natuna - Joshua BADA ana taunola ana madeḡa 110 ma i 'raḡe. ⁹ Ma doa i vereverēia au Timnat Herek i doboi, Ephraim au olana, wei lamna Ola Gaash ana au laubadei.

¹⁰ Anina ma wei kimtana i nepai amamai awarii ma kimta ḡelauna ai gabu i vaia. Wate tauī BADA eḡa ita aramaneī ma nanare aiwai i kauēi mai Israel aubai. ¹¹ Ma kaua apoapoei i kauēi BADA awarina ma Baal kokoitauī i raudunelei. ¹² Tauī BADA amamai ai God i votere-tawanei; Wei Godna tauī Egypte i taravaina-opunei. Ma i nae ma dobuḡela ravai au ririvai maemaēi ai god i viborumei. Wei kauana BADA i viamlo-ḡaiḡaini. ¹³ Tauī BADA i voterei ma Baal ma awana Ashtoreth kokoitauī i viborumei. ¹⁴ Ma BADA amlona i ḡaiḡai kua mai Israel awari, da i veredamaneī ai ḡavia awari ma tauī ai purapura i tama-naiei. Ma i voterei ai ḡaviai maḡamaḡauī au ririvai awari, ma tauī eḡa tagotagogina da ita vobelei. ¹⁵ BADA mai Israel i viḡavieī maranai i opuopu viḡavia aubaina. Lamna aubaina eḡa ita vovaiuba BADA i ririwei nanare. Ma tauī i vinuabola kua.

¹⁶ Anina ma BADA taurauetara bo ḡavia babadai i terepai, da i voagui da ai ḡavia i vovaiubai. ¹⁷ Wate tauī ai taurauetara i parivireirei ma god ḡelauī i eraweī ma i raudunelei. Tauī laḡilaḡina amamai i bababara lana i voterei ma BADA i rau-aḡaiḡaiei. ¹⁸ BADA mai Israel ai tou i nonori menanare ai ḡavia tauī i rau-iviapoapoelei. BADA taurauetara i terei ma i voagui ma i gagaloei. Maranai taurauetara i mae, BADA mai Israel i raunuapoapolei. ¹⁹ Wate maranai taurauetara i 'raḡe, rava, BADA i mae-puputei ma i apoapoe kua eḡa me amamai nanare ma god ḡelauī i vitaunolei ma i raudunelei. Tauī i geduai kua da ai kauai apoapoei ma ai ora pota ita voterei.

Mai Israel kua apoapoei i kaukauei lamna ai parivainuaḡana bagibagina BADA maiteni i kaukauei i viviaigai. BADA amlona i ḡaiḡai ma ana nota i terei da mai Israel ita raudadani da ita voagui da dobuḡela ravai ita viaḡaḡana-opunei. Dobuḡela ravai mai Israel i raudadani da tauī BADA ina votaḡotaḡoi bo eḡa me amamai i kauēi nanare.

1 Samuel

Samuel ana buka tagogi

Pariverena

Buka 4 ma Samuel ana buka i vinoa da Israel ma Judah ai vigulau riwana i parivereta, Samuel tauna wavana naenaena wei bukana tagogi au orana. Tauna mai Israel ai *taurauetara* damona. Tauna, Saul ma David au kolai monamona i waği da i vigulau, lamna aubaina wei bukana i viwavai Samuel. Wei bukana mai Israel ai kaua e bababaniei i nae da Saul ana au irağe.

Vinevinei

Samuel ana tupua (1; 2:1-11; 3:1-21)

Mai Israel gulau i vibagei (8:1-22a)

Samuel Saul i buloi (9:1-3, 15-16, 10:1-2, 5-24)

Saul i vivibada (11:14-15; 13:13-14; 15:1-4)

BADA Saul i geduaiei (15:7-23, 27-29, 34-35)

Samuel David i buloi (16:1-7)

Saul David i unurei (18:7-9)

David Saul i ruba-tawanei (21:1-6)

Saul ana irağe (31:1-5)

Samuel i tupua

¹ Orotog tagogi wavana Elkanah, ana dam Ephraim ma ana melağai Ramah, Ephraim au olana i mae. Elkanah amana Jeroham, gogana Elihu ma noina Tohu, ma ai bariawa Zuph, ai dam Ephraim. ² Tauna awawana ruağa Hannah ma Peninah. Peninah i vinatuna ma Hannah aipoi.

³ Madegana patapatana Elkanah Ramah i netawanei ma i nae au Shiloh da BADA VIVIREWAPANA KAUKAUANA ita voepaepai ma pulo ita apui awarina. Weka Eli natunatuna Hophni ma Phineas BADA ana pirişi pulo tauapui i mae. ⁴ Maranai Elkanah pulo i apuapui ma sia sikasikana i gütai da awana Peninah ma natunatuna i patai. ⁵ Wate awana Hannah sia vinevinena i verei aubaina awana nuanuana i vai-kauei avena da BADA i kauei da tauna aipoi. ⁶ BADA Hannah manawana i gudui ma lamna aubaina turana i vivinamei ma i vivijiboğa-nonoei da ita vinuabolai. ⁷ Wei kauana i mae madegana patapatana. Maranai Hannah i nae BADA ana au numa, Peninah tauna i vivinuabolai ma i vitoutouni da eğa ita amam. ⁸ Maranai Elkanah awana Hannah i pariparidaneı, “Hannah aiwai e toutouei? Aiwai aubaina eğa uta amam? Aiwai aubaina e vivinuabola, natunatum eğa lamna e vivinuabolei bo? Tau weka! Natunatum nelarai 10 epai!”

⁹⁻¹⁰ Mara tagogi maranai tauı i am vorovei BADA ana au numa au Shiloh, Hannah orana i viara kaua ma ana toutouna BADA awarina i raupari. Pirişi Eli kampa ana au gabu tempol au metaetana i kiakiala. ¹¹ Ma i parivainuagana i pa, “Oo BADA VIVIREWAPANA KAUKAUAM. Ma inanai am taunola au ora-tou uta inanai! Ma uta notai ma eğa nuanuam ina vuru. Mepa da natu orotona uta verei lamna teverana ana veremelem da ina vilaragem ana au lawana au anatapura, ma aparana eğa ina bori-dadanei.”

¹² Ma i raraupari BADA awarina ma Eli tauna ipirina i 'nainanai. ¹³ Hannah au nuanuana iraraupari ma ipirina ava i vidagudagu wate eğa babani ita opuopu. Ma Eli i notai da tauna i uma-bua, ¹⁴ ma awarina i riwa, “Ina baem bo, uma bua ma voterei!”

¹⁵ Wate Hannah i paribelei, “Eġa nanare au bada tau eġa waira bagibagina ata umai, tau au nuabola i rata kaua ma lamna aubaina a toutou BADA awarina. ¹⁶ Wenanare a rarauhari aubaina nuanuau i bola-kauei ma eġa ma notai da tau wavine apoapoeu.”

¹⁷ Eli i paribelei, “Ana nuaubam ma nae! Ma BADA Israel ana God am vibaġa ina kauei.”

¹⁸ Tauna i paribelei, “Au bada egualau kaua ma eġa ma nota-boaiu.” Ma i nae ma i am da orana i uba.

¹⁹ Ma ubaubanai boibogġi Elkanah ana numa ravai i vomairi ma i nae da BADA i raudunelei ma i ġaira me au Ramah. Elkanah awana Hannah maiteni i matave ma BADA wavine ana pari i paribelei. ²⁰ Hannah i duama ma natuna orotona i ġuni ma wavana i ġorei Samuel ma i riwa, “Wei lamna aubaina BADA a vibaġai.*”

Samuel i puloei BADA awarina

²¹ Ma madeġa ġelauna i ġetai ma Elkanah ana numa ravai maiteni i ġae au Shiloh da pulo ita apui BADA awarina ma pulo ġelauna BADA i parivainuagġani ita kauei. ²² Hannah eġa maiteni ita nae ma awana i riwei, “Maranai tevera ina eda ma ana ġaiei BADA ana au numa ma kampa ina mae-nonoa.”

²³ Elkanah i paribelei, “Ee nanare aiwai e notanotai da i ai ma kauei, ma weka ma mae da tevera ina eda. Ma BADA ina voaguim da am parivainuagġana anona ina tupua.” Ma wavine au numa i mae da natuna i eda.

²⁴ Maranai tevera i viedai ma alona i naiei au Shiloh, bulumakau orotona ana madeġa tonuġa, palawa baikena tagogġi ma wine wagina ġaeġaena maiteni. Avena da tevera melamelana ma alona i naiei da Eli au urana i terei.

²⁵ Ma burumakauna i apui God awarina ma tevera i naiei Eli awarina. ²⁶ Ma Hannah i riwa, “Oo BADA e notanotai rorova tau weka a rarauhari BADA awarina. ²⁷ BADA a vibaġai wei teverana aubaina ma a vivibaġei i vereu. ²⁸ Lamna aubaina marina natu a vereveri BADA awarina. Ana lawana anatapuna BADA ina verei.” Ma kampa tau BADA i voepaepai.

2

Hannah ana voepaepa

¹ Ma Hannah i raupari BADA awarina i pa, Tau a vinuiai kaua BADA awarina;

Tauna rewapana i vereu.

A vinuiai aubaina Tam u vilawaniu
ma lamna aubaina au ġavia a vivinamei.

² Oo BADA eġa ai ai ġelauna vivivireina me tam;
eġa mepa god ġelau anina tam ava;
eġa taugagalo ġelauna me tam, ai God.

³ Tau a ririwa, “Vogulagulau ma pari-gulagulau ona voterei;
Mae-ġaeġae babanina ona voterei.
Aubaina BADA ami kaua anatapui e araramanei
ma ina kovoġimi.”

⁴ BADA Tam sorodia vivirewapanai ai pidu u viaigaiġai;
wate vovokokarai u vovai-virewapani

⁵ Amam iauai marina ina nola da ina am;

* **1:20:** Samuel pona Hebrewi nonorana me God awarina agu i vibaġei.

am-irairāgei eġa am ina iraġe.

Wavine aipoina roaroa 7 i ġuni;

wate roaroa maġamaġau aloi i netawanei ma tauna ava e mamae.

⁶ BADA, iraġe ma lawana e neineiai;

Tauna rava au kokoaga e teretere-ġairei ma e vovovai-mairini.

⁷ BADA rava ġelau e vivimaurai ma ġelau e vivigomari;

ma ġelau e teretere-ġairei ma ġelau e teretere-ġaiei.

⁸ Tam rava molamolakai pokau au orana e sinasina-epai;

ma rava vigigimanai loġiloġi au orana e sinasina-epai; da gulagulau mait-
eni e kiakiala

ma vigulau tui ina viġariei.

Dobu anapuna tam ġarimej;

ma aiwai anapuna ana au animae u terei

⁹ Tam am rava patupatutui e gagaloei;

ma apoapoe taukauei e amoamoa au iraġe

Rava eġa ai rewapani ita vovaiuba;

¹⁰ Tam am ġavia ma pupuni;

am meji ina viarapawa me waiparara

BADA tam dobu ma rauetarei

ma am gulau ma vovai-virewapani,

ma am vinevine bulobulona ina virewapana kaua.

¹¹ Elkanah natuna Samuel i voterei ma i nae me ana au melagau au Ramah. Samuel pirisi Eli au urana i mae au Shiloh ma BADA aubaina i vitaunola.

Maranai Samuel i rarata tauna au numa gara i vovoagu da God ana nola i kaukauei. God ma rava Samuel ana nola i ġoana-kauei. Eli natunatuna ruaġa pulo tauapui, pirisi apoapoei. Maranai rava i nei da ai ġoa apoapoe aubaina pulo i apui BADA awarina, tui wei siai vovivirana i voviviri da i amam. Ma lamna aubaina Bada peroveta i paritawanei da Eli i riwei da tauna natunatuna eġa ita vinua-terenei aubaina ġo'apoapoe i kaukauei, ma natunatuna ina viraġena ruaġei. Wei au murina Eli ana epaepaia laragai ma anapui ina iraġe-pai.

3

BADA Samuel i ġorei

¹ Wei au marai BADA eġa rava awari ita bababani bo ai au rauboni bo ai au inana ita vivieġana-melei, mara tagotagogi ava wei i tuputupua. Tevera Samuel Eli i voagui ma BADA awarina i vitaunola.

² Eli matana i apoapoe kaua ma eġa ita inainana kaua. Ma waguvara tagogi ana au gabu i matamatave. ³ Ma Samuel BADA ana au numa i matamatave Parivainuaġana bokisina au ririvana ma God ana rampa au Gabu vivivireina i ararata. ⁴ Ma BADA Samuel i ġorei, "Samuel!"

Ma Samuel i paribelei i pa, "Ee tau weka!"

⁵ Ma i vomairi ma i ruba Eli awarina ma i riwa, "U ġoreu da a nei."

Eli i riwa, "Eġa ata ġorem, ma nae me da ma matave."

⁶ Ma BADA i viġore me, "Samuel!"

Samuel i vomairi me ma i ruba Eli awarina ma i riwa, "U ġoreu da a nei."

Eli i riwa, "Natu tau eġa ata ġorem ma nae me da ma matave."

⁷ BADA eġa Samuel awarina ita babani dadana lamna aubaina ponana eġa ita aramanei.

⁸ Anina ma mara vitonuina BADA i viġore ma Samuel i vomairi ma i nae Eli awarina ma i riwei, “U ġoreiu da a nei.”

Anina ma Eli i aramanei da lamna BADA tevera i ġoreġorei. ⁹ Ma Samuel i riwei, “Ma nae me da ma matave. Mepa da ina viġore me lamna wenanare ma riwei, “BADA ma babani, am taunola a rarautaniġana.”

Anina ma Samuel i nae me da i matave.

¹⁰ Ma BADA i nei ma i mairi ma i viġore me au naona i kaukaueia nanare, “Samuel, Samuel!”

Samuel i paribelei i pa, “Ma babani am taunola a rarautaniġana.”

¹¹ Ma BADA Samuel i riwei, “Tau kaua vivi-inirovorovo kaukauana ana kauai mai Israel awarii ma maranai rava riwana ina nonori taui orai ina sisi. ¹² Rorova a riwa nanare, Eli ana numa ravai maiteni ana kovoġi.

¹³ A riwana-guratei da ana numa ravai ana kovoġa-nonoei aubaina natunatuna i vijiboġiu ma i vinimalamalaiu ma tauna natunatuna i vibae-naenaiei. ¹⁴ Riwa bagibaginei a ririwa da Eli ana numa ravai ai ġo’apoapoe eġa melanai ana nota-tawanei. Avena da pulo ina apui awariu.”

¹⁵ Samuel ana au aravi i mae da mara i tom ma BADA ana numagara metaetai i votawatawanei. BADA aiwai Samuel i riwei tauna i rovo da Eli ita pariveri.

¹⁶ Wate Eli Samuel i ġorei i pa, “Samuel natu.”

Ma i paribelei i pa, “Tau weka.”

¹⁷ Eli i paridadana, “BADA aiwai i riwem? Anatapuna ma riweiu ma eġa lamna BADA ina kovoġa-guratem!” ¹⁸ Anina ma Samuel anatapuna i riwei, eġa aiwai ita tajjini. Ma Eli i riwa, “Tauna BADA, ma aiwai awarina i jijimana ina kauai.”

¹⁹ BADA Samuel i mae-ratui maranai i rarata ma Samuel aiwai i ririweia ma nanare i tuputupua. ²⁰ Ma Israel au giana da au giana, au Dan i vikarei da au Beersheba, anatapui i aramanei da Samuel lamna BADA ana peroveta. ²¹ Mara i maġa BADA au Shiloh Samuel awarina i eġa ma i babani.

8

Mai Israel Gulau i vibaġei

¹⁻² Samuel natunatuna ruagā, natuevou wavana Joel ma umauna Abijah.

Maranai Samuel i magura ma natunatuna i vinei taurauetara au Israel ma i terei da au Beersheba i nola. ³ Wate tau i eġa amai ana kaua ita vaia ma ai nuavaina mane ma lamna aubaina manelei i gwalai ma rauetara i vibarai.

⁴ Ma lamna aubaina Israel babadai i riei Samuel awarina au Ramah.

⁵ *Ma i riwei, “Ma rautaniġana bada! Tam u magura ma natunatum eġa am kaua ita ġovaivaitei. Ma lamna aubaina tauai a goei da gulau ma verelai da ina raveniai, me dobu ġelau i ravai e kaukauei nanare.”

⁶ Wate maranai wenanare i riwa Samuel eġa ita vinuaia i dadana, ma i raupari BADA awarina. ⁷ BADA i paribelei i pa, “Aiwai anatapuna ravai e ririwem ma kauai, tau i eġa tam ita geduaiem wate Tau ai gulau i geduaiem.

⁸ Maranai Egypte i teretere-opunei da wei paratana, tau i marana patapatana i mae-puputeu ma god ġelau i rarausunelei; marina nanare tam awarim e kaukauei. ⁹ Ai ġoana ma verei wate riwa bagibaginei ma riwei menanare gulau ina kauanei tau i awari.”

¹⁰ Samuel BADA ana babani anatapuna tau i gulau i vibaġei i riwei ¹¹ i pa, “Maranai gulau ina vibademi lamna awarimi wenanare ina kauai. Tauna natunatum i ina tama-naiei sorodia da ana chariot ma ana horse ina gerui

* 8:5: Deu 17:14

ma ġelau ana chariot au naona ina ruba. ¹² Ġelau sorodia 1,000 ma ġelau 50 ina vibadei. Ġelau ana wapu ina ipiei ma ana lam ina tuarui. Ġelau ġavia apiai iramei ma chariot iramai ina kaukauei. ¹³ Gulau, natunatumi guguinii ina egari da ana monamona ġabuġabui ina kaukauei ma ġelau ana palawa ina apuapui ma ana taulauvoa. ¹⁴ Am wapu ma grape wapu ma nanare olive wapu aiiai avavai ina vaia da ana gabemani babadai ina verei. ¹⁵ Ma maranai ami witi ma grape ma olive o tuarui ma ġuta 10 ona terei ma tauna ġuta tagogi ina vaia ma ana gabemani babadai ina ġutei. ¹⁶ Ami laraga nelarai ma guguini ma am bulumakau ma donkey vinevinei ina vaia tauna aubaina. ¹⁷ Ma ami sipu ma gote ġuta 10 o terei ma tauna ġuta tagogi ina vaia tauna aubaina, ma taumi ina vainimi ana taunola. ¹⁸ Maranai wei kauai i tupua ma ona tou guratana BADA awarina da gulau taumi o tereterei awarimi ina vaitawanei, wate BADA eġa ina voaguimi.”

¹⁹ Wate rava Samuel ana babani bagibagina eġa ita rautaniġanei. Tau i riwa, “Tauai anapupui a ġoei da gulau ina vibadelai, ²⁰ da tauai me dobu ġelau ravai nanare ma ai gulau ina raveniai ma ana opu viġavia aubaina.”

²¹ Anina ma Samuel BADA i riwei aiwai ravai i ririweia ²² ma BADA i paribelei i pa, “Ai ġoana ma kauai, gulau ma verei.”

Ma Samuel ravai i paritawanei ai au numa.

9

Samuel, Saul i buloi gulau

¹ Benjamin ana au dam rava tagogi wavana naenaena ma manemanena i mae wavana Kish. Tauna amana Abiel, ġoġana Zeror ma noina Bekorath ma ai magura Aphiah, Benjamin ana damei. ² Kish natuna Saul i tupua kaua ma laraga inanana aiaina eġa me laraga ġelau au Israel, ma tevera ae manawa.

³ Maratagogi Kish ana donkey i kwako ma natuna Saul i riwei, “Am taunola ma taravaini ma ona nae donkey ona baiiei!”

Saul ma ana taunola donkina i baiiana-guratei wate eġa ita nelaġai ma i nae da peroveta Samuel ita raugenari da ita vibaġai da mepa donkey ita baiiei.

¹⁵ Ma maratomna da Saul ana taunola maiteni ita ġeta Samuel awarina, BADA Samuel i riwei, ¹⁶ “Wenanare marana au maratom oroto laragana Benjamin ana damei ana paritawaneiai. Olive monamonanei kolana ma buloi da ina vimataira da tauna a tereriei da au rava Israel ina vibadei. Tauna mai Israel ina voagui da mai Philistia ina vovaiubai. Au rava mai Israel a inanai i vinuapoapoe ma ai tou awariu agu aubaina a nonori.”

10

¹ Ma Samuel olive monamonana wagina i vaia ma monamona i waġi Saul au kolana. Ma i vigia-laġolaġonei ma i riwei, “Wei a kaukauei aubaina BADA i terem ana rava vinalaulaunai Israel ma vibadei. ² Amadodo rava ruaga ma nebelei Rachel ana kokoaga au ririvana au Zelsah, Benjamin ana au dobu. Tau i riwem, ‘Donkina o baibaiei i nelaġai. Ma marina amam eġa donkey ita baibaiei wate tam e vivinuabolem, e paripari-dadana, Menanare natu ana nelaġanei.’

⁵ —Ma ona nae God ana au Gibeah ola aburuna, weka mai Philistia ai sorodia i rauġaravu. Ma ona ruirui au taon ma Peroveta borui olei ina ġaiġairai.

Tau i gitar* ma harp, tambourine ma duraio ina vikalokaloei ma BADA ana babani ina garagararei. ⁶ BADA Aruana Vivivireina ana rewapanana oram ina naeni da ina vibadem, ma tau i maiteni BADA ana babani ona jime. Ma oram ina ravivouni da tam me rava ġela. ⁷ Maranai wei kauai i tupua, aiwai BADA e viviatataiem ma kauai.”

⁸ Samuel i riwa, “Tam ma vinoa au Gilgal, ma kampa ana nebelem da ġamoġamo ana vunui ma taputapuna ana apui ma ġamoġamo ġelau ana apui viturana pulona. Wate kampa ma vipaipai aupom ⁷ da ana ġetai ma riwa ġelau ana riwei.”

Saul i terei gulau

⁹ Ma Saul i mae-tavirei da i nenaie ma God ana nota i ruini ma orana i ravivouni. Wei marana aiwai anataputa Samuel i ririwei i tupua. ¹⁰ Maranai Saul ana taunola maiteni au ola Gibeah i ġeta, peroveta borui i 'nanai i nenei awarii. Anina ma God Aruana Saul i ruini ma i vibadei da tauna maiteni God ana babani i garagararei. ¹¹ Maranai ravai Saul i araramaneia Saul i 'nanai peroveta au borui i jimajima tau i orai i auepai ma ai rava i ririwei, “Riwa kaua bo aiwai i tupua Kish natuna awarina? Saul i viperoveta bo?”

¹² Ma nai dobuna ravana i paribelei i pa, “Amana ai ai lamna avena aubaina maraġela ravarava ota e viviperoveta.” Anina ma wei babanina i mae kampa, “Moina riwa kaua da Saul peroveta?” ¹³ Ma Saul jima i voterei ma i ġae au ola au dobu vivivireina.

¹⁴ Muriai maiana Saul ana taunola maiteni i nelaġai ma i paridadanei i pa, “Mepa o nae?”

Saul i riwa, “Donkey a baibaiei ma a baiana-avei da a nae Samuel awarina da ata paridadanei ġamoġamo mepa.”

¹⁵ Maiana i riwa i pa, “Ma riweu Samuel aiwai i riwem.”

¹⁶ Saul i paribelei, “I riwelai da donkina i nelaġai.” Wate maiana eġa ita riwei Samuel aiwai i riwei, da tauna ina vigulau Israel aubaii.

¹⁷ Muriai Samuel mai Israel anataputi i ġorei da ita riei au Mispa da BADA riwana ita nonori. ¹⁸ Ma Samuel i riwa, “BADA Israel ai God wei e ririwemi, ‘Tau noinoimi mai Egypt vivirewapanai au urai a vaitawanei. Ma a neiaimi wei au dobuna ma nanare ami ġavia au ririvami a vovaiubai. ¹⁹ Wate amadodo tau ami God o geduaiei, i kauana-guratei ami au nuabola ma ami au piripiri.’ Ma o riwa, ‘Eġa! Tauai gulau a ġoġoġe da ina vibadelai! Lamna aubaina dam damai ona opui tau ami BADA au naou.”

²⁰ Maranai Samuel damdamai i neiai BADA au naona ma BADA Benjamin ana dam i vinei. ²¹ Ma Benjamin ana dam i neiai au naona ma BADA Matri ana epaepaia i vinei ma kampa BADA Kish natuna Saul i vinei. Ma maranai i baibaiei tauna kampa eġa. ²² Ma lamna aubaina i raupari BADA awarina, “Tauna mepa?”

BADA i paribelei, “Tauna kampa purapura au orai e raraugovaġa.”

²³ Tau i nae da i taravaini da i neiai, tauna rava aena manamanaina ma i mairi ma rava anataputi i votani. ²⁴ Samuel rava anataputi i riwei, “BADA rava i tereriei da ami gulau, o inainai bo eġa? Eġa ai ai ġelauna au orata me wei orotona.” Ma rava anataputi i garara, “Gulau ana lawana ina manawa.”

* 10:5: Eng. lyre

11

Saul ana vigulau i vianinei

¹⁴ Muriai Samuel mai Israel i riwei, “Ona nei ma anaputa tana nae au Gilgal ma Saul ana vigulau tana vianinei ma tana amei. ¹⁵ Anina ma anapui i nae au Gilgal ma BADA i voepapai ma i riwei da Saul lamna tau i gulau. Ma tau viturana ma mae-kaua pulona i apui Bada awarina ma mai Israel siana i am ma i uma ma i vinuai-kaea.”

Saul ana madega 30 maranai i vigulau. Tauna sorodia mai Israel i rau-etaraveni da mai Ammon maiteni i viḡaiḡaiawa da i vovaiubai. Muriai tau mai Philistia maiteni i viḡaiḡaiawa, Wate nai ravai ai sorodia i maḡa guratana aubaina da mai Israel i rovo. Saul i vipaipai da Samuel ita nae da BADA ita pulo ma muriai ita nae ita viḡaiḡaiawa. Wate Samuel eḡa laḡilaḡina ita nei. Lamna aubaina Saul pulo i apui BADA awarina. Ma BADA i viamlo-ḡaiḡaini. Ma muriai Samuel i ḡetai.

13

Saul BADA i rau-aḡaiḡaiei

¹³ Samuel Saul i riwei, “Tam u bua! Tam Eḡa BADA ana tarawatu uta voteletelei. Uta votelatela lamna am epaepai maiteni ita teremi da ota vigulau nonoa au Israel. ¹⁴ *Wate marina tam am vibada eḡa ina mae; BADA rava notanotana me tauna nanare i vinei ma i terei da ana rava ina vibadei, aubaina tam BADA eḡa uta voteletelei.”

15

BADA Saul i geduaiei

¹ *Muriai Samuel Saul i riwei, “BADA tau i paritawaneu da a buloim da u vigulau Israel aubai. Lamna aubaina BADA ana riwa ma nonora-kauei. ² *BADA Vivirewapana Kaukauna i riwa i pa, ‘Tau mai Amalek ana koveḡi aubaina amamai mai Israel i viḡaviei maranai Egyptei i opu da i nenei. ³ Marina ona nae mai Amalek ona viḡaviei ma ona pupuni, eḡa tagogi ona voterei, nelara, waivine, roaroa melamelai, bulumakau, sipu, kamel ma donkey.”

⁴ Ma Saul ana sorodia ai riwa i paritawanei da ita nei. Ma anapui au Telaim taon i vinenebelana. Sorodia 10,000 Judah ana damei i nei ma 200,000 mai Israel ḡelaui nei.

⁷ Ma Saul ana sorodia maiteni i opu ma Amalek i vunu-naiei ma i vovaiubai, i viḡavia au Havilah ma au Shur i vikwai Egypt au ḡereḡerena. ⁸ Agag mai Amalek ai gulau lawalawaina i vojijini wate rava anapui i viraḡeni. ⁹ Wate Saul ana sorodia maiteni Agag eḡa ita viraḡeni ma ai sipu ma bulumakau vinevinei ma bulumakau ma sipu natunatu ai ai eḡa ita viraḡeni. Tau ḡamoḡamo kirakirama i viraḡeni.

¹⁰ Ma BADA Samuel i riwei, ¹¹ “Tau orau i viara kua da Saul a terei Gulau aubaina tauna i mae-puputeu ma riwau i rau-agaigaiei.” Samuel nuanuana i bola-kauei maranai wei riwana i nonori ma BADA awarina i tou-maratom.

¹² Ubaubana boibogi Samuel i nae da Saul ita inanai wate i riwei da Saul i nae au Carmel taon. Kampa gana i vidamni da rava ita nei weka da tauna ita voepapai, ma i ḡaira me au Gilgal.

13 Ma Samuel i ġeta Saul awarina, Saul, tauna i viegualaei ma i pa, “Samuel, BADA ina viaiainim. Tau BADA riwana a voteletelei.”

14 Samuel i paribelei, “Aiwai aubaina sipu ma bulumakau e vivitouana a nononori?”

15 Saul i pa, “Sorodia mai Amalek awarii i vaia, bulumakau ma sipu vinevinei i vojijini da ina puloei BADA am God awarina wate ġelau anatapui a viraġena-naiei.”

16 Anina ma Samuel Saul i riwei, “Ma genuana! Waguvarai BADA awariu i babani ana riwem.”

Saul i paridadanei, “Ma riweul!”

17 Samuel i paribelei, “Avena da u nota-melem da tam rava labalababa, tam marina mai Israel ai rauetaravena. BADA i tereriem da mai Israel ai gulau. 18 Riwa bagibagina i riwem ma i paritawanem da taniga potapotai mai Amalek uta viġaviei da anatapui uta pupuna-pai. 19 Aiwai aubaina BADA eġa uta voteletelei? I riwem da eġa purapura i rairraġe-tawanei ona tami, wate tam vipurapura u ġoei ma u vai-labalababai da u nuanei, wei lamna kua apoapoe BADA au matana.”

20 Saul i paribelei, “Tau, BADA a voteletelei! I egariu da ana nae, da mai Amalek ana pupuni ma ai gulau Agag a neiai. 21 Wate au sorodia sipu ma bulumakau aiaii eġa ita viraġeni wate i neiai weka au Gilgal da ita apui pulo BADA am God awarina.”

22 Anina ma Samuel i riwa, “BADA metauna e vinuailaei?”

Votelatela bo pulo ma ġamoġamo apuapunana.

Votelatela i ai-telara, eġa me pulo apuapunana;

Ma rautaniġana i ai-telara, eġa me sipu monamonana.

23 Pariviravira BADA awarina lamna me parauma

ma mae-ġaeġae lamna me god ġelau i viviborumei

Ma tam BADA riwana u geduaiei;

lamna aubaina BADA am vigulau i geduaiei,

Tam am vigulau i vai-tawanei.”

27 ✧ Ma Samuel i mae-tavirei da ita nae ma Saul i ġoei da ita viġaei ma ana kwama adana i vojijini ma i sikai. 28 Samuel i riwa, “Me au ġara u sikasikai nanare amadodo BADA am vibada mai Israel awarii i vai-tawanei ma rava ġelauna aiaina eġa me tam i verei. 29 Israel ai God vidualaulaunana eġa moru-moruna bo nuanuana ita viravirai. Tauna eġa rava da nuanuana ita viravirai.”

34 Ma Samuel i nae au Ramah ma Saul i nae me ana au numa au Gibeah.

35 Samuel eġa Saul ita inana-melei da i raġe wate Saul i vinuabolana-maelei. Ma BADA nuanuana i bola-kauiei da Saul i terei mai Israel ai gulau.

16

BADA David i terei gulau

1 BADA Samuel i riwei, “Amapo da Saul ma mogumogueli bo? Tau Saul a vaitawanei mai Israel ai gulau. Wate olive monamonana ma vaia ma ma nae au Bethlehem ma Jesse ma inanai. Natunatuna awariei gulau a vinei.”

2 Wate Samuel i paribelei, “Menanare ana naenei? Saul riwana ina nonori ma ina viraġeniu.”

BADA i riwa, “Cow ġaubona ma vinimavoei ma ma nae da ma riwa, “Tau a nei viturana pulona ana apui BADA awarina.’³ Jesse ma rauġorei viturana pulona aubaina ma ana viatataiem aiwai ma kauei, rava ana viatataiem ma buloi Tau aubaii.”

⁴BADA Samuel i ririwei nanare i kauei. Samuel au Bethlehem i ġeta ma taun babadai ana sisisi i nebelei. Ma i paridadanei, “Ana nuaubam u nei bo?”

⁵Samuel i paribelei, “Ee! A nei da pulo ana apui BADA awarina. Anapumi ona vokaukauana-melemi ma tana nae pulo aubaina. Ma Jesse natunatuna maiteni i viaiaini ma i paritawanei da i nae pulo apuna aubaina.”

⁶Maranai tau i ġeta ma Samuel Jesse ana natuevou Eliab i ’nanai ma ana au nota i riwa i pa, “Wei teverana e maimairi BADA au naona lamna anina ana vinevine.”

⁷Wate BADA Samuel i riwei, “Tau ravana a geduaiei, eġa inananana bo ana manawa ma notanotai. BADA aiwai e inainanai, rava eġa ita inananai. Rava tupua e inainanai wate Tau nuapou a inainanai.”

¹⁰Nanare da natunatuna anapui 7 i nei, ma Samuel i riwa, “BADA eġa aiiai ita vinei.”

¹¹Ma Jesse i paridadanei, “Natunatum anapui weka bo?”

Jesse i riwa, “Natu umau e mamae wate tauna sipu e paipaini.” Samuel Jesse i riwei, “Riwa ma paritawanei da ina ġetai da tana am.”

¹²Ma Jesse riwa i paritawanei da i nei. Tauna i tupua karawata, tevera inananana aiaina ma matana namanamarana. BADA Samuel i riwei, “Wei tauna! Ma nae ma au kolana olive monamonana ma iwaġi.”

¹³Anina ma Samuel olive monamonana i vaia ma David au kolana i waġi, kampa tau i matai, ma nai au marana da i nena BADA ana Arua Vivivireina David maiteni i mae. Ma Samuel i nae au Ramah.

¹⁴Ma BADA Aruana Saul i opu-tawanei ma BADA arua apoapoei i paritawanei i rui au orana da i virovorovo.

David marina Gulau Saul ana sorodia.

18

Saul David i unurei

⁵Saul, David ġavia au anapuna i paripari-tawanei ma i kaukauana-kauei ma ġavia i vovovaiubai ma lamna aubaina i terei da ai sorodia ai bada ġaeġaena. Ma wei kauana patara ma sorodia babadai i vinuaiaiei. ⁶David oroto Philistiei ġaeġaena ma inananana vi’nirovorovona i virageni ma i nenememei ma waivine taon anapui i nei ma ketaketara ma gita i vikalokalo i arara ma gulau Saul i nebelei. ⁷Waivine i vikalokalo ma i welawela i pa;

“Saul ġavia tausan i vunui
ma David tausan dam viriviri i vunui.”

⁸Wei welana Saul i vimeji-kauei ma ana au nota i pa, “Taufi David e vovoeapapai ma e ririwa da tauna rava tausan dam viriviri i vunui ma tau tausan ava.” Ma marina ina terei ai gulau. ⁹Ma lamna aubaina tauna David i unurana-kauei ma i ’nana-vaitetei.

Wei au marana Saul David i viviġaviei ma i goei da ita virageni. Saul natuna Jonathan, David i vibenabenamei. Lamna aubaina i rovorovo-nae ma i rauraugovaġa-nae.

21

Wei marana au murina Saul David i viġaviei ma i ġoei da ita viragēni. Saul natuna - Jonathan David i vibenabenamei ma David i ruba au dobu ġela da Saul ita raugovaġei.

Ahimelek David i voagui

¹ *David i nae au Nob da Pirisi pulo tauapuna Ahimelek ita inanoi. Tauna ana rovona i opu da David i viegualaei, ma i riwa, “Aiwei aubaina u nei, ma am rava mepa?”

² David pirisi Ahimelek i paribei i pa, “Gulau Saul nola tagogi aubaina i paritawaneu wate wenanare i riweu, ‘Eġa aiai ina aramanei aiwei a kaukauei.’ Au sorodia a riwei da e paipainiu. ³ Awarim lam da uta vereu? Palawa apuapunana 5 ma vereu bo aiwei ġelauna kampa.”

⁴ Wate pirisi i riwa, “Awariai eġa palawa ota ita mamae, wate vovivirana BADA awarina. Wei palawana ma vaia mepa da am sorodia aupom biaġa eġa waivine maiteni ita viawawana.”

⁵ David i paribelei, Riwa kauga tauai eġa waivine maiteni ata matamatave, maranaġ a opuopu ġavia aubaina au nelara e ujuji. Amadodo lamna gulau ana nola a kaukauei ma wei nolana aubaina a vokaukauei kauga. ⁶ Nai marana palawa waduboi i votawanaei ma palawa voui i terei BADA au naona au tempol. Kampa eġa lam ġelauna ita mamae ma pirisi palawa vovivirana David i verei.

Anina ma David rava i tama-naiei ma nai au dobuna i raugovaġa nae ma i terei ai bada. Maranaġ Saul i nonori da pirisi ġeġetelarana Ahimelech David i voagui, Tauna pulo tauapui pirisi i vunu-pai ma Abiathar lawalawaina i voterei, ma tauna i ruba govaġa da David awarina i ġeta. Maranaġ dobuġela ai sorodia Israel i viġaviei, lamna David ana sorodia maiteni tauri i viġaviei ma Israel i gagaloei. Saul ana sorodia maiteni dobuna i naeni ma David i baiei da ita viragēni, wate eġa ita nelagāi. Mara tagogi David Saul ita viragēni wate lamna eġa ita kauēi aubaina tauna God ana vinevine. Wate Saul amapo i ġoei da David ina viragēni.

31

Saul ana iragē

¹ Mai Philistia mai Israel i viġaviei au ola Gilboa ma tauri mai Israel i virubai ma maġamaġaui i viragēni. ² Mai Philistia Saul ma natunatuna i viaġaġei da natunatuna Jonathan, Abinadab ma Malki-Shua i viragēni. ³ Ġavia i potopoto kauga Saul au ririvana ma ġavia ana piduei Saul i tonai ma i vikero-kauēi.

⁴ Ma Saul ana apia tauavaraina i riwei, “Am sodei ma viragēniu. Eġa ata ġoei da Philistia-eten ina vijiboġiu ma ina viragēniu.”

Wate tauna i rovo da viragēnana i kauana-avei. Ma Saul ana sod i lavvi da au manawana i tonei ma au tepana i peu da i raġe. ⁵ Maranaġ ana apia tauavaraina wei i 'nanai ma tauna nanare ana sod au tepana i peu ma gulau au ririvana i raġe.

2 Samuel

ana buka viruaina Pariverena

Wei bukana lamna David ana vibadana marana e ririweta. Kapita 1 da au 4 e ririweta da David menanarena Judah au rauanaḡei lamna ava i vibadei. Ma kapita 5-24 Israel au lavaratei maiteni i vibadei. Wei girumana e ririweta da menanare David ana ḡavia Israel au orana ma dobu ḡelauie i viḡaviana-nei ma e viyatataieta menanare David God nuanuana i vaia ma i vitumaḡanei, wate maiteni ana ḡo'apoapoe ma ana ḡokokokara ḡelau i viatataieta. Tauta ta inanai menanare God David i kovoḡi maranai ana ḡoa i apoapoei, wate maiteni ta inanai menanare David i rupena-nei ma God tauna ana ḡo'apoapoe i notatawanei. David piripiri maḡamaḡau i nelaḡai maranai Israel i vibadei wate God tauna i ḡagaloei ma parivainuaḡana awarina ma ana epaepaia awarii i vojijini.

Vinevinei

David mai Israel ai gulau (5:1-4)

God ana parivainuaḡana bagibagina David awarina (7:1-5, 8-17)

David Bathsheba maiteni i matave (11:1-17, 26-27)

Peroveta Nathan ana pariverena (12:1-25)

5

David mai Israel ma Judah ai gulau

¹ Israel dam damai i nei David awarina au Hebron ma i pa, “Tauta tara tagoḡi ² Au naona maranai Saul ata gulau, tam sorodia u rauetaraveni ma O viḡavia.

—Ma BADA i riwem, “Tam au dam Israel ma paini me sipu taupaini ai sipu e paipaini ma aubaii ma vibada.”

³ Maranai dam babadai i ḡeta gulau David awarina au Hebron, David parivainuaḡana bagibagina tau maiteni i kauei BADA au matana. Ma olive monamonanei David i buloi da Israel ai gulau.

⁴ David ana madeḡa 30 ma i vigulau ma i vibada da madeḡa 40 i kwa.

Ma David ana sorodia i egari ma Jerusalem mai Jebu awariei i vaia. Kampa David ana gulau numana i voai. Anina ma rava i tami ma i nae ma God ana parivainuaḡana bokisina i vaia ma i naei au Jerusalem ma kampa au numagara i terei.

7

BADA parivainuaḡana i kauei David maiteni

¹ Ma BADA David i ḡagaloei ma nanare ana ḡavia anatapui i vovaiubai. Ma ana nuaubana i mae. ² Ma David peroveta Nathan i riwei i pa, “Tau numa vigulauna, ai cedei voavoana a maemaeni wate God ana parivainuaḡana bokisina au numa gara e mamae.”

³ Nathan i paribelei, “Aiwai e notanotaia ma kauei aubaina BADA i mae-ratuim.”

⁴ Wate lamna waguvaraina BADA Nathan i riwei i pa, ⁵ “Ma nae ma au taunola David ma riwei ma pa, BADA wei e ririwei ‘Eḡa tam numa ma voai da Tau au animae.”

⁸ BADA i riwa me, i pa, “Au taunola David ma riwei, ‘BADA VIVIREWAPANA KAUKAUANA wei i riwei:

Tam au naona ravarava ota sipu u paipaini au wapu, wate Tau a terepaim da mai Israel ai bada. ⁹ Mepa u nenelana, Tau tam a mae-ratuim ma au matam am ġavia anatapui a pupuna-pai. Ma marina wavam ana voepai, me rava wavai naenaie au dobu. ¹⁰⁻¹¹ Ma au rava Israel dobu ana verei da ina raunuma ma ana nuubai ina mae. Au naona i vivikareiana da marina babada a terei da mai Israel ita vibadei, wate rava apoapoei tau i viġaviei ma marina amapo ega ina kauana-melei. TAU BADA a ririwem da am epaepaia ana vimaġai ma tam ma am epaepaia ona vivigulau.

¹² *Ma am epaia tagogi ana vinei, tam natuoim tagogi da ina vigulau maranai tam am mara damona ina ġetai da amamam ma votagoi. Ma tauna ana kauai da ina vibada ġaeġaena, ¹³ ma ega aiai ana vigulau ina vaitawanei. Ma tauna tempol ina voai Tau aubaiu, ¹⁴ Tau ina viananeu ma tauna ana vinatunei. Ma maranai i kauana-boai, ana kovogi me ama natuna e kovokovoġi nanare. ¹⁵ Wate eġa melanai au nuavaina awarina ana vaitawanei me Saul awarina a vaitawanei, tauna ana vigulau a vaitawanei ma epaiana tam a terem. ¹⁶ Am numa ravai rereġana eġa melanai ina kwa ma am epaepaia ina vigulau ma ina vibada nonoa.

¹⁷ Ma BADA aiwai Nathan ana au rauboni i riwei anatapuna David i parivereie.

11

David turana awana i kwalei

¹ Omra e tomtom maranaina gulagulau e opuopu ġavia aubaina. David sorodia ai bada Joab ma Israel ana sorodia i paritawanei da mai Ammon ai sorodia ita vipupui. Ma ai taon Rabbah etanaina i matave-potai da ravai eġa ita rui bo ita opu, David eġa ita nae ma au Jerusalem i mae.

David ma Bathsheba

²⁻⁴ Mara tagogi aubigai David i matave-vomairi ma ana au poewa vata-vatarana i bababara-nae. Ma i nana damana da wavine i nana i toatoa, i oġaoġa-melei aubaina marina ana nawaravi doriania i kwa, wavine inanana aiai kaukauana anina ma David, rava i paritawanei da ita aramanei tauna aiai. Ravana i ġeta memei ma i parivereie i pa, “Wavine wavana Bathsheba, Eliam natuna ma Uriah Hitti ei awana.” Ma David ana taunola i paritawanei da wavinena i neiai awarina ma tauna maiteni i matave ma i nae me au numa. ⁵ Wavinena i duama ma riwa i paritawanei David awarina i pa, “Tau a duama.”

⁶ David riwa i paritawanei Joab awarina i pa, “Uriah Hitti ei ma paritawanei awariu.”

Ma Uriah i paritawanei David awarina. ⁷ Maranai i ġeta David awarina ma David tauna i paridadanei, “Joab ana sorodia maiteni menanare, anina bo eġa? Ma ġavia menanare?”

⁸ Ma David Uriah i riwei, “Ma nae au numa ma ma vilauvitau.”

Ma Uriah gulau ana numa i opu-tawanei da i nae ma au murina David ana pulo i paritawanei Uriah ana au numa. ⁹ Wate Uriah eġa ita nae ana au numa, ma kampa ana au mefaeta ana bada ana taunola maiteni i vimatave lana.

¹⁰ Ma tau David i riwei, “Uriah eġa ita nae au numa.” David Uriah i riwei, “Tam u vaġavaġai da u nei. Aiwai aubaina eġa uta nae am au numa?”

¹¹ Uriah David i riwei i pa, “Parivainuagana bokisina, mai Israel ma Judah ai sorodia au numa gara e matamatave. Au bada Joab ana sorodia maiteni au wapu i raugaravu, wei lamna aubaina ega ata nae au numa da ata am ma ata uma ma awau maiteni ata matave. Lamna ega ana kauai, eगतeni!”

¹² Anina ma David Uriah i riwei, “Weka ma mae amadodo ma au maratoma ana paritawana-melem.”

Uriah au Jerusalem i mae da au pom gela. ¹³ Ma David Uriah i rauгореi da maiteni i am ma i viuma-buai. Wate waguvarai Uriah i opu David ana taunola awarii da ana au aravi i matave; ega ita nae ana au numa.

¹⁴ Ma ubaubanaina David pepa i girumi ma i paritawanei Joab awarina. ¹⁵ Pepa au orana i giruma i pa, “Mepa gavia potopotona kampa Uriah ma terei ma am sorodia ma tere-opunei da tauna ava ina mae ma ina kero ma ina iraге.”

¹⁶ Joab Rabbah taona i vivineneгane i aramanei mepa gavia i virewapana kaua ma kampa Uriah i terei. ¹⁷ Gavia taonei i opui ma Joab ana sorodia maiteni i viгavia ma David ana sorodia gelau i viraгeni. Tau Uriah oroto Hitti ei maiteni i viraгeni.

²⁶ Ma Uriah awana riwana i vaia da awana Uriah i rage ma i touei ma i moguei. ²⁷ Maranai i mogu-vorovei David rava i paritawanei da i neiai ana au numa da awana gelauna, ma tauna David natuna orotona i guni. Wate David aiwai i kauai, BADA ega ita vinuiaiiei.

12

Peroveta Nathan David i eni

¹ Anina ma BADA peroveta Nathan i paritawanei David awarina ma i riwei i pa, “Nelara ruaga au taon tagogina i mae, oroto tagogi manemanena ma maumaurana ma gelauna molamolakana. ² Ravana manemanena awarina sipu ma bulumakau magamaгau. ³ Wate ravana molamolakana sipu natuna wavinena i gimarai, ma natunatuna maiteni i gamoi da i rata, molamolakana ana sipu tagotago. Ana lam momogina sipu i aniani ma waira ana au kelaka i umaumi ma au arona i matamatave, wei lamna me tauna natuna guguinina.

⁴ —Marina taomana i nei oroto manemanena ana au numa, ma oroto manemanena ega ita goei da ana sipu bo bulumakau ita vunui da ana taomana ana lam ita vokaukai. Ega, tauna oroto molamolakana ana sipu natuna wavinena i vunui ma i vitavi ma ana taomana i verei.”

⁵ Nai maranaina David i meji guratana ma Nathan awarina i gaiawa, “BADA lawalawaina wavanei a ririwa da aiwai wei kauana i kauai anina ina iraге! ⁶ Kaua apoapoe kaukauana i kauai lamna aubaina sipu gaubona 4, orotona molamolakana ina verei.”

⁷ Anina ma Nathan David i riwei, “Tam nai ravana! Wei lamna aiwai BADA Israel ana God i riwei, “A vinem da Israel ana gulau ma Saul au urana a vaitawanem. ⁸ Ma am bada Saul ana vibadana ma ana buderi a vere-tawanem ma awawana au uram a terei. Ma nanare a terem da Israel ma Judah u vibadei. Mepa da wei anapui i muomuo guratana awarim, tagotagogina au tepana ata vaitepatepani. ⁹ Aiwai aubaina riwau bagibagina u rau-agaiгаiei? Aiwai aubaina wei kauana apoapoen a u kauai? Uriah Hitti ei sodei u piaгi; awana mai Ammon ai sodei u viraгeni. Ma awana u vaia da awam. ¹⁰ U rau-agaiгаieu

ma Uriah awana u vaia da awam lamna aubaina am au numa viġaiġaiawa ina mae-nonoa.¹¹

¹¹ —BADA wei e ririwei, “Tau aburuna ava da apoapoena ana neiai am au numa. Au matam awawam ana vaia ma oroto au ririvam ana verei. Ma tauna awawam maiteni ina matave, patara au matai. ¹² Tam u kauana-ġovaġei wate tau madeġai ana kauei, mai Israel au matai.”

¹³ David Nathan i riwei, “Tau, BADA awarina a kauana-boai!”

Nathan, David i riwei, “Ee wate God am apoapoe e vaivai-tawanei. Tam eġa ma iraġe. ¹⁴ Wate kawa apoapoena u kauei ma lamnei BADA u vijiboġa-kauei lamna aubaina natum ina iraġe.”

¹⁵ Nathan i nae ana au numa. Ma BADA doria i paritawanei David ma Uriah awana, natui awarina ma i doria kawa. ¹⁶ David i raupari guratana God awarina natuna aubaina. Am i voterei ma i rui ana au numa ma au debidebi i matamatave. ¹⁷ Ana numa babadai i nei awarina, da au debidebi ita voepai ma maiteni ita am, wate i geduai.

¹⁸ Aupom 7 au murina tevera i 'raġe ma ana numa babadai i rovo da David eġa ita pariverei. Taui ava i babani vivira i pa, “Maranai tevera lawalawaina David eġa ita rautaniġaneta ma marina menanare tana riwanei da natuna i 'raġe? Mepa da ina viapoapoena-melei!”

¹⁹ David i 'nanai ana taunola i pari-ararava ma i aramane i da natuna i 'raġe.

Ma i paridadana, “Tevera i 'raġe bo?” Ma taui i paribelei, “Ee tauna i 'raġe.”

²⁰ Anina ma David debidebiei i vomairi ma i toa ma i vigara ma monamona gabugabui i toai ma i nae au numa gara da i voepaepa. Ma i nae me au numa ma lam i vibaġei da i neiai ma i am.

²¹ Ana numa babadai i baiei ma i riwa, “Maranai tevera lawalawaina, tam u uji ma u mogu, ma tevera i 'raġe, tam u vomairi da e amam!”

²² David i paribelana, “Ee tau a uji ma a mogu maranai natu lawalawaina. A notai da BADA ina rau-nuapoapoeleu ma natu ina lawana. ²³ Wate marina i 'raġe aiwai aubaina ana u uji? Ana neiana-melei bo? Amapo ana nae awarina wate tauna eġa ina nei awariu.”

²⁴ Anina ma David awana Bathsheba i vinuabai ma maiteni i matave. Ma tevera orotona i ġuni ma David i ġorei Solomon. BADA tevera nuanuana i vaia, ²⁵ ma lamna aubaina BADA peroveta Nathan i paritawanei da tevera wavana i ġorei Jedidiah*.

* 12:25: Wei anona Bada ana nuavainana

1 Kings

Gulagulau Naona

Pariverena

Wei bukana ana ġuta tonuġa, ġuta tagogi (Kapita 1-2) lamna gulau David ana iraġe i bababaniei ma natuna Solomon tauna ana gabu i viaia da i vigulau. Ġuta viruaina (Kapita 3-11) Solomon ana vibada mai Israel awari lamna e vivieġeta ma menanare ana vibada nai au dobuna i tua-nae ma i rata. Ma maiteni e ririweta da tauna menanarena God ana tempol i voanei au Jerusalem. Ma ġuta damona (Kapita 12-22) e ririweta da menanare mai Israel i kai da navanava ruaġa, Israel ana dam ma Judah ana dam. Ma dam tagotagogi ava ai gulau i mae. Wei bukana lamna nai gulau i virarautua e bababaniei ma e viviatataieta da metau gulau Bada riwana i vogaġogaġoi me David i kauei nanare, ma metau gulau Bada i mae-puputei ma god ġelau i raudunelei.

Wei bukana au orana.

Gulau David i'raġe ma natuna Solomon i vigulau (2:10-12)

Solomon God i vibaġai da nualaula ma nota aiaina ita verei (9:3-5, 7-4, 16-18)

Solomon ana vibada i tua nae (4:20-21, 25)

Solomon God ana tempol i voai ma i raupariei (5:1-6, 6:1-7, 11-14, 8:1, 3-6, 10-11, 22-23, 27-30, 41-43)

Mai Sheba ai gulau wavinena Solomon i raugenari (10:1-9)

Solomon God i mae-puputei (11:1-5, 7-13, 26-33, 35, 40)

Solomon i'raġe ma natuna Rehoboam gabu i vaini (11:42-43)

Rava i kai da dam ruaġa, Israel ma Judah (12:1-20)

Israel ai Gulau Ahab God i mae-puputei ma god ġelau i raudunelei (16:30-33)

Peroveta Elijah kaiababa ma natuna orotona i voagui (17:1, 8-16, 17-24)

Bada Baal ana peroveta i vovaiubai au ola Kamel (18:1-2, 17-46, 19:1-21)

2

David i'raġe

¹⁰⁻¹¹ *David Israel i vibadei madeġa 40; au Hebron madeġa 7 ma au Jerusalem madeġa 33. David ana mara i kwa ma au Jerusalem au kokoaga noinoina au ririvai i vimataveni. ¹² Ma Solomon amana ana gabu i viaia da Israel ai gulau ma God i kauei da ana vibada i virewapana.

3

Solomon nuaulaula i vibaġei

³ Solomon, BADA nuanuana i viaia ma lamna aubaina amana David ana tarawatu i vojijina-kauei. Wate kava tagogi i kaukauana-boai lamna pulo i apuapu labalababai nai dobuna ravai ai pulo ai au aniamapuna.* ⁴ Wei lamna pulo aniapuna gabuna, wavana naenaena i mae au Gibeon. Solomon i nae weka da ġamoġamo 1,000 i apu-tapui BADA awarina. ⁵ Waguvara tagogi BADA, Solomon ana au rauboni i riwei i pa, "Aiwai e ġoeġoei, ma vibaġei ma ana verem?"

* **2:10-11:** 2Sa 5:4-5 * **3:3:** Eng. High placesWeka ola muomuou au tepai pulo aniapuna i voa-naiei Canaan

⁷ Solomon i paribelei, “BADA au God, tam u tereu da amau a raviepaiai da gulau, wate tau tevera ota ma eġa ata aramanei menanare ana vibadanei. ⁸ Ma tau weka am rava u vinevineia au poui, tau i maġa dewadewa da eġa aniavana. ⁹ Eġa ai ai ainelana tagotagogina am rava, u vinevineia ina vibadei. Lamna aubaina nuaulula ma vereu da ana aramanei metauna aiaina ma metauna apoapoena.”

¹⁰ BADA i vinuai ai da Solomon nuaulaula i vibaġei. ¹¹ Ma Solomon i riwei, “Tam eġa lawana manamanaina bo mane, uta vibaġei bo uta vibaġaiu da am ġavia ata viragei. Eġa! Tam u vibaġaiu nuaulaula aubaina da au rava ma vibadana-kauei. ¹² Aiwai u vibaġei ana verem! Nota aiaina ma nuaulaula ana verem, eġa me ai ai ġelauna au naona nanare bo ai ai ġelauna muriai ina vaia nanare. ¹³ Avena da mane ma vipurapura ma wavam vimae-ġaegāenana aubaina, eġa uta vibaġei, wate ana verem, da am au lawana eġa ai ai ġelauna am vigulau ina votani. ¹⁴ Ma mepa da ma rautaniġaneu ma au tarawatu ma voteletelei me amam David i kaukauei nanare, tam am lawana ina manawa.”

Solomon ana nuaulaula i vieġai

¹⁶ Muriai etanai waivinei ruaġa i ġeta gulau awarina da tauna ai ġaiawa ita okei. ¹⁷ Wavine tagogi i riwa, “Au bada tauai airuaġa ai numa tagogi. Ma tau tevera orotona a vinatunei au numa, marananai noi wavinena kampa. ¹⁸ Ma aupom tonuġa au murina wavine viruaina nanare tevera orotona i vinatunei. Eġa ai ai ġelauna au numa anina airuaġa ava.

¹⁹ —Ma waguvara tagogi wavine natuna i matave-jijini da i ’raġe. ²⁰ Ma waguvarai au pouna i vomairi, ma natu au ririvau i matamatave i vaia. Tauna natuna irairagei au ririvau i vimataveni ma tau natu lawalawaina i vaia da au ririvana. ²¹ Ubaubanai a vomairi da natu ata viġuġui, lamna a baei da natu i ’rairagei. Ma mara i tom kaua ma ata inana-kauei lamna eġa tau natu.”

²² Wate wavinena ġelauna i riwa, “Eġa! Tau natu lawalawaina; tam natum irairagei.”

Ma wavine au naona i vinatuna i riwa bagibagi i pa, “Tevera irairagei lamna tam natum ma lawalawaina lamna tau natu! Ma nanare airuaġa i viġeġae.”

²³ Anina ma gulau Solomon i riwa, “Wei tauna e ririwa, ‘Tau natu lawalawaina ma tam natum irairagei.’ Ma noi tauna e ririwa, ‘Eġa! Tam natum irairagei ma tau lawalawaina.’”

²⁴ Ma gulau i riwa, “Sod ona neiai.” Ma i neiai gulau awarina.

²⁵ Ma i eġara, “Tevera lawalawaina au pouna ona viailaraġi da navanava tagogi wavine tagogi ma navanava ġelauna wavine ġelauna.”

²⁶ Tevera lawalawaina alo oina, nuanuana i bola-kauei ma gulau i riwei, “Au gulau a vibaġaim da tevera lawalawaina noi wavinena ma verei! Eġa ma viraġeni!”

Wate wavinena ġelauna i riwa, “Eġa tam bo tau teverana tana vaia. Tevera au pouna ma viailaraġi!”

²⁷ Anina ma gulau ana paribelana i tere-ġairei i pa, “Eġa tevera ona viraġeni ma wavine au naona i vivinatuna ona verei, tauna tevera alo oina.”

²⁸ Maranai mai Israel Solomon ana etara riwana i nonori, marina tau i Solomon ina vivirei, ma i aramanei da God, Solomon nuaulaula i verei da lawana ina tere-vaijijimani.

4

Solomon i vibada kaua

²⁰ Mai Judah ma mai Israel ai patara i maḡa dewadewa me bubu au gera. Tau i lam ma ai uma tagotagogina ma i vinuai ai kaua. ²¹ Ma Solomon dobuna anatapuna i vibadei. Ana parata au waira Euphrates i vikarei da i ḡaira au Philistia ma kampa da i ḡaira Egypt ana au parata. Wei ravai tax i vivimaiei gulau Solomon awarina ma i voteletelei maranai lawalawaina.

²⁵ Maranai Solomon i vibada mai Judah ma Israel ana nuaubai i mae, ai nuabola eḡa aiwai. Au lavaratei Dan ana dam ai au dobu i vikarei da i ḡaira au Beersheba au rauanaḡei, numa nununai ravai anatapui ai numa ma ai wapu i mae.

5

Solomon Tempol voana aubaina i vokaukaua

¹ Maranai David maemaeninai, tura-kauana lamna Gulau Hiram, Tyre ai gulau. Maranai gulau Hiram riwana i vaia da Solomon i vigulau au Israel, amana David epaiana, Tauna ana taunola i paritawanei da gulau vouna i viegualaei.

² Ma gulau Solomon wei riwana i paritawanei gulau Hiram awarina i pa:

³ Tam u aramanei da amau dam maḡamaḡau i ririvaiai i mae-kwavi viroi ma maiteni i viḡaiḡaiawa nonoa. Ma lamna aubaina eḡa tagotagogina da tempol ita voai Bada ana God, viborumana aubaina. Wate i vivipaipai da au naona Bada ana aguei ana ḡavia ita vipupui. ⁴ Wate marina Bada nuauba i vereu. Au ḡavia ma au nuabola eḡa. ⁵ *A vinua-notanota da tempol ana voai, Bada God viborumana ma vimaie-ḡaeḡaenana aubaina. Me Bada amau i ririwei nanare maranai i riwa i pa, "Natum orotona ana terei gulau, am au gabu, ma tauna numa ina voai tau viborumau aubaina."

⁶ Lamna aubaina am taunola ma paritawanei au ola Lebanon, da aubaiu ai bagibagi cedar ina tarai. Tam am nelara ai tarana i aramana-kauai. Tau au nelara ana paritawaneiai da ina tara agui. Am nelara ana vimaiei, biaḡa e vivibaḡei nanare ana vimaia.

Anina ma gulau Solomon ai cedar i vimaiei. Ma mai Israel nelara 30,000 i vaia ma i voagui da ai ma purapura ḡelau numavoa aubaina i vivaneiai au Jerusalem.

Solomon wate nanare nelara 150,000 i terei da i nola, wei ravai ai nola da ḡaima ina wamawamai ma ina boribori numa voa aubaina.

6

Solomon tempol i voai

¹ Solomon mai Israel i vibadei da madeḡa tonuḡa ma au vi-4-na, nawaravi au viruaina e ḡoreḡorei Ziv, tauna BADA ana tempol voana i vikarei. Wei lamna madeḡa 480 i kwa maranai mai Israel, Egypt i opu-tawanei.

⁷ Ḡaima ḡaeḡaei numa voana aubaina anatapui au weia i ḡarai ma kampa i bori-naiei, da eḡa irama bo aniambori gugurai numavoa gabuna ita vitaniḡa-potai.

11 Ma BADA Solomon i riwei, 12 “Wei Tempolna voana aubaina ana riwem, mepa da riwau ma rautaniġanei, ma au tarawatu anatapui ma votaġotaġoi, ma aiwai a ririwem ma kaukauei, Tau aiwai amam David a parivainuaġani ana kauai aubaim. 13 Ma tau au rava mai Israel maiteni ana mae, ma eġa melanai ana netawanei.”

14 Anina ma Solomon tempol i voa-pai.

8

BADA ana Parivainuaġana bokisina i ruiei au tempol

1 BADA ana parivainuaġana bokisina au Zion, David ana taon* ita vaia da ita nei ai au Tempol. Gulau Solomon, Israel babadai ma dam nununai babadai anatapui i ġoreiai awarina au Jerusalem.

3 Maranai Israel babadai i ġetai, pirisi parivainuaġana bokisina i voepai. 4 Pirisi ma Levi ana dam ravai parivainuaġana bokisina ma numa gara ma ana purapura vivivirei i avara-naiei au Tempol. 5 Gulau Solomon ma mai Israel anatapui parivainuaġana bokisina au naona; sipu da bulumakau i vunuvunu-naiei, ġamoġamo i maġa guratana da iavana i kauana-avei.

6 Ma pirisi parivainuaġana bokisina i ruiei tempol au orana da ana au gabu vivivira dewadewana cherub† ruaġa papei au gabaurina i vikialai.

10 ✨ Maranai pirisi gabu vivivireina i opu-tawanei, bau potopotona i ġairai, ma ana boruma numana i purui. 11 Pirisi eġa tagotagogina da ai nola ita kauai aubaina bau potopotona; BADA ana boruma, tempol i vioai.

Solomon Israel aubaina i raupari

22 Ma Solomon pulo aniapuna au naona i mairi, ma au murina Israel patarana. Uрана i voepai au mara, 23 ma i raupari i pa, “Oo BADA, Israel ana God, eġa mepa God ġelauna me tam nanare, au tepana au mara bo au gabaura au dobu! Tam am parivainuaġana anatapuna e kaukauei, ma mara nonoa am rava nuanuai e vaivaia maranai orai taputapune i votaġotaġoim.

27 —Wate amapo God au dobu ina mae bo eġa? Eġateni! Mara, ma nanare mara ġedewadewa eġa tagotagogina da tauna ina vojijini. Wei tempolna a voavoia lamna anina bo eġa?

28 —Wate au pari ma nonori. BADA au God, tau am taunola ma aiwai amadodo a vivibaġei ma vereu. 29 Am tempol ma inana-vaitetei, marai ma waguvarai, wei gabuna aubaina u riwa u pa, ‘Tau wavau kampa.’ Lamna aubaina au pari weka ana pariparitawaneiai ma i rautaniġanei. 30 Au pari ma nanare am rava mai Israel ai pari ma nonori, maranai naoi i tereiai weka ma i raupari. Au mara ai pari ma nonori ma ai apoapoe ma nota-tawanei.

41-42 —Ma maranai jentail aueia maemaei, riwam ma am rewapana ma kaua ġaġaġei u kaukauei riwai ina nonori; ma ina nei da ina vimae-ġaġaġanim. Ma am numa au naona ina mairi ma ina raupari 43 am au animae au mara, ai pari ma nonori ma ai ġoana ma kauai. Ma jentail wavam ina aramanei ma

* **8:1**: Zion lamna melaga i aburuna, Jerusalem taon garina au orana. † **8:6**: Cherubwei purapurai lalawawai wate ruaġa ai Olivei i tai ma i vimairini (4 mtr) ma papei i terei da numa au giana da ġia ġelauna i tonei. ✨ **8:10**: Exo 40:34-35

ina vimae-ḡaeḡaenim me am rava oina mai Israel. Ma jentail ina aramanei da wei tempolna a voai. Tam vimae-ḡaeḡaenam aubaina.”

10

Sheba ai Gulau wavinena Solomon i raugenari

¹ Solomon ana vigulau wavana naenaena ma lamnei Bada i vimae-ḡaeḡaeni. Ma Sheba ai gulau wavinena, wei riwana i nonori ma i ḡei au Jerusalem da paridadana piripirinei Solomon ana nuaulaula ita raudadani. ² Wavine ana taunola ma kamel maḡamaḡau ai pulo i vigerui ma ana borui i derirui. Tai ai pulo lam tauvidagiai, ḡaima mai ai ḡaeḡae ma gold ḡaeḡaena. Wavine i nei Solomon awarina ma kaua maḡamaḡau i vinua-notenotei Solomon i paridadanei. ³ Solomon ana paridadana anapuna i paribelei, kampa eḡa aiwai tagogi ita piripiri guratana awarina. ⁴ Sheba ai gulau i aramanei da Solomon nuanuana i ulaula kaua ma; i `nanai ana gulau-numana, vigulauna i voai, ⁵ lam au kepakepa, ana gabemani babadai ai gara, ana wine taupainii, ma pulo i apuapui Bada ana au tempol. Ma wavine ana nota i kwa.

⁶ Ma Solomon i riwei, “Am kaua anapuna ma am nuaulaula au au dobu a nononoria lamna anapuna riwa kaua! ⁷ Au naona eḡa ata vitumaḡanei wate marina a nei da matauei a inana da a vitumaḡana. Ma a inana da aiwai a nononoria lamna eḡa. Tam am vigulau i rata dewadewa. ⁸ Am taunola* i vinuai ai kaua! Am gabemani babadai au naom e maimairi marana patapatai ma am nuaulaula e rarautaniḡanei. ⁹ Bada am God ana voepapai, i vinuai aiem ma i terem Israel ai gulau. Bada ana nuavaina maemaena mai Israel aubai i terem gulau, da riwa kauei ma kaua jijimaninei ma vibada.”

¹³ Solomon, Sheba ai gulau aiwai anapuna i rarau-oḡarei ma i vivibaḡei, i verei, wate ḡelau i vereoi. Anina ma gulau wavinena i wanavira-melei ana au dobu ana taubagibagi maiteni.

11

Solomon Awawana

¹ *Gulau Solomon, Egypt ai gulau* natuna i ravaḡi ma nanare jentail waivinei i ravaḡa-naiei, ḡelau mai Moab, mai Ammon, mai Edom, mai Sidon ma, mai Hitti. ² *Au naona BADA mai Israel i riwana-guratei i pa, “Jentail waivinei eḡa ona ravaḡi aubaina tau nuanuami ina vovirai da ai god ona voepapai.” Wate Solomon nai eḡa ita rautaniḡanei, ma awawana nuanuai i vai-kauei. ³ Tauna awawana 700, anapui gulagulau natunatui, wate awawana ḡelau 300 lamna me ana taunola. Tai Solomon ana vitumaḡana BADA awarina i vikwaki.

⁴ Maranai Solomon i magura, awawana ana nota i virai da god ḡelau i votaḡotaḡoi, ma eḡa BADA awarina ita vipatutu me amana David. ⁵ Tauna mai Sidon ai god wavinena Ashtoreth, ma mai Ammon ai god apoapoe kaukauana Milkom† i viviborumei.

* **10:8:** Giruma ḡelau e ririwa awawana * **11:1:** Deu 17:17 * **11:1:** Pharaoh * **11:2:** Deu 7:3-4 † **11:5:** Hebrew Milkomwate giruma ravai maḡamaḡau e notanotai da wei lamna mai Ammon ai god wavana ḡelaunaMolek

7 Au Ola Olive au Jerusalem kampa Solomon voepaepa gabuna i voai mai Moab ai god apoapoe kaukauana, Chemosh aubaina ma ġelauna mai Ammon ai god apoapoe kaukauana, Molek aubaina. 8 Voepaepa gabui wenanare i voanaiei awawana anatapui aubaii da tau i weka incense ma ai pulo ita apuapui ai god awarii.

9-10 Maraotai BADA, Solomon awarina mara ruaġa i eġa ma i riwana-guratei da god ġelau i viborumai ina voterei. Wate tauna eġa ita voteletelei, ma Israel ai God viborumana i voterei. Lamna aubaina BADA amlona i ġaiġai kava Solomon awarina. 11 Ma i riwei i pa, “Wei kauai i visina-viraviraim ma au parivainuāġana bagibagina ma au tarawatu eġa uta votaġotaġoi, lamna aubaina vibada au uram ana vaitawanei ma am taunola tagogi ana verei. 12 Wate amam David notanei wei eġa ana kau i maranai tam lawalawaim. Wate natum au urana ana vaitawanei.”

Jeroboam ma Solomon ai virarautua

26 Solomon ana gabemani taunoleina wavana Jeroboam maiteni gulau Solomon i viġaviei. Tauna Nebath natuna, ana taon Zeredah au Ephraim, ma alona kaiababa wavana Zeruah.

27 Jeroboam ana virarautua wenanare: Solomon ana taunola doa i taratarai da gwagwa i purupurui ma Jerusalem taon garina ġaime i gavogavoi i vopotapota-naiei. 28 Jeroboam oroto araramanina ma maranai Solomon i 'nanai da tauna i nola kava, ma i terei da Joseph noinoii dam Ephraim ma Manasseh, ai taunola i vibadei.

29 Mara tagogi, Jeroboam Jerusalem i voterei da i nena ma au mutulua peroveta Shilohe i wavana Ahijah maiteni airuāġa ava i vinenebelana, Jeroboam kwama vouna i oteoteni. 30 Ahijah, Jeroboam ana kwama vouna i vojijini ma i sikanaiei da 12. 31 Ma i riwei, “Wei garai sikasikai 10 ma vaia aubaim, BADA Israel ana God e ririwa, ‘Tau Israel ana vibadana Solomon au urana ana sikatawanei ma ana dam 10 au uram ana terei.’ 32-33 Solomon Tau i geduaieu ma mai Sidon ai god wavinena, Ashtoreth, Moab ai god, Chemosh ma mai Ammon ai god, Milkom i vovoepaepai ma eġa au iviu ita babara bo ita kauana-kau i matau bo riwau bo au tarawatu ita votaġotaġoi me amana David i kaukauei nanare. Wate au taunola David ma Jerusalem notaiei, Jerusalem a vinei da Tau ġariuei, lamna aubaina Solomon dam tagogi ana verei da ina vibadei.

35 —“Wate Solomon natuna au urana Israel ana dam 10³ ana verem.”

40 Solomon i ġoei da Jeroboam ita viraġeni, wate tauna i ruba au Egypt, ai gulau Shishak awarina ma kampa i mae da Solomon i 'raġe.

42 Solomon au Israel i vigulau da madeġa 40 i kwa.

12

Rehoboam

† 11:35: Dam ruaġa Judah ma Benjamin i voterei

¹ Mai Israel anataupui i nae au Shekem ma i vipaipai da Rehoboam ita nei ma ita terei ai gulau. ² Maranai au Egypt, Nebath natuna Jeroboam, wei riwana i nonori ma Egypt i voterei mā i naeme. (Tauna au naona Solomon i rovoei da kampa i ruba nae.) ³ Ma Israel babadai riwa i paritawanei da Jeroboam i nei ma anataupui i nae Rehoboam awarina ma i riwei, i pa, ⁴“Amam nola vitaikaukauai au teapai i terei, wate ai vita marina uta votelatelai, ma ana vitaunolem.”

⁵ Rehoboam i paribelei i pa, “Ona nae ma aupom vitonuina ona nememei ma ana paribelei.” Ma rava i vilamonei.

⁶ Ma gulau Rehoboam, dogadogara awari vinuaterena i vaia, tau i amana Solomon ana taunola maranai lawalawainai. I paridadanei i pa, “Wei ravai menanarena ana paribelana-nei?”

⁷ Tau i paribelei i pa, “Mepa da u goei da rava ma voagui, ai vibağa ma vianinei, ma tau i aubaim ina vitaunola nonoa.”

⁸ Wate Rehoboam dogadogara ai vinuaterena i geduaiei ma i nae ana kimta awarii, maiteni i rata tagogi, ma marina tauna e vivitaunolei ⁹ Tauna i paridadana, “Ami nota aiwai? Menanare tana kauanei, wei ravai e ririwa da ai vita tana viaburui?”

¹⁰ Ma ana kimta i paribelei i pa, “Nai ravai awarim i ririwa, ‘Amam vita gaeğaena i vereverelai marina ai vita ma viaburui.’ Wenanare ma riwei, ‘Tau vita gaeğaena ana veremi eğa me amau! ¹¹ Amau vita gaeğaena i veremi wate tau gaeğaetana ana terei au tepana! Tauna kwapuei i ravimi wate tau goroğorova donadonanei ana kwapuimi.”

¹² Aupom tonuğa au murina i riwa nanare Jeroboam ana babada maiteni i nememei Rehoboam awarina. ¹³ Gulau Rehoboam dogadogara ai vinuaterena eğa ita vaia ma pona bagibaginei rava awari i babani. ¹⁴ Tauna ana kimta ai vinuaterena i rautaniğanei ma nanare i riwa, “Amau vita gaeğaena i veremi; wate tau ana viaitepepani. Amau i ravimi wate tau goroğorova donadonanei opimi ana sikai.”

¹⁵ Au naona God ana peroveta Ahijah, Shilohei aiwai Nebath natuna Jeroboam i pariverei marina anona i tupua. Gulau rava ai vinuaterena eğa nonorana ita goei, wate lamna BADA i kaukauei da aiwai peroveta i ririwei nanare ina tupua* .

¹⁶ Maranai Israel patarana i 'nanai da gulau tau i babani i parivirevire, ma gulau i riwei i pa:

“Tauta eğa Jesse natuna David ana damei!

Eğa ana dam ravai!

Oo Israel ona naeme me ami au numa

Oo David am dam oina ma inanai!”

Anina ma mai Israel i nae ai au numa. ¹⁷ Wate Rehoboam mai Israel au Judah maemaiei i vibadei.

¹⁸ Adoniram, mai Israel anataupui ai taunola i vibadei. Gulau Rehoboam, Adoniram i paritawanei au Israel da ai taunola ita nei ai au Jerusalem wate tau i gaimiei i virauraei da i virağeni. Gulau Rehoboam lağilağina ana chariot i gerui ma i nae me au Jerusalem. ¹⁹ Ma wei marana da i nae mai Israel David ana dam ma ai vigulau i geduaiei ma i parivirevirei.

* **12:15:** ...da vigulau Solomon natunatuna awariei ina vaitawanei

²⁰ Maranai mai Israel anapui i aramanei da Jeroboam Egyptei i nememei, tau riwa i paritawane da i nei awarii ma i terei Israel dam anapuna ai gulau. Dam tagogiava, Judah ava, i mae David maiteni.

Jeroboam bulumakau goldei i kauē

²⁵ Ma gavia rovana aubaina Jeroboam Shekem taon gaimēi i gari kwaviviroi ma kampa i mae. Wei lamna dobu violaolana, dam Ephraim ai dobu. Muriai i nae ma nanare Penuel taon i gari-kwaviviroi.

²⁶⁻²⁷ Mara tagogi gulau Jeroboam wenanare i vinua-notanota, “Mai Israel anapui e gēgāe au Jerusalem da au tempol pulo e apuapui BADA awarina. Ma mepa da nuanuai ina virai ma ina audamana Judah gulauna Rehoboam awarina amapo tau ina virageniu.” Ma wei vigulauna ina nae me David ana epaepaia awarii.

²⁸ ✨ Ma ana dogadogara maiteni i babani da i vinua-terenei ma bulumakau ruaga goldei i kauē ma ana rava i riwei, “Jerusalem gaena i vinigarigari, Oo Israel wei ami god, tauna Egyptei i tere-opunemi.” ²⁹ Ma bulumakau goldei tagogi au Bethel ma gelauna au Dan i terei.† ³⁰ Wei lamnei i gō’apoapoe; aubaina rava gelaui uama gaegeaena i naeni da au Dan da burumakauna i voepaepai.

³¹ Jeroboam maiteni voepaepa gabui ma pulo aniapuni i voanaiei ola au tepai ma rava labalababa ega mai Levi i vinei da piri, pulo tauapuna.

Rehoboam au Judah i vigulau, ma i vigulau da madega 17 i kwa. Maranai tauna gulau i maemae, mai Judah god morumorui i raudunelei. Ma mai Egypt i nei da Judah i viġaviei ma ai tempol purapurai maiai gaegeae ma gulau ana numa purapurai maiai gaegeae anapui i pupuni da i vivane.

Rehoboam ma Jeroboam i viġaiġaiawa nonoa. Maranai Rehoboam i raġe, natuna Abijah au Judah i vigulau madega tonuga i kwa. Tauna maiteni Jeroboam i viġaviei. Maranai Abijah i raġe, natuna Asa au Judah i vigulau da madega 41 i kwa. Tauna gulau aiaina, ma God i raudunelei ma mai Judah ai god morumorui i viġaripariei. Tauna mara nonoa mai Israel ai gulau Baasha maiteni i viġaiġaiawa. Maranai Asa i raġe natuna Jehoshaphat i vigulau mai Judah awari.

Au Israel Jeroboam natuna Nadad lamna gulau apoapoena, ma nanare aiavo da tauna au murina i vivigulau anapui gulau apoapoei. Nadab mai Israel i vibadei da madega ruaga i kwa ma Baasha tauna i virageni, ma Jeroboam ana dam mamae-terenani maiteni. Wate rava wavana Baasha i vigulau da madega 24 i kwa ma i raġe. Ma natuna Elah i vigulau da Israel i vibadei da madega ruaga i kwa ma ana sorodia badana tagogi, wavana Zimri, tauna i virageni ma i terapa-melei da i vigulau. Wate wiki tagogi au murina mai Israel ai sorodia Omri i terei da gulau, anina ma Zimri i viragena-melei. Omri i vigulau da madega 12 i kwa, anina ma natuna Ahab tauna Israel ana gulau ma i mae da madega 22 i kwa.

✨ **12:28:** Exo 32:4 † **12:29:** Mai Israel ai nota da Dan ma Bethel lamna dobu vivivirei. Bethel lamna au Israel (dam 10) au laubadei ma lamna 16 kilometer ota Jerusalem au kolanana. Wei ega uama, ma wei lamna Jerusalem e teretere-gairei ma rava e ririwei da au Bethel ina voepaepa. Dan lamna Israel au kolana au lavaratei.

16

Israel ana Gulau Ahab

³⁰ Omri natuna Ahab, ana ḡo'apoapoe i rata guratana BADA awarina eḡa me gulau anatapui au naona i vivibada nanare. ³¹ Tauna i notai da lamna kaua labalababa da i ḡo'apoapoe me Nebath natuna Jeroboam i kaukauei nanare. Wate tauna i kauana-guratei maranai mai Sidon ai Gulau Ethbaal natuna Jezebel i ravaḡi ma i vikarei da ai god Baal i raudunelei. ³² Ma Baal ana voepaepa gabuna pulo tauapuna au Samaria i voai ma au orana pulo ania-puna i voai. ³³ Ahab god wavinena Asherah kokoitauna i vituramairini*. Ma kaua maḡamaḡai i kauai da BADA, mai Israel ai God ita viamlogaḡaini, me mai Israel ai gulau au naona i kaukauei nanare.

17

Elijah ma Ahab

¹ Peroveta Tishbelei wavana Elijah* ana dobu Tishbe au Gilead, Ahab i riwei, “Riwa kaua! BADA Israel ana God lawalawaina, ma tauna a vivilaragei. Wavanei a riwa da turuvani eḡa ina peu ma garewa eḡa ina atuna madeḡa biaḡa da tau ana riwa da nanare.”

Ma nanare i mae. Madeḡa biaḡa garewa eḡa ita atuna, marapoi i ḡetai ma eḡa lam.

⁸ Ma BADA Elijah i riwei ⁹ “Laḡilaḡina ma nae au taon Zarephath, Sidon au ḡereḡerena‡ ma kampa ma mae. Kampa kaiababa e mamea, a riwei da ina viambagibagim.”

¹⁰ Ma Elijah i nae au Zarephath. Maranai i ḡetai taon ana au anirui, ma kaiababa i nanai ai i ḡunaḡuna, ma i riwei, “A vivibaḡaim da waira aburuna uta neiai da ata uma!” ¹¹ Ma i nenae vainana aubaina ma orotona i garara me i pa, “Ma palawa apuapunana aburuna maiteni uta neiai.”

¹² Kaiababa i paribelana i pa, “Riwa kaua! Am BADA God lawalawaina ma wavanei a ririwa, tau awariu eḡa palawa apuapunana. Awariu palawa aburu kaimojina ma monamona aburuna. Ai a ḡunaḡuna da ana nae au numa ma lam damona ana vitavi da natu maiteni ana am ma au murina ana raumolaḡau da ana iraḡe.”

¹³⁻¹⁴ Wate Elijah kaiababa i riwei, “Eḡa ma vinuabola! BADA Israel ana God e ririwa, ‘Am palawa abomana eḡa ma monamona wagina eḡa ina kwakwava ma BADA garewa ina paritawaneiai da wapu ina gogo me!’ Anina ma nae au numa ma u ririwa nanare ma kauai, wate au naona palawa aburuna ma apui aubaiu. Ma mae-terenana ma apui aubaimi.”

* **16:33:** Asherah lamna god wavinena, Baal awana; mai Canaan, mai Egypt ma Phonisia anatapui wei godna e viviborumei. * **17:1:** Elijah anona BADA lamna God. † **17:1:** Mai Canaan e vititumaḡana da ai god Baal garewa e vivibadei, wate maraḡela god ḡelauna wavana Mot anona iraḡetauna Baal i viragei. Mepa da Baal i lawana me, lamna tauna dobu ina vituvanei. Lamna aubaina,

Elijah Baal i vimarumarui ma i ririwa da tauna God lawalawaina awarina i vitaunola, ma God garewa ma iraḡe i vibadei, muriai tana inanai maranai ina vomairi da kaiababa natuna ina vilawana-melei ‡ **17:9:** BADA Elijah i paritawanei au Sidon - kampa rava Baal i raudunelana-guratei. Wei lamna Ahab poiana orotona Ethbaal ana gabu, ma wei au marana, Elijah Ahab i raruḡovaḡei.

¹⁵ I nae ma menanare Elijah i ririwei, nanare i kauēi. Ma awari lam i mae da aupom biāga i kwa. ¹⁶ Ma me BADA Elijah i parivainuaḡani nanare palawa au aboma eḡa ita kwa ma monamona au wagi eḡa ita kwa.

¹⁷ Muriāi kaiababa natuna i doria ma ana doria i vovoguratei anina ma i 'raḡe. ¹⁸ Ma wavine Elijah awarina i riwa, i pa, "God ana taunola, Aiwai aubaina wei u kauēi awariu? U nei weka da au ḡo'apoapoe uta vieḡai ma natu uta vi'raḡeni bo?" §

¹⁹ Elijah i paribelei i pa, "Natum ma vereu." Elijah taubeu, alona au urana i vaia ma i avara-ḡaiei au vatavatara mepa i mamae lana ma ana au animatave i vimataveni. ²⁰ Anina ma ponana i rata ma i raupari BADA awarina, "Oo BADA au God, aiwai aubaina kaua apoapoe kaukauana u kauēi kaiababa awarina? Tauna i taravainiu da ana au numa a mamae, ma u kauēi da natuna i 'raḡe?" ²¹ Anina ma Elijah i taduru ma mara tonuḡa taubeu au tepana i matave ma ponana i rata ma i raupari BADA awarina i pa, "Oo BADA au God, A vibaḡaim da tevera ana lawana ma veremelei!"

²² BADA Elijah ana pari i nonori ma tevera lavutu i vikarei ma i lawana. ²³ Elijah tevera i voepai ma i avara ḡairei alona awarina ma i riwei, "Ma inana natum lawalawaina."

²⁴ Wavine i riwa, "Marina aramana-kauēi da tam God ana taunola, ma BADA ana riwa gamomei e opuopu lamna riwa kaua!"

18

Elijah ma Baal ana peroveta

¹⁻² Madēḡa tonuḡa garewa eḡa ma gomara ḡaeḡaena i mae. Madēḡa au vitonuina BADA Elijah i riwei, I pa, "Ma nae gulau Ahab ma inana. Ma tau garewa ana paritawaneiai." Ma Elijah i nae da gulau Ahab ita inana.

¹⁷ Marana tauna Elijah i 'nanai ma i riwa, "Wei tam bo, mai Israel rauaḡaiḡai amai?"

¹⁸ Elijah i paribelei, "Tau eḡa ata rauaḡaiḡai au Jerusalem, wate tam, ma amam ana numa ravai maiteni o rauaḡaiḡai. Taumi BADA ana tarawatu o geduaiei, ma Baal kokoitai o viviborumei." ¹⁹ Marina mai Israel anapui ma ḡorei da ina nae au ola Carmel ina nebeleu. Baal ana peroveta 450 ma Asherah god wavinena ana peroveta 400 Jezebel ana au aboma e amam, anaputapui ma neiai.

²⁰ Ma Ahab mai Israel anapui ma Baal ana peroveta i ḡorei da au ola Carmel ina vinenebelana. ²¹ Elijah patara au naoi i mairi ma i riwei, "Wei vinua-raḡaraḡai mara aiwai ina kwa, ona vinuanaina nae ma ona vianuanaina nei, metauna notana ona vaia? Mepa da BADA God, tauna ona raudunelei. Mepa da Baal god, tauna ona raudunelei." Wate rava eḡa aiwai ita riwei.

§ **17:18:** Nai marana rava i vitumaḡana da doria ma irage lamna God ana kovoḡa ḡo'apoapoe aubaina. Kaiababa i vitumaḡana da Elijah tauna ana au numa i mamae ma lamna BADA matana i taini awarina ma lamna i kauēi da natuna orotona i 'raḡe.

22 Ma Elijah tau i awarii i riwa, “BADA ana peroveta anina tau a mamae. Wate Baal ana peroveta 450.* 23 Aubaita bull ruaga ona nei ai, ma tau ai sia ina rautani ma ina bori muomuoi ma ai au tepana ina terei, wate ega ina ravivoai. Ma tau nanare ana kauai. 24 Ma taumi ona raupari ami god awarina, ma tau ana raupari BADA awarina. Metauna godna ai araratanei i paribelana tauna God ririwa kauana!” Ma rava anatapu i vianina.

25 Elijah Baal ana peroveta i riwei, “Taumi o maga aubaina ona vinoa, Bull tago i ona vinei ma ona vokaukauei. Ami god awarina ona raupari ma ega ai ona ravivoai.” 26 Ma tau ai bull i vaia ma i vokaukauei. Anina ma Baal awarina i raupari, ubaubanai i vikarei da i raviabenai. Tau i garagarara, “Oo Baal, ma paribelei!” Ma pulo aniapuna i arara kwaviviroi, Wate ega paribelana; ega ai ai ita paribelei.

27 Aubenai Elijah i vikarei da i vimarumarui i pa, “Ona raupari guratana! Tauna god! Mepa da e rarauboni bo i nae au ririva bo e vavaagai bo e matamave! Ona avidagudagui!” 28 Ma tau garara i voguraguratei ma me ai au kava nanare, naipiei ma aierei tupuai i boribori-melei ma tara i toitoi. 29 Tau i garagarara da i garagarara da aubigai pulo apuna ana mara. Wate amapo da ega paribelana, ega ai ai ita paribelei, ega aiwai ita nonori.

30 Ma Elijah rava i riwei, “Ona nei awariu.” Ma anatapu i nei ma Elijah i mae-kwaviviroi, tauna BADA ana pulo aniapuna i voavao-melei. 31 *Elijah gaima 12 i vaia, gaima tago i da Israel ana dam tago i aubaina. Wava Israel BADA tau noii Jacob i verei. 32 Ma gaimanei pulo aniapuna i voa-melei BADA viborumana aubaina. Ma au adana doba i garai da waira ana ruva 14 Ltr nanare ina vojijini. 33 Pulo aniapuna au tepana ai i vatari, bull i bori-naiei ma siana ai au tepana i terei. Ma i riwa, “Nau 4 gaegeae waira ona vioai, ma sia ma ai au tepana ona iwaigi.”

34 Ma nanare i kauai, ma i riwei, “Ona kauana-melei.” Ma nanare i kauai. Ma i riwei, “Mara vitonuina ona kauana-melei.” Ma nanare mara vitonuina i kauai. 35 Waira i toi gaira da dogo maiteni i vioai.

36 Ma aubigai pulo apuna ana mara i getai, Elijah i babara-gae pulo aniapuna au ririvana ma i raupari i pa, “Oo BADA, Abraham, Isaac ma Jacob ai God, amadodo rava ma viatataiei da tam God au Israel ma tau am taunola, ma anatapu u ririwei a kauai. 37 BADA ma paribeleu, Oo BADA ma paribeleu da rava ina aramei da tam, au BADA, tam anina God, ma marina rava orai e taitaina-melei awarim.”

38 Maratagoga BADA ana ai marei i gairai ma pulo bull, ai, gaima ma doa i aragibui. Ma waira i waiwagia i guguva-pai.

39 Maranai rava wei i nanai tau i mae-gaira au doa da i matave-taitaina ma i garara BADA awarina, “BADA anina God! BADA ainelana anina God!”

40 Ma Elijah rava i egari, “Baal ana peroveta ona vojijini; Ega tago i ona voterei da ina ruba!” Peroveta anatapu i vojijini ma Elijah tau i riwei da i gairei au Kishon gaugaubana ma anatapu i virageni.

* 18:22: Elijah ana babani lamna gulau wavinena Jezebel e ririwei, tauna i goei da God ana peroveta anatapu ina virageni. Ahab ana taunola Obadiah i voagu da God ana peroveta gelau au guba i tere-govaigi ma waira ma lam i verevei wate ega tata aramanei biaga lawalawai e mamae. * 18:31: Gen 35:10

⁴¹ Ma Elijah gulau Ahab i riwei, “Ma nae da ma am ma garewa gāeāena gugurana a nononori.” ⁴² Ma Ahab i nae da ita am ma Elijah i gāe ola Carmel au tepana, ma i mae-gāira au doa ma kolana au ae-tutuna ma i raupari.

⁴³ Ma ana taunola i riwei, “Ma nae ma au bogei ma inana.” Ana taunola i nae da i nememei Elijah awarina ma i riwei, “Ega aiwai ata inanai.” Anatapuna mara 7 i paritawanei da inana.

⁴⁴ Ma mara vi-7-na i nememei ma i riwa, “Apau aburuna ana rata me oroto urana a inanai bogei i gēgāe.”

Ma Elijah i riwa, “Ma nae ma Ahab ma riwei, ‘Am chariot ma gerui ma ma gāira muriai da garewa ina rautomenim.”

⁴⁵ Ma aburuna aya ma lada i gēi ma dobu i waguverei ma ivena i ruba ma garewa gāeāe otana i toi. Ahab ana chariot i gerui ma i ruba au Jesreel. ⁴⁶ Ma BADA ana rewapana i rui Elijah awarina; ma ana gara giana i taini da ana au jigoraḡita i raḡita-jijini ma i lavu da Ahab i votani da i aiḡeta au Jesreel.

19

Elijah i ruba govaḡa au Sinai

¹ Ma Ahab awana Jezebel i vibenabenamei, aiwai anatapuna Elijah i kaukauei ma menanarena Baal ana peroveta anatapui i vununaiei. ² Ma Jezebel taupariverena i paritawanei Elijah awarina ma i pa, “Wenanarena marana au maratomi, tau ana virāḡenim me au peroveta u virāḡenanei nanare. Mepa da wenanare ega ana kauēi, a raraupari da god ina kovoḡa-kauēu bo ina virāḡeniu.”

³ Elijah i rovo ma ana lawana aubaina i ruba. I nae au Beersheba au Judah, ma kampa ana taunola i voterei. ⁴ *Ma tauna ainelana i nae aupom au mutulua, ma i ḡeta ai *brum* au ḡouna ma i kiala ma i raupari da ita iraḡe. I riwa i pa, “BADA, tau malau a vai-avei. Au lawana ma vaitawanei marina, tau irairāḡe, me noinōiu.” ⁵ Ma i mae-gāera ai *brum* au karena ma i matave. Ma maratagōgi BADA ana anela Elijah i vodadani ma i riwa, “Ma vomairi, ma am.” ⁶ I nana viravira ma i matamatave lana au kolanei palawa apuapunana ma waira aniuma. I am ma i uma ma i matave me.

⁷ BADA ana anela i nememei, i vodadani ma i riwei, “Ma vomairi ma ma am aubaina am vaḡai ina manawa guratana.” ⁸ Elijah i vomairi da i am ma lamnei rewapana i vaia da ina babara aupom 40 ma maratomi 40 da au Sinai*, BADA ana au ola i ḡeta. ⁹ Ma kampa i ḡeta au guba ma i matave. Wate BADA i riwa, “Elijah weka aiwai e kaukauei?”

BADA Elijah awarina i eḡa

¹⁰ Elijah i paribelei, “Oo BADA vivirewapana kaukauam, Tau mara nonoa tam a viborumem - tam ainelam. Mai Israel am parivainuāḡana bagibagina i viaigai, am pulo aniapuna i viairikarikai, ma am peroveta i virāḡena-pai, tau ainelau i votereu, ma marina i ḡoei da tau maiteni ina virāḡeniu!”

¹¹ BADA i riwa, “Ma opu au ola ma au naoi ma mairi.”

* **19:4:** Jon 4:3 * **19:8:** Sinai wavana gēlauna lamna Horeb Weka BADA i viatataiana-melei mai Israel awarii ma ana tarawatu i verei. (Exo 19:20)

Ma Elijah kampa i maimairi ma labu gāegāena olana i ravi, da i gunevi, wate bada e^ga nai kojikojirana au orana. Ive au murina lolo, wate BADA e^ga nai lolona au orana.

¹² Lolo au murina ai araratana, wate BADA e^ga nai aina au orana. Ma ai au murina pariararava jinajinana i nonori. ¹³ Maranai Elijah wei i nonori ana kwama i vaia da naona i purui[†] ma i opu guba au naona i mairi. Ma pona i riwa, “Elijah weka aiwai e kaukauei?”

¹⁴ I paribelei, “Oo BADA God, vivirewapana kaukauam, mara nonoa tam ainelam aubaim a vivilara^ga. Wate Israel ravai am parivainua^gana bagibagina i geduaiei, am pulo aniapuna i rikanaiei, ma am peroveta anatapai i vira^geni. Tau ainelau a mamae. Ma marina i goei da tau maiteni ina vira^geniu.”

¹⁵ BADA i riwa, “Meiei e nenei nanare ma nae me, ma ma-rui au mutu-lua Damaskas, maranai u geta au taon, Hasael ma buloi, mai Syria ai gulau;

¹⁶ Nimshi natuna Jehu ma buloi Israel ai gulau, ma Shaphat natuna Elisha, ana taon Abel-Mehola ma buloi peroveta da am gabu ina vaia. ¹⁷ Aiavo i da Hasael i rovoei da e rubaruba, Jehu tau i ina vira^geni ma aiavo i da Jehu i rovoei da e rubaruba, Elisha tau i ina vira^geni![‡] ¹⁸ Wate mai Israel ai ma^ga 7,000 e^ga melanai Baal ita raudunelei bo kokoitau i ita vicia-la^gola^gonei, ina lawana!”

BADA Elisha i kwatuei

¹⁹ Ma Elijah i nae da Shaphat natuna Elisha i viaroni doa i uauatai, bulumakau 12 ruaruagei ava ra^gira^gitai aniuata i taitaini ma i uauata. § Elisha ana bulumakau, au murioina i nolanola. Elijah i gaira awarina ma ana kwama i votawanei ma Elisha i vioteni.* ²⁰ Elisha bulumakau i votere-tawanei ma Elijah i rubei, ma i riwa, “Au naona ma votereu da ana nae amau ma alou ana inanai ma ana vicia-lagolagonei ma tana nae.”

Elijah i paribelei, “Anina ma nae wate aiwai a kauei awarim ma vinuanotenotei!”

²¹ Ma Elisha i nae da ana bulumakau ruagei i vira^geni, pawe bulumakau au uai i viaigaigai da ai i viviri da sia i apui ma rava i verei da i am. Anina ma i opu da Elijah i votagotagoi.

[†] 19:13: Mai Israel i vituma^gana da e^ga aiai BADA ita inanai ma lawalawaina ita mae. (Exo 3:6)

[‡] 19:17: BADA ana rava ina kovogi ana parivainua^gana bagibagina i gai aubaina. § 19:19: Mai

Israel burumakauei ipa iramei e taitaini da e uauata. * 19:19: Wei lamna mataira da Elisha Elijah ana gabu i vaia da peroveta.

2 King Gulagulau Viruaina

Pariverena

Gulagulau ai buka viruaina lamna mai Israel e bababaniei. Gulau David ana vibadana au murina, aiwai i tupua lamna wei bukai ruaḡa gulagulau naona ma viruina e ririweta. Gulagulau bukana naona e ririweta David au murina Solomon menanarena da i vigulau.

Solomon i'raḡe ma au murina Israel i kai da baba ruaḡa. Dobuna au rauanaḡei i ḡorei Judah ma au lavaratei i ḡorei Israel. Maranai mai Judah ma mai Israel gulagulau, God i voteletei lamna nuaua i mae. Wate maraḡela gulagulau God i rawaḡaḡaie ma god ḡelau i raudunelei. Anina ma nuabola i tupua.

Maranai mai Israel God votelatelana i voterei, Tauna peroveta i paritawanei awari. Ma Gulagulau bukana viruaina au orana lamna peroveta wavana naenaena Elisha. Tauna God ana rewapaniei kaua ḡaēḡaie i kaukauei, ma rava awari i jimajima da ita mae-tavirei God awarina.

Elisha i'raḡe ma au murina, gulagulau maḡamaḡau i apoapoe kaua. Anina ma God ana rava i kovōḡi ma lamnei ai ḡavia tau i vovaiubai ma i pani ma i naiei. Au naona mai Israel awari i tupua ma muriai mai Judah awari i tupua. God ana rava mai Judah eḡa ita vianinei da ita nae me ai au dobu da madeḡa 70 i kwa.

Virarautua rereḡana

Israel i kai da Vibadana ruaḡa, Israel ma Judah 1:1–17:41

Peroveta Elijah ana virarautua 1:1–13:20

Judah gulagulau ma Israel gulagulau ai virarautua 8:16–17:4

Assyria gulauna Samaria i vovaiubai ma Israel i pupuna-naiei ma ana vibadana i kwa 17:5-40

Judah gulagulau ai virarautua 18:1–21:26

Gulau Hezekiah ana au vibada i raukarei ma i nae da gulau Josiah ana au vibada 18:1–21:26

Judah gulagulau damona ai virarautua 23:31–24:20

Babilon gulauna Jerusalem i vovaiubai da Judah ana vibadana i vikwai 25:1-30.

2

Elijah i ḡaie au mara

¹ Ma mara i ḡetai da BADA Elijah labuei ita ḡaie au mara. Elijah ma Elisha Gilgal i voterei ma i nena. ² Ma Elijah, Elisha i riwei i pa, “Weka ma mae ma BADA i riweu da ana nae au Bethel.”

Wate Elisha i paribelei, “Riwa kaua da BADA lawalawaina ma nanare tam lawalawaim, tau nanare eḡa melanai ana voterem.” Anina ma airuaḡa i ḡaira au Bethel.

³ God ana peroveta borui au Bethel maemaie i opui Elisha awarina ma i riwei i pa, “Tam u aramanei da BADA am bada amadodo awarim ina vaitawanei?”

Elisha i paribelei, “Ee a 'ramanei, wate lamna eḡa ona babaniei.”

⁴ Ma Elijah, Elisha i riwei, “Weka ma mae, BADA i riweu da ana nae au Jeriko.”

Wate Elisha i riwa, “Riwa kua da BADA lawalawaina ma nanare tam lawalawaim, tau nanare ega melanai ana voterem.” Anina ma tau i nae au Jeriko.

⁵ Ma God ana peroveta borui kampa au Jeriko maema ei i opui ma Elisha i nebelei ma i riwei, “Tam u aramanei bo da BADA am bada amadodo awarim ina waitawanei?”

Elisha i paribelei, “Ee a ’ramanei, wate lamna ega ona babaniei.”

⁶ Ma Elijah i riwei, “Weka ma mae, BADA e paripari-tawaneu au Waira Jordan.”

Wate Elisha i paribelei i pa, “Riwa kua da BADA lawalawaina ma nanare tam lawalawaim, tau nanare ega melanai ana voterem.” Ma airuaga i babara nae.

⁷ God ana peroveta 50 tau i vogaḡogaḡoi, ma au muri i tumairi maranai Elijah ma Elisha Waira Jordan au adana i tumairi. ⁸ Elijah ana kwama i votawanei ma i piri ma lamnei waira tepana i ravi. Da i vilamonei au oiena ma au kelakelauna ma tau i pouna au alalana i babara damana.

⁹ Maranai au baba gelauna i geta Elijah, Elisha i riwei, “Ma riweu aiwai ana kau ei aubaim muriai da ina gaieiu.”

Ma Elisha i paribelei, “Tau am gabu ana vaia da peroveta ai bada lamna aubaina a goei da am rewapana gaeḡaena, ma viaitepatepani ma ma veredamaneu.”

¹⁰ Elijah i riwa, “Lamna kua pipirina e vivibaḡei, wate mepa da u inana ina gaigaieiu, lamna u vivibaḡei u vaia ma ega, lamna ega.”

¹¹ Ma airuaga i bababara ma i vibababani ma hosi araratana, chariot araratana i taina getei ma tau i raviḡori. Ma Elijah ma Elisha au pou i ruba ma BADA Elijah labuei i gaieiu au mara. ¹² Elisha wei i ’nanai ma i garara, “Amiau! Amiau! Mai Israel taugagaloeina vivirewapana! Tam u nae!” Ma Elijah ega ita inana-melei. Nuanuana i bola-kau ei ma ana kwama au pouna i sikai.

¹³ Ma Elisha i nae ma Elijah ana kwama au doa i vivipeunia, maranai i gaigaieiu au mara, i voepai ma i nae me waira au adana. ¹⁴ Ma kwamana i peupeu i vaia ma waira tepana i ravi ma i riwa, “BADA Elijah ana God mepa?” Maranai waira i ravi, waira i vilamonei ma au pouna au alalana i babara damana.

¹⁵ Jeriko ai peroveta boruna 50 au weia ma i ’nanai aiwai i tupua ma i riwa, “Elijah ana rewapana i damana Elisha awarina.” Ma i nae da ita nebelei ma i mae-gaira au doa ma i raudune. ¹⁶ Ma i riwa i pa, “Tauai rewapana 50, ma paritawanelai da am bada ana baiei. Mepa da BADA Aruana, Elijah i voepai da mepa au ola bo au gaugauba i teretawanei.”

Elisha i paribelei, “Ega! Ega ona nae.”

¹⁷ Wate tau i voigirigiri da tauna i vinimala da i paritawanei i pa, “Anina ona nae.” Wate tau i 50 aupom tonuga i baia ma ega ita nelaḡai. ¹⁸ Maranai tau i nememei au Jeriko, Elisha tau i riwei, “A riwemi da avena ota nae!”

4

Elisha wavine Shunemei i voagui

⁸ Mara tagogi Elisha i nae au Shunem taon. * Weka wavine manemanena

* **4:8:** Shunem taun 50 Km da au Samaria taun.

i mae, ma Elisha i vibaġa-guratei da ita mae da ita am. Ma maranai Elisha wei au dobuna e vaġavaġai, tauna weka i amam. ⁹ Wavine awana i riwei, "Aramanei da orotona weka e nenei lamna BADA ana peroveta vivivireina. ¹⁰ Ana numa aburuna au poewa† tana voai ma ani matave, kepakepa, ani kiala ma rampa tana terei au orana tauna aubaina. Ma kampa ina mae maranai e nenei."

¹¹ Mara tagogi Elisha i nei ma i ġae ana au numa da i rauvirai.

¹⁴ Muriai Elisha ana taunola wavana Gehasi i paridadanei, "Aiwai ana kauai wavinena aubaina."

Ma Gehasi i paribelei, "Tauna eġa natuna orotona ma awana i magura."

¹⁵ Ma Elisha i riwa, "Ma ġoreia!" Ma Gehasi wavine i ġoreiai ma i nei da au metaeta i raumairiei. ¹⁶ ✧ Ma Elisha wavine i riwei, "Wenanare marana madeġa au ġelauna tam natum orotona ma ġuniġuni."

Wavine i paribelei, "Eġa au bada. Tam peroveta ma tau am taunola, eġa ma morui!"

¹⁷ Wate wavine i raumanawa. Ma marana wenanare madeġana au ġelauna wavinena natuna orotona i ġuniġuni, Elisha i ririweia nanare.

Elisha rava 100 i viambagibagi

⁴² Mara ġelauna, oroto tagogi melagai Baal-Shalishahe i nei. Tauna nai madeġana witina naona i labai ma palawa i apui da iavana 20. Ma witi majiġai baikena maiteni i neiai da Elisha i verei. Elisha ana taunola i riwei, "Rava lam‡ ma verei da ina am."

⁴³ Ma ana taunola i garara, "Aiwai! Wei lam eġa tagotagogina da rava 100 tana viambagibagi?" Wate i paribelei i pa, "BADA i riwa da rava ma verei da ina am ma lam ina mae-terei."

⁴⁴ Ma lam au naoi i terei ma tau i am ma lam i mae-terei, BADA i ririweia nanare.

5

Elisha Namaan i vilawani

¹ Namaan lamna mai Syria ai sorodia badana. BADA, Namaan awarina i mae ma lamnei ai ġavia i vovovai-ubai. Ma lamna aubaina ai gulau, tauna i vivirana-kauai ma i vitumaġanei. Namaan sorodia wavana naenaena wate doria lepera i vaia.

² Marana patapatai mai Syria i nenei au Israel i viviġavia. Mara tagogi tevera guguinina i pani da i naiei da ai bada Namaan awana i verei da ana taunola. ³ Mara tagogi guguinina ana bada wavinena i riwei, "Au bada, am bada uta riwana-dadanei mepa da ita nae perovetana au Samaria maemaena awarina. Tauna ana doria ita inani ma ita vilawani."

⁹ Ma Namaan ana hosi ma chariot borui i nae ma Elisha ana au metaeta i raumairiei. ¹⁰ Wate Elisha taupariverena i paritawanei da i riwei i pa, "Ma nae da au waira Jordan ma oġa-melem mara seven ma lepera dorianana ina voterem ma opim ina ai-me."

¹¹ Wate Namaan amlona i ġaiġai kaua ma i riwa i pa, "Tau au nota ġaeġaena da peroveta ita opui da ita inani da urana, opiu au tepana mataira ita kauai ma ana BADA God awarina ita raupari da ata lawana. ¹² Wate waira

† 4:10: Mai Israel ai poewa dabadabai. ✧ 4:16: Gen 18:14 ‡ 4:42: Peroveta ġelaui Elisha maiteni i mamae, kampa gomara i peu ma rava i vinuapoapoe.

Amanah ma Pharpar au Syria i ai telera eġa me Israel wairai. Tau kampa ata toa ma ata lawana.” Ma Namaan i mae-tavirei ma ana amloġaiġaina i nae.

¹³ Ana lalararaga i nae awarina ma i riwei, “Au bada mepa da ita riwem da aiwai pipirina uta kauēi, lamna uta kauēi tapa? Wei lamna kaua telatelana i ririwei nanare, ‘Ma toa ma ma lawana.” ¹⁴ Ma Namaan i ġaira au waira Jordan ma mara seven waira au orana i ġaira, me peroveta i ririwei nanare. Ma opina i ai me da me tevera tupuana nanare ma lepera dorianā i kwa.

¹⁵ Ma Namaan ana lalararaga maiteni i nae me Elisha awarina ma i riwa, “Marina aramane da au dobu, god eġa ita mame anina Israel ana God tauna ava; lamna aubaina au bada pulo a vereverem ma vaia.”

¹⁶ Wate Elisha i paribelei, “Riwa kaua da BADA a vivitaunolei lamna BADA lawalawaina, ma wavane i ririwa tau eġa pulo ana vaia.” Ma Namaan i babani bagibagi da Elisha pulona ita vaia, wate tauna pulona i geduaiei.

¹⁷ Ma Namaan i riwa, “Mepa da nanare lamna ma vianineu da donki ruaġa ai vita ruvana Israel doana ana vigerui da ana naiei au numa. Ma marina da e nenaē, eġa melanai pulo ana apui bo sia taputapuna ana apui god ġelau awarii, anina BADA ainelana awarina. ¹⁸ Tau am taunola ma a ġoei da BADA au ġoa apoapoei ina nota-tawane, kaua tagogi ava awarinei; maranai au gulau a ruiroi ana au tempol ma tauna au urau e vovojjina ma maiteni a mame-ġaira ma Syria ai god Rimmon a viviborumei.”

¹⁹ Elisha i riwa, “Ana nuubam ma nae.” Ma Namaan i nae.

Mai Israel ai gulau Ahab au 851 BC. i raġe. Au murina gulagulau ġelau i mae ma tau i au Samaria i mae. Maranai Hoshea i vigulau. Au 724 BC. mai Assyria ai sorodia Israel i viġaviei.

17

Samaria i peu

Mai Israel ai gulau damona lamna Hoshea. Tauna i mae gulau au Israel madeġa 9, wate Assyria ai gulau i paripariniġaiei ma lamna aubaina i pani.

⁵⁻⁶ Assyria ai gulau Israel anapapuna i naeni, da i ġeta da Samaria taon i mae-kwaviviroi, ma i gudu-tomeni da madeġa tonuġa i kwa. Maranai Hosea ana vigulau madeġana 9 i ġetai, Mai Assyria Samaria taon i ruini mai Israel i pupuna-naiei au Assyria. Ma au Halah, taon, waira Habor au ririvana ma mai Mede ai au taon nununai i verei da i raunuma.

⁷⁻⁸ Wei kovoġai i nei mai Israel awari aubaina tau i god ġelau i viviborumei. Tau i ai ġoa apoapoe i rata kaua BADA ai God awarina, Wariġa Tauna Egypt ai gulau Pharaoh au urana Israel i vai-tawane ma aiaii i ravena-opunei. Mai Israel ai God eteni i pupuna-opunei ai kaua i votaġotaġoi da i kaukauei ma kaua waduboi ġelau Israel ai gulagulai i kaukauei. ⁹⁻¹⁰ Mai Israel kaua apoapoe i kaukauei BADA ai God awarina ma BADA wei kauai eġa ita vinuuaiaiei. Tau i voepaepa gabui i voanaiei god morumorui voepaepaei aubaina au taon nununai, melagai aburuoina da au taon ġaēġaiei. Ola muomuoi anapapuni au tepai ma ai anapapuni au ġoui gana vinalaulau i terenaēi ma Asherah ana tuatua ma kokoitau i vituramairini.

BADA mai Israel ai ġoa apoapoe aubaina i viopuni

²⁴ Assyria ai gulau taon nununai ravai mai Babilon, Cuthah, Awa, Hamath ma Sepharvaim i vivaneiai da Samaria, ana au taon nununai kampa

i terei da i mae. Taui mai Israel numa i ruba-tawanei i raunumei. ²⁵ Vouvounai wei ravai ega BADA ita viborumei, lamna aubaina lion gelaui i paritawaneiai da rava i vivirağeni. ²⁶ Ma rava Assyria ai gulau ana riwa i paritawanei i pa, “Rava au Samaria u terenaiei, dobuna Godna ana tarawatu ega ita aramanei. Lamna aubaina ma dobuna ana God, lion i paritawanei ma ravai e vivirağeni.”

²⁷ Ma mai Assyria ai gulau rava i egari, i pa, “Pirisi tagogi au Samaria o panipania, ona paritawana-melei ma, dobuna ana God, ana kava ravai voui ina viararamani.” ²⁸ Anina ma pirisi tagogi au naona i naenaei au Assyria i neiana-melei da au Bethel i mae. Kampa rava i viararamani da BADA viborumei.

²⁹ Wate jentail ravai nununai ai god morumorui kokoitau i kaukauei ma metauna au taona i mamae, kampa ola au tepai au naona mai Israel au Samaria ai voepaepa gabui i voavoailana, kampa i terenaiei.

18

Hezekiah i mae mai Judah ai gulau

¹ Elah natuna Hosea i vigulau au Israel madega tonuga i kwa. Wei maranaina au Judah Hezekiah, Ahaz natuna i vigulau. ² Tauna ana madega 25 ma i vibada au Jerusalem da madega 29 i kwa. Alona Abi, Zekariah natuna.

³ Tauna kava aiiai avai i kaukauei BADA awarina me noina David nanare.

⁴ *Ma god morumorui ai ani voepaepa gabui anapui i votawatawanei. Ma kokoitau i viairikarikai ma Asherah tuatuaana i taraituina-naiei. Ma wariaga Moses mota bronzei, kokoitau i kavei, i viborumei. Hezekiah motana kokoitauna maiteni i viaigimagimai. (Mai Israel motana i gōrei Nehushtan.)

⁵ Hezekiah BADA, Israel ana God i vitumağanana-kavei. Ega gulau gelauna au Judah nanare me tauna, ma ega aiiai gelauna nanare au naona i mae bo muriai

i mae. ⁶ I vipatutu BADA awarina au anapuna ma i vovoguratei da God ana tarawatu Moses i vereverei anapuna i vovotağotağoi. ⁷ BADA tauna awarina i mae ma ana nola anapuna i davudavu. Tauna Assyria ai gulau i parivirevirei ma ega aubaina ita vilaraga. ⁸ Ma mai Philistia anapui i vovaiubai, melağai da taon gaimai garigarina anapuna i pupuni da au Gaza i geta.

Maranai Hezekiah i rağe, Manasseh amana i raviepaii da i vigulau.

21

Manasseh i vigulau au Judah

¹ Manasseh ana madega 12 ma i vigulau au Jerusalem, ma i vibada madega 55. Tauna alona Hephsibah. ² Wariaga BADA eteni ravai i virubai ai kava vinuamedamedai aubaina maranai mai Israel i ruiui au Canaan. Manasseh wei ravai ai kava i votağotağoi da i kaukauei ma ana goa apoapoe i rata BADA au matana, ³ Manasseh ola muomuoi au tepai god morumorui awari voepaepa gabui amana i viairikarikai, i voa-melei. Ma nanare pulo aniapuna i voanaiei Baal awarina, ma Asherah tuatuaana i tonanaiei me Israel ana gulau Ahab. Manasseh wate nanare ubona i viborumei. ⁴ *Tauna god morumorui ai pulo aniapuna i voanaiei BADA ana tempol au orana, wei gabuna aubaina BADA i riwa i pa, “Wavau au tempol ina mae.” ⁵ Tempol au metaetana, gabu garigarina au orana Pulo aniapui ruağa i voai ubona god aubaii. ⁶ Manasseh

natuna orotona ai au araratana i apui ana pulo,* ma parauma ma baravu ma gweri da ginauri ravai i rautaniġaneġi. Kaua maġamaġau apoapoe kaukauai i kauġi ma BADA amlona i ġaiġai kaua.

¹⁰ Ma lamna aubaina BADA ana peroveta awarieġi i babani i pa, ¹¹ “Gulau Manasseh kaua maġamaġau vinuamedamedai i kaukaueġi, ma tauna i apoapoe kaua eġa me mai Amori, taui wei dobuna i maeni muriaġi da mai Israel. Ai kokoitau miramirai awarieġi mai Judah i raveni da i ġo’apoapoe. ¹² Lamna aubaina BADA Israel ana God wenanare e ririwa, ‘Kovoġa ġaeġaeotana ana neiaġi Judah ma Jerusalem awariġi da maranai rava anatapuġi riwana tanġaġeġi ina nonori ma oraġi ina auepai. ¹³ Ruvana tagogineġi Samaria a kovoġi ma ruvana tagogineġi Jerusalem ma Israel ai gulau Ahab ana epaepaia maiteni a kovoġi. Jerusalem ravai ana amaġa-tawaneġi, me aboma ita amamaġi, ma i vitaragabubui. ¹⁴⁻¹⁵ Au rava i ġo’apoapoe awariu, maranai noinoġi Egypt i opu-tawaneġi da marina. Wei e viviamloġaiġainiu. Ma rava mamae-terenai ana inana-tawaneġi, ma ana veredamaneġi ġavia awariġi ma taui ina vovaiubai ma ai purapura ina kwaleġi.”

¹⁶ Manasseh mai Judah i raveni da god morumorui i viborumeġi ma BADA i vijiboġi; wate eġa lamna ava ma rava aiġi i viraġena labalababai da tara i kororo da Jerusalem etanaina i vioai au giana da au giana:

¹⁸ Manasseh i’raġe ma ana numa au ririvana dobu wavana Uzza ana au wapu i doboġi, Ma natuna Amon ana gabu i vaia da i vigulau.

Amon i vigulau au Judah

¹⁹ Amon ana madeġa 22 ma i vigulau. Ma i vibada madeġa ruaġa au Jerusalem. Tauna alona Meshulemeth, oroto Jotbaheġi wavana Harus natuna ²⁰ Tauna ana ġo’apoapoe, i rata kaua BADA awarina me amana nanare. ²¹ Amana i ġovaivaiteġi ma god morumorui i viborumeġi. ²² Tauna noinoġi ai God, BADA i rawaġaġaġeġi ma ana tarawatu eġa ita votaġotaġoġi.

²³ Ana gabemani babadaġi Gulau Amon i viogeġi da ana au gulau numana i viraġeni. ²⁴ Wate mai Judah, rava gulau Amon viraġenana i viogatariġi anatapuġi i viviraġena-naieġi ma natuna Josiah i terei da i vigulau.

22

Josiah i vigulau au Judah

¹ Josiah ana madeġa 8 maranai i vigulau au Judah ma i vibada au Jerusalem madeġa 31. Tauna alona Jedidah, oroto Boskatheġi Adaiah natuna. ² Tauna BADA au matana aiwai ana tapuna i kauana-kauġeġi ma noina David au ivina i tua ma BADA ana tarawatu ana tapuna i votaġotaġo-kauġeġi.

Josiah nelara ġelauġi i terei da BADA ana tempolġi i voavoavirai lamna maranaina Moses ana tarawatu au buka i girugirumi i nelaġai da i neiaġi Josiah awarina.

¹¹ Maranai gulau i nonori aiwai Tarawatu au bukana i girumi, ma ana gara i viaisikasikai. ¹² Ma gulau Josiah ana taunola piriġi Hilkiah, Saphan natuna Ahikam, Micaiah natuna Akbor, Shaphan gulau ana taugiruma ma Asaiah gulau ana tauvinuaterena i riwei i pa, ¹³ “Noinoita wei bukana riwana

* **21:6:** I apui mai Canaan ai god Molek awarina.

eġa ita votaġotaġoi, ma aiwai i ririwei eġa ita votaġotaġoi, lamna aubaina BADA amlona i ġaiġai awarita. Lamna aubaina ona nae au tempol ma BADA awarina ona raupari tau ma wei dobuna ravai aubaii ma Judah ravai ġelau aubai. Ma ona paridadana wei au bukana aiwai i ġirumi.”

Josiah ana taunola babadai i nae BADA ana peroveta tagogi awarina. Wei perovetana lamna wavine ma riwa i paritawanei i nae me gulau awarina.

¹⁶⁻¹⁷ BADA wenanare i riwa, “Tau wei dobuna ma dobuna taumaenina ana kovaġa kauai.” I girugirumia nanare, ma lamna gulau awarini i ‘avi, BADA wenanare i riwa, “Tau i geduaieu ma god ġelau i viviborumei ma lamna i viamloġaiġainiu. Jerusalem awarina orau amapo da e ararai ma amapo eġa ina dauva.” ¹⁸ Wate ona naeme Judah gulauna, i paritawanemi awarina da ona riwei, “BADA Israel ana God e ririwa da ¹⁹ Maranai u nonori menanare Jerusalem ma taumaenina ana kovoġanei. Tam u rupena ma u vilamolamona tau BADA awariu, am gara u viaisikasika ma u tou, Tau ana kauai da ina apoapoe kaua, rava ma dobu ana kovoġi da eġa aiai wei doana ina maeni. ²⁰ Ma kovoġana a neneiai au Jerusalem eġa ina nei da am irage au murina. Ana voterem da ana nuubam ma irage.”

Ma wei pariverena i naiei ma gulau i riwei. Josiah god morumorui viborumi i viġaei.

23

Josiah i parivainuagana da ina votelatela

¹ Gulau Josiah babada anatapui au Judah ma Jerusalem i ġoreiai. ² Ma pirisi ma peroveta ma rava molamolakana da manemanena, anatapui i ġae BADA ana au tempol. Kampa gulau parivainuagana bagibagina bukana tempol au orana i nenelaġaia i iava-tapui awarii. ³ Gulau ana au gabu i mairi tempol tuatuana au naona ma BADA maiteni parivainuagana bagibagina i ravivouni da tauna BADA ana tarawatu ma ana riwa bagibagina orana ma aruana taputapunei ina vojijini, i ririwei nanare au bukana. Ma rava anatapui nanare i parivainuagana.

⁴ *Ma gulau, pirisi ġetelarana Hilkiah, ana pirisi babadai ma tempol tau-painii i egari da BADA ana tempol au orana aiwaiei Baal ma god wavinena Asherah ma ubona godna morumorui i viviborumei anatapui ita opuneiai. Gulau wei purapurai anatapui i naiei da gaugauba Kidron au ririvana i apunaei, ma lapukarei i vivane i Bethel.

Anina ma Josiah mai Judah ma mai Israel ai dobu i naeni ma mepa rava kokoitau i raudunelei ola muomuoi au tepai anatapui i pupuni ma pirisi kokoitau taurauduneleina anatapui i viraġenti.

Ma gulagulau aiavoi Josiah i votaġotaġoi tui BADA eġa ita vivirei ma ai ġoa i apoapoei BADA awarina.

2 Chronicles Vinolanola Viruaina

Pariverena

Wei bukai Chronicles 1 ma 2 virarautuana tagogina Samuel 1 & 2 ma gulagulau ai au buka 1 & 2 e mamae. Chronicles 1, gulau David e virarautuei ma ana oga tempol au Jerusalem aubaina. David nola ogana piri si i verei. Tauna i gōei da rava anapapui BADA ina viborumana-kauei. Chronicles Viruaina mai Israel ai gulagulau ai nola i babaniei, menanare Solomon ana taunola BADA ana tempol i voai au Jerusalem. Solomon irage ma au murina menanare ana dobu i kai da ruaḡa. Chronicles 2, gulagulau ruaḡa ai kaua e bababaniei. Gulau gelau ai ai ai tau i BADA i viviborumei wate gulau maḡamaḡai i apoapoe kaua. Tau i eḡa BADA ana tarawatu ita votaḡotaḡoi. Tau i god morumoru i votaḡotaḡoi. Wei gulau nuabola ai rava i verei. Ma BADA ai gavia i vianinei da i nei ma do bu i ruaḡai i viḡaviei da i pupuni. Ma muriai BADA Judah mamae terenai i neiana-meleiai.

36

Judah e vovoapoapoe

¹⁴ Ma piri si ai babada ma rava anapaputapui, BADA ana parivainuaḡana bagibagina eḡa ita vojijini ma jentail au ririvai maema ei ai kaua apoapoei kaukauai ma ai bua i ḡovai vaitei. Ma lamnei BADA ana Tempol vivivireina au Jerusalem i vimiramirai.

¹⁵ Mai Judah ḡoḡoḡai ai God BADA, ana rava ma ana tempol nuanuana i bolai ma lamna aubaina ana peroveta nununai i paripari-tawanei da rava ai ḡoa apoapoe ita rupeni. ¹⁶ Wate tau i God ana peroveta i vijiboḡi ma eḡa ita vivirei ma au damona BADA ana amloḡaiḡai i rata guratana da menanare ita viubanei.

Mai Babilon Jerusalem i vipupui

¹⁷ Anina ma BADA mai Babilon ai gulau i paritawanei da Jerusalem i vipupui. Ai sorodia nelara voui tempol au orana i viraḡena-naiei. Tau i mai Judea eḡa ita rau-nuapoapoelei ma waivine ma laraga ma rava magumaguri ma doridoriai. BADA mai Judea anapapui i verenei Babilon ai gulau Nebuchadnezzar au urana. ¹⁸ Tauna Tempol ana purapura ḡaeḡaei da muomuoi ma mane anapapui i pupuna-naiei. Gulau ana gabemani babada i ai numa i viirikarikai ma mane ma purapura i pupuna-naiei au Babilon. ¹⁹ Ma God ana Tempol i apui ma Jerusalem garina i viirikarikai; ma gulau ana numa ma numa gelau anapapui ma purapura mae-terenana anapapui i viirikarikai ma i apu-naiei, eḡa aiwai ita mae.

²⁰ Ma aiavo i lawalawai i mamae, anapapui i paninaiei au Babilon da i vitaunola. Ma muriai mai Persia nai dobuna Babilon i pupuni ma i vibadei.

²¹ Mai Israel ai doa ipipipiei tau i madeḡa au vi-7-na ai doana eḡa lauvitau ita verei, lamna aubaina i kovogi, da i pupuna-naiei au Babilon da madeḡa 70 i kwa. BADA ana peroveta Jeremiah i ririweia nanare i tupua.

²² Au Persia gulau Sairas ana vibada madeḡana tagogi, ma BADA ana peroveta Jeremiah aiwai i ririweia marina i tupua, Persia ai gulau orana i ravi-dagudagui da i giruma ma i vibabara i ana au vigulau au anapapuna.

²³ Mai Persia ai gulau Sairas, wei i riwei,

“BADA, Aidamo ana God, dobu anapuna vibadana au urau i terei. Ma i vineu da ana Tempol au Jerusalem, Judah au paratana ana voa-melei. Ma taumi aiavoi BADA ana rava, o gōēgōē da ona nae me kampa, lamna anina da ona nae. Ma BADA ami God ina gagaloemi.”

Ezra

Pariverena

Wei bukana Ezra e ririweta da menanare mai Judea au Babilon i mae ma ġelau i naeme ai au dobu au Jerusalem da BADA ana Tempol ina voa-melei.

3

Pulo aniapuna i voa-melei

¹ Mai Israel ai au dobu i mae nawaravi ^v*i7ⁿa* ma marina tau i anatapui i netagogiai au Jerusalem. ² Nai maranai Josadak natuna Jeshua ana rava piri si ġelau i maiteni, ma Shealtiel natuna Zerubabel ana dam ravai maiteni; pulo aniapuna i voai Israel ana God awarina. Me God ana peroveta Moses, ana Tarawatu i ririweia nanare. ³ Avena da tau i nai dobuna taumaeni i rovorovoei; wate pulo aniapuna ana au gabu wadubona i voai. Ma i vikarei da ubaubanai ma aubigai patapatana pulo i apuapui BADA awarina.

Tempol i voa-melei

⁷ Gulau Sairas i riwa da wenanare ita kauei. Tau i mane ġaima taubori ma kamda ravai ita verei. Ma lam, wain ma oil mai Sidon ma mai Tyre ita verei da ai cedar au Lebanon bogei ita towana-neiai au Joppa.

⁸ Ma Madeġa viruaina nawaravina au viruaina Zerubabel ma Jeshua ma varevarei (pirisi ma mai Levi ma rava ġelau i maiteni i vivipanipani i nememei au Jerusalem) ma BADA ana Tempol voana i vikarei. Ma Levi ana damei nelara ai madeġa 20 da nore i ġeġae i terei da nola i vibadei.

Rava i nola da God ana Tempol i voa-melei madeġa 21 au orana.

6

Tempol i viaiaini

¹⁶ Anina ma Mai Israel pipirisi ma dam Levi ravai ma rava anatapui panipaniei i nenememei ana nuaiaii God ana Tempol i vovivirei God voepaepana aubaina.

Nehemiah

Pariverena

Nehemiah Wei au bukana e ririweta, menanare mai Judea gēlaui au Babilon i mamea, i naeme ai au dobu Jerusalem da garina ina voai-melei.

8

Ezra tarawatu bukana-rava awari i 'avi

¹ Rava anatapui Jerusalem ana au anirui e gōreḡorei Samaim,* i vitagōgiei. Ma tau tarawatu badana Ezra i riwei da Moses ana tarawatu bukana ita neiai, wei tarawatuna BADA mai Israel i verevereia.

² Ma aupom naona au nawaravi au vi-7-na, pulo tauapuna piri Ezra tarawatu bukana i neiai patarana i vitagōgieina awari, nelarai ma waivinei ma roaroa awari metau da iava i aramanei. ³ Ma Ezra au deba i mairi ma ponana gaeḡaenei bukana i 'avi rava awarii, maratōmtōmai i vikarei da aubenai ma anatapui i rautaniḡana kaua.

⁵ Ezra vatara au tepana i mairi rava au matai ma maranai buka i votawanei, rava anatapui i vomaimairi. ⁶ Anina ma Ezra BADA God gaeḡaena i voepaepai; ma rava urai i voepai ma i paribelei i pa, "Amen, Amen!" Ma i raudune au doa ma BADA i voepaepai.

⁸ Ma Levi ana dam ravai, bukana rava awari i 'avi ma i viararamani† da tau riwana anona i aramanei.

⁹ Anina ma Gavena Nehemiah, ma piri, taugiruma Ezra ma dam Levi ravai, rava awari i viararamana. Marina rava awarii i riwa i pa, "Wei marana tana vovaiivreina BADA ata God awarina. Lamna aubaina eḡa ona vinuabola ma ona tou."

¹⁰ Ma Nehemiah i riwa, "Ona nae ami au numa ma ona am kaua ma ona uma-kaua ma rava eḡa ita lauvoa, ona taraiḡuei. Wei marana lamna mara vivivireina BADA awarina. Lamna aubaina BADA ina vinuaiainimi, eḡa ona vinuabola, aubaina BADA ana nuaiai awarimi lamna ami rewapana!"

* **8:1:** Wei metaetana lamna Jerusalem garina ana anirui tagogi e gōreḡorei Samaim wate ata ponei Waira. Wei aniruina lamna waira dogona au gēreḡerena au maramatanei. † **8:8:** Bible pona Hebrewi i girumi ma wei ravai pona arama i aramanei lamna aubaina viararamana maiteni i kaukauei.

Job

Pariverena

Rava jijimanina tagogi vinuabola apoapoei maḡamaḡau i nenelaḡai lamna au bukana e vivirarautuei. Job ana nota ma ana rava ai nota wei nuabolai awari lamna e viviatataieta. Ana rava e notanotai da Job kaua apoapoei i kauai aubaina God, tauna e kovokovoḡi. Job i aramanei da wei eḡa riwa kaua. Tauna, God i vivitumaḡanei, wate i ḡoeḡoei da ita aramanei aiwai aubaina wei nuabolana e tuputupua. God, Job ana vinuapoapoe anona eḡa ita vieḡei, wate God ana rewapana ma ana nuaulaula i rata guratana au baina rava eḡa tagotagogina da ina aramanei aiwai e viviatataieta. Maranai i aramanei da God ana rewapana ma ana nuaulaula i rata guratana, tauna God vitaraviravirana i voterei ma i voepaepai. Wei virarautuana au damona God Job i vilawani ma natunatuna i vimaḡai ma i vimaura-melei. God Job ana rava tonuḡa i ena-guratei aubaina tau i eḡa ita aramana-kauai aiwai i latolatoni ma Job i vinuapoapoe.

Job ana virarautua

¹ Orotu wavana Job au Uz i mae. Tauna rava jijimana kaukauana ma ḡo'apoapoei i geduaiei. Tauna God i vivirei ma ḡoa aiiai ava i kaukauei. ² Tauna natunatuna nelarai 7 ma waivinei tonuḡa, ³ ma ana sipu 7,000; kamel 3,000; uata bullna 1,000 ma donkey waivinei 500 ma ana taunola maḡamaḡau. Ma i vipurapura ma i maura kaua eḡa aiiai ḡelauna nanare nai au dobuna, au maramatanei.

⁴ Ai mara i tereterei nanare Job natunatuna nelarai nununai ai au numa i toretorela, ma varevarei ma novunovui i rauḡoreiai ma anatapui i amam ma i umauma gogona. ⁵ Aupom biaḡa nanare torela au murina, Job ubaubanai boiboḡi ina vovomairi ma natunatuna nununai ina rauḡoreiai ma epaiiai ḡamoḡamo taputapuna ina apuapui BADA awarina da natunatuna ina viaiaini. Tauna i notanota da, "Mepa da roaroa i kauana-boai ma au orai God i parivaiapoapoeni."

Satan Job ana tumaḡana i raudadani

⁶ Marina mara i ḡetai da anela au mara i ḡeta BADA awarina ma tauviwavu - Satan tau i votaḡoi da i ḡeta. ⁷ BADA Satan i paridadanei, "Tam meiei e nenei?" Satan i paribelei i pa, "Tau were ma nare a nenei, dobu a tetetei."

⁸ Ma BADA i paridadana, "Au taunola Job u inanai bo eḡa? Tauna rava aiiai kaukauana, eḡa aiiai ḡelauna au dobu nanare. Tauna rava jijimanina ma patu-patutuna. E vivivireiu ma e paipaina-melei da eḡa kaua apoapoe ita kaukauei."

⁹ Satan i paribelei, "Tam Job e paipaina-kauai lamna aubaina e voepaepaim!" ¹⁰ Marana patapatai tauna ana numa ravai ma ana purapura e gagagaloei, ma anatapuna uranei e vovodadani e viaiaini, ma bulumakau u verei da wapuna i oai. ¹¹ Wate uram ma viloloi ma anatapuna ḡarinei ma vaitawanei, ma au matam ina parivai apoapoenim."

¹² BADA i riwa i pa, "Anina, ana purapura anatapuna au uram a tereterei, wate eḡa tupuana aiwaina ma vodadani." Ma Satan BADA i netawanei.

¹³ Mara tagogi, Job natunatuna nelarai ma waivinei i toretorela, tuai ana au numa, ¹⁴ ma taupariverena i ḡeta Job awarina ma i riwei i pa, "Am taunola burumakauei doa i uauatai ma au ḡereḡerei donkey modu i amam, ¹⁵ ma

mai Sabea i ruba-ġairai ma ġamoġamo anata-pui i kwalei, am taunola anata-pui i viragena-naiei, ma tau ainelau a ruba da ata pariverem.”

¹⁶ I bababani ma taupariverena ġelauna i ġetai ma i riwa, “Namanamara marei i ġairai da sipu ma taupainii i viragena-pai, ma tau ainelau a rubai da ata paripariverem!”

¹⁷ Ravana i bababani ma taupariverena ġelauna i ruba ġetai ma i riwa, “Mai Caldia boru tonuġa ana melaġina i ġairai ma am kamel i viaġaġana-naiei ma taupainii i viragena-pai, tau ainelau a ruba da ata paripariverem!”

¹⁸ Amapo i bababani ma wate taupariverena ġelauna i ruba ġetai ma i riwa, “Natunatum nelaarai ma waivinei, natuevou ana au numa i toretorela, ¹⁹ ma maratagogi kojikojira mutuluei i opui ma numa i vipeuni au tepai ma anata-pui i viaijijini, tau ainelau a ruba da ata pariverem!”

²⁰ Anina ma Job i vomairi ma ana kwama i sikai. Kolana i ġari ma i peu ġaira au doa ma BADA i voepaepai. ²¹ Ma i riwa, “Ana kovakovau a nei;

ana kovakovau ana nae.

BADA i verena ma i vai-melei;

BADA wavana ana voepaepai ma ana viborumei.”

²² Wei anata-puna au orana, Job eġa ġo’apoapoe aiwaina ita kauai bo God ita viwavui.

2

Satan Job i raudadana-melei

¹ Mara ġelauna, anela au mara i ġeta me, BADA awarina ma tauviwavuna - Satan tau i votaġoi. ² Ma BADA Satan i paridadanei, “Tam meiei e nenei?”

Satan i paribelei i pa, “Tau were ma nare a nenaie ma a nenei, dobu a tetetei.”

³ Ma BADA i paridadana, “Au taunola Job u inana bo eġa? Tauna rava aiiai kaukauana eġa aiiai ġelauna au dobu nanare. Tauna rava jijimanina ma patupatutuna. Ma e vivivireiu ma ġo’apoapoe e gedugedaiei. Ana lawana anina jijimanina e maemaeni avena da orau u taini da a kovoġa labalababai.”

⁴ Tauviwavu BADA i paribelei, “Tauna ana lawana ava e vinuabolei, me rava ana purapura anata-puna ina verenei da eġa ina kero. ⁵ Wate uram ma viloloi ma tupuana ma ġelamina ma ravi, ma au matam ina parivai-apoapoenim!”

⁶ BADA i riwei, “Anina, tauna au uram a tereterei wate eġa ma viragēni.”

⁷ Ma Satan BADA i netawaneie ma i nae da Job kero apoapoei i verei, au loulouna da i ġaira au ae lapalapana. ⁸ Ma Job nau gebona i vaia da kerona i kakakaroi ma au lapukare i kiakiala.

⁹ Awana Job i riwei i pa, “Amapo da am lawana jijimanina ma vovojijini bo? God ma parivai-apoapoeni ma ma iraġe!”

¹⁰ Wate Job i paribelei i pa, “Tam opaopam! Eġa nanare ma babani. Tauta God kava maġamaġau ma aiiai e verevereta, ma apoapoei e paripari-tawaneiai, maiteni tana vaia.”

Wei kauai maġamaġau apoapoe Job awarina i tupua, wate tauna ana babani awarinei eġa ġo’apoapoe ita kauai.

Job ana rava i nei da i raugenari

¹¹ Maranaie ana rava tonuġa riwana i vaia da Job wenanare ma menanare i vinu’apoapoeni, tau i vitagogiei ma i nae Job ita raugenari ma ita vinuabai. Tau i wavai Eliphas tauna Temanei, Bildad tauna Shuahei ma Zophar tauna

Naamah ei. ¹² Tau i tapunei Job i 'nanai ma i vinuanainei da lamna Job. Maranai i 'nana-kauei. Tau i vitouana, ma ai kwama i viaisikasikai ma pokau au tepai i tawatawanei. ¹³ Ma aupom ma waguvarai 7 tau i doa i vikiakialei, Job i mae-vereverei. Ma i 'nanai da ana nuabola i rata guratana ma gamoi i pota ma i kiala genuatau.

3

Job ana tupua marana i parivaiapoapoeni.

- ¹ Wiki tagogi au murina Job gamona i laḡi ma ana tupua marana i parivaiapoapoeni. ² I pa,
- ³ Au tupua marana ma boai,
ma waguvaraina i vinolanola da tevera orotona i tupua.
- ⁴ Nai marana ina waguwarei!
Ma God au aidamo wei marana ina nota-tawanei,
ma au tepana eḡa ina rarana.
- ⁵ Waguvara ma gimtona potopotona wei marana ina vibadei;
ma lada marana ina purui
ma gimtona lalalaina ina purui.
- ⁶ Gimtona nai waguvaraina ina viamoai
wei marana eḡa ma iava-melei;
madeḡana bo nawaravina.
- ⁷ Nai waguvaraina eḡa aiai ina tupua,
ma eḡa nuai ai gararana ina nonori.
- ⁸ Vijiboḡa amamai,
mepa da ai vijiboḡa boga bariawana ina vidagui;
tau i wei marana ina vijiboḡi.
- ⁹ Maratomtom ubonana ina ḡuvai
ma mara karena ina paina-avei
ma madeḡa vuduna eḡa ina inanai.
- ¹⁰ Aubaina tau i manawa metaetana eḡa ita gudui
ma vita maḡamaḡau i vereu.
- ¹¹ Airake, boiboḡi ita gomuii!
Bo ata i 'raḡe maranai a tuputupua.
- ¹² Aiwai aubaina au arona i vimataveniu
ma guḡunei i viḡuḡuii?
- ¹³ Maranaina a tupua, matau ita pota;
ma ata matave ma ata vilauvitau.

4

Eliphaz i babani

- ¹ Ma Eliphaz rava Temanei Job i paribelei i pa,
- ² Job eḡa amlom ina ḡaiḡai ma ana babani,
tau ata genuana ava, ana babani!
- ³ Rava maḡamaḡau u viararamani
ma ḡokokokarai u vovaiwewapani.
- ⁴ Riwam, rava peupeui u duḡui,
ma ae tutui viviarai u duḡui.

- 5 Wate marina nuabola i nei awarim, ma am nota i peu
i vodadanim ma u rovo-kaua.
6 Am vitumaḡana God awarina,
ma am lawana jijimanina.
Lamna, am rewapana, tapa?

- 7 Ma tumairi ma ma vinua notanota!
Rava jijimani e irairaḡe bo?
Mara aiwai rava jijimani i kero ma i'raḡe?

- 8 A inanai rava ḡoa apoapoe i paewi
ma nuabola i tuarui.

Job ana rava amapo da i ririwa-ḡirigiri da tauna kaua apoapoei i kauei aubaina wei nuabolana e nenelaḡai. Wate Job e ririwa da tauna eḡa aiwai apoapona ita kauei.

38

BADA Job i paribelei

- 1 Ma BADA labu au orana ma Job i paribelei, i pa,
2 “Tam aiai e babani labalababa,
ma au nuaulaula e paripari-virevirei?
3 Ma mairi jijimana me oroto,
ana vitaravirevirem
ma ma paribeleu!
4 Tam mepa maranai dobu tuatuana i tonei?
Ma riweu, mepa da u aramanei?
5 Aiai dobu ana manawa ma ana dabora i terei?
U aramanei tapa? Ma aiai i ruvai?
6 Aiwai dobu tuatuana e vovojjini?
Ma aiai dobu tuatuana i tonei,
7 maranai maratomtombonai i wela tagogi,
ma BADA ana anela ana morelanai i voepaepa ma i vigaragaraei?
8 Aiai boga ana au parata i terei
maranai boga manawana ana goba i wanaiwaḡi?”

40

- 1 Ma BADA Job i riwei i pa,
2 “Tam, God Vivirewapana Kaukauana e viviwavui;
Aiai God e viviwavui, ina paribelei.”
3 Anina ma Job BADA i paribelei,
4 “Tau rava labalababa, menanare ana paribelananem?
Gamou ina pota.
5 Boiboḡi a babani guratana.
Eḡa aiwai ḡelauna ana latoni.”

42

Job i babani me

- 1 Ma Job i babani me, i pa

- 2 “Tau a aramanei da tam aiwai anatapuna e kaukauei;
Eġa aiāi am oga ina viġaei.
- 3 ✧U paridadaneu, “Tam aiāi e bababani labalababa,
ma au nuaulaula e pari-virevirei?”
Riwa kaua am boruma vivinualaulaunana eġa ata aramanei,
da a voġana guratana.”
- 4 ✧“U riweu, ‘Ma rautaniġana, ma ana babani,
Ana paridadanem ma tam ma paribelev.’
- 5 Tanigau ava riwam i nonori
Wate marina matau i ‘nanaim.
- 6 A vinimala, ma au lapukare ma au debidebi ana kiala.
A rupeupena ma a mae-tavireu awarim ma au ġo‘apoapoe ma nota-
tawanei.”

Damona

7 BADA i babani vorovei Job awarina ma marina Eliphaz rava Temanei awarina ina pa, “Amlou i ġaiġai awarim am rava ruaġa maiteni, taumi eġa riwa kaua ota babaniei me Job nanare. 8 Lamna aubaina, bull 7 ma sipu ororotoi 7 ona vaia ma ona nae au taunola Job awarina ma siai taputapuna ona apui awariu. Tauna aubaimi ina raupari ma ana pari ana nonori da eġa ana vinimalaimi ami kaua apoapoei aubaina. Taumi eġa riwa kaua ota babaniei me au taunola Job nanare.” 9 Anina ma Eliphaz, Bildad ma Zophar BADA aiwai i ririweia nanare i kauēi, ma BADA Job ana pari i nonori.

10 ✧Ma maranai Job i raupari-vorovei, BADA ana maura i veremelei ma ravai-tepatepani. 11 Varevareina ma novunovuna ma ana rava waduwaduboi i nei ana au numa ma maiteni i am ma i uma gogona. Ma Job i vinuaubai aubaina BADA vita ġaeġaena Job i verei. Ma tau i anatapui kampa i ġeġeta mane ma loji goldei Job i verei.

12 BADA, Job i viaiaina-kauēi eġa me au naonei. Awarina sipu 14,000; kamel 6,000; uata bullna 2,000 ma donki waivine 1,000. 13 Ma nanare, natunatuna nelarai seven ma waivinei tonuġa. 14 Natuna wavinena magurina wavana Jemimah*, ma keikeina wavana Keziah† ma vitonuina Keren-Hapuk. ‡ 15 Job natunatuna guguini inana i ai dewadewa eġa me guguini ġelau i nai au dobuna. Ma Job natunatuna nelarai ma waivinei ai buderi i terei da anatapui ruvana tagoġina ina vaia.

16 Job i mae madeġa 140 ġelauna; da ġoġoġana ma nonoina da i nae kimta au vi-4- nainana. 17 Anina ma i magura kaua ma i raġe.

✧ 42:3: Job 38:2 ✧ 42:4: Job 38:3 ✧ 42:10: Job 1:1-3 * 42:14: Heb. wei wavana anona Gabubu † 42:14: Heb. wei wavana anona Cassia. bo kaidara talana. ‡ 42:14: Heb. wei wavana anona mata penitana.

Psalm Wela ma Pari

Pariverena

Mara manamanaina i netawanana rava maḡamaḡau taputapunei ava wela ma pari i girumi wei au bukana. Mai Israel wei wela ma pari i tami ma i teretagōgei da lamnei God i viviborumei.

Wei au bukana wela ma pari tapuna ma tapuna. Ġelau God e viviborumei ma e vovoepapai ma ana iviaiai aubaina e vivieḡalauēi. Ġelau e vivibaḡa agu ma gagalo aubaina, bo notatawanana aubaina. Wela au ḡelau, rava e raraupari ai gulau aubaina ma god e vivibaḡai da ai ḡavia ita kovōḡi. Ma wela au ḡelau tauamgiruma ana apoapoe ma ana nuabōla aubaii God awarina i beubeura.

Ma maraḡela Iesu riwa wei au parii i vaia da i viararamana. Kerisiana wei wela ma parii i welewelei ai au viboruma ma i jimajima.

Wela vinevinei

Psalm 1, 10, 23, 27, 34, 51, 67, 90, 95, 1-11, 100, 103, 110, 103, 110, 119, 9-16 ma 139.

Buka Tagogi

1

Nuaiiai ririwa-kauana

¹ Rava viaiainana, lamna eḡa ḡo'apoapoe ravai ita votaḡotaḡoi,
ma ponai eḡa ita rarautaniḡanei;
ma vivijibogaḡi eḡa awarii ita kiakiala.

² Wate BADA ana tarawatu i vinuaiiaei,
aupom ma marai e notanota-vaitetei.

³ *Tauna me ai, waira au adana gogogona,
ana au mara e rarauano;
ma ruguruguḡi eḡa ita poipoi.

Wei ravanana, aiwai anatapuna e kaukauana-kauei.

⁴ Wate ḡo'apoapoe ravai eḡa nanare!
Tauḡi me rugurugu, ive i kapupuana-naiei;

⁵ Lamna aubaina ḡo'apoapoe taukauei BADA ana au etera ita mairi ava,
ma nanare ḡoa apoapoei ta kauei rava jijimani ai au dam ita mae ava.

⁶ BADA ḡoa aiiai ravai e rarauetaraveni ma e paipaini;
wate ḡo'apoapoe ai etanai au damona, pupui.

23

*Bada taupainiu**

David ana wela

¹ BADA taupainiu
ma eḡa aiwai ana voladaḡei.

² Gidagida majimajigai au tepana i vimataveniu,
ma i raveniu waira au rarauairina au adana.

³ Au rewapana e raviravivouini
ma wavana aiaina aubaina etanai jijimaninei i raveniu.

* 1:3: Jer 17:8 * 23:: Taupainiu me sipu taupainina.

- ⁴ Avena da gwagwa waguwaguvareina ana naeni,
wate eġa aiwai apoapoena ana rovoei.
Aubaina tam au ririvau da am kwapuei ma jiġonei e gagaloeu ma
e vivinuaubaiu.
- ⁵ Aubaiu torela e vokaukauei au ġavia au naoi.
Oilei kolau u volaġolaġoi da tam u vinuavaineu,
ma au kelaka i oa-karagelai.
- ⁶ Ee! Riwa kua da am iviaiai ma am raunuapoapoe maemae nonoana
awariu ina mae, da au mara au damona.
Ma BADA ana au numa ana mae-nonoa.

27

Voepaepa parina

David ana wela

- ¹ BADA au lalalaina ma au tauvilawana,
aiwai ana rovoei!
BADA au taugagagalo
aiwai ana rovoei!
- ² Maranai ġo'apoapoei ravaii i ġetai
da ita vunuii,
au ġavia
aei ina pakana-melei da ina peu.
- ³ Avena da sorodia borui ina mae-gariġuruvui,
tau eġa ana rovo dadana.
Maranai au ġavia i vomairi,
tau anina da God ana vivitumaġanei.
- ⁴ Kua tagogi ava aubaina a vivibaġa.
Au ġoana ġaegaena da,
BADA ana au numa, boruborumana ana mae,
ma ana voepaepai. Au lawana au anatapuna.
- ⁵ Nuabola au marana
ina tereġaġariu.
Ana gabu au vivivireina, ina teregovaġiu.
Ma ola au tepana ina tereu
da ġavia eġa ina vodadaniu.
- ⁶ Ma au ġavia i garigari kwaipipiniu, ana tuvaidoedoei.
Da au tempol ana morelanau pulo ana apui BADA awarina.
Ana vinuaii ma welei ma arei ma ana voepaepai.
- ⁷ BADA ma rautaniġaneu maranai awarim a kwatukwatu,
ma raunu'apoapoleu ma ma paribeleu.
- ⁸ Au orau u riwa, u pa, "Ma nei da ma rauduneleu."
Tau a paribelem a pa, "BADA a nenei."
- ⁹ Eġa ma raugovaġeu,
eġa awariu ma ġaiawa.
Am taunola eġa ma inana geduaiei,
au anatapuna tam, au tauagu.
- Eġa ma netawaneu,
au God, tam au tauvilawana.
- ¹⁰ Avena da amau ma alou ita teretawaneu,
wate BADA ina paina-kauu.
- ¹¹ BADA, ma viararamaniu da am ġoana ana kauu.
Ma etanai au ġadaġadarana ma taravainiu aubaina au ġavia i maġa

- 12 Taui moruei ma parivairovorovoei e vunuvunuii.
Lamna aubaina, eġa ma teretawaneu awarii
- 13 A 'ramanei da BADA ana viaiaina ana inana,
weka lawalawai ai au dobu.
- 14 BADA ma vitumaġanei,
da ma virowapana ma tepam ina tora.
Anina BADA ma vitumaġanei!

34

BADA ma viborumei

- 1 BADA ana vimaēgaēgaeni marana patapatai,
ma ana viborumana-nonoeni.
- 2 Orau taputapune BADA ana voepaepai;
Vilamolamonai riwau ina nonori ma ina vinuai.
- 3 Ona nei ata BADA tana vimaēgaēgaeni
wavana tana voepae-gogonei.
- 4 A raupari BADA awarina ma i paribeleu,
awariu rovo anatapui i vaitawanei.
- 5 Aiavoi awarina e inainana,
taui naoi ina ravilalai
ma eġa melanai ina vitepa-ubaubai.
- 6 Au nota i kwa da a ġorei, ma i nonori
ma nuabola au orau i vaitawanei.
- 7 Ai ai da BADA e vivivirana-kauei,
ana anela taui e inana-vaitetei, ma e vivilawani.
- 8 Taumi ona raudadani ma ona aramanei da BADA i aii.
Taui BADA au ġouna maemae nuaiai ġaēgaena awari.
- 9 Taumi vivitumaġanami eġa aiwai ona voladaġei.
Lamna aubaina, BADA ona vivirei.
- 10 Lion ġauboi mara ġela am e irairage,
wate aiavoi da BADA awarina e vitumaġana eġa ina voladaġa.
- 11 Natunatu, ona nei, ona rautaniġana,
ma ana viararamanimi da BADA ona vivirei.
- 12 Taumi o ġoei da ami lawana ina aii
ma ina manawa bo?
- 13 Nanare, lamna menami ona paina-melei da eġa babani apoapoe bo moru
ona babaniei.
- 14 Ġoa apoapoe ona geduaiei ma kaua aiiai ona kaukauei,
ma ona voguratei da nuauba lawanana ona maeni.
- 15 BADA, matana ġoa aiiai ravai awari e tereterei,
ma taniġana e tonetonei mepa da agu e toutouei.
- 16 Wate tauna ġo'apoapoei ravai e mamae-puputei
taui ina irage ma rava nuanuai ina vuru.
- 17 Rava jijimanii agu aubaina e viviġore BADA awarina
tauna e rarautaniġana ma ai vita e vaivaitawanei.
- 18 Tauna rava peupeui, rovorovoi, ma vinuabolai e vivilawani,
tauna rava orana i peu kaua e vovoepai.
- 19 Rava jijimanii ai nuabola i maġa
wate BADA taui e vovoagui ai au nuabola.

20 E inainana-vaitetei da eġa gelamina tagogi ina wanagai.

21 Ġoa apoapoe ravai ai apoapoe ina vunumelei,
ma aiavo da ġoa aiaii ravai e gedugeduaiei, ina kovoġi.

22 BADA ana taunola e gagagaloei,
aiaii da e nenei BADA au ġouna, kovoġa ina vorei.

51

David ana rupena

Mara tagogi, Gulau David ana taunola Uriah awana Bathsheba i tavimatanei da maiteni i matave.

1 Oo God, ma raunu'apoapoeleu. Tam nuavaina maemae-nonoana amai.
Tam raraunuapoapoei amai
au ġo'apoapoe ma notatawanei.

2 Au rauaġaiġai ma oġai
ma au ġo'apoapoe ma oġa-tawanei.

3 Au rauaġaiġai a aramane
marana patapatai a notanotai.

4 Kaua apoapoei a kauai.

Tam ainelam awarim Ġoa apoapoei a kauai,
ma am viwavu lamna riwa kaua.
Amapo anina da ma kovoġiu.

5 Tau rauaġaiġai, melamelauei da marina
Au manawa da marina tau ġo'apoapoe taukauaina.

6 Wate tam u ġoei da riwa kaua au ora-dewadewau ina mae.
E viviararamani da nuaulaula orau ina oai.

7 Au ġo'apoapoei ma oġa-tawanei,
ma oġai da ana arapoira da gonu rovena arapoirana ana ġetawanei.

8 Ma riweu da au ġo'apoapoe u nota-tawanei
da ana vinuaiaii ma ana morelana
avena da gelamiu u viaiġaiġai, marina ana vinuaiaii.

9 Au go'apoapoe ma inana-tawanei
ma au apoapoe mirai ma boai.

10 Oo God nuanua ma ravivouni
da ana vipatutu kaua awarim.

11 Eġa au naom ma tawana-opuneu
ma awariu eġa Aruam Vivivireina ma vaitawanei.

12 Vilawana nuaiaina ma ravivouni me au naona nanare
aruau ma viaiaini da ana voteletelem.

13 Lamnei, ġo'apoapoei taukauei am kaua ana viararamani,
da ina mae-tavirei awarim.

14 Oo God, vi'raġena vitana awariu ma vaitawanei,
da am kaua jijimanii ana welei.

15 Oo Bada ipiriu ma votawanei da gamou ina vimaeġaeġaenim.

16 Au pulo, ġamoġamo ata apui awarim,
wate tam pulo apuapunna eġa uta vinuaiaiei.

17 Bada, pulo e ġoeġoei lamna vilamolamona.
BADA, eġa au vilamolamona ma au rupena ma geduaiei!

18 Am nuavaina Jerusalem ma viaiaini,

* 51:8: Au vinuabola lamna me gelamiu wanagaina

ma ana gari ma voa-melei.

- 19 Anina ma ai pulo nota aiainei ina vikarena-melei da ina kaukauei ma ma vinuaiaiei.
 Tauī pulo tapuna ma tapuna ina apui awarim.
 Bull maḡamaḡauī am au aniamapu ina apuapuī.

67

Vieḡualau wela

- 1 Oo God ma raunu'apoapoelelai ma ma viaiainiai,
 ma naom weka ma tereiai da ma voaḡuai!
 2 Da au dobu am kaua ina aramanei,
 da rava anatapui au dobu ina aramanei da tam ai tauvilawana.
 3 Rava ina voepaepaim Oo God,
 rava anatapui ina vimaēḡaeḡaenim.
 4 Rava anatapui au dobu ina vinuaiai ma ana morelanai ina wela,
 aubaina tam rava anatapui au dobu, kaua jijimaninei e vivibadei
 ma e paipaini.
 5 Rava ina voepaepaim Oo God.
 Rava anatapui ina voepaepaim.
 6 Anina ma doa maura ḡaeḡaena ina vereta
 ma God ina viaiaina-kaueta
 7 Riwa kaua, God ina viaiainita
 ma rava anatapui au dobu tauna ina vivirei.

90

God ana taunola Moses ana pari

- 1 Bada ai animae
 kimta wariāḡa da marina.
 2 Tam God maemae nonoana
 muriai da ola
 ma dobu uta kauēi.
 3 Tam rava e ririwei da e vipokau, ma e ririwei,
 "Rava ona wanaviraimi"
 4 Tam awarim madēḡa 1,000 lamna me aupom tagogi, i tupo kaua
 me raviravi, eḡa ita manawa dadana.
 5 Rava ai lawana e vaivaitawanana laḡilaḡinei me rauboni damona.
 Tauī me modu, ubaubanai e raraupairei,
 6 da e rarata ma e talatalai,
 wate aubigai e ḡiviḡivi.
 7 Nanare am meji tauai e laḡulaḡuriai ma
 maranai e ḡaiḡaiawa tauai a rovorovo kaua.
 8 Ai ḡo'apoapoe anatapui au naom u lavaei,
 ai ḡo'apoapoe govagovaḡana, wate anatapuna e inainanai.
 9 Am meji ai lawana i vitupoi,
 ma ai madēḡa laḡilaḡina e kwakwa, a lavutu-tawanana.
 10 Madēḡa 70 i vereta da tana mae,
 mepa da tana virewapana lamna 80;
 Wate wei lamna nuabola ava ina vereta,
 eḡa tana mae-pora ma tana nae.

- 11 Eġa aiai am ġaiawa malana ita vai-kauei.
Mepa da am ġaiawa ata aramana-kauei, lamna tauai ata vivirana-kauem.
- 12 Ma nanare, ma viararamaniai da ai lawana i tupo kaua,
ma lamna aubaina awarim nuaulaula ana vaia.
- 13 Oo BADA! Ma nememei awariai.
Ma mae-tavirem, ma vinuabolelai, tauai am taunola.
- 14 Ubaubanai marana patapatai am nuavaina maemaena ma verelai,
da ana morelanai ana logoiai ma ai au mara anatapuna ana vinuiai.
- 15 Madegħa biaġa u kovoġiai, nuaiai ma verelai
da madeġana biaġa a vinuapoapoe ina kovoġi.
- 16 Tauai am taunola, am nola vivirewapanana ma viatataielai.
Ma natunatuiai am boruma ma viatataiei.
- 17 Ma Bada ata God ana vianina ina viatataieta
ma ina kauei da aiwai anatapuna ta kaukauei anona ina tupua.
Nanare ai nola ma viuai.

91

God ata rawena

- 1 Aiai ravana e nena Aidamo Telarana awarina agu aubaina,
lamna Vivirewapanana Kaukauana au ririvana ina mae.
- 2 BADA au God awarina ana riwa ana pa, “Tam au anigagalo ma au tauviġavia.
Tam au God, a vivitumaġanem.”
- 3 Aubaina tauna, ġavia ana waro govagovaġai
ma numa rarauabubu awarinei ina gagaloemi.
- 4 Tauna papenenei ina tereġovaġimi ma papena au gabaurina ina gagaloemi;
ana vipatutu, am rawena ma am anigagalo.
5 Waguvara kauai vi’ni-rovorovoi eġa ona rovoei,
bo ġavia madeġai e viviġavia,
- 6 bo numa rarauabubu waguvara e viviġavia,
bo doria madeġai e viviraġena.
- 7 Avena da rava tausan au ririvam i peu,
bo ten tausan au oiem i peu;
wate tam ita vodadana-avem.
- 8 Matamiei ona inana ma ona inanai
ġo’apoapoe ravai ai kovoġa.
- 9 Aubaina BADA o vaia ami rawena; Ġetelarana ami taugagalo.
10 Eġa aiwai apoapoen a warimi ina tupua bo au numa ina ġeta.
- 11 God ana anela ina terei da ina painimi
ma ina gagaloemi ami au babara.
- 12 Taii uraiei ina voepaim
da aem eġa ġaima au tepana ma rauei.
- 13 Taumi lion ma mota ona vovaiubai,
lion ġaiġaiawai ma mota viviwaiawai ona tugwadagwadi.
- 14 God i riwa i pa, “Aiai nuanuau e vaivainonoei, ana vilawani;
ma ana gagaloei, aubaina i aramana-kauei.
- 15 Maranai i kwatu awariu, ana paribelei.
Tau kampa ai au nuabola,
ana taravaini ma ana voepaepai.
- 16 Ai lawana ana vimanaini,
ma au vilawana mamae-nonoana ana viatataiei.”

95

BADA tana welei

- 1 Ona nei! Tana wela BADA awarina.
 Ana nuaiaita tana wela God ata tauvilawana vivirewapana awarina.
- 2 Tana nei au naona ma tana viegualaei
 ma welei tana voepaepai.
- 3 Aubaina BADA lamna God virewapana kaukauna,
 ma god anatapui e inainana-ġairei.
- 4 Dobu anatapuna au urana,
 guba ġaeġaei doa au orana da ola ġaeġaei au tepai.
- 5 Boga tauna ġarinei, tauna i kauiei
 ma nanare tauna uranei dobu alalana i tere-kauiei.
- 6 Ona nei ma tana raudune ma tana vimaġaeġaeni,
 ae tututa tana tapeġarooi taukaueta BADA awarina.
- 7 Aubaina tauna ata God.
 Tauta natunatuna. Ana sipu ma e ġamoġamoita ana au wapu.

Mepa da ponana o nonori amadodo,

- 8*E riwei i pa "Eġa orami ona gudui me amamami au Meribah;
 me au mutulua au Massah.
- 9 Kampa amamami i 'nanai, kauababai a kauiei
 wate eġa ita vitumaġaneu, ma i raudadaniu.
- 10 Madeġa 40 wei kimtana awari amlou i ġaiġai ma a riwa,
 'Wei ravai orai i bagibagi ġaġa!
 Eġa ita rarautaniġaneu.'
- 11 Ana mejiu a parivainuaġani,
 'Gabu a vokaukauei ami lauvitau aubaina wate kampa eġa melanai
 ona rui.'

100

Voepaepa welana

- 1 Rava anatapumi au dobu ona logoimi BADA awarina!
- 2 Ana nuaiaimi BADA ona voepaepaei,
 ona nei au naona ma ona welei.
- 3 Ona aramanei da BADA anina God.
 Tauna i kaueta.
 Ma tauta tauna ġarinei. Tauta tauna natunatuna. God ana sipu ma
 e galoeta me sipu taupainina.
- 4 Ana welami ana au gari ona rui ma voepaepami
 ana au aniviboru ona rui,
 ma ona vimaġaeġaeni.
- 5 Aubaina BADA i aii;
 natunatuna e vivinuavaina-nonoei,
 ana vipatutu e mamae-nonoei, kimta au anatapui.

103

BADA ana nuavaina

David i girumi

- 1 Orau taputapunei BADA ana voepaepai.

- Wavana vivivireina ana voepaepai.
- ² Orau taputapunei BADA ana voepaepai,
kaua aiāi i kauē aubaiu eġa nuanuau ina vuru.
- ³ Au ġo'apoapoe anatapui e notanota-tawaneī,
ma doria awarineī e vivilawaniu.
- ⁴ Ata irage ma i sinaepaiu
ma nuavaineī ma raunuapoapoeleī e vivigulaeu.
- ⁵ Au lawana au anatapuna
purapura aiāi avai i verevereu, au vilaraga marana i raviravivouni me
*manubada.
- ⁶ BADA ana kaua anatapuna jijimanina.
- ⁷ Ana oga Moses i viatataiei,
ma māi Israel BADA ana kaua vivirewapanai i 'nanai.
- ⁸ BADA raraunuapoapoena ma ivina aiaina,
Eġa laġilaġina amlona ita voġaiġai. Ana nuavaina maemae-nonoana.
- ⁹ Eġa mara nonoa ina enita,
ma ana amloġaiġai eġa ita mamae-nonoa.
- ¹⁰ Anina da ita kovaġa-kaueta,
wate i raunu'apoapoeleta da kovoġa eġa ġaeġaena ita verevereta.
- ¹¹ Dobu weka ma mara nore au tepadewadewana.
Nanare, BADA ana nuavainā i rata guratana tauī da BADA e vivivirei
awarii.
- ¹² Mepa madeġa e gogogolana da mepa e ġaiġairalana, lamna uama,
ma nanare ata ġo'apoapoe vinimalana e vaivaitawana-naiei aueia.
- ¹³ Me ama natunatuna e rarau-nuapoapoeleī,
nanare BADA natunatuna e rarau-nuapoapoeleī.
- ¹⁴ Aubaina i aramaneī da tauta pokaueī i kaueta.
- ¹⁵ Ata mara au dobu lamna me modu.
Ta gogogo ma ta rarata me berana modueī;
- ¹⁶ Anina ma ive i uvena-kapupueī,
eġa ita mamae, ana gabu i kwakwava.
- ¹⁷ Tauī da BADA e voepaepai ana nuavaina maemae-nonoana
awarii ma nanare noinoī ma ai epaepaia awarii
- ¹⁸ tauī aiavoī da ana parivainuaġana bagibagina e vovojijini
ma ana patupatatui tarawatu e vovojijini.
- ¹⁹ BADA ana vigulau anikialana au mara i terei,
ma kampa ana vigulau e vivibadeī.
- ²⁰ BADA ana anela, vivirewapanami,
BADA riwana o rarautaniġaneī ma o kaukaueī,
BADA ona voepaepai.
- ²¹ Anina BADA ana anela mareī,
BADA ona voepaepai taumi ana taunola ma ana ġoana anatapuna
o kaukaueī.
- ²² Taumi anatapumi BADA uraneī i kauē, ana au vigulau maemaeī, BADA
ona voepaepai.
Tau nanare orau taputapunei BADA ana voepaepai.

* **103:5:** Manubada tawarana waduboi e peupeu ma voui e gogogo. Me manubada tawarana voui e gogogo nanare tam au lawana e raviravivouni.

110*Gulauna vinevinena*

David ana wela

¹✧BADA au bada wenanare i riwei,

“Au oieua ma kiala

da am g̃avia

au ae karem ana terei da ma tuvaidoedoei.”

²BADA, am gabemani vivirewapanana Zion * ana parata ina viratai,

da am g̃avia ma vibadei.

³Am laraga ana nuaii ina verena-melei da ina visorodia,

ma ona g̃ae BADA ana ola au tepana viḡavia aubaina,

ma ami rewapana ina ravivouni ubaubanai patapatana me ubaubanai turu-
vanina.

⁴BADA i parivainuaḡanim ma eḡa nuanuana ina virai;

“Tam pirisi maemae nonoana me Melkisedek.”

⁵BADA au oiem e maimairi da e paipainim;

tauna gulagulau ina piaḡi maranai amlona ina ḡaiḡai.

⁶Dobu nununai ai ḡoa apoapoe ina kovoḡi,

ma taubeu dobuna ina vioai

ma dobu gulagulau anapui kolai ina viaigwadagwadai.

⁷Wate au etanai au vuvura ina uma

ma rewapana ina verei ma ina vovaiuba.

119*BADA ana tarawatu boruborumana*

⁹Rava vouna menanare lawana aiaina ina maeni?

Tauna riwamei ina paina-melei.

¹⁰Lamna aubaina a baibaieum orau taputupunei;

eḡa ma votereu da riwam ana geduaiei.

¹¹Riwam a iaiavi ma au nuanuau a tereterei,

da eḡa ḡo'apoapoei awarim ana kauai.

¹²BADA, a voepaepaim!

Am tarawatu ma viaramaniu.

¹³Ipiriuei ana bababani ma

am tarawatu anapui u verevereiu ana jime.

¹⁴Am tarawatu votelatelana a vinuaiainana-kauai,

eḡa me vipurapura bo vimane.

¹⁵Riwam ana iavi

ma ana vinuanotenotei.

¹⁶Am tarawatu a vinuaiaina-kauai,

eḡa riwam ana voteretawanei.

139*Bada anapuna i aramanei.*

David ana wela

¹BADA orau u inanai ma au kaua anapui u aramanei.

²U aramanei mara aiwai a kiala ma a vomairi.

Avena au uama wate au nota e araramanei.

³E inainanai maranai a babara bo au numa a vivilauvitau.

Anapuna a kaukauai e araramanei.

✧ **110:1:** Mrk 12:36; Act 2:34-35 * **110:2:** Jerusalem wavana ḡelauna.

- 4 Muriwai da ata babani tam e araramanei aiwai ana latoni.
 5 Tam e garigari-kwaipipiniu,
 ma uram virewapananei e paipainiu.
 6 Lamna riwa kauana, awariu i aii kaua
 ma i ġe-dewadewa da kolau i kwauna-kauei.
 7 Mepa ana nae da Aruam ana raugovaġei?
 Mepa ana ruba da ana raugovaġem?
 8 Ata ġae au mara da tam kampa;
 mepa da i 'rairagei ai au dobu ata rauviraiu, tam kampa.
 9 Mepa da ana lave nae au maramatanei,
 bo mepa madeġa e neneulai,
 10 avena kampa ma uram ina raveniu,
 ma am rewapana ina painiu.
 11 Mepa da ana riwa, "Gimtona ina tereġovaġiu
 ma lalalaina ina gimtona."
 12 Wate avena da gimtonana amapo eġa ana raugovaġem.
 Tam awarim gimtona ina rarana me marai, aubaina tam awarim gim-
 tona ma lalalaina lamna tagogina.
 13 Tam tupuau anatapuna u voai da alou au manawana u teretagogieu.
 14 A viviegualauem aubaina tam am nuavaini ma am borumei u voa-kaueul
 Am rauġaroġaro i aii,
 A voepaepaim aubaina a aramana-kauei.
 15 Tam u vivineneganeu maranai a tuputupua au govagovaġana, alou au man-
 awana,
 tam ainelam anatapuna u aramanei.
 16 Tam u inanaiu muriwai da a tupua.
 Aupom biaga u vereu da ana mae
 lamna au buka u girumi,
 muriwai da aupom naona i ġotai.
 17 God! I piripiri guratana da am nota ana aramanei.
 Am nota kolau i kwauni, eġa aiwai ġelaunei am kaua ana aramanei.
 18 I maġa guratana eġa me bubu, iavana ana kauana-avei,
 avena da ata iava-pai, tau amapo da tam ana vivinuanainem.
 19 Oo God! A ġoei da ġo'apoapoei ravai uta viraġeni.
 Tauviraġena uta viaġaġei da eġa ina nei awariu.
 20 Aubaina e vivijiboġim,
 ma wavam eġa ita vivivirei.
 21 BADA, rava e gedugeduaiem, tau ravai a gedugeduaiei.
 Tau i eġa ita voteletelem lamna aubaina tau i au ġavia.
 22 Tau i a geduaiana-kauei,
 anina tau i au ġavia.
 23 Ma tuvirevireu, ma orau ma inana-pai.
 Ma raudadaniu da nuanuau ma aramanei.
 24 Mepa da ġoa apoapoe au orau, ma viatataieu,
 ma ma raveniu etanai e nenaie au lawana maemaie-nonoana awarina.

Proverbs Nuaulaula Riwai

Pariverena

Wei au bukana awanaina maḡamaḡau, ma God ana rava e viviararamani da ina mae-kaua. Gulau Solomon maḡamaḡau i girumi ma rava ḡelau ruaḡa ota i girumi. Orotu e ḡoreḡorei Agur ḡelau i girumi ma gulau Lemuel ḡelau i girumi.

Viararamana ḡaeḡaena tagogi wei au girumana lamna nuaulaula anatapui pulo Godei. Rava nuanuaulaulana au naona God ina vivirei.

Mara au anatapuna ata au animae wei nuaulaulauna e vovoaguita, au melagai, au gabemani ma au nola.

Ma maiteni wei girumana e viviararamani da lawana aiaina tata maeni, ma kaua aiaini tata kaukauei. Ma avena tata gogulagulau ma tata nola guratana ma ivita ita ai molamolakai awari.

Vinuaterena etana

⁷ BADA vivirana, lamna aramana karena,
Wate opaopai, nuaulaula ma aramana e gedugeduaiei.

⁸ Natu, amam ma alom ai vinuaterena anatapui ma voteletelei.

⁹ Ai vinuaterena lamna me kunuteia au kolam,
bo gadogado au uam
da inanam ina ai.

5

Wavine matana maḡamaḡauna ma vorei

⁸ Wavine matana maḡamaḡauna ma ruba-tawane!
Eḡa ma nae dadana ana au metaeta!

⁹ Mepa da nanare lamna rava eḡa ina vivivirem.
Tam am vilaraga ma am lawana aiaina ma vitupoi.

²¹ BADA rava ai kaua anatapui e inainanai,
Metauna etanaina e vaivaia, tauna kampa da e inana-vaitetem.

²² Taniḡapota ravana ana ḡo'apoapoelei ina waro-melei.
Ana ḡo'apoapoe tauna ina tupajijini.

²³ Tauna opaopana ma eḡa ita paina-melei,
Ana kaua opaopai aubai i raḡe.

6

Amam ma alom ai vinuaterenana

²⁰ Natu, amam ma alom ai vinuaterena anatapui ma voteletelei.

²¹ Ma vojijina-kauei au nuanuam; marana patapatai au uam ma gadoi.

²² Maranai e bababara, ai vinuaterena am etanai ina rauḡadaḡadari.
Maranai e matamatave, ai vinuaterena ina matave-painim.

Maranai u vomairi, ai vinuaterena awarim ina babani.

²³ Aubaina wei tarawatui lamna rampa.
Wei viararamana lamna ravilala, etanaina e lalalai.

Nuaterena bagibagina lamna lawana aiaina etanaina.

- 24 Tau i ina aguim da wavine matai maḡamaḡau ma vorei,
ma wavine tavitavinena ana gwalameru.
25 Eḡa wavinena inana aiaina ma erawei.
Eḡa! Ma voterei da matanei oram ina taini da ina waroim.

8

BADA nuaulaula i terei

Nuaulaula e ririwa,

- 22 “Au karena, BADA tau i tereu.
Muriai da aiwai ḡelau i kauēi.
23 Tau kampa au kare oina,
muriāi da dobu.
24 Tau a tupua muriāi da BADA gabinou i kauēi,
muriāi da waira vuvura i kwakwa-ḡetai.
25 Tau a tupua muriāi da ola,
muriāi da ola muomuoi ai au gabu i terei, tau kampa.
26 Muriāi da dobu bo wapu
bo doa pokauna.
27 Tau kampa maranai mara ana au gabu i terei,
maranai parata i taini da mara au tepana ma boga au gabaura.
28 Maranai apau i terei au mara
ma vuvura doa au orana i votawanei.
29 Tau kampa, ma boga ana parata i terei
ma i egari da nai paratana eḡa ina raḡoni.
Tau kampa, maranai dobu oḡona i tonana-naiei.
30 Nai marana tau BADA au ririvana a mamae me tauvioga,
marana patapatāi a vinuāiaini ma tau a vinuāiai.
31 A vinuāiai kaua maranai dobu i kaukaueia a inanai,
a vinuāiai kaua maranai rava a inanai.”

9

Nuaulaula ma opa

- 1 Nuaulaula ana numa i voai
tuatua ḡaeḡae 7 i tai ana numa aubaina.
2 Torela ḡaeḡaena i apui,
sia i api ma wain aiāi i wāḡi ma kepakepa i vokaukauei,
3 ma ana taunola ḡelau i paritawanei,
au deba da i viḡoreḡore,
4 i riwa i pa, “Taumi eḡa notanota kauami ona nei!”
Ma opaopai i riwei,
5 “Ona nei au lam ona ani
ma wine a viravirai ona umai.
6 Ami lawana opaopai ona voterei
ma ona lawana,
ma aramana lawanana ona maeni.”

13

- 1 Tevera nuaulaulana Amana ana vinuaterena e nonori,

wate tevera maeḡaeḡaena vinuaterena e gedugeduaiei.

⁴ Mata-galagalawana purapura e raurauoḡarei eḡa ina vaia,
wate egoegolana ana ḡoana aiwai anapui ina vaia.

²⁴ Aiai natuna ora-potapotana eḡa ita kwapukwapui, lamna natuna nuanuana
eḡa ita vaivaia.
Wate aiai da natuna nuanuana e vaivaia lamna ina viararamani.

17

²¹ Ama tevera opaopana i vinatunei lamna nuabola ava e vivitupui,
laragana amana awarina eḡa nuaiai.

20

⁴ Rava mata galagalawana e paepaewa labalababa, eḡa iri ita votaḡotaḡoi;
tuaruta ana mara e baibaia ma eḡa aiwai.

22

⁶ Natunatumi lawana aiaina ona viararamani, da maranai i vorata,
nai lawanana eḡa ina voterei.

23

¹³ Natum e viviorapota eḡa ma inana-tawanei,
boreborelei u kwapui Amapo eḡa ma viragei.

¹⁴ U raukwapui
lamna irage awarinei u gagaloei.

24

³⁰ Rava mata-galagalawana ana wapu adanei a nae,
ravana opaopana ana grape wapuna au ririvana.

³¹ A inanai da modu i gogo-nae,
ma donadona wapuna i vioai.
Ma ana gari, i wanarikarikai.

³² Lamna a inanai ma a vinua-notanotei.
A tuvirevirei ma wei i viararamaniu.

³³ Matam ma potai, ma rauviraim.
Wapu nolana avena, uram au nuanuam ma terei ma ma matave.

³⁴ Ma gomara ina ravim me taudanene;
anapuna ina pupuni.

26

- 13 Rava mata-galagalawana e ririwa, “Ĝamoĝamo ĝaiĝaiawana au doa!
Ĝamoĝamo ĝaiĝaiawana au etanai!”
- 15 Mata-galagalawana lam au urana e vaivaiaia
wate eĝa ina voepai au gamona.

29

- 3 Aiai ravana nuaulaula i ĝoana-guratei, nuaiiai ĝaeĝaena amana e vereveri.
Wate aiai da etanai waivinei maiteni e nenaē lamna ana mane ma ana
purapura anatapuna e vikalokaloei.
- 15 Kwapu ma nuaterena riwai, natum nuaulaula e vereveri.
Wate tevera eĝa viararamanana, alona e vivitepaubaubai.
- 17 Natunatumi ona vinuaterenei, da mara nonoa awarim nuauba;
ma oram ina vinuaiaini.

31*Wavine aiaii kaukauana*

- 10 Mepa nanare wavine aiaina ma egoegolana uta nelaĝai?
Wavinena i vinualaulauna kaua eĝa me ĝaima lebalebarina maiana
ĝaeĝaena.
- 11 Orotō awana i vitumaĝanei,
ma eĝa aiwai ina voladaĝei.
- 12 Wavine, kaua aiaii ma eĝa kaua apoapoe ita neneiai awana awarina
ana lawana au anatapuna.
- 13 Wavine sipu aparana ma waiape i vaia
ma i vinuaiiai da ina rauĝaroĝaro.
- 19 Wavine sipu aparana ma waiape ina metani
ma gara ina ĝauĝauri.
- 20 Ana numa ma orana i votawanei
molamolakai ma vovoladaĝai awarii.
- 30 Erawa lamna kaua morumoruna
ma inanana aiaina ina amoā;
wate wavine BADA e vivivirei, rava tauna ina voepaepai.
31 Wavinena ina voepaepai aubaina i kauana-kauei.
Rava anatapui, wei wavinena ona voepaepai.

Ecclesiastes Tauviararamana

Pariverena

Aiai da wei bukana i giruma lamna eġa wavana tata aramanei. Wate rava ġelau i ririwa da gulau Solomon i girumi. Ma aiai i girumi lamna anina da rava araramanina. E ririwa da wavana lamna *tauviararamana*. Aubaina pura-pura vopiripirii e bababaniei. Rava maġamaġau God eġa ita aramanei aubaina da i goei da ina baiei da aiwai e tuputupua. Wate anona eġa ita nenelaġai. Tauviararamana wei ravai ai nota e ririweta. Mara ġelauna rava aiwai i kaukaui lamna eġa anoi Ma e ririweta da wei kauai lamna me ive tata viaġaġei. Rava i nelaġai da lawana wei au dobuna lamna anona eġa aiwai.

Tauviararamana ana giu

¹ Wei lamna tauviararamana, David natuna, mai Israel ai gulau ana viararamana;

² Tauviararamana i riwa, “Anona eġa!
Anatapuna kwakwavina!”

³ Ma nolanola da ma magura ma anona aiwai?

⁴ Kimta e nenei ma e nena,
wate dobu maemaena e mamae.

⁵ Madeġa e gogogo ma e arearerere,
ma e wanawanavirai da ina vikarena-melei.

⁶ Kariwabu e ġotaġota,
rauanaġa e opuopu,

e kwavikwaviviro
ma e wanawanavirai da ina vikarena-melei.

⁷ Waira anatapui au boga e opuopu,
wate boga eġa ita oaoai.

Waira matanei,
e ġaiġairai ma e nena me au matana.

⁸ Kaua anatapuna i vi'nigarigari,
menanare tana riwa nei?

Matata eġa melanai ina inana iaua;
Tanigata eġa melanai ina nonora iaua.

⁹ Aiwai wariġa i tupua ina tupua me,
aiwai wariġa i kauai ina kauana-melei.
Eġa aiwai, kaua vouna wei au dobuna!

¹⁰ E ririwa, “Ona inana! Wei kaua vouna.”
Wate eġa! Wei kaua maemaena;
wariġana, muriai da ta tupua.

¹¹ Kaua wariġa i tuputupua, eġa aiai ita notanotai.
Ma kaua marina da muriai e tuputupua, eġa aiai ina notai.

Nuaulaula anona eġa

¹² Tau lamna tauviararamana ma Israel ai gulau au Jerusalem. ¹³ Orau a terei da aiwai anatapuna au dobu e tuputupua, nuaulaulei ana girumi. Ma a aramanei da God vita ġaeġaena rava i verei. ¹⁴ Aiwai e tuputupua au dobu a vinua-notenotei ma a inana da;

anatapui anona eġa, kwakwavina. Ive ava ta viviaġaġei.

¹⁵ Aiwai barabarai amapo eġa ma vojijimana-melei,

aiwai awarim eġa, lamna menanare ma iavaneī.

¹⁶ Au orau a riwa, “Tau a nuaulaula guratana, eġa me aiāi ġelauna au Jerusalem i vivigulau nanare.

A ’ramaneī nuaulaula aiwai ma aramana aiwai. ¹⁷ A ġoeī da ata aramana-kaueī nuaulaula aiwai ma bua ma opa aiwai. Wate a aramaneī da wei lamna me ive a vīviāġaġeī.

¹⁸ Aubaina au nualaula e rarata, mae-boaboa e rarata au aramana e rarata, au nuabola e rarata.”

2

Vīnuaiāiana-melana lamna anona eġa.

¹ A vīnotanota a pa, “Abeka nuaiāi ana baieī, ana raudadani, da i aīi bo eġa.” Wate a nelaġai da wei lamna kwakwāvīna. ² Lamna aubaina a riwa da kaka labalababa ma erawa lamna bua. Ma erawana aiwai aiāina e vereverem? ³ Nuaulaula a ġoana-gurateī, ma a ġoeī da wine ata umāi da orau ita telatela ma kaua opaopai ata kaueī, da ata aramaneī metauna i aīi rava au dobu awari, maranāi mara tupona ava au dobu e mamea.

⁴ Kaua ġaeġaeī a vikareī, au numa ġaeġaeī a voa-naieī ma grape wapui a paewī. ⁵ Wapu da peipeī a kaueī ma ai uauai tapuna ma tapuna a paewī. ⁶ Dogo a ġarai da garewa ma wapaketa i vojijini, lamneī wei wapui a vīvituvaneī. ⁷ Awariu taunola au numa tuputupuai, ma taunola maġamaġauī nelarai ma waivineī a ġimarai. Au bulumakau ma sipu i maġa guratana eġa me aiāi ġelauna au naona au Jerusalem nanare. ⁸ Awariu gold ma silver gaegaena ma nanare dobuġela gulauī ai vīa. Tauwela nelarai ma waivineī a vīmaieī ma guguīni inanai aiāi a vīvaneīai au numa, au anī vieraerawa. Aiwai a ġoeġoeī ana tapuna awariu. ⁹ Tau a maura ma a vīpurapura kaua eġa me aiāi ġelauna au Jerusalem nanare. Ma wei anatapuna au orana au nuaulaula i mae-kaua.

¹⁰ Aiwai a inanai ma a rauoġareī a vaia, anatapuna a notai da ita vīnuaiāiniu.

Au nola anatapui a kauana-kaueī, ma nuaiāina lamna au nola maiana.

¹¹ Anina ma aiwai anatapuna a voavoai ma a polepoleī, a vīnuā-notenoteī ma a aramaneī da wei anatapui lamna anona eġa,

lamna me ive ata vīviāġaġeī wei au doḅuna amapo eġa aiwai tana vaia.

Nualaula i aīi eġa me bua

¹² Nuaulaula, bua ma opa anoi a vīnuā-notenoteī. Gulau ana raviepaia, aiwai ġelauna ina kaueī?

¹³ Ma aramaneī da nuaulaula i aīi kaua eġa me opa, ma lalalaina i aīi kaua eġa me ġimtona.

¹⁴ Rava nuaulaulana matana au kolana e mamea wate opaopana waguwaguwareina e bababara. Ma aramaneī da ravai ruaġai ai damona tagogī.

¹⁵ A vīnuā-notanota a pa, “Tau ma opaopana ai damona tagogina. Au nuaulaula aiwai ġelauna ina vereu?”

Au nota a pa, “Wei maiteni anona eġa.”

¹⁶ Rava nuānuāulaulai lamna me rava opaopai amapo nai ravaii nuānuata ina vuru.

Kapore! Rava nuānuāulauna ma rava opaopana e irairaġe.

17 Tau lawana a geduaiei, au dobu aiwai anatapuna ta kaukauei iniviara ava e verevereta. Anatapuna kwakwavina, me ive taviviaġaġei.

Bagibagi ġaēġaena eġa anona

18 Anatapuna au dobu a polepolei a geduaiei, aubaina nai ana voterei, da rava au muriu e nenei aubaii. 19 Ma ai ai i aramanei da tauna rava nuaulaulauna bo rava opaopana? Wate tauna aiwai a polepolei ma au aramanei a vitupui ina vaia. Wei anona eġa. 20 Au bagibagi anatapuna wei au dobuna a notai ma orau i peu. 21 Aubaina rava ana nuaulaulei ma ana aramanei i nola kaua, da i maura ma anatapunana ina voterei da rava gelauna, eġa taunoleina ina vaia. 22 Marana patapatai nola ma nuabola inina e viviarei au dobu ma aiwai ina vitupui? 23 Tauna ana nola da iniviara ma nuabola; waguvarai maiteni eġa ita matamatave. Wei maiteni eġa anona.

24 I aii da rava ita am ma ita uma ma ana nola ita vinuuaiei, ma a inanai da vinuuaiai lamna God uranei. 25 Aubaina God eġa. Lamna eġa am ma eġa nuaiai. 26 Ai ai God e vivinuuaiai, God tauna nuaulaula, aramana ma nuaiai, e vereveri. Wate ġoa apoapoe ravana ana nola i verei da mane ma maura ġaēġaena ina vitupui, Wate God nai maurana ina vaivaitawanei ma ai ai e vivinuuaiai ina verei. Goa apoapoe taukauei ai nola lamna kwakwavina, me ive i taviviaġaġei!

3

Aiwei anatapui ai au mara e tuputupua

1 Mara ma iri i terei da aiwai anatapui au dobu ai au mara e tuputupua.

2 Vinatuna ana mara ma iraġe ana mara paewa ana mara ma tuaruta ana mara.

3 Viraġena ana mara ma vilawana ana mara, amrika ana mara ma voa ana mara.

4 Tou ana mara ma kaka ana mara, mogu ana mara ma ara ana mara.

5 Ġaima viorerena ana mara ma tama melanana ana mara, taragwaba ana mara ma eġa taragwaba ana mara.

6 Baia ana mara, ma baia voterena ana mara, ma purapura vojjinana ana mara ma purapura vineboana ana mara.

7 Sika ana mara ma popo ana mara, genuana ana mara ma babani ana mara.

8 Nuavaina ana mara ma ġoaġai ana mara viġaiġaiawa ana mara ma nuauba ana mara.

4

9 Rava ruaġa i aii eġa me rava tagogi, aubaina tau i ina viagu vivira ma maura ina nelaġai.

10 Mepa da tagogi ina peu, turana e mamae da ina voepai. Wate tam ainelam ma u peu lamna i apoapoe kaua, aubaina kampa eġa ai ai da ina voaguim.

11 Ma nanare mepa da rava ruaġa i matave tagogi, tau i eġa inii ina ubauba. Rava tagogi menanare ainela ina vibolabola-melei?

12 Am ġavia, ainelam ina viġaviem ma ina vovaiubaim, wate maranai taumi ruaġami e viviġaviem amapo ona vobelei.

Ma rava tonuġa i virewapana kaua me ġurava barawa tonuġei
metametanana.
Wei ġuravana viaituinana ma kauana-avei.

5

- 10 Aiavoi mane nuanuai e vaivaia eġa melanai nuanuai ina rauei;
aiavoi e goeġoei da ina vipurapura;
taui eġa melanai ai rauoġara anapuna ina vaia.
A inanai da wei anona eġa.
- 11 Maranai am maura e rarata,
lamna maranai patara e ġeġetai da e amam vereverem.
Wate wei maurana aiwai aiaina e vereverem?
Eġa aiwai, anina e viatataim da tam maumauram, wate rava ġelauna am
maura ina tawane i aubaim.
- 12 Taunola e amam kaua bo eġa,
wate e matamatave kaua.
Mane ravana eġa nanare, tauna ana maura e notanota-maratomei.
- 13 Au dobu kaua apoapoe kaukauana a inanai;
Mane ma purapura ravana ana maura au anara e teretere i muriai
aubaina. Wate wei lamnei, ana nuabola ġaeġaena i tuarui.
- 14 Ana mane ma ana maura i kauana
labalababai ma anapuna i vine-boai.
Natuna eġa ana buderi ita terei.
- 15 *Menanarena dobuna ta ruinei
nanarena tana nae me, kovakovata ma ana ura kwakwavita.
Amapo eġa ata purapura, ta vopolepolei tana vinimavoiei.

7

- 15 Au lawana kwakwavina au orana kaua ruaġa a inanai;
Rava aiaina BADA ana nola e kaukauei i'raġe laġilaġina
ma ġo'apoapoe taukaueina God ana tarawatu e viviaigai wate ana
lawana i manawa.
- 16 Lamna aubaina eġa ma viġoa aiaina guratana bo ma vinuaulaula guratana,
mepa da ma viragena-melem.
- 17 Wate nanare, eġa ma vitaniġapota guratana
ma eġa ma opa;
eġa ita ai da ma iragē muriai da am mara.
- 18 I aii mepa da wei riwai bagibagina ma nonori
Aiai God e vivivirei lamna ina paina-melei
da wei kauai ruaġai eġa ina kauei.
- 19 Rava nualaulaunana tagogi rewapana ġaeġaena ina verei
eġa me gulagulai 10 au taon.
- 20 Riwa kaua! Weka au dobu eġa aiai tagogi kaua aiiai ava taukaueina.
Ma eġa ġo'apoapoe ita kaukauei.

8

16 A gōei da nuanuau ita ulaula lamna aubaina rava ai mae au dobu a inanai, ma lamnei a aramanei da marai ma waguvarai ega matave kaua. 17 God aiwai i kaukauei ega ata aramana dadanei. Ma voguratei da ma nelaḡai, wate amapo ega ma aramanei. Nuaulaulai e ririwa da i aramanei, wate eḡateni dadana.

11

Ami au vilaraga ona vinuai

9 Laralaraga, ami vilaraga ona vinuaiiei.

Nuanuami ina morelana ami au vilaraga.

Orami ma matami ana rauoḡara ona kauei.

Wate ona aramanei da aiwai o kaukauei

God ina etaremi, anatapuna aubaina.

10 Lamna aubaina nuabola au murimi ona terei ma tupuami ona paina-melei, aubaina amapo ega ona vilaraga nonoa.

12

1 Ami au vilaraga, taukauemi ega nuanuami ina vuru, muriai da nuabola ona nelaḡai; maranai magura i tuḡereḡerei, ma ona riwa, "Lawana marina ega ita ail"

2 Lamna maranai madeḡa, nawaravi ma ubona ina ḡuvai, ma apau ina nememei da mara ina ḡuva-nonoei.

3 Anina ma nimami, taugagaloemi ina sisi aemi marina vivirewapanana ina vokokokara. Ivomi ina viruaḡa da ami lam ega ona uta gwadagwadai, matami ina vinawanawa da ega ona inana kaua.

4 Taniḡami ina pota da gugura au etanai ega ona nonori, kiu ina logologoi ina ravidagudaguimi wate ai wela anatapui ina amoa.

5 Taukauemi ona vinuanotenotei: Maranai aidamo ona gagatei ma babara ona rovoei, maranai kora ina tonaimi me rei talana, ma tam ma gwaḡa-nae me kapau e gwaḡagwaḡa-nae iraḡe aubaina. Erawa ma morelana anatapui ina kwa. Tauta kokoḡa ta tuḡereḡerei ma tou ina vikarei au doa.

6 Taukauemi ona vinuanotei, muriai da lavutu ḡuravana ina wanautuini, bo nau goldei ina wanawamai ma reduḡoru ina wanakabakabari.

7 Ma tupuami ina naeme au doa ma aruami ina naeme God, tauverena awarina.

8 Tauviararamana i riwa, "Anona ega! Anona ega! Anatapuna anona ega."

Damona, God ma vivirei ma riwana ma voteletelei

9 Tauviararamana nuanuana i ulaula kaua, ma aiwai i aramanei rava i viararamani. Riwa nuaulaulai maḡamaḡai i 'avi ma i girumei ma i rereḡa-kauei. 10 Tauna riwa vinuaubana i baiei ma aiwai i girumi lamna jijimanina ma ririwa-kauana.

11 Tauviararamana riwai lamna me kwapu ma riwa nuaulaulai i gam me tutu, nuanuam ita tonatonai. Wei anatapuna BADA i vereta. 12 Anina natu,

ma aramanei da kaua gēloui ma inana-kauei. Buka girumai eḡa ina kwa ma giruma ḡiriḡiri i vinigarigari.

¹³ Wei anapui au murina.

Riwa tagogiava ma aramanei:

God ma vivirei ma ponana ma voteletelei.

Wei lamna aubaina rava i vitupui.

¹⁴ God ata kua anapui govagovaḡai, aiaii bo apoapoe, ina kovogi.

Peroveta Isaiah ana buka

Pariverena

Wei bukana lamna peroveta gāe gāena au Jerusalem i mae tana riwa 750 BC. nanarena, wavana Isaiah. Bukana iavana tonuḡa:

Kapita 1-39 e ririweta da mai Assyria ai gulau ma ai sorodia vivirewapanai dam ḡelau Israel ma Judah au ririvai i vipupuni. Gulagulau Israel ma Judah i vibadei.

Kapita 40-55 lamna mai Babylon ai gulau mai Judah i vipupui ma i pupuna-naiei da au Babylon. Perovetana i vinuubai ma i riwei da God ina naiana-melei ma lawana vouna ina verei.

Kapita 56-66 lamna mai Judah i nememei au Jerusalem. Ma perovetana God ana ogatara Jerusalem ravai aubai e bababaniei.

2

BADA ana ola

¹ God ana pariverena, Judah ma Jerusalem aubai wenanare, Isaiah - Amoz natuna i verei.

² Mara au murina,
ola mepa tempol marina e maimairi, ina mae-nonoa.
Ina ḡetelara kaua eḡa, me ola ḡelau.
Dam nununai patarai ina taini kampa da ina voepaepa.

³ Dam patarai ina nei ma ina riwa,
“Ona nei, tana gāe BADA ana au ola,
Jacob ana God ana au numa.

Weka ana kaua ina viararamanita
da au ivina tana babara.
Aubaina BADA Riwana au Zion da ina opu,
BADA ana tarawatu Jerusalem i ina opu.

⁴ Tauna dam gāe gāe ai viḡaiḡaiawa ina rauetarei,
ma ina kovoḡa.
Ai sod ina guda-virai da ipa uata,
ma ai pawasi ina guda-virai da naipi ai raḡaraḡai kosii aubai.
Dam damai eḡa ina viḡaiḡaiawa vivira me,
bo ina vokaukaua, ḡavia aubaina.

⁵ Ona nei Israel natunatu, BADA ana au ravilala au ivina tana babara.”

5

BADA ana grape wapuna welana.

¹ ✧ Ona rautaniḡana ma au nuavainana ana wela ana ravi.
Au nuavainana ana grape wapuna i paewi,
doa au maumaurana, ola au barana.

² I auni ma ḡaima i viopuni ma i gari
ma grape ḡoroḡorovai aiiai, avavai, i paewi.
Violaḡa numana i voai

✧ 5:1: Mrk 12:1

ma nanare wine anigudana i bori au kira.
Anina ma i vipaipai da grape uena aiaii ita verei,
Wate grape anataipui i viġora.

³ Marina taumi Mai Jerusalem ma Mai Judah,

Tau ma au grape wapuna ona babiniei!

⁴ Aiwai ġelauna eġa ata kauei au wapu?
Anatapuna a kauana-paiei!

A notai da grape uena aiaii ita vereu wate viviġorai i vereu.

⁵ Marina ana riwem,

wenanare ana kauei au wapu awarina.

Garina ana viairikarikai da gamoġamo ina rui
Ma wapuna ina ġara-viravirai.

⁶ Ana voterei da modu ura gogoi ina vinelana
ma eġa aiai grape ina taraġadaġadari
bo modu ina tuparaguragui.

Modu ma donadona, wapuna ina puru-pai.
Apau ana egari da eġa kampa garewa ina atuna.

⁷ BADA Vivirewapana Kaukauana

ana grape wapuna lamna, Israel

ma grape ġoroġorovana ae tuġuna e rerereġi
lamna ana dam mai Judah,

I notanotai da lawana aiaina ita maeni
wate i 'nanai da tara i vitoini;

kaua jijimanina ita nelaġai
wate viġaiġaiawa gararai i nonori.

6

BADA Isaiah i ġorei da ina viperoveta.

¹ Madeġana gulau Uziah i 'raġe, tau Bada a inanai. Tauna ana au anikiala, au aidamo telarana i kiakiala ma ana gara adana tempol i vioai. ² Au ririvana lamna Seraph ruāġa. Tagotagogi ava papei six; papena ruāġei naoi i purui, ruāġei aei i purui ma ruāġei, i lavelave. ³ Ma tauiva i viġoreġore vivira; "Vivivirem, vivivirem, vivivirem tam BADA, Vivirewapanana; Dobu anatapuna am boruma i oai."

⁴ Ponai gugurana tempol tuatuana i gui ma bau tempol i vioai.

⁵ Ma a riwa, "Aio! A kauana-boai! Babani apoapoei gamou i vimiramirai, ma rava gamoi miramirai au poui a mamae, wate matauei gulau, Bada vivirewapana kaukauana a inanai."

⁶ Ma seraph tagogi incense aniapuna au tepana ai moniana i kavini ma i lavenei awariu. ⁷ Ma ai monianeġi gamou i vodadani ma i riwa, "Ma inanai, wei ipirim i vodadani; am apoapoe vinimalana i notawanei ma am ġo'apoapoe i notatawanei."

⁸ Anina ma BADA ponana a nonori i riwa i pa, "Aiai ana paritawanei? Aiai aubaita ina nae?"

Ma a riwa a pa, "Tau weka. Ma paritawaneu!"

7

Imanuel ana mataira.

¹⁰ Muriai, BADA, gulau Ahaz i riwana-melei i pa, ¹¹ “BADA am God ma vibaḡai da mataira piripirina, doa au ipu dewadewana, irairagei ai au animae bo mara au tepa dewadewana, ina viatataiem.”

¹² Wate Ahaz i paribelei, “Tau eḡa Bada ana vibaḡai mataira aubaina. Eḡa ata ḡoei da Bada ana raudadani.”

¹³ Ma Isaiah i riwa i pa, “Gulau David ana epaepaia, ona rautaniḡana kaua! Taumi ami orapotei rava orai o vivibadoi ma marina o ḡoei da kauana tagogina ona kauai Bada awarina bo? ¹⁴ Lamna aubaina Bada ainelana mataira ina viatataiem: Matatapu ina duama ma tevera orotona ina ḡuni ma ina viwavai Immanuel.” Wei anona God tauta maiteni.

9

Awarita tevera i tupua

¹ Tau i vivinu'apoapoe, ai vinuapoapoe ina kwa. Rorova dobu Zebulun ma dobu Naphtali i kwalai* ma i vinimalamalai, wate muriai dobu ina viboruma-kauai. Galili, jentail ai dobu, au boga Mediteranean ina vikarei da mara-matanei ina nae da waira Jordan au baba ḡelauna.

² Tau waguwaguvareina taubararai

lalaina ḡaeḡaena i 'nanai;

Tau gimtona taumaenina†

awarii lalalaina i lalai.

³ Tam ai dam u vimaḡai

ma ai nuaiai u viratai;

am viturana i vinuaiaiei;

me tuaruta au marana e vivinuaiai,

me sorodia e vivinuaiai,

maranai, ḡavia purapurai i tuarui, e ḡutaḡutai.

⁶ Aubaina, awarita tevera i tupua!

Tevera orotona i vereta!

Tauna ina vibada.

Tauna ina ḡorei:

Tauvinauterena Aiaii telarana, God Vivirewapanana;

Amata Maemae Nonoana; Nuauba Badana.

⁷ Ana vigulau ma ana nuauba ina tua,

eḡa damona ita mamae.

Noina Gulau David ana au vigulau gabuna ina kiala,

ma nuavainei ma jijimaninei ina vibada kaua;

Ina mae-nonoa, marina da mara au damona.

BADA VIVIVIREWAPANA KAUKAUANA

ana nuavainei wei anatapuna ina kauai!

11

David ana epaia

¹ Me ai tugutuḡu ita nabinabi

Mara e nenei maranai Jesse ana damei gulau ina nei.

* **9:1** I pupuna-naiei au Assyria i vipanipani † **9:2** Iraḡe paratana

- 2 Ma BADA Aruana tauna au tepana ina rauēi da:
 Nuaulaula ma aramana gāēgaena ina verei,
 ana oga tara aiaina ma tepa tora ina verei, da ana rava ina paina-kauei.
 BADA ina aramanei ma ina vivirei.
- 3 Bada votelatelana, lamna ana nuaiāi gāēgaena,
 ma ega kaua tepana inanana bo viarautu awarinei, ina kovoḡimi;
- 4 Tauna molamolakai ina rauetarana-kauei,
 ma vivinuapoapoe au dobu aubaii ina mairi.
 Ma gamona bolabolana dobu ina kovoḡi,
 ma ponanei ḡo'apoapoe ravai ina viraḡeni.
- 5 Tauna kaua jijimanina ina vijiḡoratei
 ma patutu ina vitairoroēi.
- 6 Nanare auou moduei sipu natuna maiteni ina mae,
 ma leopard gote gāubona au ririvana ina matave,
 nanare cow ma lion natunatui ina laba-tagogi;
 ma tevera ina viḡamoḡamo.
- 7 Bulumakau ma bear ina am tagogi,
 natunatui ina matave tagogi,
 ma lion gidagida ina ani me bulumakau.
- 8 Tevera daradarana mota ana au nibo ina vikalokalo
 Ee! Ma tevera edaedana mota aiara ana au nibo, urana ina tereḡairei.
- 9 Au Zion, au ola vivivireina ega aiwai ina vikeroi bo ina viapoapoeni.
 Aubaina BADA aramanana
 dobu ina vioai, me waira boga e vivioai.
- 10 Nai maranaina gulau vouna, Jesse ana damei,
 ina vomairi da ina vimataira dobu au ana tapuna.
 Dam gāēgaēi anatapuī ina deri ḡeta awarina, ana au animae boruboru-
 mana.

35

Etanai Vivivireina

- 1 Mutulua ma dobu poipoina ina vinuaiāi,
 dobu dariḡaga ina vinuaiāi ma ina talai!
- 2 Berana ina numoi,
 ma ina vinuaiāi ma ina logologo!
- Inanana i vinualaulauna me Lebanon olai
 ma ana maura me Carmel olana ma Sharon wapuna.
 Kampa BADA ana boruma rava ina viatataiēmi,
 BADA ana vigulau ina inanai.
- 3 Ura vogarigarii ona vovaibagi,
 ae tutu gwaḡagawaḡana ona vovaibagi;
- 4 Rava rovorovoi ona riwei,
 “Ega ona rovo! Ona virewapana!
 Ona inana! God ana mejina e nenei;
 da ami ḡavia ina vipupui.”
- 5 Ma mata potapotai ina inana
 ma taniḡa potapotai ina nonora

- 6 Gwaḡagwaḡai ina viauaupepa me deer, ma gungum ana morelanai
ina vigaragararei.
Waira au dobu dariḡaḡa ina wanaiwaḡi,
ma vuvura ina raupaipairei.
- 7 Doa paipairana ina vitopa
vuvura ina raupaipairei
au dobu dariḡaḡa,
modu mā gonu ina gogo labalababa auou moduei ana au animae.
- 8 Ma kampa etanai ḡaeḡaena e ḡoreḡorei *Etanai vivivireina*, ina mae.
Etanaina lamna tauti God ana babara e nenaeni, tauti ava aubaii,
Rava orai miramirai eḡa ina babarani.
Bubuai weka eḡa ina babara dadana.*
- 9 Eḡa lion bo raviuru kampa ina babara.
Eḡa ḡamoḡamo ḡaiḡaiawai kampa ina mae
BADA rava i vivilawania,
tauti ava kampa ina babara.
- 10 BADA aiavoi i gimara-melei wenanare ina nememei
ana welawelai ina rui au Zion
Nuaiai maemaena ina vikunuteiei,
nuaiai ma morelana ḡaeḡaena ina peu au tepai,
nuabola ma iniviarā ina amoa.

40

God ana rava ina vinuaubai.

- 1 Ami God e ririwa, “Au rava, ona vinuaubai!
Nuauba riwai ona riwei.”
- 2 Riwa egolanei mai Jerusalem ona riwei
ona riwei da ai vinuapoapoe marana i kwa,
ai ḡo’apoapoe i nota-tawanei.
BADA ai ḡo’apoapoe i vimaiei mara ruaḡa.
- 3* Rava e viḡoreḡore;
“BADA ana aninae au mutulua ona vokaukauei!
Etanai jijimanina ata God aubaina au mutulua ona kauei.
- 4 Gwagwa ona dobo-naiei,
ma ola anatapui ona ḡara tawatawanei
doana anatapuna ona vimataveni,
ona ḡara-laboḡi.
- 5 BADA ana boruma ina vieḡai,
ma rava anatapui ina inanai.
Lamna BADA ḡamonei i riwai!”
- 9 Zion, tam pariverena aiaina e garagararei.
Ma ḡae ola ḡaeḡaena au tepana
ma ponam ḡaeḡaenei,
pariverena aiaina ma raugugulei
ma eḡa ma rovo!
Taon ḡaeḡaei Judah au paratana ma pariverei,
“Ami God e nenei!”

* 35:8: Bo avena da ai nota i aburu, tauti eḡa ina kwako. ☆ 40:3: Mrk 1:3

¹⁰ Ona inana BADA God ana rewapanana
 e nenei da ina vibadeta.
 Ona inanai! Maiana, lamna rava i vivilawania, maiteni e nenei.
¹¹ ✧ Ana rava ina ġamoi me sipu tauġamoina,
 ana sipu natunatui au nuanuana ina raparapai.
 ma tatauvao ina ravena-kauei.

42

BADA ana taunola.

¹ ✧ BADA i riwa,
 “Wei au taunola, a vinei,
 a vovaiwewapani ma a vinuaiaiei.
 Aruau au orana a terei
 ma tauna lawana aiaina, ma kaua jijimani i ina neiai dobu au anatapuna.
² Tauna eġa ina garara
 bo ponana ina rata au deba.
³ Rava me gonu barabarana eġa ina gai,
 bo rava me wiki tupona eġa ina boi.
 Wate lawana aiaina ma kaua jijimani i ina neiai dobu anatapui awarii da
 ai lawana.
⁴ Eġa orana ina peu bo ina vokokokara,
 lawana jijimanina ina terei au dobu;
 bonabona ravai aueia nanare, e vivipaipai.”
⁶ ✧ “Tau BADA jijimani u, a vinem ma ana vovaiwewapanim da lawana aiaina
 ma neiai;
 ma ana raunimavoaim ma ana gagaloem.
 Tamei, parivainuagana bagibagina rava anatapui au dobu maiteni ana kauei,
 ma vilalalaina jentail awari.
⁷ Ma mata-potapotai matai ma vikalai;
 ma ravai au panipani numana;
 nai tau gimtona maemaiei ma tereopunei.”

49

BADA ana taunola

³ BADA i riweu i pa,
 “Israel tam au taunola ma tamei au boruma ana vieġai.”
⁵ Au manawa ma BADA i vineu da ana taunola;
 da ana rava mai Israel kwakokwakoi ana neiana-meleiai awarina.
 BADA i vimaegaeġaeniu;
 Tauna au rewapana.
⁶ ✧ I riweu “Au Taunola,
 Jacob ana dam ma voepana-melei ma
 mai Israel kwakokwakoi ma neiana-meleiai; lamna nola aburuna.
 Wate nola ġaegaeana a vereverem;
 lalalaina ma naiei jentail awarii

ma lawana mamae-nonoana ma naiei da dobu au gia dewadewana
ina ġeta.”

14 Wate mai Jerusalem i riwa,

“BADA i netawaneta! Tauta nuanuana i vuru”

15 Ma Bada i paribelei,

“Moina! Tatauvao natuna melamelana au ġuġuna, nuanuana ina vuru bo;
bo natuna i ġuniġunia nuanuana ina vuru

Mepa da alo nuanuana ina vuru,
wate tau, eġa nuanuau ina vuru!”

16 Jerusalem eġa melanai nuanuau ina vuru

Ona inana! Wavami, au ura lalalapai a rurui.

50

BADA ana taunola patupatutuna.

4 BADA God i viararamani u aiwai ana latoni,
da ġokokokarai ma peupeui ana vovairewapani.

Ubaubanai patapatai e ravidagudaguii,
ma tanigau a tonetonei da
ana rautaniganana ma ana viararamana kaua.

5 BADA God aramana i vereu
ma eġa ata pariġaiei bo ata mae-puputei.

6 *Uporau a verei da i kwapu-kauei,
ma a voterei da mutuorou i amui.

Eġa naou ata govaġi maranai i vinimalamalaii
ma naou i ovai.

7 Wate BADA God au muriu e maimairi,
lamna aubaina eġa ita vitepaubaubaii.

A vokaukaua da ana nebelei,
aramanei da eġa ina vinimalamalaii.

8 God au ririvau, ma ina vitaubabani aubaii.

Tauna ina riwemi da tau eġa aiwai ata kauana-boai.
Aiai ina viwavuii?

Tana nae tana etara
Au ġavia mepa, taumi ona nei?

9 Anina BADA tauoina e gagaloeiu,
Aiai ina riwei da tau a kauana-boai?

Tau anatapui ina gumaġa me gara wadubona.
Komaġana ina ambaubauni.

52

BADA ana vilawana e neni

7 I ai ġaġa, taupariverena a inana olei e taġotaġonai.
Riwa Aiaina e jimejime:

nuaba ma nuaiiai riwai
ma BADA ana vilawana.

Ma Zion i riwei, “Ami God e vivibada.”

8 Ona rautaniganai! Ami tauvineneġana e vigaragararei;

ana morelanai e logologo;
 Tau mataie BADA i 'nanai
 e nenememei au Zion.
 9 Jerusalem wanarikarikana,
 ana morelanami ona wela-gogona BADA awarina.
 Tauna ana rava i vinuubai,
 ma ana melagai Jerusalem, i vai-melei.
 10 Dobu anatapu i matai
 ana rewapana vivivireina e viviegai.
 Rava anatapu i dobu
 BADA ana vilawana, ina inanai.

Taunola ana vinuapoapoe ma ana boruma.

13 BADA i riwa, "Au taunola ana nola ina kauana-kauei!
 Rava tauna ina voepai au tepa dewadewana.
 14 Au naona rava mağamağau tauna i 'nanai
 ma i virovorovoanei.
 I vunu-kauei ma i vitaratarai;
 da inanana ega me rava.
 15 Wate marina dobu patarai ina raviğori
 ma gulagulau gamoi i pota tauna voepaepa aubaina.
 Ega ita parivere, i
 marina mataie ina inanai,
 ma aiwai ega ita nonori, ina aramanei."

53

1 "Aiai wei pariverenana ita vitumağanei?
 BADA aiai awarii ana rewapana i viatataie?"
 2 God au matana, i rata me ai-nabina,
 me aiwarama au kemara e gogogolana.
 Ega ita tupua karawata bo vigulauna,
 ega aiwaina vinualaulaunana da tata rauogarei.
 3 Ta inana geduaie ma ta inana-tawanei,
 iniviara ma vinuapoapoe malana i vaia,
 ta raugovağei,
 ta mae-puputei ma ta riwa da tauna rava labalababa.
 4 Tauna, ata nuabola kovogana i vaia
 ma ata iniviara i avarai.
 Wate ta notai da
 ana go'apoapoe aubaina, God i kovogai.
 5 Ata kaua apoapoe aubaina i vitonei,
 ata go'apoapoe aubaina i vikeroi.
 Kovoganei, nuauba i vereta;
 kwapu keronei i vilawanita.
 6 Anataputa me sipu kwakokwakona,
 ana nuaita ma ata goanei ta mamae;
 wate ata go'apoapoe kovogana, BADA tauna i viavarai.
 7 ♣ Au taunola i rauiviapoapoelana-kauei,
 wate i volagota;

eġa aiwai ita latoni.

I taravaina-naiei viraġenana aubaina me sipu ġaubona.

Me sipu ana genugenuanana e nenaē aparabori aubaina eġa aiwai ita latoni.

⁸ I pani ma i naiei

ma eġa aiwi tauna ita vinuabolei,

eġa ana epaepaia ma ina iraġe.

Ana lawana au pouna i kwa labalababa.

Ana rava oina ai ġo'apoapoe aubaina i'raġe.

⁹ Tauna eġa morumoruna bo ġaiġaiawana.

Wate tau i ġoei da danedanei maiteni ita doboi,

ma purapura ravana ana au kokoġa i vimataveni.

¹⁰ Maranai ana lawana i puloei ata ġo'apoapoe aubaina.

Lamna, BADA ana ġoana da tauna ita vunū-boai ma iniviarā ġaeġaena ita vaia.

Ma ana epaepaia ina maġa guratana

ma ana lawana ina manawa.

Ma taunei, BADA ana ġoana ina kauana-paiei.

¹¹ Ana nola anona ina inanai ma ina vinuiaiēi

da ana nuabola eġa kwakwavina.

Bada i riwa, "Au taunola patupatutuna a vinuiaiēi,

rava maġamaġagau ai kovōġa i avarai

ma lamnei tau ana ġorei Rava-Jjimanii.

¹² ✧ Ma lamna aubaina ana vimaeġaeġaeni, tauna rava ġaeġaena.

Ma ana au gabu ana terei

rava ġaeġaei ma virewapanai maiteni

ma ana maia ina ġutai.

Aubaina ana nuaina ana lawana i verenei.

Tauna ora-potapotai maiteni i'raġe,

ma ġo'apoapoe ravai maġamaġau aubai i mairi."

54

BADA ana nuavaina Zion aubaina.

⁴ Eġa ona rovo aubaina eġa ina vitepa-ubaubaimi.

Tepami ina tora, eġa ina vinimalamalaimi.

Ami laraga kauai nunuami ina vuru.

Ami vikaiababa nuabolana ina amoa.

⁵ Aubaina, taukauem lamna awam,

wavana BADA Vivirewapana Kaukauana.

Israel ana God Vivivireina am taugimaramelana,

Tauna dobu anatapuna ai God.

⁶ Israel, tam me wavine tavine vovvou

ma awam i geduaiem ma u vinuabola kaua.

Wate BADA ina ġore-melem awarina ma ina pa,

⁷ "A voterem mara aburuna,

wate raunuapoapoe ġaeġaenei ana vaimelem.

⁸ Au meji i rata kaua da a mae-puputem mara aburuna.

Wate au nuavaina mamae-nonoanei,

ana raunuapoapolem."

✧ 53:12: Mrk 15:28

BADA taugimaramelana i riwa me,

⁹ ✧ “Awariu, wei me Noah ana au mara,
maranai parivainuaḡana bagibagina a kauēi
da eḡa melanai wairei dobu ana purui-melei.
Marina, nanare parivainuaḡana bagibaginei a ririwem
da eḡa melana amlou ina ḡaiḡai da ana kovoḡimi.

¹⁰ Ola ina vidagu
ma ina amoa.

Wate, au nuavaina mamae-nonoana,
ma au nuauba mamae-nonoana tam awarimi ina mae-nonoa.”
BADA tauraunu’apoapolemi i riwa.

55

Nuarelanami ona nei

BADA i riwa i pa,

¹ “Ona nei, nuanuaelanami! Waira wei!
Awarimi mane eḡa ona nei ona gimara ma ona am!
Ona nei, wine ma mereki ona gimarai
maiana eḡa, ona vaioi.

² Aiwai aubaina lam apoapoei awari mane e tawatawanei.
Aiwai aubaina e nolanola labalababa.

Ona rautaniḡana kaua ma ona am-iaua,
ma lam aiaii dagidagiaii ona vinuaiaiei.

³ ✧ Taniḡami ona toneiai ma ona nei awariu
ona rautaniḡana da ona lawana.
Au parivainuaḡana mamae-nonoana ana kauēi tam maiteni.
Ma viaiaina David a parivainuaḡani ana verem.”

⁶ “BADA ona baiei da ona nelaḡai,
marina au ḡereḡeremi, ona vibaḡai.

⁷ Ḡoa apoapoei ravai, ami lawana apoapoei ona geduaiei
ma nuanuami ona virai.

Ee! Ma ona wanavirai BADA awarina da ina raunu’apoapolemi
ma ami ḡo’apoapoei ina notatawanei.”

⁸ BADA i riwa, “Au nota eḡa me ami nota nanare,
ma au kaua tapuna, eḡa ami kaua nanare.”

⁹ Mara i ḡetelara eḡa me dobu
ma nanare au kaua i ḡetera eḡa me ami kaua.
Ma nanare au nota i ḡetelara eḡa me ami nota nanare.

¹⁰ Garewa ma turuvani marei e peupeu
eḡa kwakwavina ina naeme au mara,
wate dobu ina viutuvanei
da lam ina gogo,
da pei ina vereta, paewa aubaina
ma lam, aniam.

¹¹ Ma wenanare riwau gamouei e opuopu;
eḡa kwakwavina ina nememei awariu

da aiwai a pariparitawanei ina kauēi;
au goana anatapuna ina vikwai.

56

Lawana rava anatapui aubaii

¹ BADA wei e ririwei:

“Aburuna ava, ana nei da ana vilawanimi
ma au viaiaina ana viegai.

Lamna aubaina, kua aiāi
ma jijimanii ona kaukauei.”

⁶ “Mai jentail, aiāi da tau i vituraneu
ma i vitaunoleu, ma wavau
i vinuavainei ma i vimaēgaeaēniu.
Au Sabate i vivirei,
ma au parivainuaēana bagibagina e vovojijina-kauēi.

⁷ *Tāui ana neiāi au ola vivivireina - Zion
ma nuaiāi ana verei au parinumana.
Ma ai pulo e apuapui awariu ana vianinei.
Anina ma rava, au tempol ina gōrei pari numana,
dam anatapui au dobu aubaii.”

58

Uji ririwa kauana.

BADA uji ririwa kauana e bababaniei:

⁷ “Am-irairāgei lam ona taraiēuei,
ma ami numa ona votawanei,
nelabalabai ma vinuapoapoe awarii.
Kovakovai gara ona vioteni,
ma taraoim eēa ona inana-tawanei.”

⁸ “Maranaina, au viaiaina ina ravilalaimi me maratmtom madeēana,
ma ami doria laēilagina ana vilawani.
Au naomi ana nae da ami aninae ana vovaijijimani,
ma murimiei, au boruma ina gagaloemi.

⁹ Nai maranaina ona viēgore ma TAU BADA, ana paribelemi.
Agu ona gararei ma ana riwa, “Tau weka.”

“Eēa rava, vita ona verei, eēa ona viwawuwavu
ma eēa babani morumorui ona kaukauei.

¹⁰ Maranai am-irairāgei o viambagibagi,
gōkokokarai o vovoagui.
Lamnei, ami lalalaina gimtona ina lalai,
ina ravilalai me aubenai madeēana.”

61

*Riwana Aiaina molamolakai aubai**BADA ana taunola e ririwa:*

¹ “BADA God, aruana i vereu.

I vineu ma i paritawaneu da:

Riwana Aiaina ata naiei molamolakai awari
ma vinuanuabolai ana vinuabai.

Ma panipani ana parivereu da deriei ina viopuni.

² I paritawaneu da rava ata parivereu,

da mara i turiai maranai BADA ana rava ina vilawani
ma ana ġavia ina kovogi.

Ma i paritawaneu da vinuabolai ana vinuabai.

³ Da tau i mogumogu au ola Zion,

nuaiai ina vikunuteiei ma eġa ina vidolodolo.

Nuaiai logologona ma eġa tou.

Tau i ina vinuiai ma eġa ina vinuabola.

Ai kua jijimanina aubaina ina ġorei BADA ana labarava ai jijimanina
da tauna ina vimaġaeġaeni.”

⁶ “Ma taumi ina ġoremi BADA ana pirisi.

Ina ġoremi, God ana taunola.

Taumi dobu ġelau ai maura ona ani
ma ona vigulagulauei.”

BADA i riwa

⁸ “Aubaina Tau, kua aiaii a ġoeġoei,
danene ma ġo’apoapoe a gedugeduaiei.

Au rava ai vinuapoapoe aubaina ana vimaiana-kauei;

au parivainuaġana bagibagina mamae-nonoana maiteni ana kauei.

⁹ Dam anatapui, am epaepaia ina aramanei
ma e inainana ġaei.”

Ma ina pa,

“BADA i viaiaina-kauei.”

Zion i riwa

¹⁰ BADA awarina a vivinuaiai kua
ma Aruau God awarina i vinuiai kua.

Aubaina vilawana garanei i vigaraiu

Ma jijimana viane i ma garanei i vioteniu.

Me tavitavinevou orotona e vivigarai nanare bo

me wavine tavitavinevou ana viana e tavitavine.

¹¹ Me doa, pei e vivigogoi ma debagau lam e verevereta,

nanare BADA God, rava e teretere-vaijijimani
au dobu da tauna ina voepaepae.

64

Pari agu aubaina

⁴ Oo Bada wariaġa da marina, eġa aiai god ġelau ponana ita nonori, ita inana,
bo ita aramana dadanei.

Anina Tam ainelam.

Tau da e vivipaipaiem e vovoagui.

⁵ Tam kaua aiaii ravai e vovoagui,
am tarawatu e vovojjini.

Wate maranai ta ġo'apoapoe ġiriġiri
tam amlom e voġaiġai.

Aiwai aubaina ma vilawaniai?

⁶ Anatapui ai a ġo'apoapoe,

Au matam, ai kaua jjiimanii anatapui miramirai me gara wadubona.

Anataputa ta poipoi me ai-rugurugu,

Ata ġo'apoapoe e kapupuana-naieta.

⁷ Ma eġa aiai wavam ita voepaepai

bo ita voguratei da naom ita inanai.

Lamna aubaina tam u netawanelai

da ai ġo'apoapoei e vunuvunui ai.

⁸ Wate BADA, tam amaia i.

Tauai dogodogo ma tam nau tauvoaina.

Tam anatapui ai uramei u rauġaroġaroelai.

⁹ Lamna aubaina, eġa ma meji guratana awariai.

Ma eġa ai ġo'apoapoe ma nota-nonoei.

Ma i 'nanaia i, anatapui ai tam natunatum.

Peroveta Jeremiah ana buka

Pariverena

Jeremiah lamna peroveta wavana naenaena au Jerusalem, ma BADA riwana i raugugulei ana rava awari. Tauna riwa bagibaginei ana rava i ririwei menanare God tau i kovoganei, aubaina Tauna i mae-puputei ma god gelaui i votaḡotaḡoi.

Bada Jeremiah i ḡorei

⁴ BADA i riweu i pa:

⁵ “A vinem, muriai da alom au manawana a teretagogiem.
Muriai da uta tupua, A tereriem,
rava anatapui ai peroveta.”

⁶ A paribelei, “Oo BADA God, tau tevera ota, ma babani eḡa ata aramanei.”

⁷ BADA i riweu, “Eḡa ma riwa, ‘Tau tevera ota.’ Ma nae mepa a pariparitawanem, ma aiwai a ririwem tau i parivere. ⁸ Eḡa ma rovoei aubaina Tau a paritawanem. Tau tam maiteni ana mae da ana galoem. Tau BADA a babani.”

⁹ Anina ma BADA urana i viloloi da ipiriu i tapedadani ma i riweu,
“Marina riwau au gamom a terei.

¹⁰ Ma aramana-kauei da marina rewapana a vereverem,
da dobu anatapui ai gulagulai ai kovoga ma vinolenolei wenanare,
Ḡelaui ma orumi, ma viairikarikai,
ma vovaiubai ma vipupui.
Ḡelaui ma voepai ma ma paewi.”

¹⁷ “Ma vokaukaua Jeremiah! Ma vomairi ma aiwai anatapuna a riwem ravai
ma parivere.
Eḡa ravai ma rovoei, bo au matai, ana virorovoi.

¹⁸ Amadodo a vovaiwewapanim me
melagai vivirewapanana, tuatuana ma garina iramei voavoana. Tam
ma mairi ma eḡa maiJudah ma ai gulagulai, ai gabemani ravai, ai
pirisi ma dobuna ravai ina tereḡairem.

¹⁹ Tau i vigaiviem wate ina kauana-avei.
Aubaina tau tam maiteni, ma ana galoem. Tau BADA a babani!”

6

Bada i riwa,

¹³ “Rava anatapui, ḡaeḡaei da muomuoi,
e ḡoeḡoei da moruei mane ina kauei;
peroveta da pirisi anatapui nanare
rava e morumori.

¹⁴ Tau i, au rava keroi ḡaeḡaei
e bunabunamai apamina me kero aburuna.
E ririwa da aiwai anatapuna anina,

Wate eġa anina!”

17

BADA ona-vitumaġanei

- ⁵ BADA e ririwa,
 “Aiavoi da ai vitumaġana rava ota awarii e tereterei,
 ma ai rewapana e vitumatumaġaneiei;
 ma e gedugeduaieu,
 ana parivaiapoapoeni.
- ⁶ Tau me, ai podapodai au dobu dariġaġa
 eġa aiwai aiaina ita inainanai.
 Tau dobu au paipairana ina mae, ai ma modu eġa,
 me au dobu au vivibogana ita mamae kampa eġa rava ita mamae.”
- ⁷ “Wate aiavoi awariu e vivipatutu ma e vivitumaġana da
 BADA ai tepamairi, tau ana viaiaini.
- ⁸ *Tau me ai, vuvura au adana i paewi,
 ma warami i ġaira waira au orana.
 Eġa marapoi ina rovoei,
 ma rugurugui majimajiġai ina maimairi.
 Ma marapoi ana au mara,
 eġa ua ita vovoterei.”
- ⁹ “Rava nuapoui lamna morumoru kauana, i apoapoe kaua,
 aiai i aramana-kauai, da ina vilawani.
- ¹⁰ Tau BADA rava nuapouii
 a tuvirevirei ma kaua govagovaġai au orai a inana-pai.
 Rava anatapui ai kaua ana inanai.
 ma ai kaua awarinei ana puloi.”

20

Jeremiah ana beura

BADA i riwa,

⁵ Tau, Jerusalem ma ai mane ma ai maura ma aiwai anatapui polapolai
 i toitoiei ana veredamanei ai ġavia awarii. Ina nei ma Judah, ai gulagulau ai
 purapura mai ai ġaeġae maiteni ina pupuna-naiei au Babilon.

Jeremiah i riwa,

- ⁷ Oo BADA! u gwala-kauu da a viperoveta
 ma a voterem da u kauai.
 Tam u virewapana guratana da
 u tereġaireiu.
 Marina tau rava ai anivinama.
 Rava anatapui e vivinameu, marai ma waguvarai.
- ⁸ Maranai a paripariverena,
 Riwa ana nuai e rubaruba-opu.
 “Viġaiġaiawa! Pupu e nenei!”
 BADA ana pariverena aubaina, vinama ava a nenelaġai.
- ⁹ Mepa da ana geduai ma wavana eġa ana latoni bo wavanei ana jima

Lamna maranaina riwam lamna me ai araratana,
 orau e ararai.

Amapo eġa ana vojijina-guratei. Amapo eġa!

¹⁰ A nonori patara e viviarautueu.

Au ġavia i maġa kauga,
 ma e vineneġaneu da ana neboa,
 ma ina viwavuiu ina pa,

“mepa da i jima boa, ina waro-melei ma tauta ata biwa tana vaia.”

¹¹ Wate BADA tau maiteni

me tauviġavia vivirewapanana kaukauana.

Lamna aubaina au ġavia eġa ina tereġaireu.

Tau i ina vunū-aveu ma ina vinimala kauga.

Ina vinimalana-nonoei ma eġa nuanuai ina vuru.

¹² “Oo BADA Vivirewapanam! Tam rava jijimanii e raraudadani,
 ma ai nota ma orai e araramanei.

Au vita au uram a terei

ma ana inanaim, au ġavia ma kovogġi.

¹³ Ona wela BADA awarina.

Ona voepaepai.

Maranai Rava vivirewapanai, gwaġagwaġai e rarau-iviapoapoelei,
 lamna BADA ana rewapanei tau i ina galaloei.”

23

BADA Gulau vouna ina vinei mamae-terenai aubai

¹ BADA e ririwa, “Au rava ai babada nuabola ġaeġaena ina nelaġai! Tau i sipu taupaini apoapoei. I vipaipai-boa da sipu i vidabararai.”

² Lamna aubaina BADA, Israel ana God, wenanare Israel babadai awari e ririwa, “Taumi ami kauelġi au sipu o vidabararai ma o vilamolamonei. Eġa ota vipaipai kauga. Lamna kauai apoapoei aubaina ana kovogġimi. ³ Anina ma Tau au sipu ġelau i virubai au dobuġela, ana neiana-meleiai ai au gari. Wei mamae-terenai ina vinatuna ma ina maġa guratana. ⁴ Taupainii rava kauga ana tere-naiei da ina viġamoġamo kauga ma eġa ina rovo me bo orai ina sisi. Eġa tagogi ina kwako. Tau BADA a riwa.”

⁵ *BADA e ririwa

“Mara vouna e nenei maranai gulau ana terei David ana damei.

Wei gulauna ina vibada kauga ma kauga aiainei ma jijimaninei dobu anataputa ina vibadei.

Nota aiainei Judah ravai ina rauetaraveni ma

Israel ravai au nuauba ina mae.

⁶ Wei maranaina mai Judah, ina vilawani

ma Israel ana nuaubai ina mae.

Ma wavana ina ġorei, BADA Tauterevaijijimanita.”

31

BADA Israel ina vaimelġi.

⁷ BADA i riwa:

“Ana nuaiaimi ona wela Jacob ana dam aubaina

* 23:5: Jer 33:14-16

ponami ona voepai dam vigulauna aubaii.
 Ona voepaepa, ona jima ma ona riwa,
 'God, am rava mai Israel mamae-terenai ma vilawani!'
 8 Au kariwabuei au rava ana neiana-meleiai,
 dobu au giana da au giana anatapui.
 Maiteni mata-potapotai ma sigesigei,
 duadumai mā tautauvaoi.
 Dam patara gāegaena ina nememei.
 9 Ana rupenai ma ana toutoui agu aubaina,
 ana neiana-meleiai
 Waira adanei ana taravainiai,
 etanai abuabunei da ega ina peu.
 Tau Israel amana,
Ephraim au natuevou."

Parivainuaḡana bagibagina vouna.

31 ✧ BADA e ririwa i pa, "Mara e nenei maranai parivainuaḡana bagibagina vouna ana kauei mai Israel ma Judah maiteni. 32 Wei lamna ega me noinoi maiteni a kauei nanare; maranai a raunimavoai ma Egyptei a taravaina-opunei. Aubaina au parivainuaḡana i viaigai avena da nuanuai a vaia me oroto awana nuanuana e vaivaia. 33 Wei parivainuaḡanana mai Israel maiteni ana kauei nai marana au murina." BADA e ririwa, "Au tarawatu ai au nota ana terei ma au nuanuai ana girumi. Wei ina terekauei da Tau ai God ma tau i au rava. 34 Ma ega ai rava ina viararamana-melei bo riwa vivira, 'BADA ona aramanei!' Aubaina au aburuna da au magurina anatapui ina aramaneu. Tau ai go'apoapoe ana nota-tawanei ma ega ana nota-melei." BADA e ririwa.

33

Nuauba parivai-nuaḡanana

14 ✧ BADA i riwa, "Mara e nenei maranai au parivainuaḡana bagibagina mai Israel ma mai Judah maiteni a kaukaueia anona ina tupua.

15 Nai maranaina,
 rava kua David ana damei ina nei;
 Ma Tauna kua aiiai ma jijimanii ina kauei au dobu.

16 Nai au marana
Judah ina vilawani ma

Jerusalem ana nuaubana ina mae.

Wei melagaina ina gorei, *BADA Tauterevaijijimanita.*"

38

Jeremiah waira dogona au orana.

4 Babadai, gulau Zedekiah i riwei, "Wei ravanana Jeremiah tana viraḡeni. Ana babaniei, sorodia ruaḡauta lawalawai ma rava ḡelai e viviorabadoi. Tauna ega rava ita vovoagui wate e viviorabadoi."

⁵ Gulau i paribelei, “Tauna au urami, ami ḡoana nanare ona kauei. Tau eḡa ana viḡaemi.”

⁶ Ma Jeremiah i vaia ma i tere-ḡairei gulau natuna Malkijah, ana au dogo, wei lamna gulau ana sorodia ai au potuma au ririvana. Ma ḡuravei Jeremiah i tere-ḡairei au *dого. Au orana dogodogo ava, ma Jeremiah i monu ḡaira da i mairi dogodogo orana.

* **38:6:** Wei lamna wapaketa dogona, viutuvana aubaina.

Lamentation Mogu Jerusalem aubaina

Pariverena

Wei bukana e ririweta da au 586 B. C mai Israel i vinuapoapoe kaua maranai ai ġavia i nei da Jerusalem i pupuni ma rava ma purapura aiaii i vaia da i naiei. Tauta eġa tata aramana-kauei aiaii wei bukana i girumi wate rava ġelau i notanotai da augunai Jeremiah wei bukana i girumi.

Jerusalem ana nuabola

¹ Kapore! Zion wariġa am patara i rata ġaġa, marina u kwakwava.
Dam patarai ai voepaepa, marina i vikaibaba.
Wariġa dobuġela gulagulau ai voepaepa. Tauna i 'nana ġaei.
Marina i vitaunola.

² E toutou maratomi,
jirigwegwena au navanavana e toitoi.
Ana nuavainana maġamaġau i ruba-tomana, eġa aiaii da ina vinuaubai.
Ana rava* anatapui i mae-puputei ma i viġaviei.

³ Judah i pani ma i pupuna-naiei.
Au dobu ġela i vivipanipani,
e rarau-iviapoapoelei,
i vitaomana au dobuġela.
Ġavia i mae-kwaviviroi,
menanare ina onaġanei?

⁴ Zion etanaina e mogumogu
eġa aiaii kampa ita nenaie torela aubaina.
Ana anirui i kwakwava,
Pirisi e gunugunura,
ana guguini e vivitouana;
Nuapouna i wanagwadgwadai.

⁵ Ana ġavia i vibada,
au urai e mamae.
BADA nuabola ġaeġaena i neiai Zion awarina
aubaina ai ġo'apoapoe i rata.
Natunatui i paninaieie aueia, ai ġavia au mataii.

⁶ Kapore wariġa Zion na!
Wavana naenaena, vinualaulaunana marina mepa?
Marina, Zion ana babada lamna me
deer, nuanuai i arelei ma i raumolaġau ma lam i baiana-avei.
Inina i garigari
ma eġa tagotagogina da ai ġavia ina rubatawanei.

⁷ Zion i kwakwava, ravana eġa.

* **1:2:** Ana eririam lamna wapu god Baal ma Aserah ma mai Judah maġamaġau wei god i voepaepai. Ana rava lamna tauviġavia mai Egypt ma nanare maiteni i viturana ma maranai ġavia i ġetai tauti i viruberubei.

Ana maura, wadubona e vinuanotenotei.
 Maranai ana rava i peu ai ġavia au urai, eġa aiai ita nei da ita rauagui.
 Ana ġavia Zion ana peu i 'nanai ma i vinamei.

3

- 19 BADA, A tenam nae, eġa matave kaua, iniviara maiteni,
 a vinuapoapoe kaua, notana i viġora kaua.
- 20 A notanota-maelei
 ma au orau a toutou.
- 21 Wate BADA a vinua-notenotei ma orau e vovovaivirewapani. Lamnei
 a vitumaġana:
- 22 da BADA ana nuavaina mamae-nonoana.
 Ma ana raunuapoapoe eġa ina kwa.
- 23 Ubaubanai, e raviravivouni;
 am vipatutu i rata kaua.
- 24 A ririwana-meleu, BADA au buderi lamna a vivitumaġanem.
- 25 Tau i daBADA e vivitumaġanei ma e baibaiei, ina viaiaini.
- 26 I ai da tana volaġota ma BADA tana paini da ina vilawanita.
- 27 I aii da vilamolamona ma nola ma aramanei. Am au vilaraga,
- 28 maranai BADA e viviaramanita,
 ma mae genuatau.
- 29 Tana mae-ġaira au debidebi,
 mepa da agu ina nei.
- 30 Navanavami ona verei da ina ravi, ma ina vijiboġimi.
 Wate eġa ona vobelei aubaina.
- 31 Bada eġa ina geduaiiana-nonoeta.
- 32 Avena da maraġela nuabola e neineiai, wate ana raunua apoapoe i rata
 kaua.
 Aubaina ana nuavaina i rata kaua, eġa damona.
- 33 Wate wei kauai eġa ita vinuaiaiei.

Peroveta Ezekiel ana buka

Pariverena

Ezekiel mai Jew au Babilon i vipanipani awari i babani. Tauna mara nonoa vivirarautua vinualaulaunai ma awanainei ana babani i tereterei.

Tauna rava ai riwa vouna i verei da ina vipaipai ma ai bada ina terepa-melei.

God mai Israel dobu au gia dewadewana anatapui ina neiana-meleiana da ai au dobu oina ina terei.

2

God Ezekiel i vinei ana peroveta

¹ Bada ana boruma a inanai ma au doa a peu. Ma a nonori pona i riweu, i pa, “Rava ota natuna, ma vomairi ma awarim ana babani.” ² I bababani ma God aruana au orau i rui ma i voepaiu ma a nonori awariu i bababani. ³ I riwa, “Rava ota natuna, a pariparitawanem dam paripariviravirai mai Israel awarii. Amamai maiteni ega ita voteleteleu ma awariu i pariviravira da marina. ⁴ Rava paripariviravirai ma orai badobadoi ma ega ita vivivireu. A pariparitawanem da ma riwei, ‘Wei Bada riwana.’ ⁵ Tau paripariviravirai ma ina rautaniġanem bo ega lamna avena, wate ina aramanei da peroveta i ġetai awarii.”

17

God Israel ina ravivouni

²² Bada God wenanare i riwa, “Tau ai cedar manamanaina nuanuana ana vogai da ana paewi. Raġana au tepadewadewana nabina ana gai da ola manamanaina au tepana ana paewi. ²³ Israel ola au tepai ana paewi, ina raġai ma ina raunumo, ai gulauna. Kiu tapuna ma tapuna au raġai ina raunoġi ma au ġoui ina viġou. ²⁴ Ai anatapui nai au dobuna ina aramanei da tau BADA, ai manamanaii ana taragai ma ai tupotupoi ana voepai. Ma ai majimajiġana ana vipoini ma ai poina ina raurugu ma ina rata, Tau BADA a babani, ma aiwai a riwei nanare ana kauei.”

33

God Ezekiel i vinei da tauvineneġana.

BADA i riwa:

⁷ “Rava ota natuna, Tau a vinem tauvineneġana dam Israel aubai; riwa a reverem ma nonori ma babani bagibaginei ma riwei. ⁸ Maranai ġo’apoapoe ravana a ririwei, ‘Tam, ġo’apoapoe ravana, amapo ma i raġe. Ma ravana ega uta pariveri da ana ġo’apoapoe ita voterei, ma ina iraġe. Marina ana iraġe au uram a tereterei. ⁹ Wate mepa da ġo’apoapoe ravana u riwei da ana lawana ita virai ma ega ana lawana ita virai, ana ġoa apoe ina iraġelei, ma tam am lawana ina mae.”

34

BADA tauvipaipai aiaina

11 Bada God wenanare e ririwa, “Tau ainelau au sipu ana baiei ma ana ġamoi.
12 Sipu taupainina, ana sipu kwakokwakoi e baibaiei da e nenemeleiai. Nanare tau, au sipu e kwakokwako-nae. Ana nelaġai ma ana neiana-meleiai, maranaina dobu i waguwarei ma i gimtonei.*

15 —Tau ainelau au sipu ana ġamoi ma ana terei da ina matave kaua, Tau BADA God a babani. 16 Tau kwakokwakoi ma nelabalababai ana baiei, ma ana neiana-meleiai. Ma keroi ana bunamai ma ġokokokarai ana vovaiwewapani. Wate dododoi ma viwewapanai ana pupuni. Jijimaninei au sipu ana ġamoi.

17 —Taumi au sipu Tau BADA God a ririwana-kauemi da taumi tagotagogi awa ana rauretarmi. Aiaii ma apoapoei ana vilamonei, sipu ma gote ana vilamonei.”

36

BADA ana rava ina ravivouni

16 BADA i riweu, i pa, 17 “Rava ota natuna, maranai Israel ai au dobu i mamae, tau ai kaua apoapoeni ai dobu i vimirai. Tau au matau lamna i vimiramelei me wawine ana nawaravi e vaivaia. 18 Marina, au meji ana iwaġatawanei awarii aubaina tau tara i vitoini au dobu, ma nanare kokoitauei dobu i viapoapoeni. 19 A vidabararai ma a vilamolamonei au dobuġela, ai ġo’apoapoei ma ai kaua awariei a kovogġi. 20 Wate metauna au dobuna i rui tau wawau vivivireina i vijibogġi, aubaina nai dobuna rava i ririwa, ‘Wei lamna BADA ana rava wate ana dobu i opu-tawanei.’ 21 A ġoei da au rava au wava vivivireina ita vimaġeġaġaeni, wate noi rava mai Israel dobu anatapui i naeni ma i vitepaubaubai.

22 —Lamna aubaina, marina dam Israel ma pariverei, Bada God wei i riwei, ‘Tau a neineiana-meleiaimi, eġa tam am kaua aiaina aubaina. Tau a kaukauei wawau vivivireina aubaina, taumi wawau o viapoapoenana-naiei jentail ai au dobu. 23 Ana viatataiem i da wawau, ġetelarana ma vivivireina. Wawau taumi dobu au anatapuna o vitepaubaubai. Taumiei dobu ana viatataiei da tau vivivireu 24 aubaina dobudobuai ana taravainimi ma ana neiana-meleiaimi ami au dobu.’

25 —Wairei ana vitoaimi da ona aii, ami mira ma kokoitau viborumai mirana ina oġa-tawanei. 26 Ma nuanuami vouna, ma aruami vouna ana veremi. Nuanuami badobadoi ana votawanei ma aiaina ana terei. 27 Ma Aruau au oram ana terei da au tarawatu ma au viararamana ona votaġotaġoi.”

37

BADA gelama ina ravivouni

1 BADA i raunimavoaiu ma aruanei i naieu da gwagwa ġeġaġaena au pouna i tereu, rava gelamii gwagwanana i oai. 2 Gwagwanana a naeni ma a inanai da gelama i maġa guratana ma i poi. 3 I paridadaneu, “Rava ota natuna, amapo wei gelamii ina virava me bo eġa?” A paribelei, “Oo! Bada God, tam ainelam u aramanei.”

4 Ma i riweu, “Riwauei gelama ma riwei, ‘Gelama poii, BADA riwana ona nonori.’ 5 Bada God wenanare gelama i riwei, “Lavutu au orami ana terei ma ona lawana me! 6 Vioa ma warowaro ana veremi, ma opi da gelama ina purui. Ma lavutu ana veremi da ma lawana. Kampa ma aramanei da

* 34:12: Wei lamna awanaina maranai mai Babilon Israel ina pupuna-naiei au 587 B.C.

Tau BADA.” ⁷ I ririweu nanare a babani, a vikarei da a bababani ma dobuna ura ketarana i nae da dobuna i oai, gelama anatapui i vitagogiei. ⁸ A inainana ma warowaro ma vioa gelama au tepana i ampasi ma au tepai opi i tupua da i purui, wate awari ega lavutu.

⁹ Ma i riweu i pa, “Rava ota natuna, Bada God riwanei ive ma riwei, ‘Bada God e ririwa, ive meiei da meiei e uveuvena, au orami lavutu ina opui ma taubeu patarai e matamatave ona uveni da ina lawana me.” ¹⁰ Ma i ririweu nanare a babani, ma lavutu rava! tupuai i ruini. Anatapui i lawana ma i mairi sorodia boruna gaegeaena.

¹¹ I riwa me, “Rava ota natuna, mai Israel lamna me wei gelamii. Tau i ririwa i pa, ‘Tauta gelama poi ava ma ata tumašana i kwa, ata dam i kwa.’

¹² Lamna aubaina ma riwana-meiei, Bada God wenanare e ririwa, ‘Ona inana! Ami kokoaga ana votawanei ma ana voepaemi ma ana neiana-meleiaimi au Israel.’ ¹³ Au rava! Maranai wei i tupua, ona aramanei da Tau BADA. ¹⁴ Ma Aruau au orami ana terei ma ona lawana ma ana neiana-meleiaimi ami au dobu oina. Maranaina, ona aramanei da Tau BADA. Ee! A ririweia; ana kauei.”

Peroveta Daniel ana buka

Pariverena

Daniel tauna laraga maranaina i naiei au Babilon da i vipanipani. Ma maranai i vomagura tauna i terei da gabemani ai bada g̃aẽgaena. Tauna ana au lawana i vipatutu ma God i votetelei.

Ana vipatutu awarinei God nuaulaula i verei, ma tauna tagotagogina da rava ai rauboni anona ina viẽgai ma kava aiwai amapo ina tupua e viviẽgai.

7

Daniel ana rauboni

¹³ ✧ Waguvarai inana a inanai, ma kava aiwai a inanai me Rava Natuna apau oraninei i nenei, ma i taravaina-naiei MAEMAE NONOANA awarina. ¹⁴ MAEMAE NONOANA vibadana ma rewapana ma vimaeg̃aẽgaena, tauna i verei da ina vibada, da dam anatapui ma dobu anatapui ai ponei ina voepaepai ma ina voteletelei. Ma ana rewapana ina mae-nonoa, ma ana vigulau vibadana ẽga ina kwa.

12

Mara au damona

¹ ✧ Ma nai maranaina anela vivirewapanana Michael, Israel ana taugagalo, ina ẽga. Amapo nuabola g̃aẽgae otana ina nei, ẽga melanai nanare tata inainanai, au karena da marina. Wate wei au marana rava aiavoi da wavai au buka i girugirumia ina lawana. ² Mãgamãgauri irairagei ina vomairi me, ma ina nae, g̃elau au lawana maemae nonana ma g̃elau vinimala maemae-nonoana. ³ Rava nuaulaulau ina lalai me mara madẽgana. Ma tau mãgamãgauri e raveraveni da lawana jijimani e maemaeni, ina lalai me ubona.

Peroveta Hosea ana buka

Pariverena

Hosea God ana peroveta, tauna mai Israel awari God riwana i jimei. God i riwa da tau i ina kovoḡi ma ai dam ina pupuni aubaina tau tauna i geduaiei ma god morumorui i voepaepai ma ai kaua apoapoe i votaḡotaḡoi.

Hosea awana tauna i voterei ma nelara ḡelau maiteni i nena. Wate tauna awana nuanuana i vaini ma i baiei ma i taravaina-meleiai ana au numa. Wei bukana e viviatataieta da nanare tagogina avena da mai Israel ai God i geduaiei tauna anina da tau nuanuai i vaia ma i parivainuaḡana da tau ina neiana-meleiai awarina.

11

God, Israel nuanuana i vaia

¹ Bada Hosea i riwei, i pa, “Maranai Israel ana au vitevera, a vinuavainei ma Egyptei a ḡore-opunei.

² Wate a viḡoreḡore
ma tauna amapo da i nenetawaneu.
Tauna ana pulo i apuapui Baal awarina,
ma daji ḡabuḡabui, i apuapui kokoitau ḡelau awarii.”

Peroveta Amos ana buka

Pariverena

Amos taon au aburuna i mae Bethlehem au ririvana, au Judah maranai God tauna i kwatuei ana peroveta. Tauna God riwana mai Israel i riwei da God, ai kava apoapoei aubai ina kovogi. Wei ravai God ega ita vimaegaegaeni ma ega ita ririwa kava, i morumoru ma molamolakai awarii kava apoapoei i kaukauei.

Ma maiteni Amos God ana parivainuagana tau i verei da amapo tauna Israel ana gabemani ina ravivouni, Jerusalem ina voa-melei ma gulau David ana tupua rerega ravai dobuna ina vibadana-melei ma ana nuubai ina mae.

8

Tou gaegeaena e nenei

- ⁴ Ona rautanihana! Taumi voladagai o kwalekwalei ma molamolakai o tugwadagwadai.
- ⁵ O ririwa, nawaravi vouna torelana ina kwa lagilagina ma Sabate ina kwa.
- Ma witi tana gimarei,
witi ruva aburuna tana terei ma maiana tana gaihaiei
ma sikere morumorune tana gimagimarei.
- ⁶ Witi logilogii o tami da witi o tavipotoi ma o gimarei ma lamnei, molamolakai o gimarai ami taunola.
Tau maiai me busi, maiana aburuna.
- ⁷ BADA parivainuagana-bagibagina, ana wava i kauei,
nai wavana mai Israel e vimaegaegaega,
I pa, “Ami go’apoapoei ega melanai nuanuau ina vuru.”

Peroveta Jonah ana buka

Pariverena

God ana peroveta Jonah i kwatuei da au Niniveh ita raugugula. Wate tauna eġa ita ġoei da ana dobu ravai ai ġavia wariagana awarii ita raugugula.

God i rauġaiġaiei ma iana tauna i lawani. Au murina, i nae au Niniveh ma i nelaġai da mai Israel ai ġavia, God riwana i votetelei.

Jonah BADA i rauġaiġaiei

¹ Mara tagogi BADA, Amitai natuna Jonah i riwei, ² “Ma vomairi ma nae au taon ġaeġaena Niniveh. Ma riwei, da ai ġo’apoapoei a inanai da i rata kua ma lamna aubaina ana kovoġi.”

³ Wate Jonah, BADA i voterei ma etanai ġelauna i vaia ma ina ruba ġaira au Joppa. Ma kampa waga i nenaie au Tarshish i nelaġai. I vimaia ma i geru da ita nae. I notai da BADA ita ruba govaġei.

⁴ Wate BADA kojikojira ġaeġaena i paritawanei da waga ita viairikarikai. ⁵ Waga ravai ai lawana aubaina i rovo-kaukua ma ai god awarii i tou agu aubaina, ma purapura au boga i viorereni da waga ita telatela. Wate Jonah waga au orana i raunuavuru.

⁶ Kapena i ġaira awarina ma i eni ipa, “Mara i apoapoe ġaġa ma e matamatave! Ma vomairi, ma tou am god awarina da ina voaguita. Mepa da ina raunu’apoapoeleta da eġa tana iraġe.”

⁷ Waga ravai i babani vivira i pa, “Ġaima tana vikalokaloei da tana aramane ai ai ana wavu.” Kalona i kauei ma wavuna Jonah awarina i peu ⁸ Ma tau i Jonah i paridadanei, “Aiwai aubaina kojikojira awarita i peu? Tam ai ai? Tam am nola aiwai, tam meiei?”

⁹ Jonah tau i paribelei i pa, “Tau Hebwe i ma tau BADA, Mara ana God a voepaepai, Tauna boga ma doa i kauei.”

¹⁰ Waga ravai i rovo kaukua ma i vigaragararei, “Aiwai aubaina lamna u kauei!” Jonah boiboġi i vieġa da tauna BADA i rovoei da i rubaruba. ¹¹ Mara i apoapoe kua ma tau i Jonah i vitaravirevirei, “Aiwai tana kauei da kojikojira ina kwa?”

¹² Jonah i riwa, “Ona tawaneu au boga ma ive ina raumairiei. Aramane da tau au kauei wei ivena i vomairi.”

¹³ Wate waga ravai i lare-guratana da waga ita ġairei au gera, wate eġa tagotagogina, kojikojira i voguratei. ¹⁴ Anina ma tau anapui i tou Jonah ana God awarina i pa, “Oo BADA! eġa ma voterelai da wei ravana ana ġo’apoe aubaina, ana i’raġe, ma eġa tarana wavuna ana avarai!”

¹⁵ Ma Jonah i vojijini ma i tawana-opune i au boga ma maratagogi kojikojira i wanatuini ma daumora i matave. ¹⁶ Ma ravai i rovoana-kauei da pulo i apui BADA awarina ma i parivainuaġani da tauna ina vivirei.

¹⁷ Wate BADA iana ġaeġaena i paritawanei da Jonah i lawani. Ma Jonah iana au manawana i mae aupom ma waguvara tonuġa.

2

Jonah ana pari

¹ Jonah iana au manawana ma i raupari BADA, ana God awarina. ² I pa,

“Au nuabola au orana a tou BADA awarina,
ma i paribeleu.

Irairāgei, ai au dobu
ma agu a gararei

ma au tou u nonori.

³ Au gabinou u tawana ġaireu,
boga au gabaura dewadewana.

Boga i kwaviviroiu.

Rabamam ġaeġaei i viaimonumonui.

⁴ Oo BADA! A notai da tau u tereopuneu,
ma a notai da eġa melanai am tempol vivireina ana inana-melei.”

⁵ “Boga i puruiu
lavutui i tupo
ma aragama kolau i pani.

⁶ A monu ġaira ola au kare dewadewana,
a vipanipani nai au dobuna,
dobuna metaetana guduguduna maemaena.

Wate tam BADA au God, u vilawaniu.
Lawalawaiu gabinouei u sinaepaiu,

⁷ Malana a vaia au lawana i opuopu,
ma BADA a raupari awarim,
am au tempol, ma u nonoriu.

⁸ Taii kokoitau labalababa e viviborumei,
am nuavaina mamae-nonoana i geduaiei.

⁹ Wate tau ana welem, ana voepaepaim
ma au pulo ana apui awarim.
Au parivainuāġa awarim ana kauēi
lawana maemae nonoana BADEI e nenei.”

¹⁰ Ma BADA iana i egari da Jonah i medana-tawanei au gera.

3

Jonah i nae au Niniveh

¹ Ma BADA i babani me Jonah awarina, ² I pa, “Ma nae taon ġaeġaena vinu-
alaulaunana Niniveh ma au riwa a vereverem ma pariverēi.”

³ Jonah, BADA riwana i voteletelei ma i nae au Niniveh. Niniveh lamna taon
ġaeġae otana ma aupom tonuġa i vaia da i verautuini. ⁴ Jonah i vikarei nai au
taona ma aupom tagogi i babara ma i jima i pa, “Aupom 40 ina kwa ma Niniveh
ina pupu.” ⁵ Mai Niniveh BADA riwana i vitumaġane i ma i vioga da anatapui
magurina da aburuoina i vianina tagogi da ina uji ma uji garana i oteni da
ina vimataira.

⁶ Maranai Niniveh ana gulau wei riwana i nonori, tauna ana anikiala i opu-
tawanei ma ana gulau garana i ġiġi. Uji garana i oteni ma au lapukare i kiala.

⁷ Ma mai Niniveh awarii wei vinolanolana bagibagina i paritawanei tauna au
wavanei. Wenanare i riwa:

Eġa rava bo bulumakau bo sipu, aiwai ina ani bo ina umai. ⁸ Ma ġamoġamo ma rava uji garana ina oteni ma ina raupari guratana BADA awarina. Ma kaua apoapoe ma ġoaġai ina geduaiei. ⁹ Aiai i aramanei? Mepa da God nuanuana ina amviravira ma nuavainei ana meji ina vojijini da eġa ina pupunita.

¹⁰ Maranai God inanai aiwai i kaukauei ma menanare ai kua apoapoe i geduaiei, Tauna nuanuana i virai ma eġa ita pupuni.

4

Jonah ana ġaiawa ma BADA ana nuavaina

¹ Wate Jonah wei ogana eġa ita ġoei ma amlona i ġaiġai kua. ² ✧ Ma i raupari BADA awarina, i pa, “BADA a notai da amapo nanare ita tupua muriai da au melagai ata opu-tawanei. A ramanei da tam God raunuapoapoe ma ivia-iaim, eġa laġilaġina amlom ita voġaiġai ma am nuavaina maemae-nonoana. Tam eġa am ġoana da ġo’apoapoe ravai ma pupuni wate ma tere-kauei. Lamna aubaina a ruba nae au Tarshish. ³ ✧ Ma marina BADA, au lawana ma vaitawanei, i ai da ata iraġe ma avena ata mae!”

⁴ Wate BADA i paribelei, i pa, “Tam aiwai e ġaiġaiawei?”

⁵ Jonah i opu melagai au metaetana, au maramatanei. Kampa ġou i voepai ma au gabaurina i kiala ma i vipaipai da BADA aiwai ita kauei nai taona awarina. ⁶ Ma BADA ġoroġorova i vigogoi da i tuaġeta Jonah au tepana da ana ġou. Ma Jonah wei i vinuaiaina-kauei.

⁷ Wate ubaubana boiboġi aupom ġela, BADA motamota i paritawanei da ġoroġorovana i ani da i’raġe. ⁸ Maranai madeġa i gogo, God ive maramatanei i paritawaneiai. Ma madeġa Jonah kolana i rarani da i ġokokokara. I ġoei da ita iraġe ma i riwa, “Iraġe i aii, eġa me lawana.”

⁹ Wate God Jonah i paridadanei, “Am nola aiwai da amlom i ġaiġai kua wei ġoroġorovana awarina?”

Jonah i paribelei, “Amlloi i ġaiġai kua da a ġoei ana i’raġe.”

¹⁰ BADA i riwa, “Wei ġoroġorovana u vivinuabolei lamna eġa tam uta kauei bo uta paini. Tauna waguvarai i gogo ma waguvarai i’raġe. ¹¹ Wate nai taon ġaeġaena Niniveh ma ana patara 120,000, tau i gimtona taumaenina ma ai ġamoġamo maġamaġau. Wei taona a vinuabolei ta pa?”

Peroveta Micah ana buka

Pariverena

Wei bukana, Micah mai Israel e ririwei da God tau i awari amlona i ġaiġai. Tauna amlona i ġaiġai aubaina eġa ita votelatelei. Lamna aubaina ai ġavia ina voterei da ina viġaviei.

Wate nanare BADA ana parivainuaġana i jimej. BADA i parivainuana da au damona ana rava ina vilawani.

5

Gulau meiei ina nei

¹ Sorodia ona vomairi! Ona vokaukaua!

Ġavia Jerusalem i matave kwaipipini.

Israel ana gulau ina kwapui, jiġonei navanavana ina kwapui.

² Tam, Bethlehem Ephrathah,

melaġai aburu oina dam Judah au orai.

Wate awarimiei, Israel ai gulau ina opu.

Tauna wariġana,

au karena da marina.

³ BADA mai Israel i voterei ai ġavia au urai,

da wavine marina au manawa, tevera orotona ina ġuni.

Ma ai rava ġelau i tuvai-opunei,

ina nememei ai au gana au Israel.

⁴ Tauna BADA ana rewapanei, ina mairi ma ana sipu ina raveni, ana vinualaulaunei ma BADA wavana ġaeġaenei.

Rava anatapui au dobu, Tauna ina vivirana-kauei ma lamna aubaina tau i kampa ina mae-kaua.

Peroveta Zechariah ana buka

Pariverena

Mai Jew ai ġavia i nei ma tau i pupuna-naiei au Babilon. Ma madeġa 70 au murina Babilon ai gulau mai Jew i voterei da i naeme au Israel tempol voamelana aubaina. Zechariah maiteni i nae. BADA Zechariah i riwei da mai Israel wenanare ina pariverei, “Ona mae-taviremi awariu ma ana maetavireu awarimi.”

Zechariah turana peroveta Haggai maiteni i nola tagogi nai au marana.

9

Zion ana gulau e nenei

⁹ BADA i riwa, “Ona morelana Zion

Ona logoimi Jerusalem,

ona inana! Ami gulau e nenei awarim.

Orana Jijimanina ma ana ġavia i vovaiubai.

Ana volaġotana donkey e gerugerui,

donkey ġaubona i gerui.

¹⁰ Dam Ephraim awarii Chariot ina vaitawanei,

ma Jerusalem awari ġavia horse ina vaitawanei.

Ma viġavia ana pidu ina gai.

Tauna rom ina neiai.

Ma ana vibada boga i taġoni da au boga ġela,

au waira Euphrates da dobu au ġia dewadewana.”

12

Tauna i tonatonai ana mogu.

¹⁰ Tau-Bada, David ana epaepaia ma mai Jerusalem awarii, raunuapoapoe ma rupena aruana ana iwagi. Tau i ina taepai ma i tonatonaiu ina inana, ma ina touei ma ina moguei me rava natuna tagotago i'raġe; me natuevouna ina irairaġe. ¹¹ Nai marana, tou ma tarakwatu au Jerusalem ina rata kua me au Hadad-Rimmon au wapuna, au Meggido marana i gulau Josiah i viraġeni.

13

¹ BADA Virewapana Kaukauana i riwa i pa, “Mara ina ġetai marana i vuvura ina votawanei au Jerusalem. David ana epaepaia ma mai Jerusalem anatapu i ina nei ma ai ġo'apoapoe ma ai mira ina oġa-tawanei.”

Mark Riwana Aiaina, Mark i girugirumia

Pariverena

Wei lamna God Natuna Iesu Keriso Messiah Riwana Aiaina karena. Rava wei bukana i girumi, wavana eġa ita riweta. Wate tauviararamana e ririwa da Mark i girumi. Mark, lamna eġa Apasol, wate tauviararamana maġamaġau i notai da tauna, Peter maiteni au Rome i mae. Ma Peter, Iesu ana kaua ma ana viararamana maġamaġau Mark i riwei. Anina ma Mark wei riwana i girumi da tauvitumaġana au Rome ita aramanei, Iesu aiwai i kauei.

Riwa karena i girugirumia e vivieġeta da wei lamna Iesu Keriso Messiah God Natuna Riwana Aiaina. Aubaina, wei au bukana ta inainai Iesu awarina rewapana da kaua maġamaġau ita kauei. Wei kauai tana inainai maranai: e viviararamana; ma arua-apoapoei e viviaġaġana-opunei; ma rava doridoriai e vivilawani; ma ġo'apoapoe e notanota tawanei. Mark, Iesu ana nola ma ana kaua i girumi ma eġa ana viararamana ita giruma-guratei. Mark i vieġeta menanare Iesu au korosi i raġe da rava anatapui ita vilawanai ma God menanare, Iesu iraġalei i vovaimairini.

*John Taubabataito, Iesu ana aninae i vovokaukauei
(Matthew 3:1-12; Luke 3:1-18; John 1:19-28)*

1 Wei lamna Iesu Keriso Messiah God natuna Riwana Aiaina karena.

2 Wariaġa peroveta Isaiah i girugirumia nanare:

*“Ona rautaniġana! Au peroveta au naom ana paritawanei
da am aninae ina vovokaukauei.”*

(Malakai 3:1)

3 ☆ *“Peroveta au mutulua e vivigoreġore:*

*“Taumi BADA ana aninae ona vovokaukauei,
ana eta ona vovai-jijimani!”*

(Isaiah 40:3)

4 Ma taupariverena John i nei au mutulua da rava i bababataitoi ma God riwana i jimejime i pa, “Ami ġo'apoapoe ona voterei, ma ona mae-taviremi God awarina ma ami ġo'apoapoe ina nota-tawanei ma ana babataitoimi.”⁵ Ma rava anatapui Judea au p̄aratana ma au Jerusalem i nae da John ita rautaniġanei. Maranai ai ġo'apoapoe i rupeni, John, tau i babataitoi au waira Jordan.

6 Ma John, kamel aparana metametanana i oteoteni ma ana tairoro ġamoġamo opina. Ana lam kapau ma manigewa.⁷ Ma tauna, rava i ririwei i pa, “Rava au m̄uriu e nenei i ġetelara, eġa me tau. Eġa tagotagogiu da ana ae uma ġuravana ana rupeni.”⁸ Tau wairei a babataitoimi, wate tauna, Arua Vivivireinei ina babataitoimi.”

*John, Iesu i babataitoi
(Matthew 3:13-17; Luke 3:21-22)*

9 Lamna maranaina Iesu, Nasaret, Galili i netawanei ma i nei ma John au waira Jordan, tauna i babataitoi.¹⁰ Ma maranai Iesu wairei i ġeġetai, i 'nana da mara i wanatawanei ma Arua Vivivireina me gabubu i ġairai.¹¹ ☆ Ma God ponana marei i opu ma i riwa i pa, “Tam, tau natu au nuavaina ma u vinuaiainiu.”

*Satan, Iesu i raelari**(Matthew 4:1-11; Luke 4:1-13)*

¹² Ma lamna au murina God Aruana Vivivireina Iesu i paritawanana-opunei au mutulua. ¹³ Ma au pom 40 au mutulua i mae. Ma Satan, tauna i raelari. Gamoꝰamo ꞑaiꞑaiawai nai au dobuna i mamae ma God ana anela marei tauna i paini.

*Iesu, lebalebagaꞑai ruaꝰa ma ruaꝰa i raukwatuei**(Matthew 4:12-22)*

¹⁴ Ma gulau Herod, John i pani. Ma muriai Iesu i nae au Galili da rava awarii God Riwana Aiaina i jime. ¹⁵ Ma Iesu i ririwa i pa, “God ana mara vinevinena i ꝑetai. God ana vibadana vouna rava aubai, lamna i turiai. Ami ꝑo’apoapoena ona rupeni ma ona mae-tavirem ma Riwana Aiaina ona vitumaꝰane!”

¹⁶ Mara tagogi Iesu Galili topana au gerana i bababara nae. Ma lebalebagaꞑai ruaꝰa i ’nanai, Simon* ma ana tevera Andrew au topa i rarauagida. ¹⁷ Iesu i riwei i pa, “Ona nei ma ona votaꝰotaꝰoiu. Ma me marina iana o tutuarui; nanare, ana viararamanini da rava ona tuarui da ina vitumaꝰane!”

¹⁸ Ma maratogogi ai agida i voterei ma Iesu i votaꝰotaꝰoi. ¹⁹ Ma tau i au gera i verau-nae. Iesu, Zebedi natunatuna i ’nanai, James ma John ai au waga ai agida wanawanarorona i vokaukauei. ²⁰ Ma maratogogi tau i ꝑorei, “Taumi ona nei ma ona votaꝰotaꝰoiu!” Ma tau amai Zebedi† ana taunola maiteni i voterei ma Iesu i votaꝰotaꝰoi.

*Iesu, arua-apoapoena rava awarina i viaꝰaꝰana-opunei**(Luke 4:31-37)*

²¹ Iesu ana Tauvotaꝰotaꝰo maiteni i nae au Capeniam.‡ Ma au Sabat, Iesu i rui au pari numana ma God Riwana Aiaina, viararamanana i vikarei.

²² Tauna ana rewapanana i viararamana eꝰa me mai Jew ai tarawatu babadai § nanare. Ma taurautaniꝰana ana viararamana i baiei.

²³ Maranai Iesu pari au numana i viararamana ma oroto arua-apoapoena orana i ruiruinia i garara ²⁴ i pa, “Iesu Nasaretei, aiwai e ꝑeꝑeꝑe awariai. Tam weka u nei da ma viapoapoeniai bo? Tau a aramanei tam aiai. Tam Vivivirem Godei!”

²⁵ Ma Iesu riwa bagibaginei i riwei i pa, “Ma genuana! Nai orotona ma opu-tawaneii!”

²⁶ Ma arua-apoapoena orotona i viaikwajiei ma ponana i rata, i garara ma i opu-tawanei. ²⁷ Ma rava anatapui i bana-kauei ma tau i ava i vitarapiri, “Wei aiwai? Wei viararamana vouna ma ana rewapana maiteni! Wei ravana awarina rewapana e mamae da arua-apoapoena i riwei ma tauna i vovoteletelei!”

²⁸ Iesu nolana, maratogogi i tua Galili au anatapuna.

*Iesu, rava maꝰamaꝰai i vilawani**(Matthew 8:14-17; Luke 4:38-41)*

²⁹ Nai marana pari numana i opu-tawanei ma ana tauvotaꝰotaꝰo maiteni i nae Simon ma Andrew ai au numa. James ma John maiteni i nae. ³⁰ Simon poiana wavinena ini ꝑuꝑurana ana au animatave i matamatave ma maranai Iesu i ꝑeta ma numa ravai, tauna i pariveri. ³¹ Tauna i nae wavine awarina, nimana i vojijini ma i voagui da i vomairi. Lamna maranaina, ini ꝑuꝑurana i voterei ma wavinena, tau i paini.

* **1:16:** Wavana ꝑelauna Peter † **1:20:** Eng. Zebedi. ‡ **1:21:** Eng. Capernaum. § **1:22:** Wariaꝰa BADA, ana Tarawatu Moses i verei mai Israel aubai.

³² Ma au bigai madeġa i neulai au murina, rava, ai rava doridoriai ma aiavoi arua-apoapoei au orai maemae, i neiai Iesu awarina.* ³³ Ma rava anatapai nai au melagaina i vitagogiei numa au metaetana. ³⁴ Ma Iesu, maġamaġau ai doria nununai i vilawani ma arua-apoapoe maġamaġau rava awari i viaġaġana-opunei. Ma arua-apoapoea i aramanei da tauna anina God natuna ma lamna aubaina tau i viġaei da i genuana.†

Iesu au Galili i raugugula nae
(*Luke 4:42-44*)

³⁵ Ubaubanai boiboġi, Iesu i vomairi ma numa i opu-tawane i ma i nae gabu au genugenuanana. Ma kampa, God awarina i raupari. ³⁶ Muriai, Simon ana rava maiteni i nae da i baiei. ³⁷ Ma maranai Iesu i nelaġai, ma i riwei i pa, “Rava anatapai e baibaiei.”

³⁸ Iesu i paribelei i pa, “Tana nae taon ġelau i au ġereġere, ma kampa maiteni God Riwana Aiaina ana raugugulei. Tau wei lamna aubaina a nei.” ³⁹ Ma Galili au anatapuna i naeni ma pari au numai i raraugugula ma arua-apoapoei i viopuni.

Iesu, oroto opi doriana i vilawani
(*Matthew 8:1-4; Luke 5:12-16*)

⁴⁰ Anina ma rava awarina opi doriana, i nei Iesu awarina ma au naona i peu ma i raudune ma agu i vibagei i pa, “Mepa da ma ġoei, anina da ma viaiainiu.‡”

⁴¹ Ma Iesu nuabola orana i oai ma urana i viloloi da i vodadani ma i riwa i pa, “Anina a ġoeġoei, ma aiii!” ⁴² Ma maratogogi opi-doriana, oroto i voterei ma tauna i aii me. ⁴³ Anina ma Iesu i riwana-guratei i pa, ⁴⁴ “Tam ma nae! Aiwai i tuputupua awarim, eġa rava ma vieġei! Ma jijimanina ma nae pirisi pulo tau apuna awarina ma vietataiana-melem ma viaiaina pulona Moses i ririweia ma kaui da ina vimataira tau awari! Pirisi pulo tauapuina ana vianina ina verei da tam u lawana.”

⁴⁵ Wate orotona i nae ma aiwai awarina i tuputupua lamna melagai au anatapuna i babaniana-naiei. Ma lamna aubaina Iesu melagai anatapai i vorei ma mepa eġa rava ita mamaelana kampa i nae. Wate rava mepa maemaei i nei Iesu awarina.

2

Iesu, oroto gwaġagwaġana i vilawani
(*Matthew 9:1-8; Luke 5:17-26*)

¹ Iesu ana tauvotaġotaġo maiteni i wanavira-melei au Capeniam. Ma au pom ruaġa au murina, rava nolana i nonori da tauna i nememei au melagai. ² Ma rava maġamaġau i vitagogiei au numa. Patara i rata guratana da numa i oai ma metaeta maiteni i mae-potai. Iesu, God riwana i raraugugulei. ³ Nelara ruaġa ma ruaġa, oroto gwaġagwaġana rasirasiei i avarai da i neiai Iesu awarina. ⁴ Rava i maġa guratana ma eġa tagotagogina da ita neiai Iesu awarina, lamna

* **1:32:** Madeġa ina neulai au murina au murina lauvitau ana mara damona. Mai Jew ai lauvitau ana mara au Friday madeġa e neneulai au murina e vivikarei da Saturday madeġa e neneulai au murina e vorovorovei. † **1:34:** Iesu i aramanei, mepa da ita kaui da arua-apoapoei ita riwa da tauna Keriso; lamna rava tauna ita egari da sorodia ita vibadei ma ta viġavia, me tau i vivinua-notenotei nanare. Jhn 6:15 ma inana. ‡ **1:40:** Mai Jew ai Tarawatu e ririwa da rava lepeleperai, tau mirimirai me dobu ġela ravai -Jentail. Mai Jew amapo nai ravai eġa ina vodadani. Rava mirimirai eġa maiteni ina vitaparoro bo au melagai ina mae. Lamna aubaina mepa da rava mirimirana i lawana, tauna ina ai-me, God tauna ina vaimelei ma rava maiteni ina mae ma ina taparoro.

aubaina da tetelei i amgāena da au poewa ma gavogavo i bauni ma kampa gwaḡagwaḡana ana rasirasina i tere-ḡairei Iesu au naona. ⁵ Ma Iesu, nai ravai i 'nanai da ai vitumaḡana i rata, lamna aubaina gwaḡagwaḡana i riwei i pa, "Natu, am ḡo'apoapoei, a nota-tawanei."

⁶ Anina mai Jew ai tarawatu babadai ḡelau kampa i kiakiala, au orai i vinua-notanota i pa, ⁷ "God ainelana ḡo'apoapoei e notanota tawanei. Aiwai aubaina nei ravana nanare e bababani? Tauna, God e vivijiboḡi ma e ririwa da tauna, God nanare."

⁸ Maratagogi, Iesu Aruanei ai nota i vaia ma i riwei i pa, "Aiwai aubaina wei kauai o vivinua-notenotei? ⁹ Metauna i telatela: ḡwaḡagwaḡana ata riwei, 'Am ḡo'apoapoe a nota-tawanei.' Bo ata riwei, 'Ma vomairi, am animatave ma vaia ma ma babara?' ¹⁰ A ḡoei da taumi ona aramanei da Rava Natuna au dobu ana rewapana e mamae da rava ai ḡo'apoapoe ina nota-tawanei ma ina vilawani." Ma gwaḡagwaḡana i riwei i pa ¹¹ "A riwem, ma vomairi, am animatave ma vaia ma ma nae au numa!"

¹² Orotona i vomairi ma maratagogi aravi i vaia ma i babara nae. Ma patara i rarausiga, i bana-kauei ma God i voepaepai ma i ririwa, "Tauai eḡa melanai kaua wenanare ata inanai!"

Iesu, Levi i kwatuei
(*Matthew 9:9-13; Luke 5:27-32*)

¹³ Iesu, Capeniam i voterei ma Galili topana au gerana i bababara ana tauvotaḡotaḡo maiteni. Ma patara i nei awarina ma tauna God riwana viararamanana i vikarei. ¹⁴ Ma i verau-nae aburuna ma Apius* natuna Levi i 'nanai, ana bagibagi au gabuna i kiakiala ma tax i tamitami Rome gabemanina aubaina. Iesu i riwei i pa, "Ma votaḡotaḡoiu!" Levi i vomairi ma i votaḡotaḡoi.

¹⁵ Tax tautami ma ḡo'apoapoei ravai maḡamaḡau, Iesu ma ana tauvotaḡotaḡo i votaḡotaḡoi. Ma anatapu, Levi ana au numa i kiala gogona ma i amam.† ¹⁶ Tarawatu Babadai ḡelau lamna Pharisi, ma tau i 'nanai da Iesu tax tautami ma ḡo'apoapoei ravai maiteni i amam. Anina ma Iesu ana tauvotaḡotaḡo i riwei i pa, "Aiwai aubaina Iesu tax tautami ma ḡo'apoapoei ravai maiteni e amam?"

¹⁷ Ma maranai Iesu wei riwana i nononori ma tau i riwei i pa, "Rava lawalawai, doketa eḡa ita ḡoeḡoei ma rava doridoriai, doketa e ḡoeḡoei. Tau a nei ḡo'apoapoei ravai aubai ma eḡa rava jijimani aubai."

Uji vitaraviravirana
(*Matthew 9:14-17; Luke 5:33-39*)

¹⁸ Mara tagogi, John Taubabaito ma Pharisi ai tauvotaḡotaḡo i ujiuji. Ma rava ḡelau i nei Iesu awarina ma i vitara-virevirei, "Aiwai aubaina John Taubabaito ma Pharisi ai tauvotaḡotaḡo e ujiuji, wate tam am tauvotaḡotaḡo eḡa ita ujiuji?"

¹⁹ Iesu i paribelei i pa, "Taumi o notanotai da tau aiavoi i raukwatuei tavine ana au torela, ina mae lota bo? Eḡateni kaua! Maranai tavitavine vou orotona, tau maiteni e mamae, tau eḡa ina uji. ²⁰ Wate mara ina ḡeta maranai tavitavine vou orotona ina vaitawanei ma lamna maranaina ana rava ina uji."

* **2:14:** Eng. Alphaeus. † **2:15:** Moses, BADA ana Tarawatu i girumi ma mai Pharisi wei Tarawatuna i votaḡotaḡo-kauei. Ma tau kaua waduboi amamai ḡariei maiteni i vovoteletelei ma i riwa da aiavoi Tarawatu eḡa ita vovoteletelei lamna tau rava apoapoei, ḡo'apoapoe tau kauai.

21 Ma riwa e mamae, “*Tau kaua vouna a nei ai eġa me taumi ami kaua wadubona nanare.* Eġa ai ai ravana, gara vounei gara au wadubona ina popotai da gavogavo ina vopotai. Mepa da nanare lamna, gara vouna gara wadubona ina roroi ma gavogavo ina rata. 22 Ma nanare, eġa ai ai *wine* vouna ina vaini da *wine* aniterenana wadubona ġamoġamo opinei au orana ina iwaġi. Mepa da ina kau ei, lamna *wine* vouna ina dodo ma *wine* aniterenana wadubona ina viairoroi ma *wine* ma aniterenana ina wanabauni‡. Wate *wine* vouna, anina da *wine* aniterenana vouna au orana ina iwaġi.”

Iesu ana riwa Sabat aubaina
(*Matthew 12:1-8; Luke 6:1-5*)

23 Mara tagogi au Sabat, Iesu ana tauvotaġotaġo maiteni, *witi* wapuna au orana i nena e. Ma ana tauvotaġotaġo *witi rovei* i vaini ma i amam. 24 Pharisi ġelau i 'nanai wei kauana i kaukauei ma tau Iesu i riwei, “Ma inana i, ata Tarawatu e mamae da Sabat, lamna lauvitau ana mara. Aiwai aubaina tau i vovobagibagi?”

25 Iesu i paribelei i pa, “Me peroveta i girugirimia nanare. David ana tauvotaġotaġo maiteni am-iraġe ma aiwai i kau ei? Taumi o iavi ma aiwai aubaina anona, eġa ota vinua-notenotei? 26 *Pirisi Geġetelarana Abiathar ana au mara, David, God ana au numa i rui ma palawa vovivirana i vaia ma ġelau ana tauvotaġotaġo maiteni i verei da i ani. Moses ana Tarawatu e mamae da pirisi ava palawana e aniani.”

27 Ma Iesu ana riwa au damona i riwa i pa, “God, Sabat i kau ei da rava voaguna aubaina ma eġa rava ita kau ei Sabat voaguna aubaina. 28 Ona vinuanotenotei, tau Rava Natuna, lamna aubaina tau anina Sabat badana.”

3

Iesu, Orotto urana irairaġena i vilawani
(*Matthew 12:9-14; Luke 6:6-11*)

1 Mara ġelauna au Sabat, Iesu i naeme au pari numana ma oroto urana irairaġena i 'nanai kampa i kiakiala. 2 Ma Pharisi ġelau i ġoei da aiwaiei Iesu ita viwavui. Lamna aubaina i 'nana-taġotaġoi da oroto ita vilawani bo eġa au Sabat. 3 Ma Iesu, orotona i riwei, “Ma nei, au naoi ma mairi!” 4 Ma Iesu, ravai i vitara-virevirei i pa, “Sabat au marana, metauna i aii: Aiaina tana kau ei bo apoapoena? Tana vilawana bo tana viraġena? Tarawatu aiwai i riwei?” Ma anatapui i genuana. 5 Iesu ana amloġaigaina i 'nana viravira ma i 'nanai da tau orai i bado ma nuanuana i bola-kau ei. Ma orotona i riwei i pa, “Uram ma viloloi!” Ma i viloloi ma i lawana. 6 Ma Pharisi maratagogi i opu ma i nae Herod ana rava awarii* ma ai oga i tarai da Iesu mena ita viraġenanei.

Iesu, Patara awari i babani

7-8 Iesu ana tauvotaġotaġo maiteni, tau i netawanei ma i nae au gera da ita vilavitau; ma mai Galili patara ġaeġaena i votaġotaġo. Rava maġamaġau, Iesu aiwai i kaukaueia nolana i nonori ma mai Galili ma Judea, Jerusalem taon, Idumea ma taon ġelau waira Jordan taon au babagelauna, Taia taon ma

‡ 2:22: Wine e tuputupua ma purupurona wine ana aniterenana ina viaisikasikai ✧ 2:26: 1Sa 21:1-6

* 3:6: Herod ana rava anona lamna mai Jew ai boru, tau aiavoi Rome gabemanina i vovoagui. Tau i bada wavalatona Herod Antipas. Mai Jew maġamaġau ma mai Pharisi maiteni, i notai da Herod ana rava tau i tauvibenabenam ai rava au oiena awarii.

Sidon taon,† tauri anapupi i nei Iesu awarina. 9-10 ✧ Iesu, rava maḡamaḡai i vilawani. Ma lamna aubaina doridoriai maḡamaḡai i viviamdudu ma i ḡoei da tauna ita vodadani. Lamna aubaina ana tauvotaḡotaḡo i riwei da waga i vokaukauei. 11 Maranai, arua-apoapoei rava au orai maemaiei, Iesu i 'nanai ma au naona i peu ma i garara, "Tam God Natuna!" 12 Ma Iesu tauri i viḡaei da avena ita vieḡa da tauna aiai.

*Iesu ana Apasol 12 i vinei
(Matthew 10:1-4; Luke 6:12-16)*

13 Anina ma Iesu i ḡae au ola ma ana ḡoanei nanare, rava i kwatuei da awarina i ḡei. 14 Tauna, nelara 12 i vinei da maiteni ita mae ma muriai ita paritawanei da ita raugugula. Ma i ḡorei Apasol. 15 Ma i vovai-virewapani da arua-apoapoei rava au orai ina viopuni.

16 Tauri i vinevinei 12 ai wava wenanare,
Simon i ḡoreḡoreia Peter‡

17 ma Zebedi§ natuna James ma ana tevera John i ḡorei Boaneges, anona waiparara natunatuna,

18 Andrew,
Philip,

Batolomeo,*

Matthew,
Thomas,

James, tauna Apius† natuna,

Thadeus,‡

Simon, tauna Ununurana,§

19 ma Judas Iskariotei; * tauna, Iesu tauvibenabenameina.

*Rava i riwa da arua-apoapoei Iesu e vivibadei.
(Matthew 12:22-32; Luke 11:14-23; 12:10)*

20 Ma Iesu ana tauvotaḡotaḡo maiteni i rui au numa. Ma patara i rieiai da tauri eḡa tagotagogina da ita am. 21 Ma Iesu ana numa ravai nolana i nonori ma i riwa i pa, "Tauna i bua." Lamna aubaina i nei da ina taravaini.

22 Tarawatu babadai ḡelaui Jerusalem i nei ma i riwa i pa, "Arua-apoapoei, ai bada Bielsibul,† Iesu au orana i rui ma lamnei arua-apoapoei e viviopuni."

23 Lamna aubaina Iesu, wei Babadai i ḡorei ma awanainei i pa, "Satan amapo Satan eḡa ina viopuni. 24 Mepa da dobu ravai ina viḡavia vivira, lamna dobuna ita mae ava. 25 Ma nanare dam ina viḡavia vivira, nai damna ita mae ava. 26 Ma Satan ita vomairi ma ita viḡavianamelei, amapo ita mae ava. 27 Taudanene amapo eḡa rava virewapanana ana au numa ina danene, eḡa da au naona ravana ḡuravei ina raḡini ma muriai ina danene. 28 Riwa kaua a ririwemi da God ami ḡo'apoapoei ma ami vijiboḡa anapupi ina notatawanei. 29 Wate aiai da Arua Vivivireina e vivijiboḡi, God, nai ravana ana ḡo'apoapoei eḡa melanai ina notatawanei ma ana ḡo'apoapoei ina mae-nonoa."

† 3:7-8: Eng. Tyre & Sidon. Wei ravana eḡa mai Jew. ✧ 3:9-10: Mrk 4:1 ‡ 3:16: Anona Gaima.

§ 3:17: Eng. Zebedi. * 3:18: Eng. Batolomeo. † 3:18: Eng. Alphaeus. ‡ 3:18: Wavana ḡelauna Judas - Luk 6:16 § 3:18: Anona lamna tauri mai Jew ma tauri Rome e vivigaviei. * 3:19: Iskariot, lamna Judas ana melagai wavana da auna lamna Iskariotei. † 3:22: Eng. Beelzebub. Anona lamna, nabugara ai bada.

³⁰ Iesu wenanare i babani, aubaina rava ġelau i ririwa, “Iesu au orana arua-apoapoei e mamae.”[‡]

Iesu ana dam oina

(Matthew 12:46-50; Luke 8:19-21)

³¹ Iesu alona ma varevareina i nei ma au doa i maimairi ma riwa i paritawane i Iesu awarina da ita nei. ³² Ma patara Iesu i kiala kwaviviroi, ma taupariverena i riwei i pa, “Alom ma novunovum ma varevareim au doa ma e goġoem.”

³³ Iesu i paribelei i pa, “Aiai alou ma aiavoi varevareiu?” ³⁴ Anina ma tau i kiakiala i nanai ma i riwa i pa, “Ona inana! Wei tau i alou ma varevareiu.”

³⁵ Aiai God ana ġoana e kaukauei, tauna alou ma novu ma vareiu.”

4

Doa tapuna ma tapuna ai awanaina

(Matthew 13:1-9; Luke 8:4-8)

¹ Iesu, ġiu i raukarena-melei Galili topana au adana. Ma patara i riei da ita rautaniġane i. Ma patara i rata, da tauna au waga i geru ma i kiala ma waga i dudui da i virauopu au topei ma patara au gera i mae.

² Ma kaula magamaġau awanainei igiu ma iviararamana i pa, ³ “Ona rautaniġana! Taupaewa, ana wapu i vokaukauei ma pei i ravi awawari.

⁴ Pei ġelau au eta i peu. Ma kiu i ġeta ma i ani. ⁵ Ma pei ġelau doa au ġaiġaimana i peu, doa au avavana. Ma lamna aubaina maratagogi i gogo. ⁶ Wate maranai madeġa i rarani, maratagogi i poi, anona warami eġa ita ġaira guratana doa au orana. ⁷ Pei ġelau, modu donadonai au poui i peu. Ma modu donadonai i gogo ma pei i gogogi i lavani, ma eġa ita ua. ⁸ Ma pei ġelau doa au aiaina i peu ma i gogo kaula ma i ua, ġelau 30, ġelau 60 ma ġelau 100.”

⁹ Ma Iesu i riwa i pa, “Mepa da tanigami e mamae, riwa ona nonori!”

Aiwai aubaina Iesu awanainei i babani

(Matthew 13:10-17; Luke 8:9-10)

¹⁰ Maranai Iesu ainelana i mamae ma ana tauvotaġotaġo 12 ma tau-rautaniġana ġelau i ġeta ma Iesu i vibaġai da awanaina anona ita riwei.

¹¹ Ma Iesu i paribelei i pa, “God ana vigulau ana kaula mamae govaġana; taumi i vieġemi ma rava au tano maema ei, tau aiwai anatapu awanainei e paripari-verei. ¹² Lamna ana kauei da wariaġa peroveta aiwai i girugirumia ina tupua:

“Tau i ina inana ma eġa ita inainanai.

Tau i rarautaniġana ma eġa ita araramanei;
ma lamna aubaina tau i eġa ita nenei God awarina
da ai ġo’apoapoe ita notatawanei.”

(Isaiah 6:9-10)

Doa tapuna ma tapuna anoi.

(Matthew 13:18-23; Luke 8:11-15)

¹³ Anina ma Iesu i riwei i pa, “Wei awanainei a babani ma anona eġa ota aramane i bo? Ma awanaina ġelau menanare ona aramanane i?

¹⁴ Taupaewa, God riwana, rava anatapu i paripari-verei. ¹⁵ Rava ġelau orai i baġibaġi me etanai. Riwa au tepana e raurau ei, wate maratagogi Satan e nenei da riwa rava au orai e vaivai-tawane i. ¹⁶ Ma rava ġelau orai me doa viġaiġaimana. Tau i, riwa i nonori ma maratagogi ana nuai ai riwa e vaivaia.

¹⁷ Wate warami eġa da eġa ita mamae guratana. Ma maranai nuabola bo

[‡] 3:30: Tarawatu tau girumi i parivaijijgei aubaina tau i ririwa da Arua Vivivireina ana nola lamna baravu da parauma. BADA eġa melanai ai ġo’apoapoei ina nota-tawane i.

rau-iviapoapoe e nenei tau awari, aubaina tau ai tumaġana God awarina e tereterei. Tau maratagogi e peupeu. ¹⁸ Rava ġelau orai me pei, modu donadonai au orai e gogogolana. Tau anina riwa e nononori. ¹⁹ Wate lawana ai nuabola ma mane ai nuavainana ma kaua ġelau ai au nuai ai e ruirui ma God riwana e lavalavani da eġa ita uaua. ²⁰ Ma ġelau, tau me pei doa au aiaina i peu. Tau, lamna anina riwa e nononori ma e vaivai-kauei ma e uaua: ġelau 30 ma ġelau 60 ma ġelau 100.”

²¹ Iesu i riwei i pa, “Rava, eġa rampa ita neinei ai da iriga au gabaurina ita tereterei bo vatara au gabaurina ta pa? Rampa ana au anikiala e tereterei ta pa? ²² Kaua mamae govaġai, anataputapui a vieġai ma kaua govagoġai nanarena ana vieġai. ²³ Mepa da taniġami e mamae, riwa ona nonori!”

²⁴ Iesu i riwa i pa, “Aiwai o nononoria ona rautaniġanana-kauei, ruva o ruveruveia, God nanare awarimi ina ruvai ma ġelauna ina tavipotoi. ²⁵ Lamna aubaina, mepa da riwau ona aramanei, tau ġelauna ma ġelauna ana veremi. Ma tau eġa ita aramanei, lamna aiwai aburuna i nononoria, ina vine-boai.”

Pei gogogona ana awanaina.

²⁶ Iesu e ririwa i pa, “God ana vigulau me rava, *witi* peina au doa ita ravi-awawari. ²⁷ Ma waguvara e matamatave ma maratome e vovomairi ma pei e gogogo ma e rarata. Wate aiwaiei e gogogo, tauna e vivinuanainei. ²⁸ Doa ana nuaina, pei me *witi* e vivigogoi ma e uaua. Au naona e raraupairei ma muriai e roverove ma muriai anona e magumagura au tapina. ²⁹ Maranai i magura, rava petona e raraukarei. Tuaruta marana i ġetai.”

Pei aburuoina ana awanaina

(Matthew 13:31-32, 34; Luke 13:18-19)

³⁰ Iesu i riwa i pa, “God ana vigulau aiwaiei ana parivai-patepatei bo aiwai awanainei ana pariveremi? ³¹ Wenanare, wei aina peina, lamna me gaga peina, pei aburuoina au dobu ma au doa i paewi. ³² Ma peina i gogo ma i rata da ai muomuoi i ġetawanei ma raġaraġai ġaeġae i terei ma au ġoui, kiu ai noġi ita voai.”

³³ Ma Iesu, awanaina maġamaġai, rava au matai i raugugulei da tau ai rautaniġana ana au ruva nanare. ³⁴ Awanainei, rava awari i ġiugiu, wate ana tauvotaġotaġo ava awari kaua anatapui i vivieġai.

Iesu, kojikojira i ravi-daumorai

(Matthew 8:23-27; Luke 8:22-25)

³⁵ Nai aubigaina Iesu, ana tauvotaġotaġo i riwei i pa, “Tana damana topa au baba ġelauna.” ³⁶ Anina ma tau patara i voterei. Ma anatapui Iesu, maiteni au waga i geru ma i damana, waga ġelau maiteni. ³⁷⁻³⁸ Iesu, waga au murina unutana i terei ma i raunuavuru. Ma kojikojira ġaeġaena i tupua ma rabama, waga au tepana i rauraei ma waira, waga i oaoai. Ma ana tauvotaġotaġo, tauna i ravi-dagudagui ma i riwei i pa, “Taugiu, nuanuam e bolabolai bo eġa da tana irage?”

³⁹ Ma tauna i vomairi ma ive i viġaei ma i riwei i pa, “Ma genuana!” Ma rabama i riwei i pa, “Ma mae-genuataul!” Ma ive i wanatuini ma daumora ġaeġaena i matave. ⁴⁰ Iesu ana tauvotaġotaġo i riwei i pa, “Aiwai aubaina o rovorovo? Taumi amapo da eġa ota vitumaġana!”

⁴¹ Ma tau i rovo kaua ma i riwa vivira i pa, “Wei aiai ravana da ive ma rabama tauna e vovoteletelei?”

5

Iesu, arua-apoapoena oroto awarina i viaḡaḡana-opunei.

(Matthew 8:28-34; Luke 8:26-39)

¹ Iesu ana tauvotaḡotaḡo maiteni Galili topana au baba ḡelauna i ḡeta, mai Gerasa ai au dobu. ² Wei au dobuna, arua-apoapoena oroto au orana maemaena. ³⁻⁵ Eḡa ai ai tagotagogina da ita vovaiubai. Mara maḡamaḡauna, aena ma urana seinei i pani. Wate wei i viaituini, ma eḡa tagotagogina da seinei ita pani. Marai ma waguvarai i nene-labalababa ma i garagarara ma ḡaimi tupuana i boribori-melei ma au kokoaga ma au ola i raunuma. ⁶ Maranai Iesu wagei i opuopu, arua-apoapoei orotona i ruiruinia, aueia Iesu i 'nanai ma kokoagei i ruba ma Iesu au naona i mae-peu ma i raudune. ⁷⁻⁸ Iesu, ravana i riwei i pa, "Arua-apoapoena, wei orotona ma opu-tawaneii!" Ma orotona, ponana au aidamo ma i garara, "Iesu, God Aidamo Telarana Natuna! Aiwai awariu e ḡoeḡoei? God wavanei a vivibaḡaim da eḡa ma kovoḡiul!" ⁹ Iesu, orotona i vitara-virevirei i pa, "Tam wavam ai ai?"

I paribelei i pa, "Tauai a maḡa, aubaina tau wavau lamna Ḡavia Patarana."

¹⁰ Ma arua-apoapoei, Iesu i vibaḡa-guratei da avena nai dobunei ita viopuna-tawanei.

¹¹ Ma poro boruna ḡaeḡaena au ḡereḡere ola au adana i labalaba. ¹² Ma arua-apoapoei, Iesu i vibaḡai, "Ma paritawanelai poro au orai ana rui." ¹³ Iesu i vianina. Ma arua-apoapoei, orotona i opu-tawanei ma poro au orai i rui. Poro boruna 2,000 nanare olei i ruba ḡaira da au topa i monu.

¹⁴ Ma poro taupainii i ruba nae au melagai ma au wapu; ma riwa i vibabarai. Ma rava i nei da ita inani aiwai i tupua. ¹⁵ Ma maranai i nae Iesu awarina, orotona au naona arua-apoapoei patarai au orana i mamae; tauna i kiakiala, gara i oteni ma ana nota jijimanina. Ma tau i rovo kaua. ¹⁶ Ma aiwai i tupua orotona ma poro awari, tau i 'nainanaia, rava i riwana-naiei.

¹⁷ Ma dobuna ravai, Iesu i vibaḡai da dobuna ita oputawaneii.

¹⁸ Iesu au waga i gerugeru ma orotona, Iesu i vibaḡai i pa, "Tau maiteni tana nae."

¹⁹ Iesu i viḡaei ma i riwei i pa, "Ma naeme am au dam. Ma BADA kaua aiwai ḡaeḡaena i kaukaueia ma ana iviaiai tam awarim, tau i ma pariverei."

²⁰ Ma anina orotona, Iesu i netawanei ma i nae au Dekapolis (melagai 10) da Iesu aiwai awarina i kaukaueia, rava i riwana-naiei. Ma tau i anatapui i nononoria i baiei.

Iesu, Jairus natuna wavinena ma wavine doridoriana i vilawani.

(Matthew 9:18-26; Luke 8:40-56)

²¹ Iesu wagei i damana me topa au baba ḡelauna. Maranai kampa i ḡeta ma topa au adana, ma patara i rieiai. ²² Pari numana badana wavana Jairus i nei weka ma maranai Iesu i 'nanai, tauna Iesu au aena i mae-peu ²³ ma i vibaḡa-guratei i pa, "Natu guguinina e irairaḡe. Ma nei ma uram au inina ma terei ma ina lawana."

²⁴ Anina ma Jairus, Iesu maiteni i nae ma patarana i mae gariḡuruvi ma i votaḡotaḡoi.

²⁵ Wavine tagogi kampa patarana au orana awarina tara-doriana i mae da madeḡa 12 i kwa. ²⁶ Ana mane anataputapuna, dokedoketa maḡamaḡai awari i tawanei ma eḡa tagotagogina ita vilawani ma amapo da ana doria i rarata. ²⁷⁻²⁸ Tauna, Iesu nolana ma ana babani i nonori ma au orana i vinua-notanota i pa, "Mepa da ana gara ava ana vodadani ma ana lawana." Ma tauna, Iesu murinei i nei ma ana gara i vodadani. ²⁹ Maratagogi, tara-doriana

i wanatuini ma malana i vaia da i lawana. ³⁰ Nai maranaina, Iesu malana i vaia da ana rewapana i opu-tawanei ma i mae-tavirei patara au poui ma i riwa i pa, “Aiai au gara i vodadani?”

³¹ Ana tauvotaḡotaḡo, tauna i riwei, “Ma inanai, patara i mae gariḡuruvim! Ma menanare da u riwa ‘Aiai i vodadani?’”

³² Wate Iesu i ‘nana viravira da ita inanai aiai i vodadani. ³³ Wavine i rovo kaua ma i sisisi, wate i aramanei aiwai awarina i tupua ma i nei ma Iesu au naona i raupari ma aiwai anatapui i vieḡei. ³⁴ Anina ma Iesu, wavine i riwei i pa, “Natu, am tumaḡana i vilawanim. Am doria i kwa, ana nuaubam ma nae!”

³⁵ Maranai i bababani ma rava ḡelau Jairus ana numei i nei ma i riwei i pa, “Natum ana mara i kwa. Eḡa Taugiu ma visina-viravirai.”

³⁶ Iesu ai babani i nonora-tawanei ma Jairus i riwei i pa, “Eḡa ma rovo, ma vitumaḡana!” ³⁷ Iesu, rava ḡelau i vigaei ma Peter ma James ma ana tevera John maiteni i nae. ³⁸ Ma Jairus ana au numa i ḡeta ma Iesu, patara i ‘nanai; i toutou ma i taratarakwatu ³⁹ ma i rui ma tau i riwei i pa, “Aiwai aubaina o taratara-kwatu ma o toutou? Tevera eḡa ita iraḡe, tauna e matamatave ota.”

⁴⁰ Ma tau, Iesu i kakei, ma lamna aubaina rava i viopuni au doa ma tevera alona ma amana ma tauna ana tauvotaḡotaḡo tonuḡa maiteni i rui mepa tevera i matamatave lana. ⁴¹ Iesu, tevera nimana i vaia ma i riwei i pa, “*Talitha kum!*” wei anona, “Kukuma, ma vomairi!”

⁴² Maratagogi i vomairi ma babara i vikarei (Tauna ana madeḡa 12). Ma tau i ba kaua. ⁴³ Iesu, tau i riwana-guratei da eḡa aiai ita vieḡei ma i riwa da ita viambagibagi.

6

Mai Nasaret, Iesu i parivirevirei

¹ Iesu ana tauvotaḡotaḡo maiteni nai dobuna i netawanei ma i naeme ana au melagai. ² Ma Sabat marana i ḡeta ma tauna giu i vikarei au pari numana. Ma rava maḡamaḡau i rie da i rautaniḡanei. Tau anatapui i baiei ma i vitara-viravira vivira i pa, “Wei tauna nuaulaula ma aramanana mepa i vaia?” Ma, “Kaua aiwaiei e kaukaei?” ³ Anina ma tau ava i babani vivira i pa, “Tauna tauvoa. Mary ana natuevou ma varevarena James, Joses, Judas ma Simon ma novunovui weka e mamae tauna bo?” Ma lamna aubaina mai Nasaret, Iesu i parivirevirei.

⁴ Iesu, tau i riwei i pa, “*Peroveta* dobu au ḡelau e vivivirei, wate ana au melagai, ana rava ma ana dam oina, eḡa ita vivivirei.”

⁵⁻⁶ Tauna i baiei da rava eḡa tauna ita vitumaḡanei. Ma eḡa tagotagogina da kaua vivirewapanai kampa ita kauai. Tauna urana, rava ruaḡa ota doridoriai au tepai i terei ma i vilawani. Ma muriai, melagai nununai au ḡereḡerei i viaramana nae.

Iesu ana Apasol i paritawane da ita viaramana

⁷ Ma Iesu, tau i 12 i ḡoreiai ma ruaruagei ava i paritawanana-opunei ma rewapana i verei da arua-apoapoei ina viaḡaḡana-opunei. ⁸ Ma riwa bagibaginei i riwei i pa, “Ami au vaḡai, eḡa aiwai ona vaia anina jiḡona ava; eḡa lam, eḡa autu bo mane au urami. ⁹ Ae uma ona oteni ma eḡa kwama ḡelauna ona vaia.” ¹⁰ Ma i riwei i pa, “Metauna melagaina o ruiuruana ma i vianinemi. Numa tagoginina au orana ona mae da melagaina ona oputawanei. ¹¹ ♣Mepa da au melagai o ḡeta ma rava eḡa ita vianinemi bo eḡa ita rautaniḡanemi. Nai

melagaina ona oputawanei ma aemi pokauna ona rauabuabui da ina aramanei da tau i ai wavu!”*

¹² Ma tau i opu ma rava awari i raugugula ma i riwei i pa, “Taumi ami ġo’apoapoei ona voterei ma ona mae-taviremi God awarina!” ¹³ Tau i, arua-apoapoei i viaġaġana-opunei. Ma rava doridoriai maġamaġau, olive oirana au kolai i buloi ma i vilawani.

John Taubabataito ana irage

¹⁴⁻¹⁶ *Iesu nolana i nae da rava anatapui i aramanei ma tauna i babaniei. Ma rava ġelau i ririwa i pa, “Tauna, kua vivirewapanai e kaukauei, aubaina tauna John Taubabataito iragelei i vomairi me.” Ġelau i ririwa i pa, “Tauna Elijah i nememei.” Ma ġelau i ririwa i pa, “Tauna peroveta wariagei nanare.” Ma gulau Herod,† nolana i nonori ma i riwa i pa, “Tau, John Taubabataito uana a borituini; marina i vomairi me.” ¹⁷⁻²⁰ John ana virarautua, lamna wenanare. Muriai da Iesu ana viararamana nolana ita vikarei. Herod, tuana Philip awana i kwalei ma i ravaġi. Wavinena wavana Herodias. Au murina John, Herod i riwana ġiriġiriei i pa, “Tarawatu e mamae da eġa vareim awana ma kwalei.” Ma Herod, riwa i paritawanei da John i pani da panipani au numana i terei. Herod ana nuaiaina, John i rarautaniġanei. Wate nuanuana i raġaraġa.

Ma Herodias, John awarina amlona i ġaigai ma virage nana i ġoei. Herod i aramanei da John, lamna rava jijimanina ma vivivireina ma i gagaloei. Herod, John i rovoei ma lamna aubaina wavinena eġa tagotagogina da aiwai ita kauai.

²¹ Ma wavine, gavogavo i ‘nanai, maranai Herod ana tupua marana i ġeta ma torela i vokaukauei. Ma gabemani babadai ġaeġaei ma sorodia ai babada ġaeġaei ma Galili babadai i raukwatuei. ²² Ma Herodias natuna wavinena i nei ma i ara. Herod ma tau maiteni i amam i vinuaiaini. Ma gulau, uguini i riwei i pa, “Aiwai u ġoeġoeia ma vibaġaiu ma ana verem!” ²³ Ma i parivainuaġani i pa, “God au matana a ririwem da aiwai u vivibaġeiu ana verem da au vigulau navanavana au paratana.”

²⁴ Ma tevera wavinena i opu ma alona i paridadanei i pa, “Aiwai ana vibaġei?” Ma i paribelei i pa, “John Taubabataito kolana.”

²⁵ Ma maratagogi i vipaparana ma gulau awarina i rui ma i vibaġai i pa, “A ġoeġoei da marina John Taubabataito kolana ma vereu au aboma!” ²⁶ Ma gulau nuanuana i bola-kauai. Wate parivainuaġana boiboġi i kauai tau i amam au matai. Ma lamna aubaina uguini, aiwai i vivibaġei anina i vianinei. ²⁷ Ma tauviraġena i paritawanei ma i riwei da John kolana ita neiai. Ma i nae panipani au numana ma John uana i borituini. ²⁸ Ma kolana au aboma i terei ma uguini i verei ma uguini, alona i verei. ²⁹ Ma John ana tauvotaġotaġo, nolana i nonori ma i nei ma taubeuna i vaia ma au kokoaga i vimataveni.

*Iesu, nelara 5,000 i viambagibagi
(Matthew 14:13-21; Luke 9:10-17; John 6:1-14)*

* **6:11:** Wariage mai Jew, tauvagei e nenememei au Israel. Tau i aei pokau e rarauabuabui maranai Israel ana au parata e ġeġeta, lamna taui orai e viaiaini. Ma Iesu ana tauvotaġotaġo wei i kauai da melagai ravai ina notai, “Tauvotaġotaġo e ririwa da tauta orata apoapoena me tauta eġa mai Jew.” ✠ **6:14-16:** Mrk 8:28 † **6:14-16:** Herod Antipas, Galili ana Wavalatona.

³⁰ *Apasoli* i ġeta memei ma aiwai anataputapuna i kaukauei ma i raraugugulei, Iesu i vieġei. ³¹ Lamna maranai, rava maġamaġaui i nenei ma i nenei da Iesu ana tauvotaġotaġo maiteni eġa gavogavo ita maemae da ita am. Lamna aubaina Iesu, tau i riwei i pa, “Taumi ava ona nei ma tana nae au mutulua da laumi ina tau mara aburuna.” ³² Ma anatapui wagei i nae au mutulua.

³³ Wate rava maġamaġaui i 'nanai i nenei ma i aramanei tau aiavoi. Ma melagai nununai anatapui geraei i ruba gogona da au dobuna i aiġeta. ³⁴ Maranai Iesu wagei i tuopu au gera ma patara ġaeġaena i 'nanai ma nuanuana i bola-kauei. Tau me sipu ma eġa ai tauvipaipai. Ma Riwana Aiaina viararamanai i raukarei. ³⁵ Ma au biga e tuturiai ma ana tauvotaġotaġo i nei awarina ma i riwei i pa, “Wei mutulua ma madeġa e arearere. ³⁶ Rava ma paritawanei da ina nae au melagai ma au wapu au ġereġere da ai lam ina ġimarai.”

³⁷ Wate Iesu i paribelei i pa, “Taumi ona viambagibagi!” Ma tau i paribelei i pa, “Mepa 200 *denarii*‡ tana vaia da wei patarana tana viambagibagi?” ³⁸ Ma Iesu i paridadanei i pa, “Palawa biaġa awarimi? Ona nae ma ona baiei!”

Maranai i nelaġai ma i riwa i pa, “Awariai, palawa five ma iana ruaġa.”

³⁹ Anina ma Iesu, patara i riwei i pa, “Boru nununai, gidagida au maji-majiġai ona kiala nae.” ⁴⁰ Ma tau ai au boru 50 da 100 nanare i kiala nae. ⁴¹ Ma Iesu, palawa five ma iana ruaġa i vaia ma i ġoutata au mara ma God i vieġalauai. Ma palawa i vogimagimai ma iana i ġutai da ana tauvotaġotaġo i verei ma tau, rava i verei. ⁴² Ma patara i am ma i am-iaua. ⁴³ Ma ana tauvotaġotaġo, lam am tereterenai i tuarui da poa muomuoi 12 i vioai. ⁴⁴ Nelara 5,000 i viambagibagi.

Iesu, waira au tepana i babara
(*Matthew 14:22-33; John 6:15-21*)

⁴⁵ Anina ma Iesu, ana tauvotaġotaġo i egari da ita aidamana au *Bethsaida*.§ Tau i waga i geru da i nenei ma tauna, patara i paritawanei. ⁴⁶ Patara i paritawanei ma tauna ava i ġae au ola da ita raupari. ⁴⁷ Ma waguvara ana tauvotaġotaġo au waga au topa ma Iesu au alala. ⁴⁸ Ma ana tauvotaġotaġo, lare i vovoguratei da ita ġota wate ive i viraumatamatani. Ma maratomtomo nanare, Iesu i nae awari. Tauna waira au tepana i bababara ma i ġoei da tau i ita tutelarei. ⁴⁹⁻⁵⁰ Ma maranai tau, Iesu i 'nanai topa au tepana i bababara ma i notai da tauna konaġa ma i rovo kaukaua ma i vigaragararei. Ma maratagogi Iesu i riwa i pa, “Tepami ina tora! Tau, eġa ona rovo!”

⁵¹ Ma au waga i geru ma ive i wanatuini ma tau i bana-kauei. ⁵² Avena da kava palawa awarina i kauei i 'nanai, wate ana rewapana eġa ita aramana-kauei. Tau i orai i bado ma i vinuanaina.

Iesu, rava doridoriai maġamaġaui au Genesaret i vilawani
(*Matthew 14:34-36*)

⁵³ Tau, topa i damani ma au *Genesaret* i ġota ma ai waga i raġini. ⁵⁴ Tau, waga i oputawanei ma rava, Iesu i 'nanai ma maratagogi i aramanei da tauna. ⁵⁵ Iesu nolana, *Galili* provins anatapui i naeni ma i nonori da tauna mepa i mamae. Ma kampa, doridoriai rasirasiei i vivaneiai. ⁵⁶ Iesu mepa i nenelana, melagai ġaeġaei ma muomuoi ma wapu mepa rava e mamae lana. Ma rava, ai rava doridoriai nai au melagaina i neiai au deba. Ma i vibaġa, da doridoriai,

‡ 6:37: 200 denarii. Denarius tagogi lamna taubagibagi ai maia au pom tagogo nolana aubaina.

§ 6:45: Eng. Bethsaida.

Iesu ana gara adana ava ita vodadani. Ma aiavoi Iesu ana gara i vodadani i lawana.

7

Amamami ai giu (Matthew 15:1-9)

1-4 Pharisi ma Jew anatahui, magumagura ai giu maḡamaḡai e notanotajjini. Tau, ai aniuma ma ai aniam anatahui e oḡaoḡai lamnei tau e viaiaina-melei God au matana. Ma maranai au maket da e nenei, urai ina oḡai ma ina am. Tau eḡa ina am da au naona urai ina oḡa kau e me ai magumagura ai giu nanare.

Maratagogi Pharisi ḡelau ma Tarawatu Babadai, Jerusalem ei i nei Iesu awarina da ita rautaniḡanei. Ma tau i 'nanai da Iesu ana tauvotaḡotaḡo ḡelau, urai eḡa ita oḡai ma i amam.

5 Ma tau, Iesu i vitara-virevirei i pa, "Aiwai aubaina am Tauvotaḡotaḡo magumagura ai giu, eḡa ita votaḡotaḡoi ma ana ura miramirai e amam?"

6 Ma Iesu i paribelei i pa, "Taumi morumorumi ma o vikaua-aiaina-melemi. God ana peroveta Isaiah i riwa kaua maranai i riwa, i pa:

'Wei ravai ipiriei e vovoepaepai,
wate nuanuai aueia.

7 Tau rava ai giu e viviararamani.

Lamna aubaina ai voepaepa anona eḡa.'

(Isaiah 29:13)

8 Taumi, God ana Tarawatu o teretere-tawanei ma ami giu o votaḡotaḡoi."

9 Ma i riwana-melei i pa, "Taumi o aramana kaua da God ana Tarawatu o gedugeduai e ma amamami ai giu o vovotaḡotaḡoi. 10 *God ana Tarawatu, Moses i girugirumia nanare: *Amam ma alom ma vivirei ma Aiai amana ma alona e enaena-boa, tauna ona viraḡeni.* 11 Wate taumi o viararamana da aiai awarina mane bo purapura, amana bo alona ita voagui ma ita riwei, 'Awaru e mamae da ata voaguim; wate lamna *Corban* - a tereriei pulo, God aubaina.' 12 Wei viararamanana, tau e vivigaei da amana ma alona ina voagui. 13 Ma wei taunei viararamana, rava awari o vividamani; ma God riwana o vivikwakwavi. Ma kaua maḡamaḡai ḡelau maiteni o kaukauei."

Metauna kauai, rava orai e vivimirai. (Matthew 15:10-20)

14 Iesu, patara i kwatuana-melei ma i riwei i pa, "Anatapumi ona rautaniḡaneu ma aiwai a ririwemi ona aramanei. 15-16 Aiwai au tanoei au orami e ruirui, lamna eḡa ita vivimiraimi ma aiwai da oramiei e opuopu, lamna e vivimiraimi God au matana."*

17 Anina Iesu, patara i voterei ma i rui au numa. Ma ana tauvotaḡotaḡo, i vitara-virevirei da wei awanainana anona aiwai. 18-19 Iesu i paribelei i pa, "Taumi maiteni eḡa ota aramanei bo? Kaua aiwai au tano, rava au orai e ruirui amapo eḡa ina vimirai. Anona lamna wei kauai, eḡa ita ruirui rava au nuapouna, wate au manawana da e opuopu." (Wei riwanei Iesu, lam anatahui i viaiaini).

20 Anina ma i riwa i pa, "Aiwai, rava oranei e opuopu; lamna, rava e vivimirai God au matana. 21 Anina rava nuanuane i vinuanotanota apoapoei e opuopu

* 7:10: Exo 20:12; Exo 21:17 * 7:15-16: Giruma ḡelau Mark uranei i girugirumia wei riwai wenanare e mamae, "Mepa da taniḡami e mamae, ona rautaniḡana."

me: viawawana labalababa, danene, viragēna, awadanene, ²² ambo, rau-iviapoapoe, moru, erawa, unura, terevaidega, mae-gaegae ma opa. ²³ Wei kauai apoapoei anatapui oranei e opuopu ma rava e vimiramirai.”

Jentail wavine, † Iesu i vitumaḡanei
(Matthew 15:21-28)

²⁴ Ma dobuna i voterei ma i nae Taia ana au parata. Ma i rui govaḡa au numa ma eḡa ita ḡoei da rava ita aramanei da tauna kampa, wate eḡa tagotagogina da ita raugovaḡa. ²⁵⁻²⁶ Wavine tagogi, Iesu nolana i nonori ma i nei awarina. Tauna eḡa Jew ma Jentail au Phonisia i tupua, Siria ana au parata. Arua-apoapoena, tauna natuna wavinena aburuna i ruini; ma alona i nae Iesu au naona i mae-peu ma ma i vibaḡai da arua-apoapoena ita viopuni. ²⁷ Iesu i aramanei da tauna Jentail; lamna aubaina i riwei i pa, “Eḡa ita ai da roaroa ai lam ata vaia da auou ata verei da au naona roaroa ina am-iaua.”[‡]

²⁸ Ma wavine i paribelei i pa, “Bada, aiwai u riwei; lamna riwa kaua. Wate auou, roaroa ai lam momoḡina, kepakepa au gabaurina e rauraua e aniani.”

²⁹ Ma Iesu wei i riwei i pa, “U paribelana kaua, aubaina ma nae au numa. Arua-apoapoena natum i opu-tawanei.”

³⁰ Ma wavine i naeme au numa. Natuna wavinena i ’nanai i matamatave, arua-apoapoena boibogī tevera i opu-tawanei.

Iesu, oroto taniḡa-potapotana ma mena birebirena i vilawani

³¹ Iesu Taia ma Sidon ana parata i netawanei ma au babaḡela Dekapolis i verautuini ma i nae au Galili topana. ³² Orotu taniḡana potapotana ma menana birebirena i neiāi Iesu awarina ma i vibaḡai da urana au inina ita terei da ita vilawani. ³³ Iesu, oroto i taravaina-opunei da tauī ava ma ura-gigina, oroto au taniḡana i terei ma ura-gigina ḡelauna i ovai ma menana i vodadani. ³⁴ Nuanuana i bolai ma i ḡoutata au mara; i lavutu tawanana ma oroto i riwei i pa, “*Ephatha!*” Wei anona, “Ma wanatawanei!” ³⁵ Maratagogi taniḡana i wanatawanei ma menana i vidagudagu ma i babani kaua. ³⁶ Ma Iesu, tauī i viḡaei da aiwai i tuputupua, avena rava ita vieḡei. Iesu, rava i viḡaei; wate tauī eḡa ita rautaniḡana ma riwa i vituai. ³⁷ Ma maranai ravai wei i nonori, tauī i bana-kauē ma i riwa i pa, “Aiwai anatapui i kauana-kauē. Tauna, rava taniḡa potapotai e vililawani da e rarautaniḡana ma menabirebirei e bababani.”

8

Iesu, rava 4,000 i viambagibagi
(Matthew 15:32-39)

¹ Nai maranai, patara ḡaeḡaena i riana-melei. Patara eḡa ai lam. Ma Iesu, ana tauvotaḡotaḡo i kwatuei da i nei ma i riwei i pa, ² “Au pom tonuḡa patara maiteni a mae ma ai lam eḡa ma a rau-nuapoapoelei. ³ Tauī ḡelauī, uamei i nei. Mepa da ana am-irāḡe ana paritawanei ai au numa, ma au etanai ina raumolaḡau.”

⁴ Ma ana tauvotaḡotaḡo i paribelei i pa, “Wei mutulua ma mepa lam tana vaia da wei patarana tana viambagibagi?”

⁵ Ma Iesu, tauī i paridadanei i pa, “Awarimi palawa biāḡa?”
Tauī i riwa i pa, “seven.”

⁶ Ma Iesu, patara i riwei da au doa i kiala. Ma palawa seven i vaia ma God i vieḡalauē ma i vogimagimai ma ana tauvotaḡotaḡo i verei da patara i verei.

† 7:23: Rava eḡa mai Jew. ‡ 7:27: Riwa roaroa wei au awanaina lamna mai Jew. Tauī e notanotai da tauī i ai guratana eḡa me rava ḡelauī. Lamna aubaina tauī dobu ḡelauī ravai e ḡoreḡorei auou.

7 Ma tau i awari, iana muomuoi ruağa ota. Iesu i vaia; God i viegualauei ma ana tauvotağotağō i verei da patara i verei. 8 Tau i anatapui i am da i am-iaua. Ma lam am tereterenai i tuarui da poa gaeğaei seven i vioai. 9 Rava 4,000 i viambagibagi. Ma muriai i paritawanei ai au numa.

Pharisi, God ana mataira i vibağei

(Matthew 15:39-16:4)

10 Maratagōgi, Iesu ana tauvotağotağō maiteni au waga i geru ma i nae Damanuta ana au parata. 11 Pharisi gelaui i nei ma vipariparigai i vikarei Iesu maiteni. Tau i goei da Iesu ita raudadani da mataira Godei ita viatataiei. 12 Iesu, Aruanei i lavutu tawanana ma i riwa i pa, “Wei kimta voui, aiwai aubaina mataira e goeğoei? A ririwana-kauemi, amapo mataira eğa ona inanai.”

Iesu, ana tauvotağotağō I parivainotai

13 Anina ma Iesu, patara i netawanei ma ana tauvotağotağō maiteni au waga i geru me ma i damana Topa Galili au baba gelauna. 14 Ma ana tauvotağotağō, nuanuai i vuru da ai palawa ita vaia ma palawa tagōgi ava au waga i mamae. 15 Iesu, tau i parivainotai i pa, “Pharisi ma Herod ai giu ma ai viaramamana morumoruna ona inana-kauemi! Lamna me yist.*”

16 Ma tau i babani vivira i pa, “Tauta eğa ata palawa aubaina da e ririweta.”

17 Ma Iesu i aramanei ma tau i riwei, “Aiwai aubaina o bababani da taumi awarimi eğa palawa? Taumi amapo da eğa ota aramana ma o vivinuanaina? Orami i bado bo? 18 *Matami e mamae ma eğa ota inainana. Ma taniğami e mamae ma eğa ota nonora. Ma o vinuanotanota bo eğa? 19 Maranai palawa five a vogimagimai rava 5,000 aubaii, lam am tereterenai o tami da poa biğa o vioai?”

Tau i paribelei, “Twelve.”

20 “Ma maranai palawa seven a vogimagimai rava 4,000 aubaii, lam am tereterenai o tami da poa gaeğaei biğa o vioai?”

Tau i paribelei, “Seven.” 21 Ma tau i riwei i pa, “Ma amapo da o vivinuanaina!”

Iesu, oroto mata apoapoena i vilawani au Bethsaida

22 Tau i nei au Bethsaida ma rava gelaui, oroto matana apoapoena i neiai Iesu awarina ma i vibağa-guratei da ita vodadani. 23 Ma Iesu, oroto matana apoapoena i raunimavoai ma melagaiei i taravaina-opunei. Ma kampa matana i ovi ma urana au matana i terei ma i paridadanei, “Aiwai e inainanai bo eğa?”

24 Ma i taepai ma i riwa, “Rava a inainanai ma tau me ai ita bababara.”

25 Iesu, urana i tere-melei oroto au matana. Ma matana i wanatawanei da aiwai anatapuna i 'nana-kauiei. 26 Iesu, tauna i paritawanei ana au numa ma i riwei, “Eğa ma nae au melagai! Wate jijimanina ma nae au numa.”

Peter i riwa da Iesu, tauna Keriso

(Matthew 16:13-16; Luke 9:18-20)

27 Iesu, ana tauvotağotağō maiteni i nae melagāi Caesarea Philipai au gereğerei. Maranai i nenae ma Iesu, tau i paridadanei, “Rava e ririwa; tau aiāi?”

28 *Ma tau i paribelei, “Gelaui e ririwa da tam, John Taubabataito. Ma gelaui Elijah. Ma gelaui e ririwa da peroveta wariagana tagōgi.”

* 8:15: Yist mai Jew awarii awanaini lamna aiwai da apoapoe, mira bova e vivitua bo e vivimagai. Weka Iesu mai Pharisee ma mai Herod ai lawana ma ai giu morumorui e babaniei, da eğa ina tua.

☆ 8:18: Mrk 4:12 ☆ 8:28: Mrk 6:14-15

²⁹ Ma Iesu, tau i paridadanei, “Wate taumi, mena o notanota-nei? O ririwa da tau aiai?”

Peter i paribelei, “Tam God ana *Messiah* - anona Keriso.”

³⁰ Iesu, tau i viḡaei da eḡa aiai ina riwei da tauna aiai.

Iesu ana iraḡe ma ana vomairi me i babaniei

(Matthew 16:21-23; Luke 9:21)

³¹ Ma Iesu i raukarei da ana tauvotaḡotaḡo i giuni i pa, “Rava Natuna ina vinuapoapoe kaa. Ma dogadogara, pirisi babadai ma tarawatu babadai, tauna ina pari-geduaiei ma ina virāḡeni. Ma au pom tonuḡa au murina ina vomairi me.” ³² Iesu jijimaninei wei kauai i bababaniei ma lamna aubaina Peter, tauna i taravaini au ririva ma enana i vikarei. ³³ Wate Iesu i mae-tavirei ma ana tauvotaḡotaḡo i 'nanai. Ma Peter i eni, i pa, “Satan ma nae au muriu! Tam am nota eḡa Godei ita nenei, eḡa da ravei.”

Iesu votaḡotaḡona anona

(Matthew 16:24-28; Luke 9:23-27)

³⁴ Ma Iesu, patara ma ana tauvotaḡotaḡo i raukwatuei ma i riwei, “Mepa da aiai ita votaḡotaḡoiu. Tauna ina boviaana-melei ma ana korosi ina avarai ma ina votaḡotaḡoiu.† ³⁵ Aiai ana lawana e tatajijini, ina vine-boai. Ma aiai da ana lawana i verenei; Tau ma Riwana Aiaina aubaina. Tauna ana lawana ina vaimelai. ³⁶ Ana aii bo anona aiwai, mepa da wei dobuna lawanana ma vigulauna ma vaipai ma am lawana maema-nonoana ma vine-boai. ³⁷ Wate aiwaiei am lawana ma gimara-melei. ³⁸ Mepa da aiai: tau ma au viararamana ina vinimalei; ma i mae-puputeu; ma ana ḡoanei kaa apoapoe ina kaukaui. Rava Natuna, tauna ina vinimalei maranaina ina nememei; Amana ana au boruma anela vivivirei maiteni.”

9

¹ Ma Iesu, wenanare i riwei, “Taumi a ririwana-kauemi; rava ḡelaumi weka o maimairi amapo eḡa ona iraḡe da God ana vigulau ona inanaia ana rewapanana ina nei.”

Iesu inanana i virai

(Matthew 17:1-13; Luke 9:28-36)

² Au pom six muriai, Iesu, Peter, James ma John i taravaini. Ma tau i ava i ḡae ola ḡaeḡaena au tepana. Ma kampa tau i au matai, Iesu inanana i virai.

³ Ana gara i arapora ma gamrina i vimata-kamokamota; eḡa me aiwai ḡelauna au dobu nanare. ⁴ Ma kampa au matai, Elijah ma Moses i eḡa. Ma Iesu maiteni i bababani. ⁵ Ma Peter Iesu i riwei, “Taufiararamana, i aii da tauta weka. Ma vianinelai da numakweta tonuḡa ana voai: tagogi tam aubaim, ḡelauna Moses ma ḡelauna Elijah aubaina!” ⁶ Ma tau i rovo kaa ma Peter eḡa ita aramanei da aiwai i latolatoni.

⁷ ✠ Anina ma apau i eḡa ma tau i purui. Ma pona apaei i opu ma i riwa i pa, “Wei Tau Natu au nuavainana, ona rautaniḡanei!” ⁸ Maratagogi tau i 'nana viravira ma eḡa aiai ḡelauna ita inanaia ma Iesu, tauna ava.

⁹ Ma maranai olei i ḡaiḡairai ma Iesu, tau i viḡaei da aiwai i 'nananaia eḡa ina vieḡai da au naona Rava Natuna iraḡelei ina vomairi me.

† **8:34:** Wei lamna awanaina. Anona lamna Iesu ana tauvotaḡotaḡo anina vinimala ma apoapoei ina nelaḡai aubaina tau, tauna i votaḡotaḡoi. Tauna eḡa ita ririwa da ana tauvotaḡotaḡo au korosi ina iraḡe me tauna. ✠ **9:7:** Mrk 1:11

10 Ma tau, wei riwana i voteletelei ma i babani vivira i pa, “Iraḡelei vomairi me anona aiwai?” 11 Ma tau, i vitara-virevirei i pa, “Aiwai aubaina, tarawatu babadai e ririwa da Elijah au naona ina nei?”*

12 Iesu i paribelei, “Riwa kaua Elijah au naona ina nei da aiwai anapapuna ina vokaukauei. Aubaina wariāḡa i girumi da Rava Natuna ina vinuapoapoe kaua ma ina inana-geduaiei. 13 Wate a ririwana-kauemi da Elijah anina i nei ma rava, ai ḡoanei tauna i rau-iviapoapoelei me i girugirumia nanare.”†

*Iesu, arua-apoapoena tevera orotona awarina i viopuni
(Matthew 17:14-21; Luke 9:37-43a)*

14 Iesu ana tauvotaḡotaḡo tonuḡa maiteni olei i ḡaira memei ai rava awari ma patara ḡaeḡaena, tau i gariḡuruvi. Ma Jew ai tarawatu babadai, tau maiteni i vivitarapiri. 15 Maranai patara, Iesu i 'nanai. Tau orai i auepai ma awarina i ruba ma i vieḡualaei. 16 Iesu, tau i vitara-virevirei, “Aiwai o vitarapiriei?”

17 Orototaḡoḡo patara au poui i paribelana, “Tauviararamana, arua-apoapoena natu orotona au orana e mamae ma i kauē da eḡa ita bababani, lamna aubaina a neiāi awarim. 18 Maranai ana doria e ururu-melei, lamna arua-apoapoena: tauna au doa e tawatawanei; gamona e vivipuropuro; ivona e utauta ḡiriḡiriei; ma inina e badobado. Am tauvotaḡotaḡo a vibaḡai da arua-apoapoena ita viopuni, wate eḡa tagotagoga da ita kauē.”

19 Ma Iesu i paribelei, “Oo mara aiwai ona vitumaḡana! Ta mae ḡaḡa ma ami vita ana 'vara ḡaḡalei? Tevera awariu ona neiāi!”

20 Ma tevera i neiāi Iesu awarina. Ma maranai arua-apoapoena, Iesu i 'nanai, maratagoga tevera i viaikwajiana-guratei da au doa i tonei ma i vitatauvira ma i vivipuropuro. 21 Iesu, tevera amana i vitara-virevirei, “Wei teverana ana doria mara aiwai i vikarei?”

I paribelei i pa, “Maranai aburunai. 22 Arua-apoapoena mara au anapapuna, tauna ai au araratana ma au waira e tawatawanei ma i ḡoei da ita viraḡeni. Mepa da tam tagotagoga; ma raunu'apoapoelelai ma ma voaḡuai!”

23 Iesu, tauna i riwei, “Menanare da u riwa, 'Mepa da tam tagotagoga? Aiāi ravana e vivitumaḡana, God anapapuna ina kauē tauna aubaina.”

24 Maratagoga tevera amana i garara, “A vitumaḡana, wate au tumaḡana eḡa ita rata ma ma voaḡuii da ina rata!”

25 Iesu i 'nana da patara irierieiai awarii ma lamna aubaina arua-apoapoena i egari i pa, “Tam arua taniḡa-potapotana ma gungum. Tau a egaegarim da tevera ma opu-tawanei. Ma eḡa melanai au orana ma rui me!”

26 Ma arua i garara ma tevera i viaikwajiana-guratei ma i opu-tawanei. Ma tevera inanana me taubeu. Ma rava maḡamaḡai kampa i riwa, “Tauna i raḡe!” 27 Ma Iesu, tauna urana i vojijini ma i sinaepai da i mairi.

28 Muriai Iesu, ana tauvotaḡotaḡo maiteni i rui au numa. Ma maranai tau aiava ma i paridadanei i pa, “Aiwai aubaina tau ai eḡa tagotagoga da arua-apoapoena ata viopuni?”

29 Iesu, i riwa, “Arua-apoapoei me wenanare, pari ainelana ina viopuni.”

*Iesu ana iraḡe i babaniana-melei
(Matthew 17:22-23; Luke 9:43b-45)*

* 9:11: Mai Jew i vitumaḡana da Elijah au naona ina nememei ma Keriso muriai ita nei. (Mal 3:1, 4:5-6). Ma tau eḡa ita notai da Elijah rau-iviapoapoe ina nelaḡai ana au nememei. † 9:13: Iesu lamna John Taubabataito i bababaniei da tauna Elijah (Mat 11:13-14, 17:10-13)

³⁰ Iesu, ana tauvotaḡotaḡo maiteni dobuna i netawanei ma Galili i verautuini. Iesu eḡa ita ḡoei da rava ita aramanei da tau i mepa. ³¹ Aubaina tauna, ana tauvotaḡotaḡo i viararamani i pa, “Tau i Rava Natuna ina amverenei rava ḡelau i au urai. Ma tau i ina virāḡeni. Wate au pom tonuḡa au murina ina vomairi me.”

³² Wate tau i eḡa ita aramanei tauna aiwai i bababaniei. Ma pari-dadanana i rovoei.

Tauvotaḡotaḡo i vitarapiri vivira da ai ai i ḡetelara
(Matthew 18:1-5; Luke 9:46-48)

³³ Iesu ana tauvotaḡotaḡo maiteni i ḡeta au Capeniam ma au numa i rui. Ma Iesu, tau i vitara-virevirei, “Au etanei aiwai o vitarapiriei?”

³⁴ Wate tau i genuana, aubaina au etanei tau i vitarapiri vivira da ai ai i ḡetelara. ³⁵ Iesu i kiala ma Apasol 12 i raukwatuei awarina ma i riwei i pa, “Ai ai e ḡoeḡoe da ina vibada. Tauna ina tereḡairana-melei ma ina vimuri dewadewa ma ina vitaunola rava aubai.”

³⁶ Ma Iesu, tevera i vaia ma au poui i vimairini. Ma urana au jiḡona i tere-taḡonei. Ma tau i riwei i pa, ³⁷ “Ai ai ravana; tau wavauei, tevera wenanare i rauḡorei. Lamna tau maiteni e rarauḡoreiu. Ma ai ai da tau e rarauḡoreiu. Lamna tau paritawaneu maiteni e rarauḡorei.”

Ai ai eḡa ata ḡavia, lamna turata
(Luke 9:49-50)

³⁸ Anina ma John, Iesu i riwei, “Tauviararamana! Tauai, oroto tagogi a inana; tam wavamei arua-apoapoena i viviopuni ma tauna eḡa turata. Lamna aubaina a viḡaei da eḡa ina kauana-melei.”

³⁹ Iesu i riwa, “Eḡa ona viḡaei! Eḡa ai ai au wavau kaua babai ina kauai ma muriai ina parivai-apoapoeniu. ⁴⁰ Ai ai ravana eḡa ata ḡavia; lamna turata. ⁴¹ Tau a ririwana-kauemi. Mepa da ai ai ravana, waira i veremi tau au wavau; aubaina taumi au Tauvotaḡotaḡo. Tau i ai maia eḡa ina vine-boai.”

Rauelara babanina
(Matthew 18:6-9; Luke 17:1-2)

⁴² Ai ai ravana i kauai da wei teverana ana tumaḡana Tau awariu i viapoapoeni da ḡo'apoapoe i kauai. Lamna i ai da ḡaima ḡaeḡaena ravana au uatabana ina duri ma au boga ina tawanei aubaina God, tauna ina kovoga-guratei. ⁴³⁻⁴⁴ Mepa da nimam i kauem da ḡo'apoapoe u kauai. Ma bori-tawanei! I aii da nimam tagogiava ma lawana mamae-nonoana ma vaia. Ma eḡa ma kauai da nimam ruaḡa ai ai ma ma nae ai au menamenana; mepa ai eḡa melanai ita bobo. ⁴⁵⁻⁴⁶ Mepa da aem i kauem da ḡo'apoapoeni u kauai. Ma bori-tawanei! I aii da sigesigem au lawana mamae-nonoana ma rui. Eḡa me aem ruaḡa ai ai ma ai au menamenana ina tawanem. ⁴⁷ Ma mepa da matam ina kauem da ḡo'apoapoeni u kauai. Ma vaitawanei! I aii da matam tagogi ma God ana vigulau ma rui. Eḡa me matam ruaḡa ma ai au menamenana ina tawanem; ⁴⁸ dobuna motamotana eḡa ita irairaḡe ma ai eḡa ita bobo.

⁴⁹ Au Tauvotaḡotaḡo anapatapui, ai araratanei ina bogai.

⁵⁰ “Nia i ai lam viaiainana aubaina. Ma mepa da i tomatoma, mena ma vidagiane. Nia au orami ina mae ma ona viturana vivira!”

☆ 9:35: Mrk 10:43-44 † 9:43-44: Wariaḡa nimaiei i giruma damanei tau i riwana tagogina me vs 48. § 9:45-46: Wariaḡa nimaiei i giruma damanei tau i riwana tagogina me vs 48.

10

Iesu, tavine vilamonana i babaniei

¹ Ma Iesu, dobuna i netawanei ma i nae Judea ana paratana. Ma Waira Jordan i damani da au baba ġelauna. Patara ġaēġaena i riana-melei. Ma Iesu i viararamana, me mara patapatana i kaukauei nanare.

² Ma Pharisi ġelau i ġoei da tauna ita waroi. Ma lamna aubaina i vitara-virevirei, “Tarawatu e mamae bo eġa da rava, awana maiteni ita vilamonei?”

³ Ma Iesu i paribelei, “Moses ana Tarawatu aiwai e ririwei?”

⁴ Ma tauri i riwa, “Moses ana Tarawatu e ririwa da oroto *vilamona pepana ina ġirumi ma awana ina verei. Ma tauri ina vilamonei.*”

⁵ Iesu i paribelei, “Taumi orami i bada. Au baina Moses wei Tarawatuna i terei. ⁶ *Wate ona notai da au karena, maranai God rava i kauei *ma tauna oroto ma wavine i kauei.* ⁷ **Ma lamna aubaina oroto amana ma alona ina netawanei* ⁸ *ma awana maiteni ina vitagogi* da tauri eġa ruaġa me au naona ma tupua tagogi. ⁹ God aiwai i vitagogiei, eġa aiwai ina vilamonei.”

¹⁰ Maranai tauri i naeme au numa, ma tauvotaġotaġo, Iesu i vitara-virevirei wei kauai aubaii. ¹¹ Iesu i paribelei, “Mepa da oroto, awana i voterei. Ma wavine ġelauna i ravaġi. Lamna tauna, awana awarina i rauviapoapoe. ¹² Ma nanarena mepa da wavine, awana i voterei ma oroto ġelauna i ravaġi. Lamna awana, awarina i rauviapoapoe.”

Iesu, roaroa i viaiaini

¹³ Rava ġelau, roaroa i neiai Iesu awarina da urana au tepai ita terei. Ma ana tauvotaġotaġo, ravai i viġaei. ¹⁴ Maranai Iesu wei kauai i 'nanai. Ma ana tauvotaġotaġo i eni ma i riwa, “Roaroa ona voterei da awariu ina nei. Ma eġa ona viġaei. Au baina God ana vigulau, lamna rava wenanare aubai me wei roaroai. ¹⁵ A ririwana-kauemi. Aiwei, God ana vigulau eġa ina vaia me tevera aburuna nanare. Tauna, eġa God ana au vigulau ina rui.” ¹⁶ Ma roaroa i taravaini ma i rapai, urana au tepai i terei, i raupari ma i viaiaini.

Purapura ravana

(Matthew 19:16-30; Luke 18:18-30)

¹⁷ Ma maranai Iesu i vomairi da i nena. Orotu i ruba ġeta ma au naona i raudune ma i riwa i pa, “Taugiu vinualaulaunam. Aiwei ana kauei da lawana maemae-nonoana ana vibuderiei?”

¹⁸ Ma Iesu i paribelei i pa, “Aiwei aubaina, tau u vikaua vinualaulauneu? God, tauna ava vinualaulaunana. ¹⁹ **Tam, God ana Tarawatu u aramanei, Eġa ma viragena! Eġa ma awadanene! Eġa ma danene! Eġa ma viwavu-moru! Eġa ma amkwalakwala! Amam ma Alom ma vivirei!*”

²⁰ Ma tauna i riwei, “Taugiu! Maranai tau aburueu da amadodo, wei tarawatui anatapui a voteletelei.”

²¹ Iesu, tauna i 'nanai ma i vinuavainei ma i riwei, “Kaua tagogi e mamae eġa uta kaukauei. Ma nae ma am purapura anatapuna ma ġimarei. Ma manena, rava molamolakai ma verei. Ma au mara God, tam ina vimaiem. Ma ma nei ma ma votaġotaġoi!”

²² Ma maranai oroto wei riwana i nonori. Naona i peu ma ana nuabolana i nae; aubaina tauna, purapura ravana.

²³ Iesu i 'nana viravira ma ana tauvotaġotaġo awari i riwa, “I piripiri kaua da purapura ravana, God ana au vigulau ina rui.”

24 **Tauvotaġotaġo** riwana i baiei maranai Iesu wenanare i babani. Ma Iesu i riwa me, “Natunatu! I piripiri kaua da purapura ravana,* God ana au vigulau ina rui. 25 I telatela kaua da ġamoġamo ġaēġaena wavana kamel, iġoma au gavogavona ina rui. Ma i piripiri guratana da purapura ravana, ana lawana God ina verei. Ma God, tauna ina vibadei.”

26 **Tau** i vinuanaina ma ai nota i kwa. Ma tau i ava i babani vivira i pa, “Mepa da nanare; amapo aiai lawana mamae-nonoana ina vaia?”†

27 Iesu awarii i nana ma i riwei, “Rava awarii wei kauai i piripiri. Wate eġa God awarina. God awarina aiwai anapuna i telatela kaua.”

28 **Ma Peter** i riwei, “Ma tauai menanare? Tauai ai purapura a voterei ma tam a votaġoim.”‡

29 Iesu i paribelana, “A ririwana-kauemi. Aiai da ana numa bo varevareina bo novunovuna bo alona bo amana bo natunatuna bo ana wapu ina voterei ma tau ina votaġotaġoim; tau ma Riwana Aiaina aubaina. 30 Tauna ana maia ina rata kaua wei au dobuna. Tauna ana maia ina viaitepatepani da ana numa, varevareina, novunovuna, alona, natunatuna ma ana wapu, anapui ina maġa. Rava ina rau-iviapoapoelem; aubaina tam, tau au Tauvotaġotaġo da mara au murina tauna lawana mamae-nonoana ina vaia. 31 Wate maġamaġau marina e vivinao; tau i ina vimuri. Ma maġamaġau da e vivimuri; ina vinoa.”

*Iesu ana iraġe babanina i vitonui
(Matthew 20:17-19; Luke 18:31-33)*

32 Iesu, ana tauvotaġotaġo maiteni i ġeġae au Jerusalem. Iesu, tau i au naoi i nena. Tauvotaġotaġo i baiei. Ma rava ġelau i muri i nenei i rovo kaua.§ Ma tau i 12 i rauġorei au ririva ma i raukarei da kaua amapo da awarina ina tupua; tau i vieġei 33 I pa, “Ona inana, tauta ta ġeġae au Jerusalem. Ma Rava Natuna ina verenei piri si babadai; ma tarawatu babadai awarii. Ma tau i ana iraġe ina vianinei. Ma Mai Jentail ina verei. 34 Ma tauna ina vijiboġi ma ina ovai ma ina kwapui ma ina virage ni. Au pom vitonuina ina vomairi me.”

*James ma John ai vibaġa
(Matthew 20:20-28)*

35 - **Zebedi** natunatuna James ma John i nei Iesu awarina ma i vibaġai i pa, “Tauviararamana! Tauai ai ġoana a vivibaġei uta kauai.”

36 Iesu i riwa i pa, “Aiwai o ġoēġoēi ana kauai aubaimi?”

37 **Tau** i paribelana, “Ma verelai da ana kiala, tagoġi au oiem ma ġelauna au kelakelaum am au vigulau.”

38 Iesu i paribelei, “**Taumi** eġa ota aramane i aiwai o vivibaġei! Iniviaru kelakana ana umai. **Taumi** tagotagogina da ona umai bo? Tagotagogina ona babataito me tau ina babataitoiu?***”

39 I paribelei, “**Tauai** tagotagogina!”

* **10:24:** Wei riwana buka ġelau awarii e mamae ma ġelau eġa purapura ravana. † **10:26:** Mai Jew i notai da rava vipurapurai lamna BADA ana verena ana nuavaina matairana, tau i e notai da BADA, rava vipurapurai eġa ina gagaloei, tauna ravai ġelau maiteni eġa ina gagaloei. ‡ **10:28:** Peter i ġoēi da ita aramane i da tauvotaġotaġo ai au iraġe maiana aiwai, ina vaia. § **10:32:** Iesu i ġeġae au Jerusalem ma rava maġamaġau i viġaviei ma lamna aubaina ana tauvotaġotaġo i baiei da tauna tepana i tora da weka i nena. Rava ġelau i votaġotaġo, tau i rovo kaua da aiwai awarina ina tupua maranai i ġeta au Jerusalem. * **10:38:** ...babataito me tau ina babataitoiu tau i iniviaru ma iraġe e bababanie, maranai Iesu au Gethsemani i raraupari muriai da ana iraġe tauna ana nuabolana kelaka i babanie (Mrk 14:36). Iesu, James ma John i riwei da nuabola ina nelaġai.

Iesu i riwei, “Iniviarā kelakana anina ona umai ma ona iraḡe me tau ana iraḡe. ⁴⁰ Wate tau au rewapana eḡa ita mamae da ana veremi da mepa ona kiala au oieu bo au kelakelau. God, rava i vinevinei; tau i ai gabu i vokaukauei.”

⁴¹ Maranai Tauvotaḡotaḡo 10 ḡelau, wei riwana i nonori. Tau James ma John awarii i ḡaiawa. ⁴² Ma Iesu, tau i anatapui i ḡorei da awarina ma i riwei, “O aramanei da jentail ai babada, dobu ḡela ravai jentail awarii e mamae-ḡaeḡae ma e rarau-ivipoapelei. Wate tau i ai babada ḡaeḡaei, ai rewapana i ḡetelera da ai rava e vibadebadei da ai ḡoana e kaukauei. ⁴³ ✠Wate au tauvotaḡotaḡo eḡa nanare. Eḡa da aiai i ḡoei da ina ḡetelara taumi au poumi; tauna anina da ina vitaunola. ⁴⁴ Aiai i ḡoei da ita vinoa. Tauna ina vitaunola rava anatapui aubai. ⁴⁵ Ma nanare Rava Natuna eḡa ita nei da tauna, tana nolei. Wate ita vitaunola rava aubai. Ma ana lawana ita verenei da rava maḡamaḡau i lawana ita gimara-melei.”†

Iesu, rava mata-potapotana Batimeus i vilawani
(*Luke 18:35-43*)

⁴⁶ Ma tau i ḡeta au Jeriko. Iesu, ana tauvotaḡotaḡo, patara ḡaeḡaena maiteni dobu na i opupu-tawanei. Ma oroto mata-potapotana, wavana Batimeias, Timaeus natuna au etanai i kiakiala ma i viamgigimana. ⁴⁷ Maranai i nonori da tauna, Iesu Nasaretei; garara i raukarei i pa, “Iesu, tam David natuna! Ma raunu’apoapeleu!”‡

⁴⁸ Rava maḡamaḡau, tauna i rai ma i riwei da ita genuana. Wate tauna, garara i voguratei, “David Natuna! Ma raunu’apoapeleu!”

⁴⁹ Iesu i tumairi ma i pa, “Ona ḡoreiai!”

Anina tau, mata-potapotana i ḡoreiai i pa, “Tepam ina tora ma ma vomairi! E ḡoreḡore!”

⁵⁰ Tauna, ana puru i tawanei ma i vomairi laḡilaḡina ma i nei Iesu awarina.

⁵¹ Iesu i paridadana i pa, “Aiwai u ḡoei ana kauai aubaim?”

Mata-potapotana i paribelei, “Tavuararamana! A ḡoei da ana inana me.”

⁵² Iesu i riwa, “Ma nae! Am tumaḡana i vilawanim.” Maratagogi tauna i ’nana me ma Iesu au eta i votaḡotaḡoi.

11

Iesu i rui au Jerusalem
(*Matthew 21:1-11; Luke 19:28-40; John 12:12-19*)

¹ Ma maranai Jerusalem i tuḡereḡerei ma i rui au Betphagi ma Bethani* au ola Olives. Ma ana tauvotaḡotaḡo ruaḡa i paritawanei, ² ma i riwei i pa, “Ona nae au melagai au naomi. Maranai o ruirui, kampa donki natuna ḡaubo, raḡiraḡitana ona nelaḡai. Tauna eḡa aiai ita geru-dadanei. Ona rupeni ma ona nei.† ³ Mepa da aiai ina paridadana, ‘Aiwai aubaina wei o kaukauei?’ Ona riwei, ‘BADA e ḡoeḡoei ma maratagogi ina paritawana-melei.’

✠ **10:43:** Mrk 9:35 † **10:45:** Iesu i vinuapoape me iraḡe aubaita me Isaiah i girugirumia nanare au Isa 52:13-53:12. ‡ **10:47:** Maranai oroto mata-potapotana Iesu i kwatuei David natuna ma mai Jew i aramanei Keriso - BADA ana vinevine i babaniei. Mai Jew i aramanei da Keriso ai wavalatona me David wariḡa nanare. Ma i nei da rava doridoriai ita vilawani me. (Sal 89:3-37 Isa 29:18-19 & 35:5-6 Jer 23:5-6 Ezk 34:23-24)

* **11:1:** Eng. Bethphage & Bethani. † **11:2:** Mai Jew awari, donki lamna nola aubaina ma eḡa gulau ana anigeru. Donki i gerui lamna e ririweta da tauna gulau ana nuubana ma vilamolamonana i nei.

⁴ Ma i nae ma *donki* ġaubona au doa au metaeta raġiragġitana i rupeni. ⁵ Rava ġelau kampa i maimairi i paridadana i pa, “Aiwai o kaukauei *donki* ġaubona o rupeupeni?”

⁶ Ma i paribelei me Iesu i ririweia nanare ma tau i voterei da i nae. ⁷ Tauti *donki* i neiai Iesu awarina ma ai puru au uporana i tawana-epai ma au tepana Iesu i kiala. ⁸ Ma rava maġamaġau, ai puru au eta i ebani ma ġelau, ai rugurugu i taratarai i ebani. ⁹ Tauti i vivinao ma tau i muri i nenei i garara:

“Hosanna!”[‡]

“Viviaiainana tauna BADA au wavana e nenei!”

¹⁰ “Viviaiainana amata David ana vigulau e nenei!”

“Hosanna au aidamo telarana!”

¹¹ Iesu i ġeta au Jerusalem ma i rui au Tempol ma anatapuna i tuvirevirei ma au i biga aubaina, i opu me au Bethani, tauti 12 maiteni.

Iesu, damala aina i parivai-irairagġeni

(*Matthew 21:18-19*)

¹² Ma marana i tom, tauti Bethani i opu-tawane i ma Iesu am-iragġe. ¹³ Au weia ma damala aina i 'nanai ana ruguruguna. Ma i nae da ita inana da i ua bo eġa. Marana i kampa i ġeta, eġa aiwai ita nelaġai. Anina ai ruguruguna aya, aubaina eġa damala ana mara. ¹⁴ Iesu, damala aina i riwei i pa, “Eġa ai ai amadodo ma amapo anom ina am-melei!” Ma ana tauvotaġotaġo i nonori aiwai i latoni.

Iesu, taugimara tempolei i viaġaġana-opunei

(*Matthew 21:12-17; Luke 19:45-48; John 2:13-22*)

¹⁵ Marana i tauti i ġeta au Jerusalem, Iesu i rui Tempol garina au orana ma taugimara i viaġaġana-opunei, mane tauviraina[§] ai kepakepa ma gabubu taugimareina ai anikiala i vitauvirai. ¹⁶ Ma i viġaei da eġa ai ai ana gimara Tempol au orana ita avarai-naiei. ¹⁷ *Ma rava i viararamani i pa, “I girugirumia nanare,

‘Au numa ina ġorei pari numana
dam anapui au dobu aubaii.’

Wate taumi o vovirai da kwalakwalai ai guba.”*

¹⁸ Pirisi Babadai ma tarawatu Babadai i nonori ma i ogei da ita viragġeni. Tauti, Iesu i rovoei aubaina patara ana viararamana i baii.

¹⁹ Ma au bigai Iesu ana rava, Jerusalem i opu-tawane.

Damala aina i poi

(*Matthew 21:20-22*)

²⁰ Ma ubaubanai tauti i nenaie ma damala aina i 'nanai anatapuna i poi. ²¹ Peter i notai ma i riwa “Taufiararamana ma inana! Damala aina u parivai-irairagġenia i poi.”

²² Iesu i paribelei, “God ona vitumaġane! ²³ A ririwana-kauemi. Rava wei olana ita riwei, ‘Ma vomairi ma au boga ma tawanem!’ Ma nuanuana eġa ina raġaraġa ma ina vitumaġana da aiwai e ririweia, ina tupua. ²⁴ Lamna

[‡] **11:9:** Lamna pona Aram anona ma vilawanai ma muriai lamna viegualau ma vimae-ġaeġaena aubaina. [§] **11:15:** Mai Jew ai au nota da mai Rome ma mai Greek arui mane au tepana i terei, wei mai Jew awari lamna god moromoruna. Mane tauviraina au Tempol mane dobu ġelau i virai da Tempol mane wei lamna Jew tarawatu i vianinei gimara au Tempol aubaina (Exo 30.13). [☆] **11:17:** Isa 56:7 * **11:17:** Iesu dobuġela manena tauviraina ma gimara ravai i viwavui da tauti pari numana i vovirai da amkwalakwalai ai guba, tauti rava ai arua nolana e viviapoepeni Jer 7:11-15.

aubaina a ririwemi. Aiwai ami au pari o vibaḡei, ona vitumaḡana da taumi boiboḡi o vaia ma ina viḡarimiei. ²⁵ Ma maranai e raraupari, au naona rava anatapui ai ḡo apoapoe awarim ma nota-tawanei. Ma nanare amam au mara am ḡo apoapoe ina nota-tawanei.”†

Jew babadai, Iesu ana vibadana i vitarapiriei

(Matthew 21:23-27; Luke 20:1-8)

²⁷ Tau i nememei au Jerusalem ma Tempol au orana i bababara. Ma Pirisi Babadai, Tarawatu Babadai ma dogadogara i nei Iesu awarina. ²⁸ Ma i paridadanei i pa, “Aiwai vibadanei wei kauai e kaukauei? Aiai vibadana i verem da wei kauai uta kauei?”

²⁹ Iesu i paribelei i pa, “Au vitaraviravira tagogi ana terei ma ona paribeleu. Ma ana riwemi; aiwai vibadanei wei kauai a kaukauei. ³⁰ Aiai, John taubabataito vibadana i verei da rava ita babataitoi, God bo rava? Ona riweul!”

³¹ Tau i vitarapiri vivira, “Mepa da tana riwa, ‘Godei.’ Tauna ina riwa, ‘Ma aiwai aubaina eḡa ota vitumaḡanei?’ ³² Wate eḡa tana riwa da, ‘Ravei.’ Tau i rava i rovoei, aubaina rava anatapui, ai nota da John anina peroveta. ³³ Ma i paribelei, “Tauai eḡa ata aramanei.” Iesu i riwa, “Tau nanare eḡa ana riwemi aiwai vibadanei wei kauai a kaukauei.”

12

Tauipi ai awanaina

(Matthew 21:33-46; Luke 20:9-19)

¹ † Iesu i vikarei ma awanainei awari i babani i pa, “Mara tagogi oroto, ana wapu i kauei ma grape i paewi* ma i gari ma grape anigudana ma violaḡa numana i voai. Ma tauipi ḡelau i verei da ita nolei taui anatapui aubai. Ma i vaḡai au dobu ḡela. ² Tuaruta ana mara i ḡetai ma taniwaga, ana taunola i paritawanei tauipi awarii da ana ḡuta ita vaia. ³ Wate tauipi, tauna i vojijini ma i kwapui ma kwakwavina i paritawanei. ⁴ Ma taniwaga, taunola ḡelauna i paritawanei. Ma tau, kolana i viaibauni ma i vitepaubabai. ⁵ Ma taunola ḡelauna i paritawanei ma tauna i viraḡeni ma i maḡa ḡelau i paritawanei, ḡelau i kwapui ma ḡelau i viraḡeni. ⁶ Ma tagogi ava e mamae da ina paritawanei. Lamna natuna orotona tagotago ana nuavainana. Ma tauna au murioina i paritawanei ma i pa, ‘Tau, natu ina vivirei.’ ⁷ Wate tau, tauna i ‘nanai ma i riwa vivira i pa, ‘Wei taniwaga natuna. Ona nei, tana viraḡeni ma ana buderi ina viḡaritaiei!’ ⁸ Ma i vunui ma i viraḡeni ma tupuana wapuei i tawanana-opunei.

⁹ –Wapu taniwagana marina aiwai ina kauei taui awarii? Tauna ina nei ma tauipi ina viraḡeni ma grape wapuna ina veredamanei tauipi ḡelau awari.

¹⁰ Wei girumana o iavi bo eḡa?

‘Wei ḡaimana, tauvoa i geduaiei,

wate muriai i nelaḡai da tauna ḡaima kaua.

¹¹ Wei lamna, BADA ana kaua

ma inanana i vidualaulauna.”

(Psalm 118:22-23)

¹² Jew babadai i aramanei da awanaina lamna tau i bababaniei ma i ḡoei da ita pani. Wate taui patara i rovoei, lamna aubaina Iesu i voterei ma i nae.

† 11:25: Riwa wadubo nonoana uraiei i girugirumia vs 26 weka eḡa ita mamae, Mepa da rava ai apoapoei eḡa ma nota-tawanei, amam au mara nanare am apoapoei eḡa ina nota-tawanei. ☆ 12:1: Isa

5:1-2 * 12:1: Parivainota wadubona, God au anatapuna Israel e bababaniei me tauna ana grape wapuna, me Isa 5:1-2.

Caesar awarina tax tana terei bo eġa?
(*Matthew 22:15-22; Luke 20:20-26*)

¹³ Ma Pharisi ġelau ma Herod ana rava ġelau i nae Iesu awarina da riwei ita waroi. ¹⁴ Tau i nei ma i riwa, “Tauviararamana, tauai aramanei da tam rava jijimanim. Ma rava wavai naenaei ma rava labalababa eġa uta vibainaenaei ma anatapu i e vaivaia da tagogi. Wate tam God ana babani riwa kau i e viaramani. Ma riwelai tax tana terei Rome gulauna wavana Caesar† awarina, i aii bo eġa?”

¹⁵ Wate Iesu, ai moru i ‘nana-bauni ma i riwei, “Aiwai aubaina o raudadaniu? Mani tagogi ona neiai da ana inana!”

¹⁶ Denarius tagogi i neiai Iesu awarina ma tau i vitara-virevirei, “Wei aiai aruana ma wavana?”

I paribelei, “Caesar.”

¹⁷ Iesu i riwa, “Aiwai Caesar ġarinei, Caesar ona verei. Ma aiwai God ġarinei, God ona verei!” Ma tau i baiei.

Sadusi ġelau, Iesu i vitara-virevirei irairaġelei vomairina aubaina
(*Matthew 22:33-33; Luke 20:27-40*)

¹⁸ *Mai Sadusi ai vitumaġana da rava eġa ita vovomairi-me maranai e irairaġe.‡ Anina ma ġelau i nei Iesu awarina ma i paridadanei,

¹⁹ “Tauviararamana! God ana tarawatu, Moses wenanare i girumi: Mepa da oroto i raġe ma kaiababana i netawanei ma eġa natunatu. Orotu vareina kaiababana ina ravaġi ma roaroa ina ġuni vareina aubaina. ²⁰ Mara tagogi varevarei seven i mae. Ma natuevou i tavine ma eġa natunatuna ma oroto i raġe. ²¹ Vareina viruaina kaiababa i ravaġi ma tauna maiteni eġa natuna ma i raġe. Ma nanare vareina vitonuina. ²² Ma nanare anatapu i seven, wavinena i ravaġi ma eġa natunatu. Au muriai wavine i raġe. ²³ Anatapu i seven, wavinena i ravaġi. Vomairi me au marana, lamna aiai awana?”

²⁴ Iesu, tau i riwei, “Aiwai Moses i girumi ma God ana rewapana eġa ota aramanei. ²⁵ Maranai tau i iragele i na vomairi, tau eġa ina tavine bo ina vitavine. Wate ina mae me anela au mara. ²⁶ *Ma rava iragele i ai vomairi babanina, Moses ana tarawatu eġa ota iavi bo? Mepa ai i ararata lana, kampa God Moses i riwei: *Tau Abraham ana God ma Isaac ana God ma Jacob ana God.* ²⁷ Tauna eġa rava irairaġe i ai God, wate rava lawalawai ai God. Taumi o moru kau!S”

Tarawatu ġeġetelarana
(*Matthew 22:34-40; Luke 10:25-28*)

²⁸ Ma tarawatu badana tagogi i nae ma ai vitarapiri i nonori. Ma i nonori da Iesu i babani kau, lamna aubaina tauna i vitara-viravira, “God ana tarawatu metauna i ġetelara?”

²⁹ *Iesu i paribelei, “Ġeġetelarana tagogi lamna wei: *Ona rautaniġana Israel!* BADA ata God, tauna ava BADA. ³⁰ BADA ami God nuanuami ina vaia orami anatapu nei ma aruami anatapu nei ma ami nota anatapu nei ma ami rewapana

† 12:14: Sisa. * 12:18: Act 23:8 ‡ 12:18: Sadusi tau i gulagula ma rava ġaġaei mai Jew ai giu babadai tau i maiteni eġa ita vitumaġana da anela bo arua ġelau i mamae ma buka 5 i vinoa, Moses i girugirumia, tau i lamna ava e vitumadane i (Karena, Exodus, Leviticus, Numbers, Deuteronomy). Ma eġa buka ġelau. Wate Moses ma BADA riwaei tau i viataie i da lawana e mamae irage au murina.

* 12:26: Exo 3:6 § 12:27: ...wate rava lawalawai ai God. Mepa da BADA i riwa da tauna Abraham ma Isaac ma Jacob ai God, tau i lawalawai maranai BADA, Moses awarina i babani. * 12:29: Deu 6:4-5

anatapunei! ³¹ ✧ Ma viruaina lamna wei: *Rava gēlaui nuanuam ina vaia me tam nuanuam e vaivai-melei!* Wei tarawatui ruağa i gētelara, eğa me gēlaui nanare.”

³² Tarawatu badana i riwa, “Tauviararamana u babani kaua! Riwa kaua u babaniei, *BADA Tauna ava God ma eğa mepa gēlauna.* ³³ Ma nuanuami ina vaia orami *anatapunei ma ami nota anatapunei ma ami rewapana anatapunei.* Ma, *Rava turam nuanuam ina vaia me tam nuanuam e vaivai-melei.* Wei tarawatui ruağa lamna i gētelera, eğa me pulo apuapunana bo pulo gēlaui.”

³⁴ Iesu i 'nanai da tauna i paribelana kaua ma i riwei, “Tam, God ana vigulau au gēregerena e gēgeta.” Ma eğa aiai tepana ita tora da Iesu ita vitara-viravirana-melei.

Keriso tauna aiai?

(Matthew 22:41-46; Luke 20:41-44)

³⁵ Maranai Iesu au Tempol i viararamana ma i vitara-viravira i pa, “Aiwai aubaina Tarawatu Babadai e ririwa da Keriso tauna David natuna? ³⁶ ✧ Arua Vivivireina, David nota i verei ma tauna i riwa:

‘MAMAE-NONOANA au gulau i riwei,

Au oieu ma kiala

da am gavia

au ae karem da ma tuvaidoedoei.

(Psalm 110:1)

³⁷ —David, tauoina wei gulauna i gōrei bada. Ma menanare da badana lamna, David natuna?” Patara gēaēaena riwana i nonori ma i vinuaiia.

Iesu, Tarawatu Babadai ai kaua i babaniei

(Matthew 23:1-36; Luke 20:45-47)

³⁸ Ma Iesu, tau i viararamani i pa, “Tarawatu babadai ona rovoei. Ai gara manamanai ma e bababara nae au deba da rava tau i vivivirei. ³⁹ Tau i anikiala vinevinei pari au numana ma au torela, gabu aiaii e vaivaia. ⁴⁰ Tau i, kaika-iababa e morumoru ma ai numa e kwalekwalei, e morumoru ma e raraupari-vai-manamanawa. Tau i kovogā ina apoapoe guratana.”

Kaiababa ana pulo

(Luke 21:1-4)

⁴¹ Ma Iesu, pulo aniterenana au baba gēlauna i kiala ma rava i 'nananai mane i tereterei. Rava mağamağau i vivimanei, mane mağamağau i terei. ⁴² Wate kaiababa molamolakana i nei ma mane muomuoi ruağa i terei, ruvana i aburu kaua. ⁴³ Ana tauvotağotağō i gōrei ma i riwei, “Anina a ririwemi, wei kaiababa molamolakana i tere-guratei, eğa me tau i gēlaui. ⁴⁴ Tau i gēlaui ai maurei i verena, wate wei kaiababa molaka ma gārinei anatapuna i terei, ana anilawana anatapuna.”

13

Iesu i riwa da rava God ana Tempol ina rikai

(Matthew 24:1-2; Luke 21:5-6)

¹ Iesu, Tempol i nene-tawanei ma ana tauvotağotağō tagogi i riwa, “Tauviararamana! Numa i vigulau gāğa ma numa gāimai i rata gāğa.”

² Iesu i paribelei, “Wei numai gēaēae i inanai, eğa gāimai tagogi, turana au tepana ina mae. Gaima anatapui ina rikai.”

Rava ina vinuapoapoe kaua. Iesu ana tauvotağotağō ina vipatutu

(Matthew 24:3-14; Luke 21:7-19)

³ Iesu i kiakiala au ola *Olives*, Tempol au navanavaġela ma Peter, James, John ma Andrew i nei ma i vitaraviravirana govaġei ⁴ i pa, “Ma riwelai mara aiwai wei kauai ina tupua? Ma aiwai ina vimataira da wei kauai anatapui ina tupua?”

⁵ Iesu, tauri i riwei, “Ona inana kua da eġa aiia ina terevaideġaimi! ⁶ Rava maġamaġgauri, wavauei ina nei ma ina riwa, ‘Tau Keriso tauvilawana!’ Ma rava maġamaġgauri ina terevaideġai. ⁷ Ma maranai viġavia ona nonori ma viġavia aueia riwana ona nonori; eġa ona rovo! Wei kauai anina da ina tupua, wate wei eġa damona. ⁸ Dam, damai ina viġavia vivira ma dobu, dobuai ina viġavia vivira. Ma lolo ma gomara dobu au anatapuna. Wei kauai, lamna me wavine ana iniviarra e vivikare i maranai e vivinatuna.

⁹ —Ona inana kua! Taumi ina panimi ma ina etaremi ma pari numana au orana ina kwapuimi. Ma gavena ma gugulau au naoi ona mairi, aubaina taumi o votaġotaġoiu. Ma tauri awarii, Riwa Aiaina ona raugugulei. ¹⁰ Riwana Aiaina ona raugugulei rava anatapui awari ma muriai damona ina nei. ¹¹ Ma maranai i panimi ma i etaremi. Eġa ona vinuabola da aiwai ona latoni. Aiwai riwana God i veremi, lamna ona latoni. Aiwai o latoni lamna eġa taumi ota babani, wate Arua Vivivireina. ¹² Rava, vareina ina verenei da ina viraġeni. Ma ama, natunatuna ina verenei da ina viraġeni. Ma roaroa, amamai ma aloloi ina viġavie i da ina iraġe. ¹³ Rava anatapui ina geduaiemi tau aubaiu. Wate aiia da e maimairi-jjina da au damona, tauna ina lawana.”

Iniviarra ġaeġaena ana mara
(*Matthew 24:15-28; Luke 21:20-24*)

¹⁴ “Maranai ‘Kaua apoapoe kaukauana’* e maimairi mepa avena ita mairi. (Buka tauivana wei ina aramane i anona aiwai). Tauri aiavo i au Judea ina ruba laġilaġina au ola. ¹⁵ Aiia numa au tepana eġa ina ġaira bo ina rui au numa da aiwai ina vaia. ¹⁶ Aiia au wapu eġa ina naeme au numa da ana gara ina vaia. ¹⁷ Ma iniviarra ġaeġaena, waivine duadumai ma tauri da e vivigiġu awari nai au marana! ¹⁸ God awarina ona raupari da wei kauai eġa au bodu ina tupua. ¹⁹ ✧ Ma nai au marana amapo iniviarra ġaeġaena. Ma maranai God dobu i kauai, iniviarra ġaeġaena eġa nanare ita tupua ma amapo eġa nanare ina tupua me. ²⁰ Wate BADA nai marana ina vitupoi. Mepa da eġa ina vitupoi, rava anatapui ina iraġe. Wate rava, tauna ana vinevine ina vilawani lamna aubaina mara ina vitupoi.

²¹⁻²² —Muriai keriso tauvilawana morumorui ma peroveta morumorui ina nei ma mataira ma kua babai ina kauai ma ina kauana dadane i da God ana vinevine maiteni ita terevaideġai. Lamna aubaina mepa da aiia ina riwemi, ‘Ma inana i, Tauvilawana noi!’ bo ‘Tauna noi!’ Nai babanina eġa ona vitumaġane i! ²³ Ona inana kua; anatapuna a riwana-nonoemi!”

Rava Natuna ana nei
(*Matthew 24:29-31; Luke 21:25-28*)

²⁴ Iesu wenanare i riwa, “Ma iniviarra ġaeġaena au murina.

Madeġa eġa ina rarana

ma nawaravi eġa ina lalai.

(*Isaiah 13:10*)

²⁵ *Ma ubona mare i ina peu*

ma rewapana ġelau i au aidamo ina gui.

(*Isaiah 34:4*)

* **13:14:** Eng. *Abomination of Desolation* Dan 9:27 11:31 & 12:11 ✧ **13:19:** Da 12:1

26 ✨—Nai maranaina, *Rava Natuna ana rewapanana ma ana borumana apauēi ina nei.* 27 Ma Tauna, ana anela ina paritawaneī dobu au anapapuna da rava tauna ana vinevine ina tuarui dobu au damona da dobu ġela au damona.”

Damala ana awanaina
(*Matthew 24:32-35; Luke 21:29-33*)

28 “Damala aina ana awanaina ona aramaneī. Maranai ai e numonumoi, lamna ona aramaneī da maura e tuturiāi. 29 Ma nanare, maranai wei kauai anapapui ina tuputupua, ona aramaneī da Rava Natuna i turiai; au metaeta i ġetai. 30 Anina a ririwemi da wei kauai au naona ina tupua ma muriai da rava marina lawalawaii ina iraġe. 31 Mara ma dobu ina amoa. Wate riwau eġa ina amoa.”

Bada ainelana ana nei i aramaneī
(*Matthew 24:36-44*)

32 “Ma eġa aiāi ita aramaneī nai marana bo madeġa aiwai ina nei. Anela au mara eġa ita aramaneī ma Natuna eġa ita aramaneī. Amanā, tauna ava i aramaneī. 33 Ona vineneġana ma matami ina kala!† Eġa ota aramaneī mara aiwai, wei kauai ina tupua. 34 Wei me rava ana numa i netawaneī ma i vaġai. Ma ana taunola nununai i terei da ita vipaipai ma tagotagogi ava ai nola i verei da ita kauēi. Ma tauvineneġana i riwei da ita vineneġana. 35 Ona vineneġana! Eġa ota aramaneī mara aiwai, numa taniwagana e nenei; mepa da au bigai bo au nubautuva bo maratomtomi bo ubaubanai. 36 Ma eġa matamatavemi ina nelaġaimi. 37 Aiwai riwana a ririwemi, riwana tagogina rava anapapui a riwei, ona vineneġana!”

14

Jew ai babada, Iesu i ogei da ita virāġeni
(*Matthew 26:1-5; Luke 22:1-2; John 11:45-53*)

1 ✨Au pom ruaġa muriai da Raġona ma Palawa Bagibagina torelai,* Pirisi babadai ma Tarawatu Babadai eta i baibaiei da menanare govogovaġaneī Iesu ita vunui. 2 Ma i riwa, “Au torela wei kauai eġa tana kauēi, mepa da viġaiġaiawa ġaeġaena ina tupua.”

Wavine, daji ġabuġabuna Iesu au kolana i waġi
(*Matthew 26:6-13; John 12:1-8*)

3 Maranai Iesu au Bethani, Simon i ġoreġorei lepeleperana ana au numa i kiala ma i amam. Wavine, waġi wavana alabaster i voai ma i ġeta ma waġi uana i vogai ma daji ġabuġabuna, maiana ġaeġaena e ġoreġorei *nard*, Iesu au kolana i waġi. 4 Rava ġelau kampa i mamae i ġaiawa ma i riwa, “Aiwai aubaina daji u vikalokaloei? 5 Wei dajina ita gimarei 300 *denarii* † ruvana ma manena molamolakai ita verei.” Ma tauī, wavine i vienenei.

6 Wate Iesu i riwa, “Ona voterei! Aiwai aubaina o vinuabolai? Tauna, kua aiaina awariu i kauēi. 7 Molamolakai awarimi eġa ata mamae-nonoa ma ona ġoei ma tauī ona voagui. Wate tau awarimi eġa ata mamae-nonoa. 8 Wavine ana nola i kauēi. Tauna, dajiei tupuau i vokaukauana-nonoēi vikokoaga aubaina.‡

✨ **13:26:** Da 7:13 † **13:33:** Wedau Evanelia i girumi, ma i raupari, wate buka wadubo nonoana wei eġa ita mamae, Luk 21:16 kampa ona inanaī da e mamae. ✨ **14:1:** Exo 12:1-27 * **14:1:** Raġona (passover) Exo 12:1 Palawa eġa yist maiteni (Unleavened-Bread) Exo 12:17 & 23:15 † **14:5:** Wei lamna me taubagibagi ana maia madeġa tagogi aubaina. ‡ **14:8:** Mai Jew ai kua da taubeu dajiei e bulubuloi muriai au kokoaga e tereterei.

⁹ A ririwana-kauemi, mepa Riwana Aiaina i raugugulei dobu au anapui, wei wavinena aiwai i kaukauei ina babaniei, ma eġa nuanuai ina vuru.”

¹⁰ Judas Iskariotei tauna Apasol tagogi, Pirisi Babadai awari i ġeta da Iesu ita vibenabenamei. ¹¹ Taui i vinuaiiai kaua maranai wei i nonori ma Judas i parivainuagani da mane ita verei. Ma Judas i nana da mepa gavogavo ita inanai da Iesu ita amverenei.

Iesu ma Apasol, Raġona torelana i ani.

(Matthew 26:17-25; Luke 22:7-14, 21-23; John 13:21-30)

¹² Ma Palawa Bagibagina torela ina vikarei. Maranai sipu orotoi ġauboi e vunuvunui Raġona torelana aubaina. Tauvotaġotaġo, Iesu i paridadanei, “Mepa u ġoġoġo Raġona torelana ana vokaukauei aubaim?”

¹³ Iesu, taui ruaġa i riwei ma i paritawanei, “Ona nae au Jerusalem ma oroto, waira wagina e avavarai ona inanai ma ona votaġotaġo. ¹⁴ Au numana e ruiruiana, numa taniwagana ona riwei, ‘Ai tauviararamana i riwa, “Numa vokaukauana mepa ma au Tauvotaġotaġo maiteni Raġona torelana ana ani?” ¹⁵ “Ma tauna, numa vatavata ra ina viatataiemi i vokaukauana-nonoei ma kampa aubaita ona vokaukaua.”

¹⁶ Tauvotaġotaġo i nae au Jerusalem ma i ririweia nanare i nelaġai ma Raġona torelana i vokaukauei.

¹⁷ Au i biga ma Iesu i nei Apasol maiteni. ¹⁸ Taui au kepa kepa i amam ma Iesu i riwa, “Anina a ririwemi. Taumi tagogi ina vibenabenameu; tagogi weka maiteni amam.”

¹⁹ Tauvotaġotaġo i vinuabola ma tagotagogi ava i pa, “Eġa tau tapa?”

²⁰ Iesu i paribelei, “Taumi tagogi weka palawa e vivigaloi au aboma tau maiteni. ²¹ Wariaġa i girugirumia nanare, Rava Natuna ina iraġe. Wate aiai da Rava Natuna i vibenabenamei; tauna, kovoġa ġaġaena ina vaia! I aii da alona avena ita vinatunei.”

²² Maranai i amam ma Iesu palawa i vaia ma i viegualau, i vogimagimai ma Tauvotaġotaġo i verei ma i riwa, “Ona vaia; wei tupuau.”

²³ Anina ma wine kelakana i vaia ma i viegualau ma i verei da anapui i umei, ²⁴ “Wei tau tarau i toi rava maġamaġgai aubai ma au parivainuagana bagibagina ina vovai-virewapani. ²⁵ Anina a ririwemi, wine eġa ana uma-melei da maranai God ana rava aubaii ana vigulau.”

²⁶ Ma taui voepaepa welana i ravi ma i ġae au Ola Olives.

Peter, Iesu ina boviei

(Matthew 26:31-35; Luke 22:31-34; John 13:36-38)

²⁷ Iesu, taui i riwei “I girumi nanare,

God i riwa, ‘Tauviġamoġamo ana viraġeni ma sipu ina vilamonei.’ (Zekariah 13:7) Ma nanare anapumi ona ruba-tawaneu. ²⁸ Wate au vomairi au murina ana aivinao au Galili.”

²⁹ Peter i riwa, “Mepa da anapui ina rubatawanem, wate eġa tau!”

³⁰ Iesu, Peter i riwei, “A ririwana-kauem da amadodo waguvarai muriai da kokorereko ina tou mara ruaġa; tam mara tonuġa ma boviu.”

³¹ Wate Peter, ponana i bagibagi ma i riwa, “Avena mepa da tau, tam maiteni ana iraġe. Eġa melanai ana boviem!” Ma taui ġelau riwana tagogina i latoni.

Iesu au Gethsemani i raraupari

(Matthew 26:36-46; Luke 22:39-46)

☆ 14:24: Exo 24:8; Jer 31:31-34

³² Ma au Gethsemani i ġeta ma Iesu, ana tauvotaġotaġo i riwei, “Weka ona kiala ma ana raupari.” ³³ Ma Peter, James ma John i taravaini ma nuanuana i raġe ma nuanuana i bola-kauei. ³⁴ Ma taui i riwei, “Au nuabola i rata kaua au orau da e vunuvunuii. Weka ona mae ma ona vineneġana.”

³⁵ Ma aburuna i verau-nae ma au doa i peu ma i raupari da mepa da tagotagogina, lamna wei marana apoapoena tauna ita netawane. ³⁶ I riwa i pa, “*Abba* Amau! Aiwai anatapuna tagotagogina tam awarim. Wei kovoga kelakana ma vaitawane. Wate eġa tau au ġoana, wate tam am ġoana.”

³⁷ Ma Iesu i nememei ma taui tonuġa rarau-nuavurui i nelaġai. Ma Peter i riwei, “Simon! [§] tam aiwai matavena? Mara aburuna uta vineneġana bo eġa?”

³⁸ Ma Iesu, taui i riwei, “Ona vineneġana ma ona raupari da eġa au raelara ona peu! Arua e ġoġoġoi, wate tupua i ġokokokara.”

³⁹ Ma i naeme ma parina tagogina i raupariei. ⁴⁰ Maranai i nememei ma i nelaġai, i matamatave; taui, matai i vitai. Ma taui eġa ita aramane i aiwai ita riwei.

⁴¹ Mara vitonuina i nene-memei ma taui i riwei, “Taumi amapo ona matamatave ma laumi ina tautau? Anina! Mara i ġetai, ona inana. Rava Natuna ina vibenabenamei ġo’apoapoe ravai au urai. ⁴² Ona vomairi; tana nae; ona inana! Tauvibenabenameu e nenei!”

Iesu i pani

(Matthew 26:47-56; Luke 22:47-53; John 18:3-12)

⁴³ Iesu i bababani ma Judas, tauna ana Tauvotaġotaġo tagogi i ġetai. Tauna, patara ana api ai maiteni i nei. Pirisi Babadai ma Tarawatu Babadai ma dogadogara, wei ravai i paritawaneiai. ⁴⁴ Muriai da Iesu awarina ita ġeta; Judas, patara ai mataira i verei, “Orotona ana vigia laġolaġonei; nai tauna. Ona pani ma ona naiei ma ona inana-kauei!”

⁴⁵ Maranai Judas i ġeta ma i nae Iesu awarina ma i riwei, “Tauviararamana!” Ma i vigia-laġolaġonei. ⁴⁶ Ma taui, Iesu i vojijini ma i pani. ⁴⁷ Ma tagogi kampa i maimairi, ana sword i taina-lavui ma Pirisi ġeġetelarana ana taunola taniġana i borituini. ⁴⁸ Ma Iesu, taui i riwei, “Taumi ana api ai o nei da ota panii bo, apamina tau amkwalakwalau? ⁴⁹ Marana patapatai taumi maiteni ta mamae au Tempol ma a viararamana ma eġa ota panii. Ma i girugirumia nanare, ina tupua.”

⁵⁰ Ma Tauvotaġotaġo anatapui, Iesu i voterei ma i ruba-tawane.

⁵¹ Ma laraga tagogi, i vikareko ma Iesu i votaġotaġoi. Taui i ġoġoi da ita vojijini, ⁵² wate ana kareko i vojijini ma tauna ana kovakovana i ruba.

Taui, Iesu i etarei.

(Matthew 26:57-68; Luke 22:54-55, 63-71; John 18:13-14, 19-24)

⁵³ Ma taui, Iesu i naiei Pirisi Ġeġetelarana. Pirisi Babadai, dogadogara ma Tarawatu Babadai mepa i vitagogieiana. ⁵⁴ Ma Peter i votaġotaġo da Pirisi Ġeġetelarana ana numma. Ma ana au debadeba, purusimani maiteni i kiala ma i viviarara. ⁵⁵ Pirisi Babadai ma mai Jew ai boru ġeġetelarana,* Iesu ana apoapoe i baiei da ita viraġeni; ma i baiana-avei. ⁵⁶ Matamata maġamaġau, Iesu i viwavu-morumoruei, wate ai viwavu taputapunei ava.

⁵⁷ Ma ġelau i vomairi ma wei wavuna morumoruna i kauei Iesu awarina, ⁵⁸ “Tauai a nonori tauna i riwa, ‘Wei tempolna i voavoai. Tau ana rikai ma au

§ 14:37: Au Mrk 3:16 Simon wavana i virai da Peter. * 14:55: Mai Jew e ġoreġorei Sanhedrin.

pom tonuġa au murina, Tempol ġelauna ana voai ma lamna eġa rava ita voai.”
 59 Wate nanare ai viwavu taputapunei ava.

60 Pirisi ġeġetelarana i mairi tau i naoi ma Iesu i vitara-virevirei, “Wei ravai e viviwaviim ma eġa aiwai ma paribelei bo?”

61 Ma Iesu i genuana ma eġa ita paribelei.† Ma Pirisi ġeġetelarana i vitaraviravirana-melei, “Tam Keriso tauvilawana bo? Viviaianana Natuna bo?”

62 ✨ Iesu i paribelana, “Tau tauna! Ma *Rava Natuna ona inani, Vivirewapanana au oiena ina kiala ma mara ladanei ina nei.*

63 Pirisi ġeġetelarana, amlona i ġaiġai ma ana gara i sikai ma i riwa, “Aiwai aubaina matamata ġelau tana ġoei? 64 Taumi, vijiboġa o nonori ma ami nota aiwai?”

Tau anapui i riwa, “Tauna ana ġo’apoapoe aubaina anina da ina iraġe!”

65 Ma ġelau i raukarei ma Iesu i ovai ma naona i purui; i raunavanavai ma i riwei, “Ma pariverelai, aiai i ravim!” Ma tauvipaipai, Iesu i vaia ma i vunui.

Peter, Iesu i boviei

(Matthew 26:69-75; Luke 22:56-62; John 18:15-18, 25-27)

66 Ma Peter au gabaura i mamae ma Pirisi ġeġetelarana ana taunola gugui i ġetai. 67 Maranai tauna, Peter i ’nanai i viviairara; ma i ’nana-tunutunui ma i riwa, “Tam maiteni Iesu Nasaretei, ana tauvotaġotaġo!”

68 Wate tauna i bovi ma i riwa, “Eġa ata aramanei aiwai e bababaniei, a vinuanainei!” Ma i tuopu au metaeta ma [kokorereko i tou‡].

69 Taunola gugui, Peter i ’nanai ma i raukarena-melei ma rava au ġereġere i maimairi i riwei, “Wei ravana, tau tagogi!” 70 Wate Peter i bovi me.

Mara aburuna muriai, tau au ġereġere i maimairi, Peter i riwana-melei, “Tam anina, tau tagogi; aubaina tam, Galiliei!” 71 Ma Peter i riwa, “God au matana, tau a ririwa kaua, ravana o ririweia a vinuanainei!”

72 Maratagogi kokorereko i tou mara viruaina ma Peter, Iesu riwana i notai - *Muriai da kokorereko ina tou mara ruaġa, tam mara tonuġa ma bovieu.* Ma Peter i vinuabola kaua ma i tou.

15

Iesu i taravaina-naiei Pilate au naona

(Matthew 27:1-2, 11-19; Luke 23:1-5; John 18:28-38)

1 Ubaubanai boiboġi, pirisi babadai ma dogadogara ma tarawatu babadai anapui i vaboru* ma i vianina da Iesu i pani ma i veredamanei Pilate au urana.

2 Pilate, Iesu i vitara-virevirei i pa, “Tam mai Jew ai gulau bo?” Iesu i paribelei i pa, “Anina e ririwa nanare.”

3 Pirisi Babadai e viviwaviim kaua maġamaġau aubai. 4 Ma nanare Pilate, Iesu i vitaraviravirana-melei i pa, “Tam ma paribelana bo eġa? Ma nonori e viviwaviim kaua maġamaġau aubai!” 5 Wate Iesu i genuana ma eġa ita paribelei. Ma Pilate i ba kaua.†

Iesu ana iraġe i vianinei

(Matthew 27:15-38; Luke 23:13-25; John 18:39-19:16)

6 Tau ai kaua maemaena da Raġona Torelana au marana, Pilate, panipani tagogi, rava ai ġoanei e ruperupeni ma e vovoterei da e nena. 7 Oroto tagogi

† 14:61: Isaiiah i parivereta da Keriso ana au iraġe eġa ina gagaloana-melei. (Isa 53:7). ✨ 14:62: Da

7:13 ‡ 14:68: Wei riwana buka au wadubo nonoana eġa ita mamae. * 15:1: Mrk 14:55 Sanhedrin

† 15:5: Mai Rome ai tarawatu e mamae da maranai i viviwaviim ma tauetara eġa uta paribelei lamna tam anina wavu ma varai.

wavana Barabas; tauna Rome gabemani i viġaviei ma i pani da panipani au numana i mamae. Ana rava maiteni tauviraġena. ⁸ Ma patara i ġeta da Pilate ita vibaġai da panipani tagogi ita rupeni Raġona Torelana au marana. ⁹⁻¹⁰ Pilate i paribelei, “Taumi o ġoeġoei da mai Jew ai gulau ana rupeni aubaimi bo?” Pilate i aramanei da Pirisi Babadai, Iesu i unurei ma lamna aubaina Iesu i veredamanei tauna awarina. ¹¹ Wate Pirisi Babadai, patara i egari da Pilate, Barabas ita rupeni ma eġa Iesu. ¹² Pilate, patara i paridadana-melei i pa, “Tauna o ġoreġoreia mai Jew ai gulau mena ana kauanei?” ¹³ Tau i garara, “Ma tuparatui!” ¹⁴ Pilate i riwa, “Aiwai apoapoena i kauiei?” Ma tau i garara guratana, “Ma tuparatui!” ¹⁵ Pilate i ġoei da patara ita vinuubai ma Barabas i rupeni ma *sorodia* i egari da Iesu i kwapui da i vitaratarai ma i naei da ita tuparatui.

Sorodia, Iesu i vinamei
(*Matthew 27:27-31; John 19:2-3*)

¹⁶ *Sorodia*, Iesu i taravaina-ruiei Pilate ana au numa ma ai rava ġelau i ġoreiai. ¹⁷ Ma gara lebalebarina[‡] [*me gulau ana gara*] Iesu i vioteni ma kunuteia ai donadonanei i viri da au kolana i terei. ¹⁸ Ma vinamana i raukarei ma i garara, “Egualau mai Jew ai gulau!” ¹⁹ Ma kolana gonuei i raviravi ma i ovaovai. Ma ae-tutuie i mae-ġaira au doa ma i raudunelei ma i vivinamei. ²⁰ Ma i vijiboġa vorovei ma gara lebalebarina i voġiġi-tawanei ma ana gara i vioteni. Ma i taravaina-opunei da ita tuparatui.

Iesu i tuparatui
(*Matthew 27:32-44; Luke 23:26-43; John 19:17-37*)

²¹ Tau i nenaie ma Simon i nelaġai, rava Sairinie[§] (tauna Rufus ma Alexander amai). Simon wapuei i nenei. Ma *sorodia*, tauna i egari da Iesu ana *korosi* i avarai. ²² Tau, Iesu i naiei da gabu i ġoreġorei Golgotha, lamna anona unu gabuna. ²³ *Sorodia*, *wine* bunama *myrrh* maiteni i virai ma Iesu i veredadani, wate tauna i geduaiei. ²⁴ Ma Iesu i tuparatui ma ana gara, tau i ava au orai i ġutai.*

²⁵ Ubauban 9 kilok nanare, Iesu i tuparatui. ²⁶ Aniviwavuna i girumi ma i tutui, “Mai Jew ai gulau.” ²⁷⁻²⁸ Danedanenei ruaġa, Iesu au ririvana i tuparatui; tagogi au oiena ma ġelauna au kelakelauna.†

²⁹ Taubabara, kolai i kwajikwajiei ma Iesu i vivinamei, “Na! Tam Tempol taurikaina ma au pom tonuġa ma voa-melei. ³⁰ Ma vilawana-melem ma *korosiei* ma ġairai!”

³¹ Ma nanare Pirisi Babadai ma Tarawatu Babadai maiteni, Iesu i vivinamei, “Rava ġelau i vilawani, wate ainelana ita vilawana-melana-avei. ³² Keriso Tauvilawana, Israel ana gulau; marina *korosiei* ma ġairai ma tana inana da tana vitumaġanei!” Danedanenei i tupatuparatui maitenai, Iesu i vinamei.

Iesu ana iraqe
(*Matthew 27:45-56; Luke 23:44-49; John 19:28-30*)

³³ Ma au benai dobu anatapura i waguwarei da 3 kilok au bigai. ³⁴ Lamna maranaina Iesu ponana i rata ma i kwatu, “*Eloi, Eloi, lama sabachthani?*”

‡ 15:17: Eng. purple. § 15:21: Eng. Cyrenian. * 15:24: Tau ġaima i tawanei me dice da aiai aiwai garana ita vaia. ☆ 15:27-28: Isa 53:12 † 15:27-28: Giruma ġelau waduboi vs 28 e mamae Ma aiwai i kaukaeia lamna peroveta i ririweia i tupua, Tau i ‘nanai me tau ġo‘apoapoe taukauei. Isa 53:12 ☆ 15:29: Mrk 14:58

Lamna anona, “*Au God, au God aiwai aubaina u netawaneu?*”³⁵ Ma rava gēlaui au gēreḡere imaimairi i nonori ma i riwa, “*Ona rautaniḡanei, Elijah e kwatukwatuei!*”³⁶ Ma rava tagogi i ruba da gara ai au damona i pani ma au *wine* tomatomana i vīgaloi ma i voepai Iesu au ipirina ma i riwa,[‡] “*Ona vipaipai ma tana inanai mepa da Elijah ina nei da ina tereḡairei.*”³⁷ Ma Iesu ponana i rata ma i kwatu ma i lavutu tawanana.³⁸ Ma Tempol au orana anitereḡaḡara au pouna i wanasikai au tepana da i ḡaira au doa.³⁹ Ma *sorodia* ai bada, Iesu au naona i maimairi; i ‘nanai da i lavutu tawanana ma i riwa, “*Wei anina God Natuna.*”⁴⁰ Waivine gēlaui aueia i mae ma i raraubiga: Mary Magdalene ma Mary (James keikeina ma Joses^S aloi) ma Salome.⁴¹ Tauī, Iesu i votaḡotaḡoi ma i vovoḡui maranai au Galili i mamae ma waivine gēlaui maḡamaḡauī, tauna maiteni i ḡeḡae au Jerusalem, anatapui kampa.

Iesu i vikokoagei

(*Matthew 27:57-61; Luke 23:50-56; John 19:38-42*)

⁴²⁻⁴³ Ma au biga i tuturiai Joseph Arimathea^{*} tauna rava ḡaeḡaena tagogi boru ḡetelarana au orana. Tauna God ana vīḡulau ana nei i vipaipaei. Ma vokaukua marana (Lamna Sabat au naona)[†] ma Joseph ana tepatorana, Pilate awarina i rui ma Iesu taubeuna i vibaḡei.⁴⁴ Pilate i baiei da Iesu boiboḡi i ḡage. Tauna, *sorodia* ai bada i kwatuei ma i vitara-virevirei da Iesu i ḡage bo eḡa?⁴⁵ Maranai *sorodia* ai bada i parivereī da anina riwa kua. Ma Pilate, Joseph i riwei da Iesu tupuana i vaia.

⁴⁶ Joseph, gara maiana ḡaeḡaena i gimaraī ma Iesu tupuana i tere-ḡairei. Gareī i umai ma au guba tupuana i vimataveni ma ḡaima ḡaeḡaena i kaipeuri da kokoaga metaetana i viaitomeni.⁴⁷ Mary Magdalene ma Mary - Joses alona i ‘nanai mepa Iesu taubeuna i vimataveni.

16

Iesu i vomairi

¹ Ma Sabat au murina, Mary Magdalene ma Mary - James keikeina alona ma Salome, bunama ḡabuḡabui i gimaraī da i naiei da Iesu tupuana ita buloi.^{*}
² Ma Sunday ubaubanai boiboḡi maranai madeḡa i gogogo, tauī i nae au kokoaga.³ Ma i nēnae ma i bababani, “*Aiai aubaita ḡaima kokoaga au metaetana ina kaipeura-tawaneī?*”⁴ Maranai tauī i taepai, i ‘nanai da boiboḡi ḡaima i kaipeura-tawaneī - ḡaima ḡaeḡae kaukauana.⁵ Maranai i rui au guba ma oroto laragana ana gara ararapoirina i ‘nanai au oiena.[†] Ma tauī orai i auepai.⁶ Orotol aragana i riwa, “*Eḡa orami ina auepai, taumi, Iesu Nasaretei o baibaiei bo? I tupatuparatuia; tauna i vomairi! Ona inana, tauna eḡa weka! Tauī weka taubeuna i vimataveni.*”⁷ [✧]Marina ona nae ma ana tauvotaḡotaḡo ona riwei, ma Peter eḡa nuanuami ina vuru da Iesu e vivinao au Galili. Kampa ona inanai

[‡] **15:36:** Psa 69:21 peroveta i girumi da Keriso ita verei. ^S **15:40:** Au Mat 27:56, Matthew

i girumijoseph ma eḡa Joses. ^{*} **15:42-43:** Eng. Arimathea. [†] **15:42-43:** Mai Jew ai Sabate, madeḡa e neneulai au Friday e vivikareī da madeḡa e neneulai au Saturday e kwakwa. Mai Jew ai Tarawatu e ririwa da rava i ḡage lamna marana tagogina ina doboi. Sabate amadodo madeḡa e neneulai ina vikareī lamna aubaina Joseph i volaḡilaḡina da Iesu taubeuna ita doboi. ^{*} **16:1:** Mai Jew ai kua maemaena da taubeu monamonei ina buloi ma muriaī ina doboi ma waivine i goei da wei kauai ita votaḡotaḡoi.

[†] **16:5:** Tupua i vimataveni au oiena i kiakiala, ana gara ararapoirina. [✧] **16:7:** Mrk 14:28

i ririwemi nanare.”⁸ Tauri i opu ma kokoagei i viruberubei ana ini sisisi ma ana rovoi. Tauri i rovo kaua, lamna aubaina eġa rava ita riwei.

Mark 16:9-20

Mark Riwana Aiaina damona lamna wariāġa i vine-boai. Ma rava ġelauna aiwai i notanotai nanare au vs 9 da 20 i ġirumi. Wei damonana weka i vikarei.

Iesu, Mary Magdalene awarina i eġa

⁹ Iesu iraġelei i vomairi me au Sunday ubaubanai boiboġi ma i ainae da Mary Magdalene awarina i eġa. Maraotai Iesu, Mary awarina arua-apoapoei seven i viopuni. ¹⁰ Iesu, ana tauvotaġotaġo i vivinuabola ma i toutou ma Mary i ġeta da i pariveri. ¹¹ Ma Mary i pariveri da Iesu i lawana me ma tauna matanei Iesu i 'nanai. Wate tauī eġa ita vitumaġanei.

Iesu, tauvotaġotaġo ruaġa awari i eġa

¹² Wei au murina Iesu inanana tapuna ma ana tauvotaġotaġo ruaġa awari i eġa; maranai tauī i nenaē au melagai. ¹³ Tauī i naeme ma tauvotaġotaġo ġelauī i vieġei. Wate tauī nanare eġa ita vitumaġanei.

Iesu, Tauri 11 awari i eġa

¹⁴ Muriai tauī 11 i amam ma Iesu awarii i eġa. Ma i eni aubaina tauī orai i bado ma eġa ita vitumaġana maranai rava, i riwei da Tauna i vomairi me. ¹⁵ ✧ Iesu ana Apasol i riwei, “Ona nae dobu au anataapuna. Ma God Riwana Aiaina ona jimeī rava anatapui awarii. ¹⁶ Aiai da i vitumaġana ma i babataito; tauna ina lawana. Ma aiai da eġa ita vitumaġana ina kovogī. ¹⁷ Ma tauī aiavoī da i vitumaġana, rewapana ina veri da kaua babai ina kauēi. Ma arua-apoapoei ina viopuni ma pona tapunei ina babani. ¹⁸ Tauī, mota uraiei ina vaia ma waiawa ina umai ma eġa ina rauputei. Ma urai doridoriai au kolai ina terei ma ina lawana.”

God, Iesu i ġaiei au Mara

¹⁹ ✧ BADA Iesu, awari i babani vorovei. Ma tauna i ġaiei au mara ma God au oiena i kiala. ²⁰ Tauri tauvotaġotaġo i opu ma dobu au anataapuna i raraugugula. Ma BADA, tauī i voagui ma kaua babai i kaukauei da tauvotaġotaġo aiwai i bababaniei i vovai-virewapani.

Apasol ai kaua Pariverena

Luke ana buka i giruma vorovei ma muriai Apasol ai kaua bukana i girumi. Tauna ana ano gae gaena lamna i goei da rava ita viegei da menanare Arua Vivivireina Iesu ana taivotagotago i rau-etaraveni da Riwana Aiaina ita vituai, Au Jerusalem ma au Judea au anatapuna ma au Samaria ma dobu au gia dewadewana.

(1:8)

Kerisiana ai babara ma ai nola i babaniei. Mai Jew awarii i vikarei ma i nae da dobu anatapui i vituma gana. Tauamgiruma ana nota gae gaena da wei bukana tauivavana ita pariveri da kerisiana avena Rome gabemanina ita vivigaviei. Kerisiana vituma ganana lamna mai Jew ai vituma gana e kaukauana-paiei. Wei bukana i gutai da ragaragana tonuga, ma e viviatataieta da dobu au anatapuna Iesu Riwana Aiaina i jimei ma ekalesia i vitupui:

Iesu ana gae au murina Ekalesia au Jerusalem ai nola i vikarei;

Palestine taun gelai awari i tua-nae;

Ma i tua-nae au Mediteranean da i nae au Rome paratana. Wei bukana ana kaua gae gaena lana Arua Vivivireina i nolanola, ma rewapana tauvituma gana au Jerusalem i verei au Pentecost. Ma wei au bukana i viegeta da Arua vivivireina mara nonoa agu ma rewapana ekalesia ma ai babada i verei ai au aninola au anatapuna. Waria ga kerisiana ai pariverena i tere-tagogiei raugugula au magama gau, ma kaua ma ai nola i kaukauei anatapui. Wei au bukana i girumi da wei parivai-ua ganana ana rewapana tauvituma gana ai au lawana ma kerisiana ai au voepaepa i viatataieta.

Buka rere gana 1.

Vokaukaua tauvimatamata aubai (1:1-26)

Iesu ana tarawatu ma ana parivainua gana damona (1:1-11)

Judas Epaiana (1:12-26)

Tauvimatamata au Jerusalem (2:1-8:3)

Tauvimatamata au Judea ma Samaria (8:4-12:25)

Paul ana nola (13:1-28:31)

Paul ana vagai tagogi (13:1-14:28)

Boru au Jerusalem (15:1-35)

Paul ana vagai viruaina (15:36-18:23)

Paul ana vagai vitonuina (18:24-21:16)

Paul i vipanipani au Jerusalem, Caesarea, ma Rome (21:17-28:31)

Iesu ana Apasol i parivainua gani

¹ Egualau Theophilus, buka au naona a girugirumia* lamna Iesu ana tupua ma ana nola i vikarei da i kaukauei ma i viviararamana a pariverem ² i nae da ana gae au marana. Muriai da Iesu i gaiei au mara, Tauna Arua Vivivireinei ana apasol vinevinei riwa bagibaginei i pariveri. ³ Iesu ana irage au murina i viegana-melei ana apasol awarii. Ma kaua magama gau i kauei da apasol i vituma gana kaua da Tauna anina i lawana me. Tau awarii i ega au pom 40 au orana ma God ana vigulau i babaniei. ⁴ Maranai ana apasol maiteni i vitagogiei ma i riwana-guratei i pa, "Ega Jerusalem ona oputawanei, wate pulona amau i paripari-vainua ganimi ona paini, maraotai a ririwemi nanare. ⁵ *John

* 1:1: Bukana au naona i girugirumi lamna Luke ana Gospel ✧ 1:5: Mrk 1:8

wairei i babataito, wate mara aburuna ava Amau, Arua Vivivireinei taumi ina babataitomi.”

God Iesu i ġaiei au Mara

6 Muriai maranai Iesu ma Apasol i vitagogiei ma tau i Iesu i vitara-virevirei i pa, “Bada! Marina, Israel ana† vigulau ma vere-melei bo?”

7 Ma Iesu i paribelei, “Amau ainelana ana rewapani mara ma iri e vivibadei, aubaina da taumi eġa ona aramanei. 8 *Wate maranaina Arua Vivivireina au orami ina rui, maranaina taumi rewapana ona vaia. Ma aubaiu ona vitaunola au Jerusalem, Judea, au Samaria ma dobu au anatapuna.” 9 *I babani vorovei ma au matai God Iesu i ġaiei au mara. Ma apau i nei da i purui ma tau i eġa ita inana-melei.

10 Ma tau i ġoġouta au mara ma nelara ruaġa ai gara ararapouri au ririvai i raumairiei. 11 Ma i riwa, “Mai Galili, aiwai weka o maimairiei ma o ġoġoutatei? Wei ravana menanarena o inana i ġaenei, amapo nanare ina nememei.”

Judas epaiana i vinei

12 Anina ma Apasol Ola Olive, i voterei ma i ġaira me au Jerusalem lamna eġa uama ma au ġereġere. 13 *Ma au Jerusalem i ġeta ma i ġae numana i mamae lana au tepana au vatavatara. Tau i ai wava, Peter, John, James ma Andrew, Philip ma Thomas, Batolomeo ma Matthew, James - Apius natuna, ma Simon tauna au naona Zealot‡ ma Judas - James natuna. 14 Ma wei ravai mara patapatana i vivitagogiei ma i raruapari gogona, waivine ġelau i ma Iesu ana roaroa ma aloi Mary maiteni kampa.

15 Wei au marana, tauvitumaġana 120 i vitagogiei ma Peter i vomairi ma wenanare awari i babani, 16-17 “Varevareiu, Judas Iskariot lamna turata tagogi ma maiteni ta nola gogona, wate muriai i voagu da Iesu i pani. Arua Vivivireina wei riwana wariġa gulau David i riwei da ina tupua; ma aiwai i ririwei anina nanare i tupua.” 18 Judas Iesu i amverenei mane vainana aubaina, ma wei manenei doa i gimarai. Ma nai au doana tauna kolanei i peu ma manawana i wanawamai da amoamona i opu. 19 Ma rava anatapui au Jerusalem wei irageña riwana i nonori, lamna aubaina tau i nai dobuna ai ponei i viwawai Hakeldama, wei anona Tara Doana.

20 “Wariġa Gulau David i girugirumia, nanare i tupua,

Ana animae ina kwakwava,
ma eġa aiai au orana ina mae.

(Psalm 69:25)

Ma

rava ġelauna ana nola ina vaia.

(Psalm 109:8)

21 *Lamna aubaina marina awarita, rava ġelauna tana vinei da ina raviepaiai. Tauna ravanana Iesu maiteni ta bababara-nae madeġa tonuġa au orana, 22 John rava i babataitoi au marana ma i nae da Iesu i ġaiei au mara. Ma maiteni tana nola ma rava tana riwei menanarena God Iesu iragelei i vovaimairini.”

23 Ma tau i rava ruaġa i vinei, Joseph-Barsabas (ana wava ġelauna Justus) ma Matthias. 24-25 Anina ma tau i raupari, “BADA tam rava anatapui orai u aramanei. Ma vieġelai da wei ravai ruaġa, ma metauna u vinei da Judas ana

† 1:6: Rome gabemanina Juda i vibadei wei au marana, Mai Jew wei eġa ita ġoei, ma i ġoei da ita virai.

* 1:8: Mrk 16:15 * 1:9: Mrk 16:19 * 1:13: Mrk 3:16-19 ‡ 1:13: Rava ununurana. Wei ravai mai Rome ai gabemani e vivivieġaiei.

* 1:21: Mrk 1:9; Mrk 16:19

gabau ina vaia da ina viApasol, aubaina Judas i voterelai da i nae ana au gabu.”

²⁶ Anina ma tau i vine, ma vinevine Matthias awarina i peu, ma tauna i vi-Apasol, ma Apasol 11 au orai i rui. §

2

Arua Vivivireina i ġairai

¹ Pentecost torelana i ġetai ma tauvitumaġana anatapui numa tagogi au orana i vitagogiei. *

² Maratagogi gugura ġaeġaena, nonorana me ive vivirewapanana marei i ġairai ma tauvitumaġana i mamae numana i vioai. ³ Tau purapura inanana me ai menamenana i nanai, i ġairai ma rava tagotagogi ava au kolai i kiala. ⁴ Ma Arua Vivivireina anatapui i vioai ma pona taputapunei ava i bababani Arua ana aguei.

⁵ Nai maranaina mai Jew patupatutui dobu au anatapuna i vitaomana au Jerusalem da Pentecost torelana ita apui. ⁶ Ma patarai kampa i viruberubei, ma i nonori da gugurana lamna tauvitumaġana tau tagotagigiava ai ponei i bababani ma tau ai nota i kwa. ⁷ Tau anatapui i baei ma tau ava i babani vivira i pa, “Wei mai Galili bo?” ⁸ Ma menanarena da anataputa awarita ata ponei e bababani! ⁹⁻¹⁰ Tauta ġelauta mai Parthia, Mede ma Elam, ma mai Mesopotamia, Judea, Capadosia, Pontus ma Eisia, Pirijia, Pamphilia, Egypt ma Libya navanavana, au Sairini au ġereġerena, ma ġelauta mai Rome, ¹¹ ġelau mai Jew ma ġelau Jentail wate inibori i vaia da i vimai Jew. Ma ġelauta mai Crete ma mai Arabia. Wate God kaua ġaeġaena i kaukaueia, ata ponei i bababaniei ma ta nononori!” ¹² Tau anatapui i vinuanaina, nuanuai i raġaraġa ma i bababani vivira, “Wei aiwai kauana e tuputupua?”

¹³ Wate ġelau tau i vinamei i pa, “Wei ravai i uma bua!”

Peter rava awarii i raugugula

¹⁴ Anina ma Peter i vomairi Apasol 11 maiteni, ma ponana ġaeġaenei patara awarii i babani,

Au rava mai Jew ma anatapumi au Jerusalem maemaemi, babani ana tere-kauai da ona aramanei. Ona rautaniġana kaua. ¹⁵ Wei marinaota, 9 kilok ubaubanai! † Wei ravai eġa ita uma bua me taumi o notanotai nanare,

¹⁶ Wei lamna wariġa peroveta Joel i ririweia e tuputupua:

¹⁷ *Mara au damona,*

Aruau rava anatapui awari ana iwaġi.

Ma natunatumi nelarai ma waivinei riwau ina jimei,

ma nelara voui mataiei kaua ina inanai,

ma babada magumaguri raubonie kaua ina inanai.

¹⁸ *Wate nanare, Aruau ana iwaġi au taunola nelarai ma waivinei awarii,*

ma ina vitaubabani.

¹⁹ *Ma kaua babai au mara ana kauai,*

ma au dobu mataira ana vieġai

§ **1:26:** Wei kalona wenanare: mai Jew wava ġaima muomuoi awari i girugirumi ma e tawatawanei, ma ai ai ana namba i eġa lamna tauna ina vaia. Tau i vitumaġana da wei kauana awarinei God tau i vitaataiei da ai ai ita vinei. (Pro 16:33) * **2:1:** Mai Jew ai Raġona torelana au murina au pom 50 ma Pentecost torelana e vivikarei. Wei riwana anona amapo wei bukana au damona ona iavi ma ona aramanei. † **2:15:** Mai Jew tau i bigai sia e aniani ma wain e umaumai.

ai araratana, tara ma bau potopotona.

²⁰ *Ma madeġa ina waguwarei*

ma nawaravi ina ravitaratarai,

muriai da BADA ana mara ġaegġaena ma boruborumana ina nei.

²¹ *Nai au marana aiavoi da BADA awarina e vivigore agu aubaina BADA tau*
ina vilawani. (Joel 2:28-32)

²² *Ma Peter i babani me:*

Mai Israel ona rautaniġana: God Iesu Nasaretei i vovai-virewapani da kaua babai, ma mataira ġaegġaei i kauai da ita viatataiem i tauna anina Godei i nei. ²³ *Wate God wariġa i viogei ma ana ġoana nanare da Iesu au urami i terei, ma taumi ġo'apoapoe ravai ai agei, Tauna au korosi o tuparutui da o viragei. ²⁴ *Wate God, Iesu iragelei i vovaimairini, ma irage iniviarana i vaitawane ma irage eġa tagotagogina da tauna ita vojijini. ²⁵ Wariġa David Iesu i babaniei maranai i riwa:

Tau a inana BADA God au naou mara au anataputa.

Tauna au oieu lamna aubaina eġa ana rovo.

²⁶ *Lamna aubaina nuai ai orau i oai ma menau i morelana,*

ana irage ma a aramane i tupuau ma paina-kauai.

²⁷ *Ma aruau eġa rava irairagei ai au dobu ma voterei,*
ma tam eġa am taunola vivivireina tupuana ma voterei da ina buda.

²⁸ *Tam lawana etanaina u viatataie,*

ma Tam maiteni a mamae ma a vinuai ai kaua. (Psalm 16:8-11)

²⁹ Au rava, A riwana-kauemi da amata gulau David i'rage da i doboi, ma ana kokoaga weka e mamae. ³⁰ *Wate David lamna peroveta, ma i aramane i da God i parivainuagani da ana damei gulau ina opu, me tauna nanare. ³¹ Ma David i 'nanai God muriai aiwai ina kauai ma i riwa,

Keriso ina vomairi me,

ma tupuana eġa rava irairagei ai au dobu ina voterei da ina buda. (Psalm 16:10)

³² Ma God Iesu-na tagogina iragelei i vovaimairini, ma tauai anataputai a vimatamata. ³³ Ma God i ġaie ma au oiena i vikialai. Ma Arua vivivireina i verei me i parivainuagana nanare, ma nai Aruana tagogina Iesu awariai i waġi, lamna marina o nononori ma o inainanai. ³⁴ * David eġa ita ġae au mara, ma wate i riwa, BADA au Bada i riwei, "Au oieu ma kiala ³⁵ ma am ġavia au ae karem ana terei. (Psalm 110:1)

³⁶ Lamna aubaina mai Israel anataputi ona aramana-kauai da wei ravana Iesu o tupatuparutui, God i terei da BADA ma Tauvilawana.

³⁷ Ma maranai rava wei riwana i nononori, tauai orai i rautonai da Peter ma Apasol ġelau i riwei, "Varevareiai, tauai aiwai ana kauai da ana lawana?"

³⁸ Ma Peter i paribelei, "Taumi tagotagogi ava Iesu Keriso wavane i ona rupena ma ona babataito ma ami ġo'apoapoe i nota-tawane, ma God ana pulo Arua Vivivireina ona vaia. ³⁹ Wei parivai-nuaganana lamna taumi natunatumi maiteni aubaimi. Ma wate nanare mai jentail - aiavoi da e kwatkwatuei ina nei Tauna awarina."

⁴⁰ Ma Peter riwa ġelau maiteni rava i vinua-terenei, ma i egari, "God ona vianinei da ina vilawanimi, ma eġa kovoga ona vaia." ⁴¹ Ma rava magamaġau Peter ana babani i vitumaġane i babataito ma nai au marana rava 3,000 ai au boru i rui.

Tauvitumaġana i mae gogona

42 Ma tauvitumaḡana Apasol ai viararamana i nononori, ma i viboruboru, i amam ma i raraupari gogona. 43 Apasol kaua babai ma mataira ḡaeḡae maḡamaḡau i kaukauei ma anatapui i rovo ma God i vivirana-kauai. 44 *Ma tauvitumaḡana anatapui gabu tagogi i vivitagogiei ma aiwai ḡariei ai rava maiteni i ḡutaḡutai. 45 Tau i ai doa, ai numa, ai wapu ma ai purapura i gimagimarei ma manena ai rava ḡelau maiteni i ḡutaḡutai. 46 Tau mara patapatai au tempol i vivitagogiei, ma ai au numa ana nuaiaii ma ana morelanai i amam gogona. 47 Ma tau i God i vovoepapai ma rava anatapui i vivinuaiaini. Ma marana patapatai rava voui i neneiai Iesu awarina ma tauvitumaḡana ai boru i viviratai.

3

Peter, oroto aena ḡwaḡagwaḡana i wilawani

1 Mara tagogi au bigai 3 oklok, Peter ma John pari aubaina i ḡeḡae au Tempol. 2 Ma oroto tagogi aena ḡwaḡagwaḡana i tupuei, ma mara au anata-puna ana rava i avavara nei ai da Tempol metaetana, e ḡoreḡorei, metaeta aiaina, kampa i vivikialai ma rava i rui rui tempol au orana i vivigigimanei mane aubaina. 3 Maranai i 'nanai da Peter ma John aburuna ava da au metaeta ita rui, ma i vibaḡai mane aubaina. 4 Peter ma John orotona i 'nana-tunutuunui ma Peter i riwa, "Ma inanaiai!" 5 Ma orotona tau i 'nanai ma i notanotai da aiwai awarii ita vaia. 6 Ma Peter, orotona i riwei, "Awariu silva ma gold eḡa wate aiwai awariu lamna ana verem. Iesu Keriso Nasaretei, wavanei ma vomairi, ma babara!"

7 Ma Peter oroto nimana au oieina i vojijini ma i voaḡui da i vomairi. Ma maratagogi oroto aena ma ae kwarukwaruna i ai ma i virowapana, 8 ma aenei i viauepa ma babara i vikarei. Anina ma tau maiteni i rui au tempol ma tauna tempol oraninei i bababara, i viviauepa ma God i vovoepapai. 9 Ma rava anatapui orotona i 'nanai i bababara ma God i vovoepapai, 10 ma i aramanei da tauna ravana tagogina tempol metaetana e ḡoreḡorei *inanana aiaina* au naona, i kiakiala ma i vivigigimana. Ma rava anatapui i 'nanai aiwai i tupua wei orotona awarina ma i ba-guratana.

Peter patara awarii i babani

11 Ma orotona Peter ma John i vovojijini ma rava anatapui i bana-kauai, ma i viruberubei tau awari au lovelove e ḡoreḡorei, Solomon ana lovelove. * 12 Ma maranai Peter patarai i 'nanai ma i riwei:

Au rava mai Israel, aiwai aubaina o vivinuanaina? Ma aiwai aubaina o inainana-tunutuunui, apamina tau ai rewapani bo ai vipatutuei, wei ravana a kauai da i babara? 13 *Wei lamna amamata Abraham, Isaac ma Jacob ai God, ana taunola Iesu i viborumei, ma taumi Tauna o verenei da ita viragēni, ma Pilate au matana o geduaiei. Pilate i ḡoei da ita rupeni wate taumi eḡa ota vianinei. 14 *Iesu lamna rava vivivireina ma jijimanina, wate o geduaiei. Ma Pilate i ḡoei da Iesu ita rupeni, wate taumi o ḡoei da tauviragēna i rupeni aubaimi. 15 Ma taumi lawana maemae-nonoana tauvereina o viragēni, wate God i wilawana-melei, tauai wei a vimatematei. 16 Wei ravana aena ḡwaḡagwaḡana Iesu au wavana i vitumaḡana ma lamna

* 2:44: Act 4:32-35 * 3:11: Solomon ana lovelove tagogi tempol au orana e mamae. Wei lamna gari au rivivana ma ana tuatua maḡamaḡauna. ☆ 3:13: Exo 3:15 ☆ 3:14: Mrk 15:6-14

aubaina i lawana. Taumi o aramanei ana doria menanare, Wate ana tu-
mağana Iesu awarina i vilawani.

17 Ma au rava marina a aramanei da taumi ami babada maiteni Iesu
o virağeni, aubaina taumi eğa ota aramanei da tauna tauvilawana. 18 Wate
wei lamna wariaga God ana peroveta anapui i ririweia i tupua, God i riwa
da ana tauvilawana ina vinuapoapoe. 19 Ami ġoa apoapoe Ona voterei ma
ona mae-taviremi God awarina da tauna ami ġo'apoapoe ina nota-tawanei.
20 Ma lamna maranaina God aruami nualawalawana ina verei, God Iesu
i vinei da ami Tauvilawana ma ina paritawaneiai. 21 Iesu au Mara ina mae da
God kaua anapui ina ravivouni, me God ana peroveta vivivirei wariaga
i ririweia nanare. 22 *Moses i riwa, "BADA ami God peroveta, me tau nanare,
ina terei ma tauna ami dam oinei ina nei. Ma aiwai anapuna e ririwemi
ona rautaniğanana-kauei. † 23 *Ma aiwai da wei perovetana eğa ina rautaniğanei
lamna God ana rava awariei ina vilamonei."

24 Peroveta Samuel ma muriai Peroveta mağamağau, kaua i ririweia
marina e tuputupua. 25 *Taumi nai perovetai natunatui ma taumi maiteni
parivainuağana bagibagina au orana. Au baina God Abraham i riwei, "Am
epaepaia awariei dam anapui au dobu ana viaiaini." 26 Ma maranai God
ana faunola i vinei, ma au naona i paritawaneiai awarimi da ita viaiainimi,
ma lamnei taumi tagotagogi ava ami ġo'apoapoe ota opu-tawanei ma ota nei
Tauna awarina.

4

Jew babadai Peter ma John i etarei

1 Peter ma John rava awari i bababani ma pirisi pulo tauapuina ma tempol
taupainii* ai bada ma Sadusi ġelau † i ġetai. 2 Tau amloi i ġaiğai kaua Peter
ma John awari aubaina tau i viviararamana da God, Iesu irağelei i vovaimairini
ma wei i viatataiana da God rava anapui irağelei ina vovaimairini. 3 Tau Peter
ma John i pani ma au i pom aubaina panipani au numana i terei da i mae mara.

4 Wate rava mağamağau riwa i nonori ma i vitumağana, ma ai mağa nelara
5,000 waivine eğa ita iavi.

5 Ma mara i tom ma Jew babadai, dogadogara ma tarawatu babadai au
Jerusalem i vitagogiei. 6 Ma pirisi ġeğetelarana Annas kampa ma Caiaphas,
John, Alexander ma pirisi ġeğetelarana ana rava maiteni. ‡ 7 Ma tau Peter
ma John i neiei da au naoi i vimairini ma i riwei, "Aiwai rewapananei, ma aiwai
wavaneei wei o kauei?"

8 Arua Vivivireina Peter orana i vioai ma tau i riwei, "Rava ai babada
ma dogadogara; 9 tauai kaua aiaina a kauei gwağagawağana awarina ma
amadodo taumi o vitara-virevirelai, da menanare tauna i lawananei. 10 Ma
wei ona aramana-kauei, da taumi ma mai Israel anapui, da Iesu Keriso
Nasaretei o tuparatui, Wate God tauna irağelei i vovaimairini ma tauna wa-
vaneie wei orotona au naomi lawalawaina e maimairi. 11 Taumi tauvoa nai

* 3:22: Deu 18:15, 18 † 3:22: Mai Jew e ririwa da Moses lamna ai peroveta ġaęaena. * 3:23:
Deu 18:19 * 3:25: Gen 22:18 * 4:1: Tempol tau-painina lamna anapuna au tempol
e inainana-vaitetei (purusimani). Tau pirisi ġeğetelarana ana taunola. † 4:1: Sadusi tau irağelei
vomairime eğa ita vitumağanei ‡ 4:6: Mai Rome Caiaphas i vinei da Pirisi ġeğetelarana, poiana Annas
epaiana. Wate mai Jew ai au ġiu da aiwai pirisi ġeğetelarana vaivaina i vaia, tauna anina ina mae da au
irağe. Luke e ririwa da Annas tauna pirisi ġeğetelarana.

gaimana o geduaie, wate wei gaimana lamna numa ogona, numa ana tapuna e vovojijini. §

12 — Lamna aubaina Iesu ainelana ina vilawanita. Ma God ega aiai gelauna au dobu rewapana ita verei da ina vilawana.”

13 Ma tau i Peter ma John ai tepatora inana i marana i aramane da tau i ega girugirumai, ma i baie. Ma i aramane da tau i Iesu ana tauvota goga.

14 Ma wate i 'nanai oroto i vilawana Peter ma John maiteni i maimairi, lamna marana tau i gamoi i pota. 15 Anina ma Peter ma John i riwei da boru gabuna i opu-tawane, ma tau i ava i vitarairavira vivira. 16 Tau i vitarairavira-viravira i pa, “Aiwai tana kau e wei nelara awari? Rava anatapu i Jerusalem

i aramane da tau i kaua babai i kaukauei, lamna ega tana bovie. 17 Wate tana vi gae da wei kau i ega ina tua rava gelai awari, ma riwa bagibaginei tana vi gae da ega aiai awarina Iesu wavane i na raugugula.”

18 Anina ma tau i gori da i rui me, ma riwa bagibaginei i vi gae da ega aiai awarina Iesu wavane i na raugugula bo ina viaramana. 19 Wate Peter ma John tau i paribelei, “Taumi ami nota aiwai. Tau i God ana voteletele bo taumi?”

20 Tau i aiwai a i inainaia ma a nonoria babanina ega ana voterei.”

21-22 Wei Orotana i vilawana lamna gwa gawa gawa ma ana made ga 40. Lamna aubaina rava anatapu i God i vovoeapai, ma babada ega ita aramane menanare Peter ma John ina kovo gane. Ma i parivairovoro-melei ma i paritawane da i nae.

Tauvituma gana God i viba gai agu aubaina.

23 Peter ma John i nae me ai rava awari ma pirisi gae gae ma dogadogara aiwai i ririweia tau i viegei. 24 *Marana i tauvituma gana wei riwana i nonori, tau i anatapu i raupari gogona God awarina:

BADA tam ai gulau, Tam mara, dobu, boga ma anatapu na au orana maemaie taukaueina. 25 Tam Arua Vivivireinei am taunola, amai David gamone i u babani ma u riwa,

Aiwai aubaina rava awariai e mejimeji,

ma aiwai aubaina ai oga e taratara labalabai?

26 *Ma dobu ai gulagulai i voka kua ma babada gae gae gelai maiteni i vitagogie da*

BADA ma ana tauvilawana* maiteni i vi gavi.

(Psalm 2:1)

27 *Anina riwa kau. Wei kau i weka au Jerusalem i tupua, Herod ma Pontius Pilate, Jentail ma mai Israel maiteni i vitagogie, da am taunola vivivireina Iesu u bulobuloia i vi gavi.

28 Ma tam am rewapane ma am goane am oga menanare u taratarane i marina nanare i tupua. 29 BADA, nai ravai ai parivai-rovoro au uram ma am taunola ma vovai-virewapani da ana teporai riwam ina raugugulei. 30 Uram ma viloloi da ma vilawana ma kaua babai ma mataira gae gae ma kau e, am taunola Vivivireina Iesu wavane.

31 Ma pari au murina, tau i mepa i vivitagogie gabuna i vigo. Ma Arua Vivivireina anatapu orai i vioai. Ma ana teporai God riwana i raugugulei.

Tauvituma gana gari e i guta gutai

§ 4:11: Mai Jew ai numa gaimie i vovovai. Iesu tauna anina God ana Tempol vouna ogona. (Eph 2:19-21, Isa 28:16). * 4:24: Exo 20:11 * 4:26: Wei lamna Keriso. * 4:27: Mrk 15:1

32 ✠Tauvitumaḡana anatapui ai nota ma orai tagogi. Ma ai purapura tagogi ma eḡa aiwai ita nuanei. 33 Ma Apasol ana tepatorai ma rewapanai BADA Iesu ana iraḡe, ma ana vomairi me i raugugulei. Ma God ana viaiaina ḡaeḡaena tau anatapui awari i peu. 34-35 Ma tau i orai eḡa aiwai ita voladaḡei aubaina, ai rava ḡelau ai doa bo ai numa i gimagamarei ma manena i neneiai Apasol awari i tereterei, ma ai ai da aiwai i vovoladaḡei nanare i vovoagui.

36 Me Joseph, tauna Levi ana damei, au Saipras i tupua, ma Apasol tauna i ḡoreḡorei Barnabas, wei wavana anona lamna tauduḡu. 37 Tauna ana doa i gimarei, ma manena i neiai da Apasol awari i terei.

5

Ananias ma Saphaira

1 Anina ma Ananias awana Saphaira maiteni ai doa navanavana i gimarei. 2 Ma airuaḡa i vianina tagogi da mane navanavana i nuanei, ma Ananias mane navanavana i naiei da Apasol awari i terei.

3 Anina ma Peter tauna i vitaravirevirei, “Ananias aiwai aubaina Satan u vianinei da au oram i rui ma Arua Vivivireina u morui, ma doa u gimagamarei manena navanavana u nuanei? 4 Doa lamna tam ḡarime i da uta gimarei bo eḡa. Ma maranai u gimarei lamna manena tam ḡarime i da uta verenei, aiwai aubaina nota apoapoena au oram i rui? Tam eḡa rava awarina uta moru, wate God awarina u moru.” 5-6 Maranaina Ananias wei riwana i nononori, tauna i peu da i raḡe. Anina ma nelara i rui da tupuana i umai ma i naiei da i doboi. Ma aiavo i da wei riwana i nonori i rovo kaua.

7 Tau i eḡa ita mae guratana, ora tonuḡa nanare ma awana i nei, aiwai i tupua eḡa ita aramanei. 8 Ma Peter wavine i paridadanei, “Abe uta riweu, tam awam Ananias maiteni doa o gimagamarei maiana anina wei bo?” Ma tauna i paribelei, “Ee, doa maiana anina nai.”

9 Ma Peter i riwa, “Aiwai aubaina taumi o vianina da BADA Aruana ota raudadani? Nelara i awam i dobodobo ma inana i au metaeta da tam maiteni ina avara-opunem.”

10 Maratagogi wavine Peter au ae karena i peu da i raḡe. Maranai nelara i rui au numa ma i 'nana i da wavine i raḡe, anina ma i avara-opunei da awana au ririvana i doboi. 11 Lamna maranaina ekalesia anatapui, ma rava aiavo i da wei riwana i nonori i rovo kaua.

Apasol rava maḡamaḡau i vilawani

12 Ma Apasol mataira ma aniba kauai maḡamaḡau i kaukauei rava awari. Ma tauvitumaḡana Solomon ana au lovelove i vivitagogiei. 13 Wate rava ḡelau ai au boru ruina i rovoei, wate rava tau i vivirana-kauai. 14 Wate nelara ma waivine maḡamaḡau Iesu awarina i vitumaḡana ma tauvitumaḡana ai au boru i ruirui. 15 Ma lamna aubaina rava ai rava doridoriai i avavara-opunei au eta ma ai au animatave i vimataveni, da Peter inii ita vodadani bo eḡa da ḡouna tau i ita ḡouni da ita lawana. 16 Ma melagai ḡelau Jerusalem au ririvana ravai maḡamaḡau ai rava doridoriai, ḡelau arua-apoapoei i ruiruinia i neiai ma anatapui i vilawani.

17 Anina ma pirisi ḡeḡetelarana ma ana rava mai Sadusi anatapui orai unura i oai. 18 Ma Apasol i pani, ma panipani au numana i terei. 19 Wate waguvarai BADA ana anela i nei da panipani numana metaetana i votawanei, ma tau i taravaina-opunei ma i riwei, 20 “Ona rui tempol au orana, ona mairi

ma lawana vouna riwana anatapuna rava ona pariveri.” ²¹ Anela i ririwei nanare, tau i tempol i rui ma rava viararamanai i vikarei. Nai maranai piri si gegetelarana ana rava maiteni i getai ma boru gaegaena e goregorei Sanhedrin i terei. Ma rava i paritawanei au panipani numana da Apasol ita nei ai awari. ²² Tau i panipani au numana i geta ma i baina-avei, ma i naeme da i viega. ²³ I pa, “Panipani numana anina i gudu-kauei, ma tauvipaipai au metaeta i maimairi; wate maranai tau ai metaeta a votawanei lamna ega ai ai kampa.” ²⁴ Maranai tempol taupainina ai bada ma piri si babadai wei riwana i nonori, tau i vinuanaina da aiwai i tupua.

²⁵ Ma rava tagogi i nei ma i riwa, “Ona rautani gāna! Nelara panipani au numana o teretereia, tau au tempol e maimairi ma rava e viararamani.” ²⁶ Anina ma tempol taupainina ai bada, ma babada gelau i maiteni i nae ma Apasol i nei ai. Tau i rovo ma ega ita egari mepa da rava gaime i ita ravi.

²⁷ Ma Apasol i nei ai boru gegetelarana au naol, ma piri si gegetelarana tau i vitara-virevirei. ²⁸ I pa, “A riwana-guratemi da wei ravana au wavana avena ota viararamana, wate ami viararamana i tua da Jerusalem i oai. Ma wei ravana tarana wavana tau ai o vereverelai.”

²⁹ Ma Peter Apasol gelau i aubai i vitauvibabani i pa, “Tau ai God ana voteletelei ma ega rava. ³⁰ Taumi Iesu au *korosi* o tuparatui ma o vira gēni, wate amamata ai God Tauna i vovaimairini. ³¹ Ma marina Tauna God au oiena e kiakiala, Tauna BADA ma Tauvilawana, Da mai Israel ai go’apoapoe ina rupeni, ma ai go’apoapoe ina nota-tawanei. ³² Ma tau ai Arua Vivivireina maiteni wei kau ai anapui mataielai a inana i. Ma nanare God Arua Vivivireina i paritawanei rava votelatelai awari.”

³³ Tau i wei babanina i nonori ma amloi i gāigai kaua, ma i goei da Apasol ita vira gēni. ³⁴ Wate Pharisi ma tarawatu badana wavana Gamaliel, rava anapui wei ravana e vivivirei. Tauna Sanhedrin boruna au orana i mairi, ma rava i riwei da Apasol i opunei au doa mara aburuna ava. ³⁵ Anina ma ana rava i riwei, “Mai Israel, ona inana kaua ma muriai da aiwai wei ravai awari ona kauei. ³⁶ Mara tagogi oroto wavana Theudas vi gavia i vikarei ma i kauana-melei da tauna rava gaegaena, ma rava ai ma ga 400 nanare tauna i voga goga goi. Ma maranaina tauna i vira gēni ana tauvoga goga go i vilamonei ma aiwai anatapuna kampa i kwa. ³⁷ Wate tauna au murina oroto Galiliei wavana Judas i geta, census au marana ma rava ma gama gaudi tauna i voga goga goi, ma tauna maiteni i vira gēni, ma ana tauvoga goga go i vilamonei. ³⁸ Lamna aubaina a ririwemi da wei ravai ona voteretawanei! Mepa da tau ai nola ravei, amapo ina peu. ³⁹ Wate mepa da Godei, taumi ega tagotagogina da wei ravai ona vi gaei, taumi mepa da God o vivigaviei.”

⁴⁰ Tau i Gamaliel ana babani i voteletelei. Ma Apasol i riwei da i rui, ma i wipiei i kwapui ma i vi gaei da Iesu wavanei ina jima, ma i paritawanei da i nae.

⁴¹ Aubaina i aramanei da God tau i vinei da Iesu wavana aubaina ina vinuapoapoe. Anina ma Apasol ana nuaiai Sanhedrin i opu-tawanei, ⁴² Tau i mara patapatana tempol au orana ma au numa God riwana aiaina i raraugulei ma i vi viararamana da Iesu tauna Keriso.

6

Stephen i vinei tauvoaga

¹ Tau vituma gāna ai boru i rarata, ma au orai mai Jew Greek taubabanieina, mai Jew kampa maema ei i viamparipariei. Tau i beubeura da ai kaikaia baba ai guta ega ita tereterei. ² Anina ma Apasol 12 tau vituma gāna ai boru i raukwatuei.

Ma i riwei, “Tauai Apasol ma ai nola lamna God riwana ata jimejime ma avena mane nolana maiteni ata kaukauei. ³ Lamna aubaina au rava, awarimi rava 7 ona vinei, tau i orai Arua Vivivireina i oai ma nuaulaulai da wei nolana ina kauai, ⁴ Ma tauai ai nola da pari ma God riwana ava ana jime!”

⁵ Rava anatapu i wei ogatarana i vianinei, ma Stephen i vinei, Arua Vivivireina orana i oai, ma ana tumaḡana God awarina i rata kaua. Ma nanare Philip, Prokoras, Nikano, Timon, Pamenas ma Nicolas tauna Jentail, Antiokei ma ini bori i vaia ma i vikeresiana. ⁶ Ma wei ravai i neiai ma Apasol nimai tau i tepai i terei ma i raupariei.

⁷ Anina ma God riwana i vituai ma au Jerusalem rava maḡamaḡau i Iesu i vitumaḡanei, ma nanare pirisi maḡamaḡau i vitumaḡana.

Stephen i pani

⁸ Anina ma God Stephen i viaiaini ma i vovai-virewapani da mataira ma kaua babai i kaukauei rava awari. ⁹ Wate mai Jew ḡelau i provins nununai i nei mai au Sairini, mai Alexandria, ma Silisia ma Eisia ai parinumanana e ḡoreḡorei panipani *waduboi, Stephen ana ḡavia i vomairi. ¹⁰ Wate Arua Vivivireina, Stephen nuaulaula ma riwa i verei ma i bababani da tau i vigaopotai. ¹¹ Lamna aubaina tau i rava ḡelau i gwalai da moruei Stephen ita vibenabenamei, ma ita riwa, “Tauai a nonori Stephen, Moses ma God i vivijiboḡi.” ¹² Ma lamnei patara i viamlo-ḡaiḡaini, dogadogara ma tarawatu babadai maiteni. Anina ma tau i Stephen i vojijini ma i naiei mai Jew ai Boru ḡeḡetelarana† awarina. ¹³ Ma tau i rava ḡelau i neiai da moruei Stephen i vibenabenamei, ma i riwa, “Wei ravana mara patapatana Tempol vivivireina ma Moses ana tarawatu i vivijiboḡi. ¹⁴ Tauai a nonori i riwa da Iesu Nasaretei tempol ina rikai ma tarawatu Moses i verevereta anatapu i maiteni ina virai.”

¹⁵ Ma rava anatapu nai au boruna i kiakiala, Stephen i nana-tunutunui, ma i nana da tauna naona i lalalai me anela.

7

Stephen ana babani.

¹ Anina ma Pirisi ḡeḡetelarana Stephen i paridadanei, “Wei viwavuna, riwa kaua bo?” ² *Stephen i paribelei:

Varevareiu ma amamau, au babani ona rautaniḡanei. God boruborumanana noita Abraham awarina i eḡa au Mesopotamia, muriai da ita nae au Haran. ³ Ma God tauna i riwei, *Am dobu ma am dam ma netawanei da ma nae dobu ana viatataiem lana.* ⁴ *Anina ma Abraham Mesopotamia i netawanei ma i nae da au Haran i mae. Amana i raḡe ma au murina God Abraham i paritawanei da marina dobuna o mamae lana kampa ita mae, ⁵ *Nai maranaina God eḡa Abraham doa ita verei, eḡa aburu dadadana! Wate i parivainuagani, da ina verei tauna ma ana epaepaia aubaii. Nai au marana Abraham eḡa natunatuna, ⁶ *ma God wenanare Abraham i riwei, *Am epaepaia au dobu ḡela ina mae ma ina vitaunola, nai dobuna ravai tau i ina rau-iviapoapelei da madeḡa 400 ina kwa.* ⁷ *Wate ravai, awarii e vivitaunola

* **6:9:** Wei ravai lamna slave waduboi, marina i voterei da ana ḡoanei e mamae. † **6:12:** Sanhedrin.
 * **7:2:** Gen 12:1 * **7:4:** Gen 12:4 * **7:5:** Gen 12:7; 13:15; 17:8 * **7:6:** Gen 15:13-14 * **7:7:** Exo 3:12

ana kovog'i, ma muriai mai Israel ina opui ma wei au dobuna ina voepaepaiu. 8 *Anina ma God inibori parivai-nuaganana bagibagina Abraham maiteni i kauai, ma maranai Isaac i tupua ma au pom vi-8-na Abraham natuna inina i bori. Muriai Isaac natuna Jacob inina i bori, ma nanare Jacob natunatuna 12 anatapui inii i bori. Wei babadai lamna tauta noinoita.

9 *Jacob natunatuna varee Joseph i unurei ma i gimarei da ita vitaunola au Egypt, wate God tauna awarina i mae. 10 *Ma ana au nuabola i gagaloei. Ma God nuaulaula i verei ma i kauai da Egypt ai gulau nuanuana i vaia, anina ma i terei da Egypt i vibadei ma ana numa orana i vibadei. 11 *Ma gomara gae'gaena i geta au Egypt ma au Canaan, ma vinuapoapoe gae'gaena i tupua. Ma noinoita ega ai lam. 12 Ma maranai Jacob i nonori da au Egypt lam, ma noinoita i paritawanei au Egypt, wei ai babara naona. 13 Ma muriai i nae me ma wei maranai Joseph i vie'gana-melei varevareina awarii, ma kampa mai Egypt ai gulau Pharaoh, Joseph ana numa ravai i aramanei. 14 *Anina ma Joseph riwa i paritawanei amana Jacob awarina ma i riwei da ana numa ravai anatapui, ai maga 75, ita nei au Egypt. 15 *Anina ma Jacob i nae au Egypt. Tauna kampa i'rage ma nanare natunatuna anatapui. 16 Taubeui i naiana-melei au Shekem ma Abraham Hamor natunatuna awarii kokoaga i imagimaraia, kampa i vimataveni.

17 *Maranai mara i tugeregerei da God Abraham i paripari-vainuaganiana ita kauai, ata patara i maga guratana au Egypt. 18 Ma Pharaoh vouna au Egypt i vibada ma tauna noita Joseph ega ita aramanei. 19 *Tauna amamata i morui ma i rau-iviapoapoelei, i egari da natunatui melamelai numei i viopuni da ita irage. 20 *Wei au marana Moses i tupua, tevera inanana aiaina. Amana ma alona natui i gamoi da nawaravi tonuga i kwa. 21 *Ma maranai tevera numei i tere-opunei, gulau natuna guguinina tevera i vaia ma i gamoi da natuna. 22 Ma mai Egypt ai nuaulaula Moses i viaramamani ma i viREWAPANA, babani ma nola awarina.

23 *Moses ana madega 40 ma i nota da ita nae ana dam ravai ita raugenari. 24 Ma i 'nanai da Egyptei, Moses ana rava oina i raviravi, ma tauna turana bainei Egyptei i vunui da i virageni. 25 Moses i notai da ana rava ita aramanei da God tauna i paritawanei da ita agui da Egypt ita oputawanei. Wate tui wei ega ita aramanei. 26 Ma maratamna Moses i nae me ma ana rava rua'ga i vigai'gaiawa i 'nanai, ma i riwei, "Taumi ava ma aiwai aubaina o vigai'gaiawa?" 27 Wate gaiawa tauvikareina Moses i vokaririi ma i riwei, "Tam ai ai i terem da ma vibadelai bo tauai ai taurauetara? 28 Tam ma virageniu me pom Egyptei u virageni nanare bo?" 29 Maranai Moses wei i nonori tauna Egypt i ruba-tawanei ma i nae au Midian, wei ega ana dobu wate kampa i mae. Muriai dobuna wavinena i rava'gi ma natunatuna nelarai rua'ga i tupua.

30 *Ma kampa i mae madega 40 i kwa ma BADA ana anela au mutulua

* 7:8: Gen 17:10-14; Gen 21:2-4; Gen 25:26; Gen 29:31-35:18 * 7:9: Gen 37:28; Gen 39:2-21
 * 7:10: Gen 41:39-41 * 7:11: Gen 42:1-2 * 7:14: Gen 45:9-10, 17-18 * 7:15: Gen 46:1-7; Gen 49:33 * 7:17: Exo 1:7-8 * 7:19: Exo 1:10-11; Exo 1:22 * 7:20: Exo 2:2 * 7:21: Exo 2:3-10 * 7:23: Exo 2:11-15 * 7:30: Exo 3:1-10

ola Sinai au ġereġerena tauna awarina i eġa, inananana me ai menamenana ai aburuna rugurugui au orana i ġeġae. ³¹ Wei i 'nanai ma i baei ma i nae au ġereġere da ai arata ita tuvirevirei ma i nonori BADA i riwa i pa, ³² "Tau amamam ai God, Abraham ma Isaac ma Jacob ai God." Maranai Moses wei i nononori i rovo kaukaura ma naona i tere-govaġi. ³³ Ma BADA i riwa, "Am ae uma ma votawane! Wei gabuna au tepana e maimairi, lamna doa vivivireina ma Vიაianana. ³⁴ A inananai menanare mai Egypt, natunatu e rarau-iviapoapelei. Ai ora-tou a nonori ma a ġairai da tau i ata vai-tawanei. Ma marina ma nei, Tau ana paritawanem au Egypt."

³⁵ ✧ Stephen i riwa:

Wei Moses na tagogina, mai Israel i parivirevirei i pa, "Aiai i terem da tauai ma vibadelai ma ma rautarelai?" Moses i paritawaneiai da ita vibademi ma ita tereopunemi, anela i eġaeġa ai menamenana au poui, ana aguei. ³⁶ ✧ Ma Moses tau i Egypte i ravana-opunenei ma mataira babai ma vivirewapanai i kaukauei au Egypt, Boga lebalabarina ma ai au vaġai madeġa 40 au mutulua. ³⁷ ✧ Wei Moses-na tagogina, mai Israel i riwei, "God muriai peroveta ami damei ina paritawaneiai me tau." ³⁸ ✧ Moses Israel patarana maiteni Egypt i opu-tawanei i vitagogiei au ola Sinai ma anela Moses awarina i bababani, tauna kampa noinoita maiteni. Ma riwa mamae-nonoana i nonori ma wei lamna i veredamanei tauta awarita. ³⁹ Wate noinoita Moses i parivirevirei ma au orai i ġoei da ita nae me au Egypt. ⁴⁰ ✧ Ma tau i Aaron i riwei, "Nai ravana Moses, Egypte i taravai-opunelai, tauai eġa ata aramanei aiwai awarina i tupua. Ma tauai ai god kokoitau ma kauei da ina rautaraveniai." ⁴¹ ✧ Anina ma bulumakau ġaubona kokoitauna i kaukai, ma pulo i apui awarina ma i amei ma i umei, da aiwai uraiei i kaukauei i vimae-ġaeġaeni. ⁴² Wate God tau i mae-puputei ma i voterei da ubona ma nawaravi ma madeġa au mara i vimae-ġaeġaeni. Wei lamna peroveta nununai i ririweia i tupua:
Rava mai Israel! Maranai madeġa 40 au mutulua.

Taumi eġa Tau awariu ġamoġamo ota vunui ma ota apui tapa?

⁴³ Taumi ami god Molek ana numa gara ma ami ubona god kokoitauna *Rephan o avarai.*

Kokoitau o kauei da ota vimae-ġaeġaeni.

Lamna aubaina rava borui ami au dobu ina vainimi ma ina naiemi aueia,

Babilon ina netawanei da dobu au ġelauna.

(Amos 5:25-27)

⁴⁴ ✧ Noinoita, God ana numagara, i avarai maranai au mutulua i mamae. Moses wei i voai, me God i viatataiei nanare. ⁴⁵ Muriai Joshua noinoita i rautaraveni ma God ana numagara i avarai ma ana aguei i rui ma nai dobuna ravai i viopuni ma ai dobu ta vaia. Ma numagara kampa i mae da gulau David ana au mara.

⁴⁶ ✧ God, David nuanuana i vai-kauei ma David i vibaġa da tauna God ana numa ita voai. ⁴⁷ ✧ Wate David eġa numa ita voai ma natuna Solomon numa i voai. ⁴⁸ Wate God ġeġetelerana eġa rava uranei numa ita voavoai au orana ita mamae, me peroveta wariġa i riwa i pa:

✧ 7:35: Exo 2:14 ✧ 7:36: Exo 14:21; Num 14:33 ✧ 7:37: Deu 18:15, 18 ✧ 7:38: Exo 19:1-20:17

✧ 7:40: Exo 32:1 ✧ 7:41: Exo 32:2-6 ✧ 7:44: Exo 25:9, 40 ✧ 7:46: 2Sa 7:1-16 ✧ 7:47:

1Ki 6:1-38

49-50 *Aubaina Tau aiwai anatapuna au mara ma au dobu a kauēi. Tapa?*

BADA i riwa, “Mara* au anikiala
ma dobu aeu kareu aniterenana.

Wate numā aiwaina ona voai tau aubaiu? Eḡateni!

Tau au animae-kaua mepa? Eḡa mepa!

(Isaiah 66:1-2)

51 Ma Stephen i riwa:

Taumi orami badobadoi. Ma eḡa ota ḡoeḡoei da God ona voteletelei ma taniḡami o vopotai da ana riwa eḡa ota nononori. Taumi Arua Vivivireina o vivigaviei me noinoimi i kaukauei nanare. 52 Noinoimi metau i perovetai eḡa ita rau-iviapoapoelei. Wariaḡa perovetai, God ana tauvilawana, ana nei i vinolenolei; Wate noinoimi wei perovetai maiteni i viragēni. Ma marina Tauna i nei ma o vibenabenamei ma o viragēni. 53 God ana anela i paritawaneiai da ana tarawatu noinoita i verei, wate taumi tarawatuna eḡa ota voteletelei.

Stephen ḡaimei i viragēni

54 Maranai babada wei riwana i nonori ma i meji guratana ma ivoi i uta-giriḡiriei Stephen awarina. 55 Wate Arua Vivivireina Stephen orana i oai, i taepai au mara ma God ana boruma i 'nanai, ma Iesu God au oiena i maimairi. 56 Ma i riwa, “Ona inana! Mara metaetana i wanatawanei ma Rava Natuna a inainanai God au oiena e maimairi.” 57 Marina tau i anatapui taniḡai i vopotai, i vigaragarei ma Stephen aubaina i ruba, 58 ma i taina-opunei au doa, taon i opu-tawanei da au ririva ma ḡaimei ravina i vikarei. Ma tauviwavu ai kwama i votawanei ma tevera laragana wavana Saul au aena i vidamni. 59 Tau i virauraei ma tauna i raupari i pa, “BADA Iesu, aruau ma vaia! 60 Ma ae-tutunei i peu ma i garara, “BADA ai ḡo'apoapoe ma nota-tawanei.” Wenanare i riwa ma i rage.

8

1-2 Ma Saul kampa da Stephen ana irage i 'nanai ma i vianinei. Rava patupatutui ḡelau ana toutoui ma ana tarakwatui i nei ma Stephen taubeuna i naiei ma au kokoaga i terei.

Saul Ekalesia i rau-iviapoapoelei

Nai maranaina rau-iviapoapoe ḡaeḡaena i vikarei ekalesia awarii au Jerusalem, Ma anatapui i viruba-tomana au Judea provins ma Samaria provins. Apasol ava au Jerusalem i mae. 3*Wate Saul i vikarei da ekalesia ai boru ita viamoai. Numa anatapui i ruini ma nelara ma waivine i taina-opunei ma i paritawanei au panipani-numana.

Philip au Samaria

4 Wate tauvitumaḡana Jerusalem i rubaruba-tawanei taon ma dobu anatapuna i naeni ma Riwana Aiaina i raugugulei. 5 Ma Philip i nae au taon tagogi au Samaria ma kampa BADA ana Vinevine Keriso i raugugulei. 6 Maranai patarana, Philip i raruugugula i nonori, ma i 'nanai kaua babai ma mataira ḡaeḡae i kaukauei tau i anatapui orai taputapunei i rautaniḡana. 7 Tauna arua-apoapoei rava maḡamaḡai au orai i egari da ana garagararai i viopuopuana,

* 7:49-50: Wei anona lamna Bada wenanare natuna i riwei, “Tam au oieu ma kiala ma am ḡavia au ae kareu ana tuvaideoedoei” ☆ 8:3: Act 22:4-5; 26:9-11

ma nanare rava maḡamaḡau i gwaḡagwaḡai ma sigesigei i vilawani. ⁸ Ma nuaiai ḡaeḡaena i mae nai au taona.

Simon tauna barabaravuna

⁹ Wenanare, nai au taona oroto tagogi i mae wavana Simon, ma tauna wariaga ava ana baravu i kaukauei ma mai Samaria i baibaiei. Ma i voepaepana-melei da tauna rava ḡaeḡaena. ¹⁰ Rava labalababa, ma wavai naenaeni anata-pui ana babani i rarautaniḡana-kauei ma i ririwa, “Tauna, God ana rewapana e ḡoreḡorei, Rewapana Gaeḡaena.” ¹¹ Tau i vineneḡanana-kauei aubaina mara nonoa tau Simon ana baravu i baebaei. ¹² Wate tau Philip i vitumaḡanei maranai, God ana vigulau Riwana Aiaina ma Iesu Keriso rava awari i raugugulei. Ma lamna aubaina nelara da waivine i nei da i babataito. ¹³ Simon maiteni i vitumaḡana ma i babataito. Ma Philip mepa i nenaē tauna kampa aubaina kaua babai ma mataira vivirewapanai i kaukauei. Tauna wei pulona i bana-kauei.

¹⁴ Maranai Apasol au Jerusalem i nonori da mai Samaria, God Riwana i vitumaḡanei, tau Peter ma John i paritawane awari. ¹⁵⁻¹⁶ Ma au Samaria i ḡeta ma tau i raupariei da Arua Vivivireina ita rui au orai. Aubaina tau Iesu wavane i ava i babataito. Ma arua vivivireina eḡa ita rui. ¹⁷ Peter ma John urai tau i tepai i terei ma i raupari da Arua Vivivireina au orai i rui. ¹⁸ Maranai Simon i 'nanai da mai Samaria Arua Vivivireina i vaia, maranai Apasol urai au kolai i terei, ma Simon mane i vilololoi, ¹⁹ ma i vibaḡa i pa, “Tau maiteni nai rewapanana ma vereu da rava au kolai urau ana terei ma tau Arua Vivivireina ina vaia.” ²⁰ Wate Peter i paribelei i pa, “Anina da God tam am mane maiteni ina tawanem ai au menamenana, aubaina tam e notanotai da God ana pulo manelei ma gimarai! ²¹ Tam wei nolana au orana am gabu eḡa ita mamae, aubaina oram eḡa ita ai God au matana. ²² Am nota apoapoe ma votere-tawanei. Ma mae-tavirem BADA awarina ma ma vibaḡai da am nota apoapoe ina nota-tawanei. ²³ Aubaina a inanim da unura oram i oai tauai awariai ma wei notai apoapoei e panipanim.” ²⁴ Simon marina Peter ma John i riwei, “Aubai BADA awarina ona raupari da aiwai o ririwei eḡa ina tupua awariu!”

²⁵ Ma Peter ma John ai lawana ma BADA Riwana Aiaina ekalesia voui awari i raugugulei. Ma i raugugula nae Mai Samaria ai au taon nununai da i ḡeta au Jerusalem.

Philip ma Ethiopie

²⁶ Mara tagogi BADA ana anela, Philip i riwei, “Ma vokaukaia ma ma nae au rauanaḡei, etanai au Jerusalem da e ḡaiḡaira au Gaza.” (Wei etanaina lamna au mutulua). ²⁷ Anina ma Philip i vokaukaia ma i nae. Ma wei au etanaina oroto Ethiopie i 'nanai. Tauna mai Ethiopia ai kwin Kandake, ana mane taupainina. Wei orotona i nae au Jerusalem God viborumana aubaina, ²⁸ ma i nenaē-me ana au dobu. Ma ana au chariot i kiala ma wariaga peroveta Isaiah buka i girugirumia i 'aiavi. ²⁹ Ma Arua Vivivireina Philip i riwei, “Ma nae ma chariot au ririvana ma babara-nae.” ³⁰ Anina ma Philip i ruba chariot au ririvana ma i nonori badana peroveta Isaiah ana buka i 'aiavi. Ma Philip i paridadana, “Aiwai e iaivia e araramanei bo eḡa?” ³¹ Orotona i paribelei, “Menanare ana ramananei mepa da rava eḡa ita parivai-araramaniu!” Ma

Philip i vibaḡai da i ḡeta da au ririvana i kiala. ³² Buka au orana, wei riwana i 'aiavi,

*Tauna i taravaina-naiei me sipu viragēnana aubaina
me sipu natuna e genugenuana maranai aparana e boribori,
tauna eḡa aiwai ita latoni.*

³³ Tauna i vijiboḡi ma i vinimalamalai ma eḡa ita kauana-kauei awarina.
Aiai ana epaepaia ina babaniei.

Aubaina ana mara au dobu i vaitawanei.” (Isaiah 53:7-8)

³⁴ Ma orotona, Philip i paridadanei, “Isaiah e babaniana-melei bo rava ḡelauana e babaniei?” ³⁵ Ma Philip, wei riwana awarina i vikarei ma riwa ḡelauai maiteni ma Iesu Riwana Aiaina i viararamani. ³⁶ Ma i nenaē da waira i 'nanai ma Ethiopiei i riwa, “Ma inana waira noi, aiwai aubaina da eḡa ana babataito?” ³⁷ * ³⁸ Badana, chariot taurubeina i riwei, “Chariot ma vojijini” Ma tauna ma Philip i ḡaira waira au orana ma Philip, badana i babataitoi. ³⁹ Maranai wairei i ḡeta, BADA Aruana maratagōḡi Philip i vai-tawanei ma turana eḡa ita inana-melei, ma ana morelanana i nae ana au dobu. ⁴⁰ Wate Philip au Asotus i rauēḡa ma dobuna i naeni ma Riwana Aiaina i raugugulei da au Caesarea taon i ḡeta.

9

Saul i vitumaḡana

¹ Wate Saul amapo da i mejimeji ma i ḡoeḡoei da BADA ana tauvitumaḡana ita viragēni. Ma i nae Pirisi Getelarana awarina, ² ma i vibaḡai da pepa ita girumi boru-numai babadai awarii au Damaskas da rewapana ita verei da Iesu ana etanai tauvitumaḡanai, nelara ma waivine ita pani ma ita neiai au Jerusalem.

³ Ma Saul, Damaskas i tuḡereḡerei, nanare ma lalalaina marei i ḡairai da tauna i ravilalai. ⁴ Tauna i peū au doa ma pona i nonori awarina i babani i pa, “Saul, Saul! Aiwai aubaina e rarau-iviapoapooleu?”

⁵ Saul i paridadana, “Tam aiai bada?”

Ma pona i paribelei, “Tau Iesu, tauna e rarau-iviapoapoolei! ⁶ Marina ma vomairi ma ma rui au Damaskas, ma kampa aiwai ina riwem ma kauei.”

⁷ Nelara Saul maiteni i nenaē i mairi kwakwa, ana gamopotai, tau pona i nonori wate eḡa aiai ita inana. ⁸ Ma Saul au doa i matamatave i vomairi ma matana i kala, wate eḡa aiwai ita inana. Ma ana rava i raunimavoai ma i taravaina-naiei au Damaskas. ⁹ Ma au pom tonuḡa eḡa ita inana, eḡa ita am bo ita uma.

¹⁰ Au Damaskas tauvitumaḡana i mae wavana Ananias. BADA ana au inana i viatataiei i pa, “Ananias!”

Ma i paribelei, “Bada, tau weka!”

¹¹ BADA tauna i riwei, “Etanai wavana Etanai Jijimanina ma vaia da Judas ana au numa, kampa oroto Tarsusei wavana Saul ma baiei. Tauna marina e raraupari awariu. ¹² Ma ana au inana i 'nanai oroto wavana Ananias i nei awarina ma urana au inana i terei da ita inana-me.”

¹³ Wate Ananias i paribelei, “Bada, rava maḡamaḡau i riweu da wei ravana ana kaua i apoapoe kaua tauvitumaḡana awarii au Jerusalem! ¹⁴ Ma weka i nei pirisi ḡaeḡaei ai rewapanei da aiai wavam e viviborumei ina pani.”

¹⁵ Wate BADA, Ananias i riwei, “Ma nae! Tau a vinei da aubaiu ina vitaunola ma wavau ina jimei, Jentail ma ai gulagulau awarii ma nanare mai Israel

* 8:37: Buka wadubo nonoana vs 37 eḡa ita mamae.

awarii. ¹⁶ Tau ana viatataiei da aubaiu ina jima ma rau-iviapoapoe gāeāena ina nei awarina.”

¹⁷ Anina ma Ananias i gēta au numa ma i rui. Ma urana Saul au tepana i terei ma i riwei, “Vareiu Saul, BADA Iesu, Tauna au etanaī awarim i ega maranai weka u nenei, i paritawaneu awarim da ma inana me ma Arua Vivivireina oram ina vioai.” ¹⁸ Maratagogi purapura inanana me iana wenavina au matana i peu, ma tauna, inana me. Ma i vomairi ma i babataito. ¹⁹ Ma i am ma ana rewapana i vai-melei.

Saul au Damaskas i raugugula

²⁰ Ma tauna maratagogi i nae ma pari au numai i raraugugula da Iesu anina God natuna. ²¹ Tau i aiavoi da Saul i nonori i ba kaua ma tau i ava i babani vivira i pa, “Wei ravana tagogina, rau-iviapoapoe gāeāena Iesu ana tauvitumaḡanaī awarii i kaukauei au Jerusalem bo? Tauna i nei weka nolana tagogina aubaina da tauvitumaḡana ita pani ma ita naiei Pirisi babadai awarii bo.” ²² Wate Saul ana raugugula i virewapana kaua ma lamnei mai Jew au Damaskas i aramanei da Iesu anina Keriso, Vinevina, ma lamna aubaina ana babani ega ita parivirevirei.

²³ Ma au pom biaḡa au murina Jew babadai i viogatara da Saul ita virāḡeni. ²⁴ Mai Jew marai ma waguvarai taon garina au metaetana i vipaipai da Saul ita virāḡeni. Wate Saul ai ogatara riwana i nonori. ²⁵ Ma waguvarai tauvitumaḡanaī ḡelau ai bada Saul i taravaini ma iriga gāeāena au orana i poi ma gavogavo aburuna taon au garina, kampa ḡuravei i tere-ḡairei au doa ma i ruba.

²⁶ Saul i gēta au Jerusalem ma maranai i ḡoei da tauvitumaḡanaī ai au boru ita rui. Wate tau i roveoi ma ega ita vitumaḡanei da tauna Iesu ana tauvotaḡotaḡo. ²⁷ Wate Barnabas tauna i taravaini ma i naiei Apasol awarii, ma i riwei menanare au etanaī Saul, BADA i nanai ma aiwai awarina i babaniei. Ma menanare au Damaskas ana tepatorana i raugugula Iesu wavanei. ²⁸ Anina ma tau i Saul i taravaini ma maiteni i mae ma Jerusalem i naeni ma ana tepatorai i raugugula BADA wavanei. ²⁹ Ma nanare Saul mai Jew pona Greek taubabanieina maiteni i babani ma i viparipariḡai, ma tau i viogatara da tauna ita virāḡeni. ³⁰ Maranai tauvitumaḡana ḡelau wei i nonori, ma Saul i taravaina-naiei au Caesarea da i paritawanei au Tarsus.

³¹ Anina ma ekalesia au Judea, Galili ma Samaria ana nuubaii i mae. Ma Arua Vivivireina ana aguei ekalesia ai tumaḡana i vovai-virewapani, Ma ai boru i rarata, ma tau i BADA i vivirana-kauei.

Aeneas ma Dorkas

³² Nai maranaina Peter dobu maḡamaḡau i naeni, ma God ana tauvitumaḡana awarii i gēta au Lidda. ³³ Kampa oroto wavana Aeneas i nelaḡai, tauna gwaḡagwaḡana madeḡa 8 ana au aravi i matave. ³⁴ Peter i riwa, “Aeneas, Iesu Keriso i vilawanim! Ma vomairi ma am aravi ma noui!” Ma maratagogi i lawana. ³⁵ Anina ma rava maḡamaḡau au Lidda ma Sharon wapuna melagaina, i mae-tavirei BADA awarina.

³⁶ Au Joppa tauvitumaḡana tagogi wavana Tabitha (Greek ponanei lamna Dorkas) tauna marana patapatana kaua maḡamaḡau aiiai i kaukauei molamokai aubaii. ³⁷ Wei marana tauna i doria ma i raḡe ma tupuana i oḡai ma numa vatavatara au aidamo, i vimataveni. ³⁸ Lidda, lamna Joppa au ḡereḡerena

ma maranai tauvitumaḡana i nonori da Peter au Lidda, tau i ai rava ruaḡa i paritawanei da Peter i egari i pa, “Laḡilaḡina ma nei!”

³⁹ Ma Peter tau i maiteni i nae da i ḡeta ma i taravaina-ruiei au numa vata-vatara. Kaikaiababa maḡamaḡai ana toutoui Peter i mairi kwaviviroi. Maranai Dorkas lawalawaina ma kwama da gara i popopoia Peter i viatataiei.

⁴⁰ Wate Peter anatapui i vibaḡai da i opu au doa, ma ae-tutunei i mae-ḡaira ma i raupari, ma taubeu i riwei, “Tabitha, ma vomairi!” Tabitha matana i kala ma maranai Peter i ‘nanai, i vomairi da i kiala. ⁴¹ Peter urana i viloloi ma i voagui da i vomairi. Ma tauvitumaḡana anatapui ma kaikaiababa maiteni i kwatueiai, ma wavine lawalawaina tau i verei. ⁴² Ma wei riwana dobu Joppa i naeni ma rava maḡamaḡai Iesu i vitumaḡanei. ⁴³ Peter au Joppa i mae au pom biaḡa nanare Simon ḡamoḡamo opina taurauḡaroḡaroaina ana au numa.

10

Peter ma Cornelius

¹ Au Caesarea oroto* wavana Cornelius, tauna mai Italy sorodia boruna ai bada. ² Tauna rava jijimanina ma patupatutuna, ma ana numa ravai maiteni God taurauduneleina. Ma molamolakai i paipaina-kauei ma marana patapatai i raraupari God awarina. ³ Au bigai tagogi 3 oklok nanare i raraupari ma ana au inana, God ana anela au aiaina i ‘nanai, i nei awarina ma i riwa, “Cornelius!”

⁴ Cornelius ana rovona anela i ‘nana-tunutunui ma i riwa, “Au bada, menanare!”

Ma anela i paribelei, “Am pari ma am verena molamolakai awarii, i ḡeta God awarina me pulo apuapunana ḡabuna. ⁵ Ma marina nelara ḡelau ma paritawanei au Joppa ma ravana wavana Simon wavana ḡelauna Peter ina taravainiai. ⁶ Tauna rava wavana Simon, ḡamoḡamo opina taurauḡaroḡaroaina awarina e mamae gera au ririvana.”

⁷ Maranai anela i nae, Cornelius ana taunola ruaḡa i ḡoreiai, ma ḡelauna lamna sorodia, tauna ana tauvipaipai, tauna God tauvitumaḡaneiana.

⁸ Tauna aiwai anatapuna tau i riwei ma i paritawanei au Joppa.

Peter Cornelius i raugenari

⁹ Maratomna au benai nanare maranai nelarai Joppa i tuḡereḡerei, Peter i ḡeta numa au tepana da ita raupari. ¹⁰ Ma am i ‘raḡe ma i ḡoei da aiwai ita ani, maranai tau lam i vovokaukauei, ma Peter matanei rauboni i ‘nanai.

¹¹ I ‘nanai mara i wanatawanei ma purapura inanana me puru ḡaegaena au adana 4 i vojijini ma marei i tere-ḡaireiai au dobu. ¹² Au orana lamna sia tapuna ma tapuna, tetetei me mota ma kiu au aidamo lavelavei. ¹³ Ma pona i riwa, “Peter ma vomairi, ma viragaena ma ma aml!”

¹⁴ Wate Peter i paribelei, “Eḡa! Lamna eḡa melanai ana kauei. Eḡa melanai lam viviḡana ata am-dadani.”

¹⁵ Wate pona i babani me, “Aiwai God i viviaiaiania, eḡa ma riwa da i apoapoe.”

¹⁶ Mara tonuḡa wenanare i tupua ma me marana puruna i ḡaiana-melei au mara.

¹⁷ Ma Peter aiwai i ‘nainanai anona i vinua-notenotei, nanare ma Cornelius nelara i paripari-tawanei, tau Simon ana numa i nelaḡai ma i ḡeta ana au

* 10:1: Wei ravana jentail.

metaeta. ¹⁸ Tau i paridadana, “Weka rava wavana Simon-Peter e mame bo ega?”

¹⁹ Peter amapo da wei i vivinua-notenotei maranai Arua vivivireina i riwa, “Simon, nelara tonuga e baibaiem! ²⁰ Lamna aubaina ma vomairi ma ma gaira au gabaura, ega ma geduai, aubaina tau a paritawanei awarim.”

²¹ Peter i gaira ma awarii i riwa, “Tauami tau o baibaieu bo, Ami goana aiwai?”

²² Ma nelarai i paribelei, “Tauai Cornelius mai Rome ai sorodia ai bada i paritawanelai, tauna rava jijimanina ma God tauvoepaepana, ma mai Jew magamagau tauna e vivivirei. Anela vivivireina i riwei da uta nei ana au numa da aiwai u aramane i uta riwei.” ²³ Ma Peter nelarai i gorei da i rui au numa ma kampa i matave.

Peter Cornelius ana au numa

Ma maratamna anatahui i nae, Tauvitumagana gelau i Joppa maiteni i vomairi. ²⁴ Ma au pom gelauna tau i Caesarea i geta. Cornelius tau i paipaini, ma ana numa ravai ma ana rava i gorei da i nei. ²⁵ Ma maranai Peter i ruirui au numa, Cornelius Peter i 'nanai ma i mae-gaira au ae karena ma ana vivirana i raudune. ²⁶ Wate Peter tauna i voepai ma i riwa, “Ma vomairi, Tau rava ota me tam.”

²⁷ Peter ma Cornelius i bababani ma i ruirui au numa. Ma i 'nanai da patara tauna i paipaini. ²⁸ Peter tau i riwei, “Tauami o aramana-kauei da tauta mai Jew ata tarawatu e vivigaeta da Jentail maiteni tana mae-gogona bo tana raugenari. Wate God i viatataieu da ega rava ana gorei rava apoapoena bo miramirana. ²⁹ Lamna aubaina maranai u vibaigai da ata nei, Tau au nota aiainei a nei. Tau ata pari-dadanem, Marina ma riweu aiwai aubaina au riwa u paritawanei?”

³⁰ Cornelius i paribelei, “Au benai wenanare au pom 4 marina i kwa, au numa a raruapari, nanare ma rava ana gara ararapoirina ma namanamarina au naoiu i raumairiei. ³¹ Ma i riwa, ‘Cornelius! God am pari i nonori ma am verena molamolakai awarii i vinuiaiiei! ³² Ma nelara ma paritawanei au Joppa da Simon e goregorei Peter awarina. Tauna Simon, gamogamo opina tauraugarogaroena ana au numa e mame.’ ³³ Lamna aubaina da am riwa lagilagina ava a paritawanei, ma i ai da tam u nei. Tauai anatahui i marina weka God au matana a vivipaipai da BADA aiwai i riwem ana nonori.”

Peter ana babani

³⁴ Ma Peter babani i raukarei, “Marina a inana-kauei da God rava anatahui e vaivaia da tagogina. ³⁵ Wate dohu dohuai ravai God e vivivirei ma kaua aiiai e kaukauei, Tauna wei ravai e goegoei, ³⁶ Tauami o aramane God Riwana Aiaina i paritawanei mai Israel awarii da rava ina mae-kaua God maiteni, maranai Iesu Keriso ina vitumaganei ma tauna ai lawana ina vibadei. ³⁷ Tauami o aramane Iesu aiwai i kauei Judea au anatahui, au Galili i vikarei maranai John babataito ai kaua i raugugulei. ³⁸ God Arua Vivivireina ma rewapana Iesu Nasarete i verei da dohu magamagau i naeni ma kaua aiiai i kaukauei, ma rava au orai arua apoapoe i ruiruini, i vilawani.

³⁹ —Aiwai anatahui au Judah provins ma au Jerusalem i kaukauei tauai anatahui a vimatematei ma a bababaniei. Tauna au korosi i tutui da irage. ⁴⁰ Wate God tauna iragelei i voepa-melei aupom au vitonuina ma i kauei da gelauai awarii i ega. ⁴¹ Ega rava magamagau tauna ita inana, anina tauvimatamata i vinevinei awari ava i geta. Lamna tauai maiteni a uma ma am ana vomairi au murina. ⁴² Ma i egariai da dohu au anatahui ana raugugula

ma ana jima da God Iesu i vinei da rava anatapui lawalawaii ma irairaḡei ina rauetarei. ⁴³ Peroveta anatapui i jimei da maranai rava Iesu i vitumaḡanei, Tauna wavinei God tau i ḡo'apoapoe ina vaitawanei."

⁴⁴ Maranai Peter i bababani ma Arua Vivivireina i ḡairai ma rava i raurautaniḡana i vioai. ⁴⁵ Ma mai Jew Jopei i nenei Peter maiteni, i ba kava maranai God Arua Vivivireina i paritawana ḡairei Jentail awarii. ⁴⁶ Au baina mai Jew i nonori tau i pona tapunei i bababani ma God i vivimae-ḡaeḡaeni. Anina ma Peter i riwa, ⁴⁷ "Tau i Arua Vivivireina i vaia me tauta. Wei lamna aubaina eḡa ai i ina viḡaeta da wei ravai tana babataitoi." ⁴⁸ Ma tau i Cornelius ana numa ravai maiteni ma ana rava ḡelau i Iesu Keriso wavanei i babataitoi, ma tau i Peter i vibaḡai da maiteni ita mae mara aburuna.

11

Peter ana babani

¹ Apasol ma tauvitumaḡana au Judea provins i nonori da Jentail maiteni God riwana i nonori ma i vitumaḡana. ² Ma maranai Peter i ḡeta me au Jerusalem tauvitumaḡana mai Jew ḡelau i eni i pa, ³ "Tam Jentail ai au numa u rui, ma maiteni i am!"

⁴ Anina ma kava menanare i tuputupuanei anatapuna Peter tau i pariverei:

⁵ I riwa i pa:

Maranai a raraupari au Joppa ma matauei kava a inanai, ma purapura inanana me puru ḡaeḡaena adana 4 i vojijini ma marei i tere-ḡaireiai awariu.

⁶ Au orana a inana lamna ḡamoḡamo maramaraḡamai ma moduei, tetetei me mota ma kiu au aidamo lavelavei. ⁷ Ma pona a nonori i pa, "Peter ma purua i ḡaiana-melei au mara!"

⁸ Tau a paribelei, "Eḡa! Lamna eḡa melanai ana kau. Eḡa melanai lam vivigana ata am-dadani."

⁹ Wate pona marei mara viruaina i babani, "Aiwai purapurana God i riwa da i ai, tam eḡa ma riwa da i apoapoe." ¹⁰ Mara tonuḡa wenanare i tupua, ma purua i ḡaiana-melei au mara.

¹¹ Nai maranaina mai Caesarea ai rava tonuḡa i paripari-tawaneiai, au metaeta i raumairiei. ¹² Ma Arua Vivivireina i riweu da eḡa aiwai ana notai ma orau taputapunei ana nae. Mai Joppa tauvitumaḡana 6 maiteni a nae ma ravana ana au numa a rui. ¹³ Cornelius i riwelai da anela awarina i eḡa, ma i riwei, "Rava ma paritawanei au Joppa da rava wavana Simon Peter ina nei." ¹⁴ Tauna wei riwana ina nei i lamnei tam ma am numa ravai maiteni ina vilawanimi.

¹⁵ Ma babani a raukarei ma Arua Vivivireina i ḡairai da tau i vioai me au naona awarita i tupua nanare. ¹⁶ *Anina ma Iesu aiwai i ririwei a notai, "John wairei i babataito, wate taumi Arua Vivivireinei ina babataitoimi."

¹⁷ Inanana au aiaina da God Jentail pulona tagogina i verei, me tauta i verevereta maranai Iesu Keriso ta vitumaḡanei, ma tau ai i da God ata viḡaei?

¹⁸ Tau i vigaḡapotai maranai wei i nonori, ma God i viborumei i pa, "Riwa kava da God Jentail maiteni i vianinei da ina rupena ma ina lawana."

Ekalesia au Antiok

19 ✨Ekalesia ġelau i rau-iviapoapoe i rovoei maranai Stephen i viraġeni ma i vilamonei au uama. Ġelau i ruba nae au Phonisia, au Saipras ma Antiok, ma kampa Iesu Riwana Aiaina i raugugulei mai Jew ava awarii. 20 Wate ekalesia ġelau mai Saipras ma mai Sairini i nae au Antiok Jentail awarii ma Iesu Riwana Aiaina i raugugulei. 21 BADA ana rewapana tau i orai i mae ma Jentail maġamaġau i vitumaġana ma i mae-tavirei BADA awarina.

22 Wei riwana i ġeta ekalesia awarii au Jerusalem, ma tau i Barnabas i paritawanei au Antiok. 23-24 Maranai i ġeta ma i 'nanai da God ravai i viaiaina-kauei, tauna i vinuaia i ma i egari da BADA awarina ina vipatutu orai taputa-punei. Barnabas tauna rava aiaina, Arua Vivivireina orana i oai ma ana tumagana i rata, ma God ana aguie i rauguga ma rava maġamaġau i taini BADA awarina.

25 Ma Barnabas i nae au Tarsus da Saul ita baiei. 26 Ma i nelaġai ma i neiai au Antiok, ma kampa tauvitumaġana maiteni i mae madeġa tagogi i kwa, ma patara ġaeġaena awarii i viaramana. (Weka au Antiok lamna i vikarei da tauvitumaġana i viġorei Kerisiana)

27 Wei au marana peroveta ġelau Jerusalem ei i ġairai. 28 ✨Peroveta tagogi wavana Agabas i vomairi ma God ana rewapanei i vieġa da gomara e nenei au naoi dobu au anatapuna (Caesar Claudius ana vibada au marana gomarana i nei). 29 Tauvotaġotaġo au Antiok i vianina da tau i vianina ita kauana-guratei da mane vounaina ita kauei da ai rava ekalesia au Judea ita voagui. 30 Tau i nanare i kauei ma manena Barnabas ma Saul au urai i terei ma tau ekalesia ai babada au Jerusalem i verei.

12

James i viraġeni ma Peter i pani

1 Lamna maranai, gulau Herod Agrippa* i raukarei da ekalesia ġelau i rau-iviapoapoele. 2 James, John tuana uana sodei i bori-tuini. 3 Ma maranai Herod i 'nanai da mai Jew wei kauana i vinuaiaie, ma ana sorodia i egari da Peter maiteni ita pani da au pani numana ita terei. Wei kauana Palawa Bagibagina ana au torela i tupua. 4 ✨Ma Peter i pani ma au pani numana i terei ma sorodia 16 tauna i paini. [Sorodia 16 i terei da borui 4 ma i vipaipai.] Herod i ġoei da Peter ita vojijini da raġona torelana au murina ma au deba ita rauetarei. 5 Ma lamna aubaina Peter au pani numana i vojijini mara aburuna. Wate ekalesia i raaupari guratana God awarina Peter aubaina.

Peter pani numanei i tere-opunei

6 Ma nai waguvaraina, ma maratamna da Peter ita rauetarei, Peter sorodia ruaġa au pou i matamatave. Urana seinei i raġini sorodia ruaġa au urai, ma sorodia ġelau i metaeta i vipaipai.

7 Maratagogi BADA ana anela i eġa ma pani numana i ravilalai. Ma Peter i vogugui da matana i kala ma i riwei, "Laġilaġina ma vomairi!" Ma sein au urana i dabarara. 8 Ma Peter i riwei, "Ma vigara ma ae uma ma oteni." Ma nanare i kauei. Ma i egari, "Am kwama potopotona ma oteni ma ma votaġotaġoiu."

✨ 11:19: Act 8:1-4 ✨ 11:28: Act 21:10 ✨ 12:1: Tauna gulau Herod 1 ġoġana. ✨ 12:4: Exo 12:1-27

⁹ Peter anela i votaḡotaḡoi da pani numana i opu-tawanei, wate eḡa ita aramanei anela aiwai i kaukauei, tauna i notai i rarauboni. ¹⁰ Taui, sorodia boruna ruaga au doa i netawanei, da i opu au metaeta iramei, wei e opupu au taon. Metaeta ainelana i wanatawanei aubaii ma i opu. Taui etanai tagogi i ḡairani ma maratagogi anela tauna i voterei.

¹¹ Peter ana nota i nememei ma i riwa, “Wei anina riwa kaua! BADA ana anela i paritawaneiai da Herod au urana i vaitawaneu, da mai Jew aiwai i notanotai da ita tupua lamna eḡa ita tupua.” ¹² Maranai ana nota i nememei tauna i nae Mary ana au numa. (Mary lamna John alona. John wavana ḡelauna Mark). Kampa rava maḡamaḡau i vitagogiei ma i raraupari. ¹³ Peter au metaeta i raupewapewa ma taunola wavana Rouda i nei da metaeta ita votawanei. ¹⁴ Ma Peter ponana i nonori ma i aramanei da tauna, ma i vinuaii guratana da eḡa metaeta ita votawanei ma i ruba-rui da i vinolanola i pa, “Peter au metaeta e maimairi!”

¹⁵ Wate taui eḡa ita vitumaḡanei ma i riwei, “Tam ma bubua!” Wate tauna i riwa bagibagi. Ma taui i riwa, “Nai Peter ana anela.”

¹⁶ Wate Peter i rarau-pewapewa ma maranai tau i metaeta i votawanei ma i 'nanai da tauna, tau orai i auepai.

¹⁷ Peter urana i voepai da rava i genuana ma i riwei menanare BADA pani numanei i tere-opunei. Ma i riwei, “James[†] ma ekalesia ḡelau wei ona pariverei.” Ma Peter i nae au dobuḡela.

¹⁸ Maranai mara i tom kampa au pani numana nuabola ma vinuanaina ḡaeḡaena i peu sorodia awarii da aiwai i tupua Peter awarina. ¹⁹ Herod, ana sorodia i egari da Peter i baiiei wate eḡa ita nelaḡai. Lamna aubaina sorodia 16 i etarei ma i viraḡeni. Muriai Herod Judea i netawanei ma i nae au Caesarea da ita mae mara aburuna.

Herod irage

²⁰ Marina Herod amlona i ḡaiḡai kaua Taia ma Sidon ravai awarii, lamna aubaina tau i ana borui i nei da Herod maiteni wei i babaniei. Taui Herod ana taunola ḡaeḡaena Blastus, i taravaini da ita voagui. Taui rom i vibaḡei Herod maiteni. Aubaina ai lam Herod ana dohuei i nenei. ²¹ Ma marana i ḡetai da Herod maiteni ita vaboru ma tauna ana vigulau garana i vigarei ma ana au anikiala i kiala ma awarii i babani. ²² Ma patara ana babani i nonori ma i logoi i pa, “Wei lamna god e bababani ma eḡa rava!”

²³ Maratagogi BADA ana anela Herod i vipeuni au doa ma motamota orana i ani da i rage, aubaina tauna rava ai voepaepa i vinuaiiaiei ma eḡa rava ita riwei da BADA ita voepaepai.

²⁴ Ma ekalesia BADA riwana i raraugugulei ma rava maḡamaḡau i nenei BADA awarina ma ekalesia i rarata. ²⁵ Maranai Barnabas ma Saul ai nola au Jerusalem i vikwai, tau i John-Mark i taravaini da maiteni i nei au Jerusalem.

13

Barnabas ma Saul i viaiaini ma i paritawanei

¹ Kerisiana au Antiok au orai peroveta ma taugiu wavai wenanare, Barnabas, Simeon (e ḡoreḡorei Gawara), Lusias Sairiniei, Manaen (Tauna gulau Herod Antipas maiteni i rata tagogi), ma Saul. ² Mara tagogi maranai taui i ujiuji ma BADA i vovoepaepai ma Arua Vivivireina i riwa i pa, “Tau, Barnabas

[†] 12:17: Iesu ana tevera

ma Saul a vinei, ona tereriei au nola aubaina.” ³ Anina ma uji ma pari au murina tau i urai Barnabas ma Saul au tepai i terei ma God ruaḡai i viaiaini ma i paritawanei.

Au Saipras

⁴ Ma Arua Vivivireina Barnabas ma Saul i paritawanei da i ḡaira au Selusia ma kampa i amkuka damana au bonabona Saipras. ⁵ Ma au Salamis i ḡota ma i nae mai Jew ai au boru numana ma God riwana i raugugulei. John-Mark tau i maiteni i nae da ai tauagu.

⁶⁻⁷ Tau i bonabonana i kwaviviroi da au Paphos taon i ḡeta. Weka Jew ei barabaravuna ma peroveta morumoruna i nebelei wavana Bariesu. Tauna bonabonana ana gavena Segius Paulus i vituranei, Segius Paulus rava nu-
alaulaunana ma i ḡoei da God ana babani ita nonori ma lamna aubaina Barnabas ma Saul i raugoreiai. ⁸ Wate barabaravuna Bariesu (Greek ponanei lamna Elimas) Saul ma Barnabas i viḡaviei da gavena ana tumagana ita viapoapoeni. ⁹ Saul wavana ḡelauna Paul, Arua Vivivireina orana i oai ma barabaravuna matana i 'nana-tunutunui. ¹⁰ Ma i pa “Tam Satan natuna ma kua aiiai ma jijimani tauviapoapoenina! Tam moromoru kaukauam ma gwalagwalamerum. Ma amapo da BADA ana kua ma voviravirai da moru. ¹¹ Ma marina BADA urana ina kovoḡim da matam ina apoapoe mara aburuna ma eḡa madeḡa lalalaina ma inana!” Maratagogi matana i vinawanawa ma i gimtona ma nare da were i voladaḡa-nae da rava au urana ita vojijina.

¹² Maranai gavena i 'nanai aiwai i tupua ma i vitumaḡana, aubaina tauna BADA ana viararamana i bana-kauei.

Paul God Riwana Aiaina i jimejime i au Antiok taon au Pisidia

¹³ Paul ana rava maiteni Paphos i voterei ma i amkuka damana au Perga taon au Pamphilia provins, Ma weka John-Mark tau i voterei ma i naeme au Jerusalem. ¹⁴ Perga i voterei ma i rui da au Antiok taon au Pisidia provins. Ma au Sabate i rui au boru-numana ma i kiala. ¹⁵ Ma rava ḡelau, Moses ana tarawatu bukana ma peroveta ḡelau ai buka i 'avi, ma babada riwa i paritawanei Paul ma Barnabas awari i pa, “Varevareiu! Mepa da awarimi nota aiwai da ota voagui ai lamna marina ona ḡei da ona babaniei.”

¹⁶ Paul i vomairi ma urana i voepai da rava i genuana ma babani i vikarei i pa: Mai Israel ma taumi eḡa mai Jew ai God tauviborumeina,

ona rautaniḡaneu! ¹⁷ *Mai Israel ai God noinoita i vinei, ma i vimaurai ai au mae au Egypt, ma ana rewapana ḡaeḡaenei dobunei i taravaina-opunei.

¹⁸ *Madeḡa 40 au mutulua ami kua apoapoei ami beura ma ami gunura anatapui am-iauei. ¹⁹ *Dam ḡaeḡaei 7 i vipupui au Canaan ma dobuna mai Israel i verei da i viḡariana-nonoei. ²⁰ *Wei anatapuna madeḡa 450 au orana i tupua. Wei au murina God taurauetara† i terei da tau i vibadei da peroveta Samuel ana mara. ²¹ ‡Anina ma rava God i vibaḡai da gulau ita verei. Ma God Saul, Kish natuna Benjamin ana damei i terei; ai gulau da madeḡa 40

i kwa. ²² §Ma God Saul i tere-opunei ma David i terei ai gulau. Ma wenanare i riwa i pa, “Tau a aramanei da David, Jesse natuna orau ana rauoḡara, ma au ḡoana anatapuna ina kauei.”

* 13:17: Exo 1:7 † 13:18: Num 14:34 ‡ 13:19: Deu 7:1 § 13:20: (a) Jdg 2:16; (b) 1Sa 3:20
 † 13:20: Wei ravai lamna ai ḡavia babada i ma ai tauravena ma taurauetara Judge. ‡ 13:21: (a) 1Sa 8:5; (b) 1Sa 10:21 § 13:22: (a) 1Sa 13:14; (b) 1Sa 16:12

²³ Muriai me God i parivainuaḡani nanare, Mai Israel ai Tauvilawana, Iesu David ana damei i nei. ²⁴ ✧ Muriai da Iesu ita nei, John mai Israel anatapui awari i jima da ai ḡo'apoapoe ina voterei ma ina mae-tavirei God awarina ma ina babataito. ²⁵ ✧ Ma John ana nola au damona i riwa, "Taumi o notanotai da tau Tauvilawana bo? Eḡa! Tau eḡa tauna. Wate ona rautaniḡana, rava au muriu e nenei tauna i ḡetelara, tau eḡa tagotagogina da ana ae uma ḡuravana ana rupeni."

²⁶ Varevareu - Abraham natunatuna ma taumi Jentail God tauviviborumeina, God tauta awarita, kwakokwakoi vilawanai riwana i paritawaneiai! ²⁷ Mai Jerusalem ai babada maiteni God ana Tauvilawana i vinua-nainei, ma lamnei Iesu i kovoḡi, Peroveta wei lamna i jimejimeu au Sabate marana patapatana. ²⁸ ✧ Taui eḡa ana apoapoen aiwai ita nelaḡai da Iesu ita viragēni, wate Pilate i vibaḡai da ita viragēni.

²⁹ ✧ Maranai rava ai babada maiteni, ai nuabola Iesu awarina i kauana-paiei me peroveta i ririwei nanare, ma tupuana au korosi i tere-ḡairei ma au guba i vimataveni. ³⁰ Wate God Iesu iraḡelei i vovaimairini. ³¹ ✧ Ma au pom maḡamaḡau Iesu tau maiteni au Galili da i ḡeḡae au Jerusalem awari i eḡa. Wei ravai marina e vivimatamata rava awarii.

³² Marina tauai Riwana Aiaina a paripariveremi. Wei parivainuaḡanana wariāḡa noinoita awari i kauēi. ³³ Ma God nanare i kauēi tauta eda muri aubaita, da Iesu iraḡelei i vovaimairini, au Psalm viruaina wenanare I girumi, *Tam natu.*

Amadodo Tau a viamanem.

(Psalm 2:7)

³⁴ God Iesu iraḡelei i vovaimairini da eḡa tupuana ina buda. Me i girugirumi nanare i pa,

Au viaiaina vivivireina David a parivainuaḡani tam ana verem. *(Isaiah 55:3)*

³⁵ Psalm ḡelauna wenanare i girumi,

A 'ramanei da Tam am Messiah-Tauvilawana tupuana eḡa au kokoḡa ma voterei da ina buda. *(Psalm 16:10)*

³⁶ Maranai David i mamea ma God ana nola i kauēi ma iraḡe, ma amamana maiteni i doboi ma tupuana i buda. ³⁷ Wate God Iesu iraḡelei i vovaimairini ma tupuana eḡa ita buda.

³⁸⁻³⁹ Lamna aubaina au rava, ona aramanei da Iesu awarinei God ami ḡo'apoapoe ina nota-tawanei. Rava anatapui da Iesu e vitumaḡanei, ai ḡo'apoapoe e notanota-tawanei ma ai viturana e viviaiaini. Wei Moses ana tarawatu eḡa ita kaukauei. ⁴⁰ Ona paina-melemi da peroveta aiwai i ririwei eḡa awarimi ina tupua. Aubaina i riwa;

⁴¹ *Ona rautaniḡana vivijiboḡami,*

kaua ḡaeḡaena ana kauēi da Ona baei ma ona iraḡe!

Aubaina ami au lawana kaua ḡaeḡaena ana kauēi da taumi ona vitumaḡana-avei.

⁴² Paul ma Barnabas i opuopu ma rava i nei ma i vibaḡa-guratei da ita nememei au Sabate ḡelauna da Tauvilawana ana kaua ita babanana-kauēi. ⁴³ Boru i kwa da rava i vilamonei, mai Jew borui ma ḡelau marina ina bori i vaia da i vimai-jew, tau Paul ma Barnabas i votaḡoi, ma i riwana-guratei da Iesu ana aguei ina mae jijina.

44 Au Sabate gēlauna taon ravai anapupui i gēta da Iesu riwana aiaina ita nonori. 45 Maranai mai Jew wei patarana i 'nanai ma orai unura i oai ma Paul i vikaua-morumoruei mā i vitepaubaubai.

46 Ma Paul ma Barnabas ana tepatorai i babani, “God riwana a jimei awarimi au naona, wate taumi wei riwana o geduaiei. Wei e viviatataiana da taumi lawana mamae-nonoana eḡa ota ḡoeḡoei. Lamna aubaina ana voteremi ma God riwana ana jimei Jentail awarii. 47 BADA wenanare riwa bagibaginei i riwelai,

Tau a vinemi da lalalaina Jentail awarii,

da rava anapupui au dobu ona riwei menanare ai ḡo'apoapoe a nota-tawanei ma a vilawani.

49:6)

(Isaiah

48 Maranai Jentail wei riwana i nonori, tau i vinuai ai kaua ma BADA Riwana Aiaina i voepapai, ma tau da God i vinei lawana mamae-nonoana ita vaia, i vitumaḡana.

49 Ma BADA Riwana Aiaina i vituai nai au paratana. 50 Wate mai Jew Jentail waivinei manemanei ma mai Jew ḡelau i egari da Paul ma Barnabas ai ḡavia i vomairi ma dobunei i viaḡaḡana-opunei. 51 *Anina ma tau aei pokauna i rauabuabui da ita viatataiei da BADA eḡa ita vinuai ai awarii ma i nae au Ikoniam taon. 52 Wate Arua Vivivireina kerisiana voui au Antiok orai i oai ma i vinuai ai kaua.

14

Paul ma Barnabas i jima au Ikoniam.

1 Kauana tagogina i tupua au Ikoniam. Paul ma Barnabas i nae mai Jew ai au boru numana ma menanare i babaninei da mai Jew ma Jentail maḡamaḡau i vitumaḡana. 2 Wate mai Jew ḡelau eḡa vivitumaḡana i Jentail i kelari ma ai nota i barai da Paul ma Barnabas i geduaiei. 3 Avena ma Paul ma Barnabas kampa i mae guratana ma ana tepatorai BADA ana aguei i jimajima. Ma kaua babai ma vivirewapanai maḡamaḡau i kauai. Wei i vimataira da ai jima lamna riwa kaua.

4 Taon i kai ḡelau mai Jew aubai i mairi ma ḡelau Aposol aubai i mairi. 5 Ma mai Jew ma Jentail ḡelau i vioga da Paul ma Barnabas ḡaime ita viraurauai. 6 Wate tau riwana i vaia ma dobuna i ruba-tawanei ma i nae au taon ḡaeḡaei Listara ma Derbi au Laikoniam provins ma taon au ririvai. 7 Ma weka Riwana Aiaina i jimana-naiei.

Rava i notai da Paul ma Barnabas god

8 Au Listara oroto aena ḡokokokarana, alona manawanei gwaḡagwaḡana i vinatunei ma eḡa ita babara dadana. 9 Kampa i kiala ma Paul i bababani i rarautaniḡanei. Paul matana i tawanei ma i 'nanai da tauna i vitumaḡana da ita lawana 10 ma i garara awarina, “Aemei ma mairi!” Ma orotona aenei i mairi ma babara i vikarei. 11 Maranai patara i 'nanai Paul aiwai i kauai tau i ava ai ponei i babani vivira, “god ruaḡa i ḡairai awarita me *rava.” 12 Tau i riwa da

* 13:51: Mrk 6:11 * 14:11: Paul ma Barnabas Greek ponanei i bababani

Barnabas lamna mai Greek ai god Zeus[†] ma Paul i vitauvibabani aubaina i riwa da tauna Hermes. ¹³ Zeus ana pulo gabuna, taon au giana, Zeus ana pirisi patara maiteni bull ma berana ulaulai i neiai taon au metaetana da Apasol ita puloi.

¹⁴ Wate maranai Paul ma Barnabas wei riwana i nonori, tau i gara i sikai ma i ruba-opu patara awarii ma i garara, ¹⁵ ✨“Aiwai aubaina wei kauana o kaukauei? Tauai rava ota me taumi nanare! Tauai Riwa Aiaina a neneiai da nai kauai kwakwavi ona voterei ma ona nae BADA lawalawaina ona viborumei. Tauna mara ma dobu ma boga ma aiwai anapuna au orai i kauai. ¹⁶ Wariaġa tauna rava i voterei da ai ġoanei i mae. ¹⁷ Wate marana patapatai e viviatataiemi da tauna e mamae ma ana nuavaina e verevereta, garewa marei ma maura ma lam e vereveremi ma au orami nuai ai e oaoai.” ¹⁸ Apasol i bababani ma i kauanaguratei da ravai ita viġaei da tau i avena ita puloi.

Mai Listara Paul ġaime i virauraei.

¹⁹ Mai Jew ġelau Antiok ei ma Ikoniamei i nei ma patarana i egari da Paul ġaime i virauraei ma taonei i taina-opunei, i notai da tauna iraġe. ²⁰ Wate maranai vivitumaġanai i ġeta da i mae-kwavi viroi, tauna i vomairi ma i naeme au taon.

Aupom ġelauna tauna ma Barnabas i nae au Derbi.

²¹ Paul ma Barnabas Riwana Aiaina i jime i au Derbi ma ekalesia voui maġamaġau i rui. Ma i nae me au Listara, Ikoniam ma Antiok. ²² Metauna au dobu i jimajima kampa tauvitumaġana i ririwana-guratei ma i vovai-virewapani da ina mairi-jijina ai au tumagaana i pa, “Piripiri maġamaġau au orana ona rui wate au murina God ana au vibadana ona rui.” ²³ Paul ma Barnabas ekalesia nununai ai babada i vinei ma i raupari ma i uji BADA awarina, da ai ekalesia ma ai babada ina paini. ²⁴ Anina ma au Pisidia provins i verautua da i nae me au Pamphilia provins. ²⁵ Au Perga BADA riwana i jime i ma i ġaira au Atalia. ²⁶ Ma kampa i amkuka ma i nae me au Antiok au Syria provins, weka ai nola i vikarei, maranai ekalesia kampa God i vibaġai da tau i ita viaiaini ai au nola ma i paritawanei ma marina ai nola e vivikwai.

²⁷ Ma kampa i ġeta ma ekalesia i vitagogiei, ma aiwai anapuna God ana aguei i kaukauei rava i vieġei, ma menanare Iesu metaeta i votawanei da Jentail maiteni Tauna i vitumaġanei. ²⁸ Ma kampa tauvitumaġana maiteni i mae guratana.

15

Boru au Jerusalem

¹ Wate nelara ġelau Judeaei i ġairai au Antiok ma ekalesia i viararamani i pa, “Mepa da eġa inibori ona vaia Moses ana tarawatu e ririwei nanare, God taumi eġa ina vilawanimi.” ² Ma karuwaga waġa ġaeġaena i bauni Paul ma Barnabas maiteni. Ma tau i Paul, Barnabas ma rava ġelau i vinei da i ġae au Jerusalem da Apasol ma babada ita inanai wei babanina aubaina. ³ Ma i paritawanei au Jerusalem, Ma ai au vaġai ekalesia au Phonisia ma Samaria provins i parivere i menanare Jentail i mae-tavirei God awarina. Ma tau i

[†] **14:12:** Zeus lamna mai Greek ai god ġaeġaena. Rava ai vitumaġana da godna e vivilawani. Hermes lamna Zeus natuna ma tauna lana Tau-vinolanolana. Zeus ma god ġelau aubaii. Rava i notai da Hermes lana e kauwei da rava e babana-kauwa ma ai babara e aiiai. Wate nanarena e notanotai da tauna kauwa aiaina e vivitupui ma e kauwei da rava e vivinatuna kauwa. ✨ **14:15:** Exo 20:11

i vinuiai i kua maraina wei i nonori. ⁴ Maranai i ġeta au Jerusalem, ekalesia ma Apasol i nei da i nebelei. Tau i parivere i menanare kua anatapui God ana aguei i tupua. ⁵ Wate ekalesia ġelau mai Pharisi, i vomairi ma i babani guratana i pa, “Jentail anina da inibori ina vaia ma ona egari da Moses ana tarawatu ina voteletelei.”

⁶ Apasol ma babada i viboru da wei babanina i okei. ⁷ ✨ Ma i vitarapiri guratana ma Peter i vomairi ma tau i riwei i pa, “Au rava! O aramanei da au orata God i vineu da Riwana Aiaina ana jimei Jentail awarii da tau i nonori ma ina vitumaġana. ⁸ ✨ God rava anatapui ai nota e araramanei, ma Jentail Aruana Vivivireina i verei me tauta nanare. Wei matairana i viatataieta da God i vianina. ⁹ Tauna Jentail ma tauta e vaivainita da tagogina, ma ata vitumaġanei orata i viaiaiani. ¹⁰ Marina aiwai aubaina God o viviamlo-ġaiġaini? Tauta amamata maiteni eġa tata virewapana da tarawatu tata vojijina-kauei. Wate marina wei vitana Jentail ta verevere-damanei. ¹¹ Eġateni! Tauta anataputa ta vivitumaġana da BADA Iesu ana aguei tana lawana, ma nanare Jentail maiteni.”

¹² Rava anatapui i genuana ma Barnabas ma Paul i rautaniġanei, tau i bababani menanare ana au vaġai God ana aguei kua aniba ma vivirewapana i kauei Jentail awarii.

¹³ Maranai i babani vorovei, James* babani i vikarei, “Au rava ona rautaniġaneu.

¹⁴ —Peter † au naona i pariveremi menanare God Jentail i raugenari ma ġelau i vinei da tauna ġarinei. ¹⁵ Ma Peroveta nununai wei kauai i bababaniei marina nanare e tuputupua:

¹⁶ *Wei au murina ana nememei,
ma David ana numa gara ana voa-melei.
Ana vituramairini
ma ana kauei da ina virewapana me.‡*

¹⁷ *Da rava mamae-terenai
BADA ina baiei,
Wate Jentail a rauġorei da ġariuei, BADA i riwa. (Amos 9:11-12)*

¹⁸ *Wariaġa da marina wei ta aramanei.*

¹⁹⁻²¹ — ✨ Lamna au baina eġa tana kauei da ina pipiripi Jentail aubaii, tau i mamae-tavirei God awarina. Wate pepa tana girumi ma tana egari da lam e pulopuloei god morumorui awarii eġa ina ani, eġa ina viawawana labalababa, ġamoġamo uai e kikiki eġa ina ani ma sia ana tarana eġa ina ani. Aubaina wariġa da marina Moses ana tarawatu e raugugulei boru au numai Sabatena patapatana.”

Pepa i girumi Jentail awarii

²² Ma Apasol, babada ma ekalesia anatapui rava ġelau i vinei ma i paritawanei au Antiok au Syria provins Paul ma Barnabas maiteni. Tau i babada ruaġa i vinei wavai Judas wavana ġelauna Barsabas ma Sailas. ²³ Ma wei pepana au urai i terei,

Aposol, ekalesia babadai, varevareimi.

✨ 15:7: Act 10:1-43 ✨ 15:8: Act 10:44; 2:4 * 15:13: Iesu ana tevera † 15:14: Peter wavana ġelauna Simon. ‡ 15:16: Maranai God David ana numagara e bababaniei lamna David ana vibadana vouna e ririwei ma eġa ana epaepaia. ✨ 15:19-21: Lev 18:6-23; Lev 17:10-16

Jentail ekalesia au Antiok, Syria provins ma Silisia provins. Varevareiai, egualau!

²⁴ Tauai riwana a vaia da rava gēlauri ai au boru i gairai ma ai viararamani i vinuabolaimi ma i visina-viraviraimi, wate tauai nai ravai ega ata paritawanei. ²⁵ Lamna aubaina tauai a viboru ma a vianina da taupariverena ata paritawaneiai, ata rava Paul ma Barnabas maiteni, ²⁶ tauai i verena-melei ma ai lawana ega ita vinuabolei BADA Iesu Keriso wavana aubaina. ²⁷ Judas ma Sailas a pariparitawanei da tauai gamoieii ina riwemi aiwai tauai a girumi.

²⁸ Arua Vivivireina ma tauai ai goana da ega vita gaegeaena ana veremi, anina wei tarawatuna ava.

²⁹ Lam god morumorui i puloi ega ona ani, Ega tara ona umai, Ega gamogamo uana kikikina vioana ana tarana ona ani.

Ega ona viawawana labalababa,§

Mepa da wei tarawatui ona vojijina-kauei, taumi kaua aiaina o kaukauei.

Egualau kaua.*

³⁰ Ma nelarai i paritawanei da i gaira au Antiok, ma ekalesia irieiai da pepa i verei. ³¹ Ma tauai i avi ma i vinuiai kaua pariverena aiaina aubaina. ³² Judas ma Sailas tauai God ana peroveta ma i babani guratana awarii ma wei tauai i vinuiaiie ma ai tumašana i vovai-virewapani. ³³ Ma kampa i mae mara aburuna ma ekalesia ana nuubai i paritawana-melei au Jerusalem. ³⁴† ³⁵ Wate Paul ma Barnabas au Antiok i mae, ma tauai maiteni BADA Riwana Aiaina i viararamani ma i raugugulei.

Paul ma Barnabas i vilamonei

³⁶ Ma muriai Paul, Barnabas i riwei, “Tana nae dobu au anatapuna mepa BADA Riwana Aiaina ta raugugulei ma ekalesia tana raugenari, ma tana inanai tauai anina bo ega.” ³⁷ Barnabas i goei da John-Mark ita taravaini. ³⁸ ✧ Wate Paul wei notana ega ita goei aubaina au naona John tauai au Pamphilia i rubatawanei ma ega ita mae da maiteni ita nola. ³⁹ Ai vipariparinigai i apoapoe guratana da tauai i vilamonei. Barnabas, Mark i taravaini ma kukei i damana au au Saipras. ⁴⁰ Paul, Sailas i vinei. Ma ekalesia, BADA i vibaagai da ana aguei tauai ai au nola ina paini. ⁴¹ Tauai Syria da Silisia i naeni ma ekalesia i raugenari ma i vinua-terenei.

16

Timothy Paul ma Barnabas maiteni i nae

¹ Paul i nae au Derbi da au Listara, kampa tauvota gōtagō i mae wavana Timothy. Tauna alona Jew ei ma kerisiana, Wate amana Jentail. ² Ekalesia au Listara ma Ikoniām Timothy i voepaepana-kauei. ³ Paul i goei da tauna ita taravaini ana au vaagai, lamna aubaina ini bori i verei aubaina mai Jew

§ 15:29: Viawawana labalababa gelauri wei: Rava gelauri awawai maiteni e viawawana. (Exo 20:14, Deu 5:18) Mane aubaina e viawawana (Lev 19:19, 1 Cor 6:15) Am femili ravai o viviauwaneii (Lev 18:22, Rom 1:26-27) Gamogamo e viviauwaneii (Lev 18:23) Rava ega uta ravaigi ma e viviauwaneii (Eph 5:3) Rava u egari da u viawawaneii. (Gen 34:7, Deu 22:25-28) * 15:29: Kaua gaegeaena lamna ega ini bori ma Iesu ana aguei, u korosi i take aubaita. † 15:34: Buka waduwaduboi au orai vs 34 ega ita mamae “Wate Sailas i goei da kampa ita mae.” ✧ 15:38: Act 13:13

kampa i aramanei da tauna amana Jentail.⁴ Maranai taon nununai i nenaeni, ma ekalesia kampa i paripari-verei Aposol ma babada au Jerusalem ai nota, ma i riwei da tarawatu i ririwei ina votaḡotaḡoi.⁵ Ma ekalesia ai vitumaḡana i vovai-virewapanai ma tauvitumaḡana voui i ruirui marana patapatai.

Paul ana rauboni

⁶ Arua Vivivireina Paul ana rava maiteni i viḡaei da eḡa BADA riwana ita jimei au Eisia provins, ma Pirijia ma Galatia paratana i naeni.⁷ Maranai i nei Maisia ana au provins ma i ḡoei da ita damana au Bithinia provins. Wate Iesu Aruana eḡa ita vianinei.⁸ Ma Maisia i verautuini da i nae au Troas.⁹ Waguvaraina Paul ana au inana i 'nanai oroto Macedoniei i maimairi ma i vivibaḡai i pa, "Ma damanai au Masedonia da ma voaḡuail!"¹⁰ Paul ana rauboni au murina tauai a vioga da laḡilaḡina ana vomairi Masedonia provins aubaina. Tauai a vitumaḡana da God i ḡorelai da Riwana Aiaina kampa ana jimei.

Paul i nae au Philipai.

¹¹ Au Troas tauai amkuka, a viaruana damana au Samotreis bonabonana a ḡeta ma au pom ḡela a kuka-nae au Neapolis.¹² Ma kampa da a babara nae au Philipai taon au Masedonia provins, weka mai Rome ai sorodia ai bareki ḡaeḡaena i mae, kampa a veraumae.¹³ Ma au Sabate taon a opu-tawanei ma a nae au waira, a notanotai da kampa boru gabuna wate eḡa. A kiala ma waivine ruaga ota kampa i rauriei awari a babani.¹⁴ Taurautanigana tagogi lamna Jentail wavinena wavana Lidia ma ana dobu Thaiataira. Tauna gara lebalebarina maiana ḡaeḡaena taugimareina ma God i vitumaḡanei, ma God orana i votawanei da aiwai Paul i bababaniei i rautaniganana kauiei.¹⁵ Maranai wavine ana numa ravai i babataito ma i rauḡorelai i pa, "Ona nei au numa mepa da o notanotai da tau kerisiana ririwa kauana." Ma i egariai da ana au numa a mae.

Paul ma Sailas au panipani numana au Philipai

¹⁶ Mara tagogi a nenaie boru au gabuna ma taunola guguini a nebelei, Tauna au orana arua apoapoena i mae ma lamnei aiwai amapo da ina tupua i vivieḡai. Ma mane ḡaeḡaena i kaukauiei ana taniwaga aubaina.¹⁷ Tauna Paul ma tauai i votaḡotaḡoiai ma i garagarara "Wei nelarai God ḡeḡetelarana ana taunola! E vivinolanola menanare God e vivilawananei."¹⁸ Wei kauana i kauiei au pom biaga da Paul i viamlo-ḡaigaini da i mae-tavirei ma arua apoapoena i riwei, "Iesu Keriso wavanei a egaegarim da wavine ma opu-tawanei!" Maratagogi arua apoapoena wavine i opu-tawanei.

¹⁹ Maranai taunola guguini ana taniwaga i aramanei da ai mane etanaina i vine-boai, tau Paul ma Sailas i vojijini ma i taina naiei au deba Gabemani awarii.²⁰ Tau i nei ai taurauetara awarina ma i riwa, "Wei nelarai mai Jew wei dobuna ravai e vivinuaragaḡaraḡai.²¹ Tau i ata rava kua ḡelau i viviararamani ma wei ata giu e teretereḡairei."

²² Ma patara i rui Paul ma Sailas vunuai aubaina. Ma gabemani Paul ma Sailas, ai gara i sikai ma wipiei i kwapui.²³ I vunui-kauiei ma i tawana-ruiei au panipani numana. Ma numana badana i egari da ita paina-kauiei da eḡa ita ruba.²⁴ Anina ma Panipani badana tau i tawana-ruiei, panipani numana au orana ma aei, ai vivitainiei au orana i raḡita-jijini.

²⁵ Nubautuvai Paul ma Sailas i raraupari ma i welawela God awarina ma panipani ḡelau i rarautaniganana.²⁶ Nanare ma lolo ḡaeḡaetana dobuna i gui.

Ma maratagogi pani numana metaetana i wana-tawatawanei ma panipani anapui ai sein i dabarara. ²⁷ Pani numana badana i vomairi ma ita inanai da metaeta wanatawanana ma i notai da panipani i ruba ma lamna aubaina ana sod i lavui da ita vira^gena-melei. ²⁸ Wate Paul i garara, “E^ga ma vunuu-melem! Tauai anapuiwai weka!”

²⁹ Pani numana badana ana taunola i ^gorei da lalalaina ita neiai ma i rubarui ma ana sisisisina i mae-peu Paul ma Sailas au naoi. ³⁰ Ma i opunei au doa ma i paridadanei, “Babada aiwai ana kauei da ana lawana?”

³¹ Tau i paribelei, “BADA Iesu Keriso ma vituma^gane i ma ma lawana, am numa ravai maiteni.” ³² Ma God riwana i raugugulei tauna ma ana numa ravai awari. ³³ Nai maranaina avena da waguvarai, pani numana badana Paul ma Sailas i naiei ma keroi i o^gai, Ma maratagogi tauna, ana numa ravai maiteni i babataito. ³⁴ Paul ma Sailas i ^gaiiei ana au numa da i viambagibagi. Tauna ana numa ravai maiteni i vinuaii kua da marina God i vituma^gane.

³⁵ Ma marana i tom ma tauetara ana taunola* i paritawane i pani numana badana awarina ma i egari i pa, “Nelara ma voterei da ina nae.”

³⁶ Pani numana badana Paul i riwei, “Taurauetara i egariu da ana voteremi da ona nae. Marina ana nuaubami ona nae.”

³⁷ Wate Paul, taurauetara i riwei, “Tauai e^ga ita rautarelai ma i vunuu-kauei patara au matai. Ma avena da tauai mai [†]Rome, wate marina i ^goei da govagova^gane i ina paritawanelai bo? E^gateni kua! Ona voterei da taurauetara ina nei weka da ina naielai.”

³⁸ Tau i wei babanina i naiana-melei da babada i riwei ma tau i rovo kaukau maranai riwana i nonori da Paul ma Sailas lamna mai Rome. ³⁹ Ma i nei au pani numana ma i riwa, “Tauai a kauana-boai, ai ^go’apoapoe ona nota-tawane.” Ma i tere-opunei ma i viba^ga-guratei da dobuna ita oputawane. ⁴⁰ Ma Paul ma Sailas pani numana i opu-tawane ma i nae Lidia ana au numa ma kampa kerisiana maiteni i viboruboru ma i vovai-virewapani. Anina ma tau i dobuna i netawane.

17

Au Thesalonika

¹ Paul ma Sailas Amphipolis taon ma Apolonia taon i voterei da i nae au Thesalonika taon. Weka mai Jew ai boru numana i mamae. ² Ma i rui au boru numana au Sabate me mara patapatai i kaukauei nanare, kampa Sabate tonu^ga rava awari God riwana i viararamani. ³ Ma God riwane i viararamana da Keriso ina vinuapoapoe ma iragelei ina vomairi me, “Wei ravana a bababaniei awarimi, tauna Iesu Keriso.” ⁴ Mai Jew ^gelau orai i taini ma tau i vota^gota^goi. Ma nanare Jentail nelara ma^gama^gagau i God taurauduneleina ma waivine wavai naenaei ma^gama^gagau.

⁵ Wate mai Jew i unura ma rava ora-potapotai ma^gama^gagau au etanai i tami ma au taon vikaruwa^gawa^ga i vikarei. Ma oroto wavana Jason ana numa i ruini Paul ma Sailas i baibaiei da ita opunei patara awari. ⁶ Wate maranai e^ga ita nela^gai tau i Jason ma kerisiana ^gelau i taina-naiei taon babadai awari, ma i garara, “Wei ravai dobu au anapuna apoapoe ma^gama^gagau i kauei, marina i ^getai ata au dobu.” ⁷ Ma Jason, Paul ma Sailas i taravaini ana au numa. Tau i

* **16:35:** vs. 20 ma inana. [†] **16:37:** Mai Rome ai tarawatu lamna, “E^ga rava Romei ma kwapu labalababai bo ma pani da au naona ma rautarei.” Rome Israel i vibadei Iesu ana au mara.

Caesar ana tarawatu e viviaigai ma e ririwa da gulau ġelauna e mamae wavana Iesu.

⁸ Maranai patara ma taon babadai wei babanina i nonori tau i amlai i ġaiġai kaua, ⁹ ma Jason i egari da mane ġaeġaena i vimaiei da eġa mae boaboa ġelauna ina vitupui. Ma tau i Jason i voterei da i nae.

Au Berea

¹⁰ Ma waguvarai tauvitumaġana Paul ma Sailas i paritawanei au Berea. Maranai kampa i ġeta, ma i rui au boru numana. ¹¹ Mai Berea i viaiaii, eġa me mai Thesalonika. Tau i rautaniġana ma i votelatela ma marana patapatana God ana buka i 'aiavi da ita aramanei da Paul aiwai i bababaniei lamna riwa kaua. ¹² Ma lamnei mai Jew maġamaġau i vitumaġana, ma nanare mai Greek waivinei wavi naenaei ma nelara.

¹³ Maranai mai Jew au Thesalonika paratana i nonori da Paul God riwana i raraugugulei au Berea, tau i maiteni i nae kampa, ma rava i rauegari da ġavia ita vikarei. ¹⁴ Maratagogi kerisiana Paul i paritawanei au gera wate Sailas ma Timothy au Berea provins i mae. ¹⁵ Ma nelara Paul i tauvigwanigwaniei da au Athens, ma Paul nelarai i riwei ma i paritawanei au Berea da Sailas ma Timothy ita riwei da laġilaġina ita nei awarina.

Paul au Athens i raugugula

¹⁶ Ma Paul au Athens ana rava i paipaini, ma i 'nanai da kampa kokoitau i maġa kaua ma i vinuabola kaua. ¹⁷ Mai Jew ma mai Greek God tauviborumeina awari i jima guratana au pari numana ma nanare au deba, aiavi da i ġeta ma i rautaniġana. ¹⁸ Ma rava ġelau i nuaulaulai i ġetai ma maiteni i vitarapiri, tau i e ġoreġorei mai Epicure ma mai Stoic*, tau i lawana ai kaua tauviararamanai. Ma ai rava ġelau i paridadana, "Wei ravana aiwai e voġavoġanei?" Ġelau i riwa, "Mepa da tauna dobu ġelau ai god e bababaniei." Tau i wenanare i babani aubaina Paul Iesu Riwana Aiaina ma ana iraġe ma ana vomairi me, i raugugulei.

¹⁹ Ma i taravaini ma i naiei ai au boru e ġoreġorei Areopagus ma i riwei, "Ma nei ma a ġoei da am viararamanana vouna e bababaniei, ata aramanei. ²⁰ Kaua ġelau i babaniei tauai a vivinuanaini, ma a ġoei da ana aramanei anona aiwai?" ²¹ (Taumana ma mai Athens marana patapatatai ai nola eġa aiwai, da kaua voui ina virarautuei ma ina nononori.)

²² Ma Paul babadai au naoi i mairi ma i riwa:

Dogadogara mai Athens! A inana da taumi vipatupatutumi ami god awarii, ²³ A bababara ma ami pulo aniapunana a inainanai, ma tagogi a inana i tepana i giruma, "Wei God eġa ata araramaneia aubaina." Wei Godna o viviborumei wate eġa ota aramanei. Tau ana riwemi nai Godna aiavi.

²⁴ *Tauna God mara ma dobu ma aiwai anataputa au orana i kauai. Ma tauna mara ma dobu badana, ma numa rava uranei e voavoai au orana eġa ita mamae. ²⁵ Ma eġa rava ai agu ita paipaini, tauna agu eġa ita ġoeġoei.

* **17:18:** Mai Epicure rava wavana Epicurus ana viararamana i votaġotaġoi. I viararamana da lawana ana ano lamna nuaiaii. Da tau aiwai da tupuai ma matai ana rauoġara, e vivinuaiaiei. Ma aiwai da e virovorovi bo iniviara e vereverei. Tau i wei lamna e ġeduġeduai. Tau i ririwa da God rava eġa ita vinuvainiei Stoic rava wavana Zeno ana viararamana e votaġotaġoi. I viararamana da rava ma ai maiteni au ririvata ta mamae (nature) ita vivirei, Tau ai ġoana ma ai erawa ita teretawanei ma ita vivinotanota kaua ma avena rava ġelau ai agu ita rauneneli. Tau i ririwa, "Nuaiaii lamna kaua e votorei da mena ina tupua nei nanare ina tupua." * **17:24:** 1Ki 8:27; Act 7:48

Aubaina tauna rava lawana ma lavutu ma anapuna e vereveri. ²⁶ Au karena rava tagogi i kauēi ma nai ravaneī dam patarai i vitupua ma dobu i maeni. Tauna ainelana rava ai mara i terei da ina mae ma ina irage ma anime paratana i aiterei. ²⁷ God wenanare i kauēi da rava tauna ina baiei da mepa ina nelaḡai. Wate tauna au geregereta, eḡa au uama. ²⁸ Taugiruma ḡelauna Greekei i riwai pa, “Tauneī ta mamae ma ta bababara ma anapuna ta kaukauēi.”[†] Ma wate ami taugiruma ḡelauna i girumi i pa, “Tauai nanare tauna natunatuna.”[‡]

²⁹ Ma tauta God natunatuna, eḡa tana notai da God lamna me kokoitau, goldei bo silvei i kauēi. Rava uraiei ma ana nuaulaulauei i kauēi. ³⁰ Wariaga rava God eḡa ita aramaneī wate God tauī i 'nana-tawaneī, wate marina anataputa egaegarita da tana rupena ma tana mae-tavireta awarina. ³¹ Aubaina mara i vinei maranai rava anatapui aiaineī ma jijimanineī ina kovoḡi. Rava i vinei da tauneī ina kovoḡa. God wei ravana iragelei i vovaimairini lamna ina vimataira rava awari da ravana anina tauna.

³² Maranai Paul iragelei vomairina i babanieī, rava i nonori ma ḡelauī tauna i vinei wate ḡelauī i riwa, “Tauai a ḡoei da muriai wei babanina ma babaniana-melei.” ³³ Ma Paul ai boru i opu-tawaneī ma boru i gudu. ³⁴ Wate ḡelauī i vitumaḡana ma Paul i votaḡotaḡoi. Tagogi lamna Dionisius, Areopagus boruna au orana, ma wavine wavana Damaris, ma rava ḡelauī.

18

Paul i nae au Corinth da rava awari Iesu ita jimeī

¹ Paul Athens i netawaneī ma i nae au Corinth. ² Kampa Akwila tauna Jew au Pontus i tupua, marinaota au Italy * da i nei awana Prisila maiteni. Aubaina Rome ai gulau Claudius mai Jew anatapui i viagaḡei da Rome i opu-tawaneī. Paul i nae da tauī ita inanaī. ³ Paul tauī maiteni i mae, tauī tauampopo, (ḡamoḡamo opina ma gara i popopoi numa aubaina ma i gimagamarei) me Paul ai nola tagogina. ⁴ Sabate patapatana au pari numana tauna mai Jew ma Jentail awari i jima guratana da orai ita sinavirai.

⁵ Maranai Sailas ma Timothy au Masedonia da i ḡetai, Marina Paul BADA riwana ava i raugulei mai Jew awarii da Iesu tauna anina God ana Vinevine Keriso. ⁶ Wate mai Jew Paul i viḡavieī ma riwa apoapoeneī i ririwie. Ma tauna ana gara i rauabuabui ma awari i riwa, “Mepa da o kwako, lamna ona viwavu-melemi, eḡa tau ona viwavuiul Marina da e nenaē, ana nae Jentail awari.”

⁷ Ma tauī i voterei ma i nae Jentail wavana Titus Justus ana au numa i mae, tauna God tauviborumeina ma ana numa pari numana au geregerena. ⁸ Crispus, pari numana ai bada, BADA i vitumaḡaneī ana numa ravai maiteni, ma mai Corinth maḡamaḡauī Paul i rautaniḡaneī, i vitumaḡana ma i babataito.

⁹ Waguvara tagogi BADA Paul ana au inana i babani i pa, “Eḡa ma rovo, ma babani ma eḡa ma genuana.” ¹⁰ Aubaina Tau tam maiteni. Ma rava eḡa ina rau-iviapoapoelem aubaina au tauvotaḡotaḡo i maḡa wei au dobuna. ¹¹ Ma Paul kampa i mae madeḡa tagogi ma nawaravi six, ma God riwana i jimeī.

[†] 17:28: Epimenides Ciritei au 6 century BC. [‡] 17:28: Aratus Silisiei 3 century BC. * 18:2: Rome taon lamna taon ḡaeḡaena au Italy ma ai kapital AD. 49 au orana kampa viḡaiḡaiawa ḡaeḡaena da wavalatona Claudius mai Jew i riwei da dobuna i netawaneī.

12 Wate maranai Galio i vi-Gavena au Akaia provins, mai Jew kampa i vitagogiei ma Paul i vojijini ma i naei Gavena awarina da ita rauetarei. 13 Ma tau i viwavui 'pa, "Wei orotona ana moruei rava orai e taitaini da God e viviborumei ma ata tarawatu e viviaigai."[†]

14 Ma Paul gamona i laḡi da ita babani ma Galio i babani mai Jew awari i pa, "Mepa da taumi wei ravana o viviwavui da kaua ḡaeḡaei bo kaua apoapoe aubaina, lamna tau au nola da ata rau-taniḡanemi. 15 Wate wei taumi ami babani ami wava ma ami tarawatu, ana voterei au urami. Tau eḡa wei kauai ana rauetarei." 16 Ma etara numanei i viaḡaḡana-opunei. 17 Tau i anatapai pari numana ai bada Sothenis i vojijini ma i vunui etara numana au naona wate Galio tau i 'nana-tawanei.

Paul i nae me au Antiok au Syria

18 Paul i mae mara aburuna tauvitumaḡana maiteni au Corinth ma wagei i nae au ḡereḡere au Cenkirei waga ai au animae. Prisila ma Akwila maiteni. Ma kampa Paul au parivainuḡana aubaina aparana i ḡari, ma anatapai i nae au Syria 19 Tau i Ephesus i ḡeta ma Paul, Prisila ma Akwila i voterei. Ma i nae au boru numana Mai Jew awari i jima. 20 Rava i vibaḡai da ita mae mara aburuna wate tauna eḡa ita vianina. 21 Wate maranai i opu da ita nae ma tau i riwei, "Ana nememei mepa da God ana ḡoana, ma Ephesus i netawanei ma wagei i damana." 22 Maranai i ḡeta au Caesarea ma i nae au Jerusalem da kerisiana i raugenari ma i nae au Antiok. 23 Au Antiok i mae mara aburuna ma Galatia provins ma Pirijia provins i naeni ma kerisiana i vovai-virewapani.

Apolos mai Ephesus awari i raugugula

24 Wei marana Apolos tauna Jew, au Alexandria da Egypt da i nei au Ephesus. Tauna BADA riwana ma ana giruma i aramana-kauai ma rava bababanina. 25 Rava ḡelau, Apolos BADA ana etanai babanina, i viararamani, ma ana tepatorana i jima ma Iesu ana kaua ma ana lawana i viararamana-kauai. Wate tauna John Taubabataito ana babataito babani ava i aramanei. 26 Ma i vikarei da ana tepatorana i raugugula au boru-numana. Wate maranai Prisila ma Akwila tauna ana babani i nonori. Ma i ḡorei da maiteni i nae ai au numma ma BADA ana etanai ana babani i viaramana-kauai.

27 Maranai Apolos i nenae au Akaia, kerisiana Apolos i vovai-virewapani. Ma kerisiana au Akaia ai pepa i giruma da ita pariveri da tauna ita nebele. Maranai au Akaia i ḡeta ma tau i God ana aḡuei i vititumaḡana, agu ḡaeḡaena i verei. 28 Tauna ana babaniei au deba mai Jew i vovaiubai. Ma God riwana i vaia ma lamnei rava i viararamani da Iesu anina Keriso.

19

Paul au Ephesus

1 Apolos au Corinth taon Akaia provins i mae, ma Paul ola i taḡoni da au Ephesus i ḡeta. Kerisiana ḡelau kampa 2 ma i paridadanei i pa, "Arua vivivireina o vaia bo eḡa maranai o babataito?"

[†] 18:13: Mai Jew e ririwa da Paul eḡa tau ai vitumaḡana oina ita viararamani ma wei Rome ai tarawatu i vianinei, wate e ririwa da Paul rava taparoro vouna e viararamani ma wei Rome ana tarawatu e viviaigai, lamna aubaina tau i ḡoei da Rome ai bada Paul ina kovoḡi. Ma inani Act 16:20-21 ma 17:7.

Tau i paribelei i pa, “Eġa, Tauai eġa ata aramanei da Arua vivivireina e mamae.”

³ Ma Paul i paridadana, “Aiwai babaitona o vaia?”

Tau i paribelana, “John ana babataito a vaia.”

⁴ *Paul i riwa, “John ana babataito lamna mataira da tau i ai ġo’apoapoele i mae-tavirei; ma mai Israel i riwei da Tauna au muriu e nenei ona vitumaġanei lamna Iesu.” ⁵ Maranai wei i nonori ma i aramanei tau i babataito BADA Iesu wavanei. ⁶ Ma Paul urana au kolai i terei ma Arua vivivireina au orai i rui. Ma i vikare i da pona tapunei i bababani ma God riwana i raugugulei. ⁷ Tau nelara iavana twelve.

⁸ Paul i nae au boru-numana ma kampa nawaravi tonuġa au orana ana tepatorana mai Jew awarii i bababani. Da rava orai ita sinavirai da BADA ana vigulau ita vitumaġanei. ⁹ Wate ġelau kampa orai i bagibagi ma eġa ita ġoei da ita vitumaġana, ma patara au matai Iesu ana etanai i vijibogi. Ma Paul tau i voterei ma kerisiana i taravaini ma i nae Tairanus ana au numa, ma kampa i viararamana ma i giugiu pompom. ¹⁰ Ma nanare i mae madeġa ruaġa i kwa, da mai Jew ma Jentail ravai maġamaġau i Eisia provins maemaiei BADA riwana i nonori.

Sceva natunatuna

¹¹ Ma God ana rewapanei Paul kaua ġaeġaei ma aniba i kaukauei, ¹² lamna avena wate rava ai aġesi da ai nola garai i naiei Paul awarina da i vodadani ma i naei da rava doridoriai i vodadani, ma arua apoapoei i opu-tawanei ma i lawana.

¹³ Mai Jew ġelaui dobuna i naeni ma arua apoapoei i viviaġana-opunei ma i raudadana Iesu wavanei da arua apoapoei i viviaġaġei. Tau arua apoapoei i riwei i pa, “Iesu wavanei, taunei Paul e raraugugula, Tau a egarim da ma opu.”

¹⁴ Skeva, pirisi ai bada natunatuna nelarai seven wei kauana i kaukauei.

¹⁵ Wate mara tagogi arua apoapoeni i paribelei, “Iesu a aramanei ma Paul a aramanei ma taumi aiavoi?” ¹⁶ Ma rava au orana arua apoapoeni maemaena i auepai ma tau i vunui da eġa ita vikalokaloei. Ai gara i sika-naei ma ana kovakovai ma tararatai numei i viopuopuana ma i viruberubei.

¹⁷ Mai Jew ma Jentail ravai au Ephesus maemaiei wei riwana i nonori ma rovo orai i ġaeni ma Iesu wavana i vivirana-kauei.

¹⁸ Maġamaġau i vitumaġana ma i nae kerisiana awarii ma ai ġo’apoapoe i rupeni. ¹⁹ Tau vitumaġana voui maġamaġau paraparaumai,* ai buka i vidamni au deba ma i apui. Maranai bukai ai maia i ’avi da silver 50,000†. ²⁰ Kaua babai me wei, Iesu riwana i vibabarai nai au dobuna ma rava maġamaġau i vitumaġana.

²¹ Wei anatapuna au murina Paul au orana i vinua-notanota da au Masedonia da Akaia ita verautuini da ita damana au Jerusalem ma i riwa, “Ana nae au Jerusalem ma muriai ana nae da Rome ana inana.” ²² Ma Paul ana tauagu ruaġa Timothy ma Erastus i aiparitawanei au Masedonia provins, ma tauna kampa i mae mara aburuna au Eisia provins.

Viġaiġaiawa au Ephesus

* **19:4:** Mrk 1:4, 7-8 * **19:19:** Au Deu 18:10-14 God ana rava e viviaġaei da eġa ina parauma. † **19:19:** Dracma coin tagogi lamna tau-vobagibagi ana maia au pom tagogi aubaina. Marina lamna million biaġa.

²³ Iesu ana babani ma ana kua vouna aubaina, ma viḡaiḡaiawa ḡaeḡaena i tupua au Ephesus. ²⁴ Silver taunoleina wavana Demetrius, mai Greek ai god wavinena ana numa taparoro kokoitau i rarau-ḡarogaroēi da i gimagimare, ma wei nolana mane ḡaeḡaena e neineiā silver taunoleina nai au dobuna aubaii. ²⁵ Ma tau i anatapu i rava nolana tagogina e kaukauei maiteni i rauḡoreiai ma i riwa, “Au rava, o aramane da ata maura wei nolanei ta vaivaia. ²⁶ Ma o inana ma o nonori menanare wei ravana Paul e kaukauei, Rava ai nota i sinavirai da maḡamaḡau god Artemis raudunena i voterei au Ephesus ma dobu Eisia paratana anatapuna. Ma e ririwa da ‘rava god i rauḡarogaroēi, lamna eḡa god.’ ²⁷ Tauta tana inana kua da wavata ma ata mane ani kauana eḡa ina apoapoe. Ma ata god ḡetelarana Artemis ana numa taparoro ma wavana eḡa ina vijiboḡi, eḡa au Eisia provins ava ma dobu au anatapuna.”

²⁸ Marana patara wei babanina i nonori tau i meji kua ma i vigaragarei, “Artemis mai Ephesus ai god i ḡetelera!” ²⁹ Ma tau i garagarara rava nai au dobuna i nonori ma tau maiteni i garara labalababa. Anina ma patara Gaius ma Aristakas i vojijini tau ruaga i mai Masedonia Paul ana tauvigwanigwani-ana, ma i rubana-naiei nai dobuna ana boru gabuna.† ³⁰ Paul i ḡoei da patara au naoi ita rui da ita babani wate kerisiana eḡa ita vianinei. ³¹ Wate nanare Paul ana rava ḡelau au gabemani tauna i viḡaei da eḡa ina nae au boru.

³² Patara i vinuanaina, i logologoi ma i garagarara labalababa ma eḡa ita aramane aiwai aubaina weka i nei. ³³ Mai Jew oroto tagogi i dudupone i naoi wavana Alexander ma patara ḡelau i garara awarina da ita babani. Alexander urana i voepai da tau ita genuana ma tauna ana rava aubai ita babani. ³⁴ Wate marana i aramane da tauna Jew. Tau i anatapu pona tagoginei wenanare i garagarara, “Tauta mai Ephesus ata god Artemis i ḡetelera!” da *hour* ruaga i kwa.

³⁵ Ma taon badana patara i riwei da i genuana ma i riwa, “Au rava mai Ephesus, rava anatapu au dobu i aramane da tauta tauvipaipai mai Ephesus ai god ḡeḡetelarana Artemis ana numa taparoro ma ana ḡaima vivireina marei i peuai aubaina. ³⁶ Eḡa aiwei ina vikaua-moruei. Lamna aubaina orami ina rauei ma eḡa aiwai apoapoena ona kauēi. ³⁷ Wei ravai o neiāi weka wate tau eḡa au numa taparoro aiwai ita danenei bo ata god ita riwana-boei. ³⁸ Mepa da Demetrius ana rava maiteni e viviwavui tau ina nae ina rauetara ma ami viwavu ona naei kampa taurauetara awarina. ³⁹ Ma mepa da ami nuabola ḡelau e mamae lamna taon babadai ai au boru ona babaniei ma ona terejijimani. ⁴⁰ Ma amadodo aiwai i tupua, tau a rovo da ina viwavuita mae-boaboa aubaina. Wei vikaruwaḡawaḡana anona eḡa, ma mepa da Rome ina paridadana ma tauta menanare tana paribelanani. ⁴¹ Anina ma boru i gudui ma rava i vilamonei.”

20

Paul i nae au Masedonia ma Greece

¹ Vikaruwaḡawaḡa au Ephesus taon i kwa ma au murina Paul kerisiana i raukwatueiai da i vinua-terenei, i viegualauēi ma inetawane i da inae au Masedonia provins. ² Ma dobuna ḡaeḡaenana i naeni ma kua maḡamaḡau

† **19:29:** Dobuna ana boru gabuna lamna numa ḡaeḡaena. Eḡa poewana, ma inana me nawaravi gebona. Rava maḡamaḡau 26,000, nanare ina kiala **meeting place**. Rava e nenaē kampa da kalo tapuna ma e raraubiḡa.

kerisiana i vinua-terenei. Anina ma au Akaia* i ġeta. ³ Kampa nawaravi tonuġa i mae. Tauna i vokaukua da ita nae au Syria ma wate i nelaġai da mai Jew ġelau i viraghenana i viviogatarei lamna aubaina da i nae me au Masedonia. ⁴ Nelara ġelau i votaġotaġo tau i lamna Piras natuna Sopater ana dobu Berea; Aristakas ma Sekundus, mai Thesalonika, ma Gaius tauna ana dobu Derbi; ma Tijkus ma Trophimus ai dobu Eisia provins; ma Timothy. ⁵ Tau i wagei i ainae au Troas ma kampa i painiai. ⁶ Ma palawa bagibagina torelana au murina, wagei Philipai taon au Masedonia provins a netawanei. Ma aupom 5 au murina au Troas a ġeta ai rava awari, kampa aupom 7 a mae.

Au Troas, Paul Eutikus iragħelei i vovaimairini

⁷ Wiki au karena - Sunday tauai a vitagogielai voepaepa ma BADA ana amogona aubaina, ma kampa Paul i jima da nubautuva, aubaina maratonna da ita nae. ⁸ Numa vatavatara au tepana a vitagogielai, ma kampa rampa maġamaġau i ararata. ⁹ Orotto laragana wavana Eutikus au windo i kiakiala ma Paul i raraugugula, ma tauna matana i pota kaua da i raunuavuru, ma kampa au tepa dewadewana i peu-ġaira da au doa i rauei. Maranai tau i ġaira da ita voepai, tauna irairagħena. ¹⁰ Paul i ġaira, i matave-tepani ma i rapai ma rava i riwei i pa, "Eġa ona vinuabola, tauna lawalawaina!" ¹¹ Anina ma Paul i ġae me au numa ma kerisiana maiteni BADA ana amogona amna i ani ma awari i babani maratoma. Ma Paul nai dobu i netawanei. ¹² Tau i laragana lawalawaina i naiei au numa ma rava orai i rauei.

Paul i amkuka au Miletus

¹³ Paul aenei i nae au Assos ma tauai i riwelai da wagei ana nae au Assos da tauna kampa ana vigerui. ¹⁴ Ma au Assos a vigerui ma a nae au Miletus ¹⁵ Maratonna bonabona Kios au ġereġerena a nae. Ma marana i tom au Samos a ġeta, ma maratoma ġela au Miletus a ġota. ¹⁶ Paul i ġoei da jijimanina ina nae ma avena ita rui au Ephesus, eġa ita ġoei da au Eisia provins ina mae-guratana. Tauna i vipaparana ma mepa da tagotagogina au Jerusalem ina ġeta muriai da Pentecost torelana.

Paul kerisiana au Ephesus i netawanei

¹⁷ Au Miletus Paul riwa i paritawanei au Ephesus taon kerisiana babadai awari da ita nebelei. ¹⁸ Maranai au Ephesus taon i ġetai ma tau i riwei i pa:

O aramanei au lawana menanare maranai vovounai weka au Eisia provins a ġetai. ¹⁹ Mai Jew i ġoei da ita rau-iviapoapeleu wate tau a vilamolomona ma ana toutou BADA awarina a vivitaunola. ²⁰ O aramanei da maranai God Riwana Aiaina awarimi a raugugulei, riwa aiaina aniaguimi eġa ata tajjini. Au deba a raraugugula rava maġamaġau au naoi, ma ami au numa a viararamanimi ²¹ Riwa bagibagina mai Jew ma Jentail a verei, A riwei da ita rupena ma ita mae-tavirei God awarina ma Iesu ita vitumaġanei.

²² Ma marina Arua Vivivireina i riweu da ana nae au Jerusalem. Eġa ata aramanei kampa aiwai awariu ina tupua. ²³ Wate taon nununai awari a nena ma Arua Vivivireina e vivieġeu da amapo ina panu ma au deri ina tereu ma ina rau-iviapoapeleu. ²⁴ Ma mepa da ina viragħenu, wei lamna eġa kaua ġaegħaena tau awariu. Wate kaua ġaegħaena lamna BADA Iesu nola

* 20:2: Marina e ġoreġorei Greek.

i verevereu da ana vikwai. Wei nolana lamna, God ana iviaiai maemaena, riwana ana raugugulei.

²⁵ Maḡamaḡaumi awarimi a nei ma God ana vigulau a raugugulei wate marina a aramanei da amadodo da i nene, naou eḡa ona inana-melei.

²⁶⁻²⁷ God ana vilawana ogatarana rava aubaii eḡa ata govaḡi awarimi lamna aubaina riwa bagibaginei a ririwemi da mepa da rava au babani eḡa ina vitumaḡanei ma ana lawana maemae-nonoana ina vine-boai, lamna eḡa tau au wavu.

²⁸ Taumi babada ma ona paina-melemi, nanare tauvitumaḡana tau aiavoi da Arua vivivireina au urami i teretereia. Ona inana-vaitetei me sipu taipainana ana sipu e paipaini. Tau lamna God ana vinevine taranei i gimarai.

²⁹ A aramanei da ana nae ma au muriu tauraugugula morumorui ina nei awarimi ma rava ai tumaḡana ina viapoapoeni, me auou moduei sipu au boruna virageḡa aubaina.

³⁰ Ma rava ḡelau ami au dam oina ina vomairi ma ina viararamana ma moruei rava orai ina taini da tau i votagotagoi.

³¹ Lamna aubaina matami ina kala ma ona aramanei da madeḡa tonuḡa marai ma waguvarai a notanotaimi ma ana toutou a viviararamanimi.

³² Ma marina God au urana a tereteremi. Ana agu e verevereoiimi ona vivitumaḡanei. Wei aguina e vovaiwewapanimi, ma ami pulo ina veremi, aubaina taumi God natunatuna viaiainai.

³³ Ma tau eḡa rava ana mane bo ana purapura ata rauḡarei ³⁴ Taumi o aramana-kauei da tau nimauei a nola da mane a vaia da tau au taubagibagi turau aubaii. ³⁵ Nanare, a viatataiemi da ona nola guratana da mane ona vaia ma vaia ona voagui. Iesu ana babani eḡa nuanuami ina vuru, Tauna i riwa i pa, “Verena i ai kaua eḡa me vainana.”

³⁶ Paul i babani vorovei ma anatapui i mae-ḡaira au doa ma i raupari.

³⁷⁻³⁸ I vinolanola i pa, “Amapo eḡa naou ona inana-melei.” Wei riwana i vinuabolai da i vitouana, Paul i taragwabai ma i vigia-laḡolaḡonei. Ma i naiei da au waga i vigeruei.

21

Paul ana vaḡai au Jerusalem

¹ Ephesus kerisiana babadai a viegualauei ma wagei jijimanina a nae au

Cous bonabonana ma ubaubanai a nae au Roudes bonabonana, kampa da

a damana au Patara taon. ² Weka waga ḡelauna i nene a Phonisia a gerui,

³ da au Saipras bonabonana a rubatawanei, au kelakelauai da a nae au Taia

au Syria provins a ḡota, da purapura ita viopuni. ⁴ Kampa tauvitumaḡana

a baii ma aupom 7 maiteni a mae. Arua Vivivireina kerisiana i riwei da

Paul awarina aiwai ina tupua, ma lamna aubaina Paul i viḡaei da eḡa ina nae

au Jerusalem. ⁵ Ma mara i ḡetai da ata vomairi, kerisiana awawai maiteni

da natunatuī taon i voterei ma anatapuiai a ḡaira au gera, a raupari gogona.

⁶ A viegualau da tauai au waga a geru ma tau i nae-me ai au numa.

⁷ Au Taia ma a nae au Tolemais taon a ḡeta. Tauvitumaḡana kampa a nebelei

ma aupom tagogi maiteni a mae. ⁸ Ma marana i tom ma dobuna a voterei

ma a nae au Caesarea, kampa God riwana taujimeina Philip ana au numa

a mae, tauna oroto vi-7-na au Jerusalem i vinevinei da lam taipainina. ⁹ Tauna

natunatuna waivinei 4 eḡa tavitavinei, tau God ana riwa i vivieḡai rava

awari.

¹⁰ Aupom vomaḡai i kwa, kerisiana wavana Agabas, tauna nanare God

riwana i viviegai, Judeaei i gairai au Caesarea. ¹¹ Ma i nei awariai da Paul ana tairoro i vaia ma tauna urana ma aena i ragina-melei ma i riwa i pa, “Arua Vivivireina e ririwa, da Jew babadai wei tairorona taniwagana wenanare ina ragini, ma Jentail au urai ina terei.”

¹² Maranai wei riwana a nonori, tauai kerisiana gelau maiteni Paul a vibašana-guratei, da avena ita nae au Jerusalem. ¹³ Wate i pa, “Aiwai aubaina o vitouana ma orau o viviapoopeni! Tau a vokaukaua nonoa da ina ragini, wate ega lamna ava ma ina viraḡeniu au Jerusalem, BADA Iesu a vovotaḡotaḡoi aubaina.” ¹⁴ Tauai a vivigaei ma ega tagotagogina da nuanuana ata sinavirai lamna aubaina riwanana a voterei ma a riwa a pa, “BADA ana ḡoanei nanare ina tupua.”

¹⁵ Wei au murina a vokaukaua ma a vomairi au Jerusalem. ¹⁶ Kerisiana gelau mai Caesarea I naielai Nason ana au numa ma kampa a mae. Tauna oroto Saiprasiei, ma Iesu votaḡona i vikareni maranaina rava vouvounai i vikarei da Iesu Riwana Aiaina i rarau-gugulei.

Paul, James i raugenari

¹⁷ Maranai au Jerusalem a ḡeta kerisiana ana nuaiiai i nebelelai. ¹⁸ Maratom ḡela Paul maiteni a nae da* James a raugenari,† dogadogara anatapui kampa. ¹⁹ Paul tau i viegualauei ma ana au vaḡai God aiwai i kaukauei Jentail awari anatapuna tau i parivere.

²⁰ Maranaina wei riwai i nonori, tauai God i voepaepai ma Paul i riwa i pa, “Turaiiai u aramanei mai Jew ai maḡa tausana nanare weka Iesu e vivitumaḡanei, ma God ana tarawatu e vovotaḡo-kauai. ²¹ Wate rava Jew kerisiana weka au Jerusalem am kaua i vibenabenei, da tam Jew Jentail maiteni e mamae e viaramani da Moses ana tarawatu ina gedugeduaiei. Ma u riwei da natu-natui ini ega ina bori ma ai kaua gelau ega ina votaḡotaḡoi. ²² Tauai aramanei da tam u ḡetai, Marina aiwai tana kauai? ²³ Aiwai a ririwemi ona kauai. Au nelara 4, tauai parivainuaḡana bagibagina God awarina i kauai. ²⁴ Ma taravaini ma ona nae au Tempol ma ona viaiaina-melemi ma ma vimaia da tauai ai viaiaina pulona ina kauai. Anina ma tauai kolai ina ḡari ma rava anatapui ina aramanei da tam Moses ana tarawatu anina e vovotaḡotaḡoi, ma babani au naona lamna anatapuna moru kaua. ²⁵ ✧Ma Jentail marina i vivitumaḡana aubaii pepa a girumi ma wenanare a riwei, sia e pulopuloei kokoitau awarii ega ina ani, Tara ega ina umai, Rava ḡamoḡamo uai e kikiki tarai ega ita toi-tawanana, ega ona ani. Ega ona viawawana labalababa.”‡

²⁶ Anina ma marana i tom Paul nai nelara 4 maiteni i viaina-melei God au matana. Muriiai Paul i rui Tempol au orana ma i vinolanola piriisi awarii da mara aiwai tauai ai viaiaina ina voterei. Ma maranaina pulo ita terei tauai tagotagogi ava aubai.

* **21:18:** Wei lamna Iesu ana tevera. Act 12:17; 15:13 ma Mrk 6:3 † **21:18:** Mane anatapui ai au vaḡai i tami bo rava i puloi i verei damanai mane taupainina i verei ✧ **21:25:** Act 15:29

‡ **21:25:** Viawawana labalababa wei anatapuna e vaivaipai: Rava ḡela awana oroto bo wavine maiteni e viawawana (Exo 20:14; Deu 5:18); Rava ḡela maiteni e viawawana mane bo purapura aubaina (Lev 19:29; 1 Cor 6:15); Natuim maiteni e viawawana, me oroto natuna wavinena maiteni bo wavine natuna orotona maiteni (Lev 18:6); Orotu ma oroto bo wavine ma wavine e viawawana (Lev 18:22; Rom 1:26-27); Rava ma ḡamoḡamo e viawawana (Lev 18:23); Rava ḡela, ega awaom maiteni e viawawana (Eph 5:3); Rava gelau e gaegari da maiteni ma viawawana. (Gen 34:7; Deu 22:25-28).

Paul i pani.

27-29 ✨Ma aupom 7 aburuna ava da ita kwa ma Jew ḡelau i au Eisia provins maemae tau i Paul i 'nanai Tempol au orana. Au naonei tau i Paul i 'nanai oroto Ephesusei wavana Trophimus maiteni, au taon i bababara ma i notai da tauna Trophimus i ruiei Tempol au orana. Tau i Paul i vojijini ma i garara i pa, “Nelara mai Israel ona nei, ona voaguiai! Wei orotona dobu anapapuna e nenaeni ma rava anapapui e viviararamani da mai Jew ma ata tarawatu ma Tempol i parivirevirei. Tauna Jentail i neiai gabuna au vivivireina ma i tuvaidoedoei God au matana!”

30 Ma rava anapapui i nonori da au Tempol viḡaiḡaiawa i tupua ma anapapui kampa i ruba. Ma Paul i vojijini ma i taina-opunei au doa ma Tempol metaetana i gudui. 31 Maranai tau i Paul viragēnana i kaukauei, Mai Rome sorodia ai bada ḡaeḡaena i nonori da viḡaiḡaiawa ḡaeḡaena i tupua au Tempol. 32 Tauna laḡilaḡina ana sorodia ma ai babada i vaini ma i ruba kampa, maranai rava tau i 'nanai, Tau i Paul vunuaana i voterei.

33 Sorodia ai bada i nei Paul awarina da i vojijini ma ana sorodia ruaḡa i riwei da seinei Paul urana au urai i pani jijini. Anina ma tauna patara i vitara-virevirei i pa, “Wei aiai orotona? Aiwai i kauēi?” 34 Patara au orana rava ḡelaui babani tagogi i gararei, ma rava ḡelaui babani tapuna i gararei. Rava were da nare i garagarara da sorodia ai bada menanare ita nelaḡai gaiawa karena aiwai, lamna aubaina ana sorodia i egari da Paul ita naiei, ai au bareki. 35 Maranai Paul bareki tetena i tutuḡereḡerei, patara i ḡaiawa guratana aubaina sorodia Paul i voepai da i avarai da ita gagaloēi. 36 Patara amapo da tau i vovotaḡotaḡoi ma i garagarara i pa, “Ona viragēni, ona viragēni!”

Paul patara awarii i babani.

37 Maranai tau i aburuna ava da au bareki ita rui, Paul Greekei sorodia ai bada i riwei i pa, “Anina bo eḡa da awarim ata babani?”

Ma tauna i aupai ma i riwa i pa, “Tam Greek u aramanei bo? 38 Tau a notai da tam Egyptei, rorova ai babada u viḡaviei, Ma rava 4,000 orai potapotai u opunei au mutulua, Tam nai ravana bo?”

39 Paul i paribelana i pa, “Eḡa! Tau Jew ei, au taon Tarsus a tupua, au Silisia provins, a vivibaḡaim da rava awari ana babani.”

40 Tauna i vianina ma Paul au tete i mairi. Tauna urana i voepai da patara garara i voterei. Maranai tau i genuana, Paul tau i awarii ai ponanei i babani i pa.

22

1 “Amamau ma varevareiu, ona rautaniḡaneu ma ana viatataiemi da tau eḡa aiwai ata kauana-boai.”

2 Maranai patarana Paul i nonori da tau i pōnei i bababani, tau i genuana ma i rautaniḡana.

3 ✨I riwa:

Tau Jew ei, Tarsus au Silisia provins a tupua wate weka au Jerusalem a rata ma a giruma. Amamata ai tarawatu a girumei ma au tauviararamana Gamaliel.* A ḡoana-guratei da God ata voepaepa-kauēi me taumi anapapumi

✨ 21:27-29: Act 20:4 ✨ 22:3: Act 5:34-39 * 22:3: Gamaliel tauna tauviararamana ma rava aiaina Paul ana au mara. Tauna Pharisi ma boru ḡetelarana (Sanhedrin) au orana.

nanare. ⁴ ✠ Tau Iesu ana etanai tauvotaḡotaḡoina a rau-iviapoapoelei da ḡelau i'raḡe. Nelara ma waivine a pani ma au numa panipani a tawana-ruiei. ⁵ Piriḡi ḡeḡetelarana ana boru ḡeḡetelarana† maiteni i aramanei da tau a ririwa kaua. Tau i ai vianina pepana i vereu da ai rava au Damaskas ata verei ma a nae au Damaskas da kerisiana ata pani ma a neiai da kovoḡa ita vaia weka au Jerusalem.

⁶ Aubenai Damaskas a tuḡereḡerei ma maratagogi lalaina gamrina ḡaeḡaena marei i ḡairai da i tunui. ⁷ A peu au doa ma pona a nonori i pa, “Saul! Saul! Aiwai aubaina e rarau-iviapoapoeleu?”

⁸ Tau a paribelei, “Bada tam aiai?”

Tauna i paribelei, “Iesu Nasaretei e rarau-iviapoapoelei.”

⁹ Rava maiteni a nenaē lalalaina i 'nanai wate babani eḡa ita nonori.

¹⁰ A paridadana a pa, “Bada Aiwai ana kauēi?” Ma Tauna i riwa i pa, “Ma vomairi ma nae au Damaskas. Kampa rava am nola ina pariverem.”

¹¹ Lalalaina gamrina i rata guratana ma matau i kamoi da eḡa ata inainana. Ma tauviganigwaniana au urai i voa ma i naieu au Damaskas.

¹² Orotō wavana Ananias kampa i mae tauna God i voepapai ma ana tarawatu i vovojijina-nonoei. Mai Jew tauna i vivirana-kauēi. ¹³ I nei da au ririvau i mairi ma i riwa, “Vareiu Saul ma inana me!” Nai marana a inana me.

¹⁴ Anina ma i riwa, “Amamata ai God i rautanim, da ana ḡoana ma aramanei, ana Taunola Jijimanina‡ - matamei ma inana, ma riwana taniḡamei ma nonori. ¹⁵ Aiwai u inainana i u nononori ma vimatemei rava anatapai awarii. ¹⁶ Marina aiwai e paipaini! Tauai ana babataitoim ma BADA awarina ma raupari da am ḡo'apoapoei ina oḡa-tawanei.”

¹⁷ Anina ma a nae au Jerusalem. Au Tempol a raraupari ma matauei kaua a inana. ¹⁸ A inana BADA awariu i bababani i pa, “Rava weka am jima tau aubai eḡa nonorana ita ḡoeḡoei. Laḡilaḡina Jerusalem ma opu-tawanei.”

¹⁹ Wate tau a paribelei, “BADA wei ravai i aramanei da pari numai a nepai da kerisiana a vunui ma a pani-naiei. ²⁰ ✠ Ma marana i am peroveta Stephen tarana i toi, tau kampa a maimairi ma ana iraḡe a vianinei ma ḡaima tautawanai ai gara a paipaini.”

²¹ Ma BADA i riweu, “Ma nae a paripari-tawanem aueia Jentail awarii.”

Paul e ririwa da tauna Romei

²² Patarana Paul i rarautaniḡanei ma marana i wei babanina i kauēi tau i meji guratana ma i vigaragararei i pa, “Ona viraḡena-tawanei, eḡa ina mae!”

²³ Tau i vigaragararei, ai kwama i kwajikwajiei ma pokau i watatawanei awarina. ²⁴ Ma sorodia ai bada sorodia i egari da Paul i naiei ai au bareki. Ma i riwei da Paul ita wipi da ita vieḡa aiwai aubaina ana rava amloi i ḡaiḡai ma awarina i garagarara. ²⁵ Ma urana ruaḡa i terepai au aidamo ma i raḡiraḡini da ita wipi ma Paul sorodia ai bada i riwei i pa, “Tau Rome-ei, Eḡa ota etareu ma o vunuvunu-labalababaiu. Lamna menanare?”

²⁶ Marana i sorodia ai bada wei i nonori ma i nae da ai bada ḡaeḡaena i parivere. Ma tauna i vitara-virevirei i pa, “Aiwai e kaukauēi? Wei ravana Rome-ei!”

✠ 22:4: Act 8:3; 26:9-11 † 22:5: Sanhedrin ‡ 22:14: Rava Jijimanina bo bulobulona, lamna Iesu wavana. Paul eḡa Iesu wavana ita latoni mepa da taurautaniḡana mai Jew ita viamloḡaigaini. ✠ 22:20: Act 7:58

²⁷ Sorodia ai bada i nae Paul awarina ma i paridadanei, “Ma riweu! Riwa kaua da tam Rome-ei bo?”

Ma Paul i paribelei, “Ee, lamna riwa kaua!”

²⁸ Sorodia ai bada Paul i riwei, “Tau mane ġaeġaena Rome gabemanina a verei da a vimai Rome.”

Paul tauna i riwei, “Tau a tupua da Rome-ei.”

²⁹ Sorodia i ġoei da Paul ita etarei wate maratagogi ita ġori-melei. Ai bada ita ġori ma i rovo-kaukua maranai i aramanei da i kauana-boai da Paul, Rome-ei seinei i pani.

Paul Jew ai boru ġetelarana^S au naoi i mairi.

³⁰ Au maratamna sorodia ai bada i ġoei da ita aramana-kauai mai Jew ai viwawu aiwai Paul awarina. Ma lamna aubaina Paul ana seinei i votawatawanei ma i opunei boru ġetelarana au naona i vimairini.

23

¹ Paul boru ġeġetelarana i 'nana-jijini ma i riwa, “Varevareiu tau au nola God awarina i jijimana ma orau aiaina da wei paratana.” ² Ma Pirisi ġeġetelarana Ananias rava ġelauna Paul au ririvana i maimairi i egari da Paul i raunavanavai.

³ Ma Paul Ananias i riwei, “God ina raunavanavaim, tam morumorum! Moses ana tarawatuei e rarauetareu wate maranai am rava u riwei da i raunavanavaiu tam tarawatu u viaigai.”

⁴ Taui Paul au ġereġerena i maimairi Paul i riwei, “Aiwai aubaina God ana Pirisi Ġetelarana e vivijibogi?”

⁵ Paul i paribelei, “Varevareiu eġa ata aramanei da tauna God ana Pirisi ġeġetelarana. Au buka i terei da *Eġa God ana taunola ma parivai-apoapoeni.*” (*Exodus 22:27*)

⁶ *Anina ma Paul i 'nanai da Sadusi ma Pharisi ġelau kampa ma ponana i rata ma i riwa, “Varevareiu tau Pharisi, amau maiteni Pharisi. A vivitumaġana da God rava iragelei ina vovaimairini wei lamna aubaina taumi o etaetareu!” ⁷ Maranai wei i latoni Pharisi ma Sadusi viparipariniġai i raukarei ma boru i kai da ruaġa. ⁸ *Aubaina Sadusi e ririwa da rava e irairage lamna eġa ita vovomairi me, ma anela da aruarua eġa ita vivitumaġanei, wate Pharisi wei anatapu i vivitumaġanei.

⁹ Gaiawa ġaeġaena i tupua ma tarawatu babadai ġelau tau Pharisi, i vomairi ma i babani guratana i pa, “Tauai eġa aiwai apoapoena ata inanai wei ravana awarina! Mepa da anela bo Bada Aruana tauna awarina i babani?”

¹⁰ Viġaiġaiawa ġaeġaena i tupua ma sorodia ai bada i rovo mepa da rava Paul ina vaiisikasikai ma sorodia i egari da i rui ma Paul i taravaina-opunei ma ina naieiau bareki.

¹¹ Ma waguvarai ġelauna, BADA Paul au ririvana i mairi ma i riwei, “Tepam ina tora! Me aubaiu u jima au Jerusalem nanare aubaiu au Rome ma jima.”

Mai Jew i vioga da Paul ina viragēni

¹² Ubaubanai mai Jew ġelau i vitagogiei ma i viogatara ma i parivainuagana da eġa ina am bo ina uma da Paul ina viragēni. ¹³ Nelara 40 nanare i vianina da Paul ina viragēni. ¹⁴ Taui i nae pirisi babadai ma dogadogara awarii ma i riwei, “Tauai parivainuagana bagibagina a kauai da eġa ana am da Paul ana viragēni.”

¹⁵ Taumi Boru gēgetelarana maiteni ona moru ma riwa ona pari-tawanei sorodia badana awarina da Paul ina neiai ma ona vitara-virevirei da riwa kaua ona vaia. Tauai ana vipaipai da ana viragēni muriai da weka ina gētai.

¹⁶ Wate maranai Paul avuna wei ogatarana i nonori ma i nae sorodia ai au bareki ma Paul i pariverei.

¹⁷ Ma Paul sorodia badana i gōreiai ma i riwei, “Wei laragana laḡilaḡina ma naiei ami bada awarina da ana riwa ina riwei.” ¹⁸ Ma i naiei ai bada gaeḡaena awarina ma i riwei, “Panipani wavana Paul riwa i paritawanei awariu ma i riweu da wei laragana ata neiai awarim aubaina am riwa awarina.”

¹⁹ Sorodia ai bada gaeḡaena laraga i vinimavoai ma i maeria ma i paridadanei, “Am riwa aiwai ma riweu?”

²⁰ I riwa, “Mai Jew i riwa da ita vibaḡaim da au maratom Paul uta naiei ai au Boru gēgetelarana, Wei anatapuna moru. ²¹ Wate eḡa ma rautaniḡanei aubaina rava 40 nanare pota e paipaini da ina viragēni. Tau i vioga da eḡa ina am da Paul ina viragēni. Tau i vokaukaua ma am vianina ava e paipaini.”

²² Ma bada laraga i riwei da eḡa aiwai ina riwei ma i paritawanei.

Tau Paul i paritawanei Gavena Felix awarina.

²³ Anina ma sorodia ai bada gaeḡaena babada ruaḡa i gōreiai ma i riwei, i pa, “Sorodia sod ravai 200, aiera ravai 200 ma hos ravai 70 ma vaia ma ona vokaukaua da waguvarai 9 oklok ona vomairi. ²⁴ Hos biaḡa ona vaia Paul aubaina da aiaina ona naiei gavena Felix awarina au Caesarea.”

²⁵ Ma sorodia ai bada pepa wenanare i girumi:

²⁶ Tau Claudius Lisias, a girugiruma awarim au bada vinualaulaunam, Gavena Felix.
Egualau.

²⁷ Mai Jew wei orotona i vojijini ma ita viragēni, wate maranai a nonori da tauna Rome-ei ma lamna aubaina au sorodia maiteni a opu da au urai a vaitawanei. ²⁸ A ḡoei da ata aramanei ana apoapoe aiwai, da ata naiei ai Boru gēgetelerana awarina. ²⁹ Ma a nelaḡai da viwavuna lamna tauiva ai tumāḡana kauai ma Rome ana tarawatuei lamna tauna eḡa aiwai apoapoena ita kauēi da ata viragēni bo ata pani. ³⁰ Maranai riwana a vaia da mai Jew i ḡoei da govagovaḡanei tauna ita vunui. Lamna maratagogi a paritawanei awarim, ma nanare tauviwavu a riwana-guratei da kampa ina gētai da ai viwavu ina kauēi.

³¹ Ma sorodia ai babada i ririweia nanare i kauēi ma waguvarai Paul i taravaini ma i naiei da au taon Antipatris i gēta. ³² Au maratomna aiera ma sod sorodiai i naeme au Jerusalem ma hosi sorodia Paul i naei au Caesarea. ³³ Maranai hosi sorodiai au Caesarea i gēta pepana ma Paul gavena i veredamanei au urana. ³⁴ Gavena pepa i 'avi ma Paul i paridadanei metauna provins-na u tupua ma i riwa, “Silisia.” ³⁵ Gavena i riwa i pa, “Am etara ana nonori maranai am tauviwavu ina gētai.” Ma sorodia i naiei Herod numa i voavoaiana da ita inana-vaitetei.

24

Paul Gavena Felix au naona i mairi

¹ Apom 5 au murina Pirisi gēgetelarana Ananias ma dogadogara i ḡaira au Caesarea ai taurauetara wavana Tertelus maiteni. ² Ma Paul i gōreiai gabemani au naona. Ma Tertelus i vomairi ma viwavuna i vikarei:

Au bada Felix *vinualaulaunam, Am vibadanei ta mae ubauba ma ata nota eġa aiwai. Ma kaua vouii ma aiiai u kaukauei ata dobu voana aubaina i voagu-kaueta. ³ Anatapui ai mepamepa a mamae a vinuai ai kaua tam awarim. ⁴ Wate eġa ata ġoei da ana visina-viraviraim. Ma lamna aubaina a ġoei da uta rautaniġaneu mara aburuna ava.

⁵ Tauai a nelaġai da wei ravana lamna orana potapotana ma viġaiġaiawa tauvikareina mai Jew awarii dobu au anatapuna. Tauna boru vouna e ġoreġorei mai Nasaret† ai bada. ⁶ Tau i ġoei da Tempol maiteni ita tuvaidoedoei ma lamna aubaina a pani. ⁷ ‡ ⁸ Ma rauetarei ma ma nelaġai da ai viwavu lamna anatapui riwa kaua.

⁹ Ma mai Jew Tertelus au murina i mairi ma i riwa, “Wei babani anatapui riwa kaua!”

¹⁰ Anina ma Gavena Felix Paul i raumotemotei da ita babani. Paul babani i vikarei i pa:

Au bada vinualaulaunam, a aramanei da tam madeġa biāġa wei dobuna ai taurauetara lamna aubaina tau ana nuaubau ana babani aubaiu. ¹¹ Am rava ina riwem da tau pom ota aupom 12 nanare a ġeta memei au Jerusalem da BADA ata voepaepai. ¹² Au tauviwavu eġa ita nelaġaiu ata viġaiġaiawa au Tempol bo au boru-numana bo mepa nanare au Jerusalem. ¹³ Ma ai viwavu tau awariu menanare tana aramanei da lamna riwa kaua?

¹⁴ Wate riwa kaua da tau amamata ai God a voepaepai ma BADA Iesu ana etanai, a votaġotaġoi ma tau i ririwa da wei lamna taparoro morumoruna. Wate nanare Moses tarawatu i girugirumi ma God ana peroveta nununai i girugirumia anatapuna a vitumaġane. ¹⁵ Tau God awarina a vitumaġana guratana me ravai nanare, da tauna muriai rava anatapui iraġelei ina vilawana-melei, ravai aiiai ma rava apoapoei. ¹⁶ Lamna aubaina a kaukauana guratei da orau ina ai rava ma BADA awarii.

¹⁷ *Jerusalem a netawanei madeġa biāġa i kwa ma pom ota a nememei da molamolakai ata puloi ma pulo ata kauei God awarina. § ¹⁸ Tau aiiai, maranaina i nelaġaiu au Tempol viaina pulona a kaukauei. Eġa patara maiteni ma eġa visinaviravira. ¹⁹ Wate mai Jew ġelau i Eisia provinsei i nei kampa. Tau i mepa marina! Ita nei au naom da ai viwavu ita terei. ²⁰ Bo babada weka ita riweta au apoapoe aiwai maranai boru ġeġetelarana au naona a mairi. ²¹ *Wate mepa da maratagogi awarii a garara a pa, “A vitumaġana da God rava anatapui iraġelei ina vovaimairini! Lamna aubaina tau weka a maimairi.”

²² Felix tauna BADA Iesu ana Etanai riwana i aramana-kauei, boru i gudui ma i riwa, “Maranai sorodia ai bada Claudius Lisias ina nei, ma ina pariblem.”

* **24:2:** Felix ana au vibadana lamna eġa ita ai. Tertelus lamna Felix i ġwalagwalamerui da Paul ita viwavui ma ita pani. Felix rava vita ġaeġaei i verei da madeġa ruāġa i kwa Sisaei Nero wei ravana i viopuni. Gavia ġaeġaena i tupua ma Jew Rome i viġaviei ma tau i Jerusalem i rikai da eġa aiwaina ita mae. † **24:5:** Wava Nazarene lamna Iesu ana tauvotaġotaġoi e babaniei aubaina tauna Nasaretei. Maranai Tertelus tau i ġorei Nazarene Lamna Kerisiana e vivijiboġi. Jew Jerusalem ei ma Judea Provins anatapuna mai Galili provins ravai e inainana ġairei, (John 1:46 ma iavi). Tauna wate e ririwa da menanare Paul e tapataparoro nei lamna mai Rome ai tarawatu e viviaigai. ‡ **24:7:** Verse 7 lamna buka waduwaduboi biāġava au orana e mamae, wate buka Greek ponanei i girugirumi maġamaġai wei ves-na au orana eġa. * **24:17:** Act 21:17-28 § **24:17:** Madeġa 5 i kwa ma Paul i nememei au Jerusalem da ita mae mara aburuna da tauvitumaġana ita vovai viwewapani ma ana babara ma nolana aiaina ita virarautuei. (Act 18:22) * **24:21:** Act 23:6

²³ Ma sorodia ai bada i egari da Paul ita inana-vaitetei ma ita voterei da ita bababara ma ana rava ita nei da ita raraugenari.

Paul Felix i viararamani

²⁴ Aupom biağa au murina Felix awana Drusila maiteni i nei. Drusila lamna wavine Jew ei. Ma riwa i paritawanei da Paul i neiai, ma rava ai tumağana Iesu Keriso awarina i babaniei ma Felix i rautaniğana. *

²⁵ Wate maranai Paul babani i vikarei da God ana goana, da rava lawana aiaina ma jijimanina ina maeni, ma erawa kauai ma go'apoapoe ina geduaiei, aubaina mara e nenei maranai rava anatapui ina etarei. Felix wei babanina i nonori tauna i rovo ma Paul i riwei, "Ma nae! Ma maranai ana goem lamna ana kwatuem." ²⁶ Ma Felix i goeğoei da Paul tauna manelei ita gwalai ma lamna aubaina mara i mağa i raukwatuei ma awarina i babani.

²⁷ Madeğa ruağa au murina Felix i rautom ma ana gabu Posias Festus i vaia. Felix i goei da wavana ita ai mai Jew awarii lamna aubaina Paul au numa panipani i votere-tawanei.

25

Paul i vibağa da Sisa au naona ita mairi

¹ Festus i ğeta au Caesarea da ana nola ita vikarei ma aupom vitonuina i ğae au Jerusalem. ² Weka pirisi ğeğetelarana ma dogadogara Festus i nebelei ma ai viwavu Paul awarina tauna i verei. ³ Ma Festus i vibağai da ita voagui da Paul ita paritawanei au Jerusalem. Tau i ava i vioga da Paul au etanai ita virağeni.

⁴ Wate Festus i paribelei i pa, "Paul au deri au Caesarea ma tau a ğaiğaira me kampa aupom ruağa au murina. ⁵ Mepa da Paul aiwai i kauana-boai lamna ami Babada maiteni ana ğaira da kampa ami viwavu ina terei."

⁶ Aupom 8 da 10 nanare au murina Festus i ğaira me au Caesarea ma maratamna au numaetara i kiala ma ana sorodia i eğara da Paul ita ruieiai au naona. ⁷ Maranai Paul i ruieiai, ma Jew babadai Jerusalem ei i ğairai i nei awari ma ina viwavui, kava mağamağau apoapoei aubaii. Wate tau i viwavu anatapui anona eğa.

⁸ Paul wei *viwavui i vinua-nainei ma i pa, "Tau eğa aiwai apoapoena ata kau ei mai Jew ai tarawatu awarina bo ai Tempol awarina bo Caesar awarina."

⁹ Wate Festus i goei da mai Jew ita vinuaiaini lamna aubaina Paul i paridadanei i pa, "E goeğoei bo eğa da tana ğae au Jerusalem ma etara?"

¹⁰ Paul i riwa, "Tau marina Caesar ana au etara gabuna a maimairi, weka ina etareu. Tam u aramana-kau ei da tau eğa aiwai apoapoena ata kau ei mai Jew awarii. ¹¹ Wate mepa da aiwai apoapoena a kau ei lamna ma virağeni. Tau eğa irage ata rovoei. Wate mepa da wei lamna viwavu moru lamna eğa ai ai ana rewapana ita mamae da ina veredamaneu. Tau a vivibağa Caesar awarina!"

¹² Festus Caesar ana dogadogara ai nota i vaia ma i paribelana i pa, "Tam u vibağa Caesar awarina, Anina Caesar awarina ma nae."

* **24:24:** Mepa da Drusila Jew wavinena awarinei Felix wei ravai e goeğoei tauvitumağana i aramanei. Drusila lamna Herod Agrippa natuna guğuinina umauna ana madeğa 20. Tauna wavalatona Siriei i ravaği wate i voterei maranai ana madeğa 16 da Felix i ravaği. Wei lamna ana tavine viruiaina ma Felix ana tavine vitonuina. * **25:8:** Paul au Tarsus i tupua wate tauna wavana Rome gabemanina awarina. Lamna aubaina tauna ana rewapana e mamae da ana nuabola ina naiei au Rome da Caesar ina rauetarei.

Festus Paul ana babani gulau Agrippa i pariverei

¹³ Aupom biāga au murina gulau Agrippa[†] novuna Benisi maiteni i nei au Caesarea da gavena vouna Festus i raugenari da ita viegualaei. ¹⁴ Ma i mae aupom vomağauna ma Festus Paul i rarauetara gulau i pariverei i pa, “Felix panipani tagogi weka i voterei. ¹⁵ Ma maranai a nae au Jerusalem mai Jew ai piriisi babadai ma dogadogara ai viwavu i nei ai awariu ma i vibağaiu da Paul ata virāgeni.

¹⁶ —Ma a riwei da tauai mai Rome ai tarawatu e ririwa da eğa rava ana kovoga labalababai da au naona ana rauetarei. Tau i na ġetai da ai viwavu taurauetara au naona ina mairi da ina gagaloana-melei. ¹⁷ Maranai tauviwavu maiteni weka a ġetai. Tau eğa ata vipaipai ma maratomna a eğara da ravana i nei ai da ita etara. ¹⁸ Tauviwavu i vomairi ma a notai da aiwai apoapoena aubaina ita viwavu wate eğa. ¹⁹ Anina kaua biāga ava ai taparoro kauaii, ma rava tagogi irairāgena wavana Iesu i vitarapiriei. Wate Paul e ririwa da Iesu lawalawaina. ²⁰ Tau nuanuau i rağarağa menanare riwa kaua ana vainei ma Paul a paridadanei da i vianina da maiteni ata ġae au Jerusalem da kampa ata etarei. ²¹ Wate Paul i vibağa da Caesar ana viwavu ina rautaniğanei. Ma sorodia a eğari da au numa panipani ina paini da ana paritawanei Caesar awarina.”

²² Ma Agrippa Festus i riwei, “A ġoei da ravana ana babani ana rautaniğanei.” Ma Festus i paribelei, “Anina, au maratom ma rautaniğanei.”

Gulau Agrippa Paul i rautaniğanei

²³ Au maratomna gulau Agrippa ma Benisi gulau garai i oteni ma ana gabemani babadai ġaeğae maiteni, i arana-ruiei au boru numana. Festus ana sorodia i eğari da Paul i ruieiai. ²⁴ Festus i riwa, “Gulau Agrippa ma anatapumi o rieiai weka, wei ravana o inainanai! Tauna mai Jew au Jerusalem ma weka au Caesarea e ġoeğoei da ina irağe. ²⁵ Wate tau a nelağai da tauna eğa aiwai ita kauana-boai da ina irağe. Wate i vibağa da Caesar tauna ina rauetarei. Lamna aubaina a pariparitawanei Caesar awarina. ²⁶ Wate Caesar aiwai ana riwei, eğa ata aramanei aiwai ana girumi? Lamna aubaina a nei ai awarimi ma tam gulau Agrippa maiteni da tana babaniei da nota ona vereu da aiwai ana girumi. ²⁷ Aubaina eğa ita ai da panipani ana paritawanei Caesar awarina ma ana viwavuna eğal!”

26

Paul ana gudu i tarai

¹ Ma Agrippa Paul i riwei, “A vianinem da ma babani.” Ma Paul urana i voepai ma ana gudu tarana i vikarei ² i pa:

I ai kaua gulau Agrippa da amadodo tam au etara e rarautaniğanei da Jew babadai ai viwavu awariu ana tere-vaijijimani. ³ Tau aramanei da tam mai Jew ai giu ma ai paripariğai u aramanana-kauei. Lamna aubaina a vivibağaim da au paribelana ma rautaniğanana-kauei.

⁴ Mai Jew anatapui au lawana i aramanei, aburu da marina, au dobu oina da au Jerusalem. ⁵ ✨ Tau i rorova ava i aramaneu ma ina riwem da tau ai

† 25:13: Wei lamna Herod Agrippa 11, Herod Agrippa 1 natuna. ✨ 26:5: Act 23:6

boru bagibagina ma piripirina, Pharisi au orana a rui ma tarawatu anatapuna a vojijina-kauei. ⁶ Ma marina a vivitumaġana da God aiwai noinoita i parivainuaġani ina kauei. Ma lamna aubaina tau weka a maimairi. ⁷ Wei parivai-nuaġanana ata dam 12 e vipaipaiei da ina nei lamna aubaina ata rava i vipatutu ma marai ma waguvarai God e vivivorumei. Au gulau wei vitumaġanana aubaina mai Jew e viviwavuii. ⁸ Aiwai aubaina o notanotai da God eġa tagotagogina da rava iragelei ina vovaimairini?

⁹ *Tau au naona a notai da aiwai anatapuna ata kauei da Iesu Nasaretei ata viġaviei. ¹⁰ Ma anina lamna a kauei au Jerusalem. Pirisi ġeġetelerana babadai pepa i verei ma lamna i vovai-virewapaniu ma kerisiana vivivireii maġamaġau au numa panipani a terei, ma nanare ai irage a vianinei. ¹¹ Mara maġamaġau boru numai a naeni da kerisiana a vununaiei da ai tumagaana ita boviei. Amlou i ġaigai kava da dobu ġelau a naeni kerisiana a baibaiei.

¹² Mara tagogi pirisi babadai au Jerusalem pepa i vereu da rewapana i vereu ma a nae au Damaskas. ¹³ Ma aubenai nanare, tau au etanai a nena ma a inanai, lalalaina marei i ġairai ma i lalaiai, gamrina madeġa i ġetawanei! Au rava maiteni a bababara i lalaiai. ¹⁴ Anatapuiai a vipeuana au doa ma pona Hebrewei awariu i bababani. I riwa, “Saul, Saul aiwai aubaina e vivigavieu? Tam e ġoġoei da Tau ma viapoapoeniu wate eġa da tam e viviaopoapoenamelem!”

¹⁵ Ma a paridadana, “Bada tam aiai?”

Ma BADA i paribelei, “Tau Iesu, ravana tauna e vivigaviei. ¹⁶ Wate ma vomairi. Tau a nei awarim da vaivai ata verem da ma vitaunola Tau aubaii, ma amadodo aiwai u inanai ma aiwai ana viatataiem, ma vimatamatei rava awarii. ¹⁷ Tau ana gagaloem am rava mai Israel awarii ma nanare Jentail ravai awari, ma ana paritawanem Jentail awarii, ¹⁸ da matai ma vikalai, da ai lawana apoapoe ina voterei ma ina nei au lalalaina, ma Satan ana rewapana ina votere-tawanei ma ina nei God awarina. Tauna ai ġo’apoapoe ina nota-tawanei, ma ina taravaini natunatuna rarautanii, ai tumagaana awariu aubaina.”

¹⁹ Lamna aubaina Gulau Agrippa, tau riwa marei au inana a inanai a voteletelei. ²⁰ *Au naona a jima mai Jew awarii au Damaskas ma nanare au Jerusalem ma Judea anatapuna ma muriai Jentail maiteni awarii. A jima da ai ġo’apoapoe ina votere-tawanei ma ina mae-tavirei God awarina, ma ai lawana ina vimataira da ai kava apoapoe i voterei-tawanei.

²¹ Wei babanii aubaina mai Jew au Tempol i vojijiniu ma i ġoei da ita viraġeniu. ²² Wate God i vilawanu da marina, ma weka a maimairi da a vimatamata rava muomuoi ma nanare rava ġaeġaei awarii. Aiwai a bababaniei lamna peroveta nununai ma Moses i ririweta ina tupua. ²³ *Tauri i riwa da tauvilawana Keriso ina vinuapoapoe. Ma tauna ina irage ma ina vinoa da ina vomairi me ma wei matairana ina vinolanola da tauna God lalalaina mai Jew ma Jentail aubaii.

²⁴ Weka Festus i vionaġi ma i garara Paul awarina, “Tam u bual! Am aramana i vibuaim!”

²⁵ Wate Paul i paribelei, “Au bada Festus tau eġa ata bua. Tau aiwai a bababaniei lamna riwa kava ma babani anona. ²⁶ Wei kava eġa govogavagaana ma aramanei da Gulau Agrippa anatapuna i aramanei, ma lamna

aubaina ana tepatorau wei kauai ana babaniei awarina.” ²⁷ Paul Gulau Agrippa i riwei i pa, “Peroveta e vivitumaġanei bo eġa? A aramanei dā nanare!”

²⁸ Ma Agrippa i paribelei, “U notai da tau laġilaġina ma sinaviraiu da ana vikerisiana!”

²⁹ Paul i paribelei, “Laġilaġina bo amapo, a raraupari God awarina da tam na rava anatapai wei au boruna ina tupua-vira me tau nanare wate eġa sein maiteni.”

³⁰ Anina ma gulau ma gavena ma Benisi i vomairi ma i nae. ³¹ Ma anatapai i nenaē ma i babani vivira ma i vianina i pa, “Wei ravana eġa aiwai apoapoenā ita kauē da tana virāġeni bo tana pani.”

³² Ma Agrippa Festus i riwei, “Mepa da eġa ita vibaġa ġae Caesar awarina, lamna marina tata rupeni.”

27

Paul wagei i vaġai nae au Rome

¹ Festus mara i tereterei i ġetai da tauai ata nae au Rome. Paul ma tau ma panipani ġelau i maiteni au waga a geru ma a vaġai Rome aubaina. Rome ai sorodia badana wavana Julius au urana i terelai. Tauna Caesar ana sorodia vinevinena. ² Waga Adaramitei i nei da a geru ma wagana i ġota-nae au Eisia provins gerana. Orotō wavana Aristakas ana dobu Thesalonika au Masedonia provins tauna maiteni i geru.

³ Au maratomna au Sidon taon a ġota, Julius ivina i ai Paul awarina ma i voterei da i opu au gera da ana rava ita raugenari ma ana ġoana aiwai ita vibaġei. ⁴ Muriai wagei a opu da a nenaē ma ive i verau-matamataniai ma lamna aubaina bonabona au Saipras ma dobu ġaeġaena au pouna au mullaġina ambori. ⁵ Ma boga ġaeġaena a bori da Silisia provins da Pamphilia provins gerai a voterei da au Maira taon a rui au Lisia provins ⁶ Au Maira taon kampa sorodia badana mai Egypt ai waga Alexandriei i nenaē au Italy kampa i vigeruai. ⁷ Ma aupom maġamaġai nuatauai a ruba ma a voia guratana da Cinidus taon a tuġereġerei wate ive i verau-matamataniai da kampa waga a virai da Crete bonabonana ma mutu Samone au poui au mullaġina a nae. ⁸ Ma kampa nuatauai bonabona Crete gerana a naeni aubaina mara i apoapoe ma a ġeta dobu e ġoreġorei U Aiaina, Lasea taon au ġereġerena.

⁹ Mara ġaeġaena a vine-boai au vaġai* ma Rupena Ujina marana boi-bogi i kwa,† marina lamna ive ma rabama ai mara ma boga babarana i vinirovorovo. ¹⁰ Ma Paul i riwa, “Nelara, malana a vaivaia da ata vaġai ina apoapoe kaua ma waga ma purapura tana vine-boa-pai. Ata lawana maiteni tana vineboai.” ¹¹ Wate sorodia ai bada, kapena ana babani i rautaniġanei ma eġa Paul da kampa ata mae ma eġa ata nae. ¹² Wei gabuna eġa ita ai wei ivena au marana ma rava maġamaġai i goei da waganei ata nae da Phinix una, Crete au bonabonana da kampa ata mae da bodu ita kwa. Wei u ġaeġaena ma mutu i lavarata ma rauanaġa e vinao-vereverei, da au mullaġina e mamae.

Kojikojira Ġaeġaena

¹³ Maranai rauanaġa i vikarei ma waga ravai i notai da marina mara aiaina da ita nae au Phinix una. Ma anika i taini ma Crete bonabona gerai

* 27:9: Iri i parei da kojikojira ana mara ma i vaġai. † 27:9: Eng. Atonement bo *Yom Kippur* marana wei lamna September bo October rabama ma ive ai mara

i nae. ¹⁴ Ma eġa barana ita uama ma kojikojira[‡] olei iveiai. ¹⁵ Ive wagana i verau-matamatani ma waga eġa tagotagogina da ita vobelei ma i voterei da ive waga i avara-opunei. ¹⁶ Bonabona aburuna Kauda gerana au mulagina a ruba ma kampa a voia guratana da dingy a terepai au waga da a ragita-jijini. ¹⁷ Wei i kauana vorovei ma guravei waga au gabaurina da waga adana i raġita-kwaviviroi. Tau i rovo mepa da au maratete ina amġaena au Syrtis,[§] Libya au gerana. Lamna aubaina guravei ai da kuka, i raġita-tagogiei ma au boga i viorereni da waga ita bibi. Ma i voterei da kojikojira waga i avaranaiei. ¹⁸ Maratomna kojikojirana i rarau-guratanelei da purapura ġelau i boga a viorereni. ¹⁹ Aupom vitonuina tau i waga purapurai i viorereni au boga. ²⁰ Kojikojira i ruba da aupom biagā da madeġa ma ubona i purui. Ravai ai nota i kwa.

²¹ Wei au marana rava au waga am i kauana-avei, anina ma Paul i vomairi ma tau i riwei, “Nelara ota rautaniġaneu ma Crete eġa tata oputawanei, amapo waga eġa tata viapoapoeni ma ata purapura eġa tata vineboai. ²² Wate a ririwana-guratemi da eġa orami ina peu! Aubaina avena da waga ina monu wate eġa ina iraġe. ²³ God lamna tau au BADA ma ana taunola tau. Waguvarai God ana anela i paritawaneiai awariu. ²⁴ Ma i riwa, ‘Eġa ma rovo! Tam anina da Caesar au naona ma etara! Ma ġelauna lamna God ana nuavaina maemaena rava anatapui maiteni e vaġavaġai ina lawana.’ ²⁵ Lamna aubaina tepami ina tora! Aubaina tau God a vivitumaġane i ma menanare i ririweia nanarena ina tupua. ²⁶ Wate tauta au maratete tana amġaena.”

²⁷ Kojikojira i avara-naielai au Mediterranean Bogana da aupom 14 i kwa ma nubautuva waga ravai malana i vaia da tau i gera i tuġereġerei. ²⁸ Ma barawa au giana ġaima i raġini ma au boga i tawanana-ġairei da topa ana gabinou ita aramanei. Ma i aramanei da 40 meter ma i mae aburuna ma i raudadana-melei lamna marina 30 meter. ²⁹ Ma tau i rovo mepa da rabama waga au kira ina viairikarikai lamna aubaina waga au ipuna anika 4 i tawana ġairei ma i vipaipai da mara ina tom tawanana. ³⁰ Ma waga ravai ai kua i kaukaui da ita ruba-govaġa. Ma i vioga da dingiei ita opu waga au naona da anika ita dubara-naiei, ma lamna aubaina dingy i teretere-ġairei au boga, ³¹ Wate Paul sorodia ai bada maiteni i riwei, “Mepa da waga ravai ina rubatawanemi lamna anatapumi ona iraġe.” ³² Ma sorodia dingy guravana i borituini ma dingy kwakwavina i peu au boga ma i avara-naiei.

³³ Ma maratomtomi Paul rava anatapui i egari da ita am, i pa, “Taumi marina aupom 14 rovo i kauemi ma eġa ota am.” ³⁴ “Tau a vivibaġa-guratemi da ona am da ona virewapana, eġa ai ai tagogi ina iraġe.” ³⁵ Paul i babani vorovei ma au matai palawa i vaia, BADA i viegualaei ma i vogimai ma i ani. ³⁶ Ma rava anatapui inanai ma orai i bagibagi ma am i vikarei. ³⁷ Tauai anatapuiai 276 au waga. ³⁸ Ma rava anatapui i am da i am-iaua. Ma witi baikei au boga i viorereni da waga ita votelatelai da au gera ita ġota da avena ita amġaina.

Waga au maratete i amġaena

³⁹ Maranai mara i tom tawanana tau i dobu i 'nanai wate gerana eġa ita aramanei, wate U inanai da gerana aiaina ma i notai da gerana aiaina da waga kampa ita viġaeni. ⁴⁰ Anina ma anika guravai i viaituituini, ma labilabi i tere-ġairei, ma waga au naona kuka voaburunei i votawatawanei ma gera aubaina i ruba. ⁴¹ Wate waga au maratete i amġaena da i tapaiei, ma rabama waga ipuna i viairikarikai.

[‡] 27:14: Kariwabu ġaegāena [§] 27:17: Wei lamna maratete.

⁴² Sorodia i ǵoei da panipani ita viraǵeni, da avena ita toa-ǵaira au gera ma ita viruberubei. ⁴³ Wate sorodia ai bada i ǵoei da Paul ita vilawani ma i viǵaei, anina ma ai viogatara eǵa ita kauēi. Ma tauī aiavoī toa i aramanei i egari da i viauepa au boga ma i toa-ǵaira au gera. ⁴⁴ Ma ǵelauī aiwai da i tenatenam i vidauei. Ma nanare anatapui lawalawaii au gera i ǵota.

28

Paul au Malta bonabonana

¹ Maranai a ǵota au gera ma a aramanei da tauai au Malta bonabonana. ² Dobuna ravai i nebelelai ma iviī i ai kaua awariai. Garewa atuna i vikarei ma i ubauba, ma tauī au gera ai i viviri. ³ Ma Paul ai ragorago i ǵuna da ai au tepana i tereterei ma mota ǵaiǵaiawana ai bolana malana i vaia da i opui ma Paul nimana i ani. ⁴ Dobuna ravai i 'nanai da motana Paul au nimana i dawedawe ma i pari-ararava, "Wei ravana lamna tauviraǵena ma eǵa ita monu wate ata god* e ririwa da tauna eǵa ina lawana." ⁵ Wate Paul motana i viaikwajiei da ai au menamenana i rauēi ma tauna eǵa ita kero. ⁶ Rava i vipaipai da Paul nimana ita dodo bo ita peu da ita irāǵe. Wate maranai i vipaipai guratana ma i 'nanai da tauna anina, tauī ai nota i virai ma i riwa da tauna god ǵelauna.

⁷ Au gerana a ǵotaǵota - lana au ǵereǵerena lamna dobuna badana Publius ana wapu ǵaeǵaena. Tauna i taravainiai ma i paina-kauelai da aupom tonuǵa ⁸ Publius amana i doria manawa ruba ma iniguǵura i vaia da i matamatave, Paul i rui inanana aubaina ma urana au tepana i terei ma i raupariei ma i vilawani. ⁹ Anina ma rava anatapui doridoriai au bonabona i nei ma i vilawani.

Paul au bonabona Malta da i nae au Rome

¹⁰⁻¹¹ Kampa mai Malta maiteni a mae nawaravi tonuǵa. Ma ravai i voagu-kauelai ma maranai ata vomairi, ai ǵoana vaǵai aubaina anatapuna i verelai. Ma waga ǵelauna a gerui lamna mai Alexandria ai waga bodu aubaina kampa i mae. Waga au naona lamna ai god ruaǵa kokoitauī i tai†. ¹² Kampa ma a amkuka-nae da au Sairakius a ǵota ma a mae aupom tonuǵa ¹³ Kampa da ambori damana au Regium ma maratamna rauanaǵa i wanabauni ma amkuka ma geraei a ruba da maratam ǵela au Puteoli a ǵota. ¹⁴ Kerisiana kampa a nelaǵai ma i riwelai da maiteni a mae wiki tagogi. Anina ma a babara-nae da au Rome taon a ǵeta. ¹⁵ Kerisiana au Rome riwai ai i vaia da a nenei ma i ǵei da ita nebelelai, ǵelauī i ǵei au taon e ǵoreǵorei Vaǵavaǵai Tonuǵa ai Numa ma ǵelauī i ǵae Apius ana au maket. Maranai Paul wei ravai i 'nanai, ma i vinuiai kaua ma God i viegualauēi. ¹⁶ Maranai au Rome taon a ǵeta tauī Paul numa i verei da ainelana i mae ma sorodia i terei da i 'nana-vaitetei.

Paul au Rome i raugugula

¹⁷ Ma aupom tonuǵa au murina Jew babadai kampa maemaēi i rauǵoreiai ma awarii i babani, "Varevareiu tau eǵa aiwai ata kauana-boai ata rava awarii bo amamata ai tarawatu ata viaigai. Wate au Jerusalem i panui ma i veredamaneu Rome gavena awarina. ¹⁸ Mai Rome i etareiu ma i ǵoei da ita rupeniu aubaina eǵa aiwai apoapoena ata kauēi da ina viraǵeniu. ¹⁹ ✧ Wate Jew babadai wei eǵa ita ǵoei ma lamna aubaina Rome babadai a riwei da tau

* **28:4:** God wavinena wavana kaua aiaina bo kaua jijimanina (Justice). † **28:10-11:** Wei lamna mai Rome ai god raǵaraǵa wawai Castor ma Pollux ruaǵai e ǵoreǵore Dioscuri bo raǵaraǵa marei, Tauī lamna god Zeus ma Leda natunatuī. ✧ **28:19:** Act 25:11

eġa ana mae wate ana ġae au ġaeġaena Caesar awarina da ita rauetareiu. Wate lamna eġa au rava ata viviġaviei, eġa. ²⁰ Lamna aubaina a ġoremi weka da tata babani gogona, ma ata riwemi da tau a vipanipani aubaina a vitumaġana da mai Israel ai tauvilawana wariġa i ririwei boiboġi i nei.”

²¹ Tau i paribelei, “Tauai eġa pepa Judeaei ata vaia bo ai rava riwa ita neiai. ²² Tauai aramanei da ravai anatapuġi kerisiana boruna e paripari-virevirei. Wate tauai a ġoei da am nota ana vaia.”

²³ Ma tau i mara i terei da Paul maiteni ita viboru, ma patara i ġetai mepa Paul i mamaelana. Ma ubaubanai Paul God ana vigulau jimana i vikarei da waguvarai i vorovei. Moses ana tarawatu ma peroveta nununaii ai au buka i mairi ma i jima. I ġoei da orai ita taini da Iesu ita vitumaġanei. ²⁴ Ana babaniei ġelau orai i taini ma ġelau eġa ita vitumaġana. ²⁵ Ma tau avababana i viparipariniġaiei ma muriai da ita vilamonei Paul wei riwana tagoġi i latoni i pa, “Arua Vivivireina riwa kua Peroveta Isaiah ponanei amamami i riwei i pa:

²⁶ *Ma nae am rava mai Israel awari da ma riwei,*

ona nononora wate eġa ona araramanei

ona inanan wate eġa anona ona aramanei.

²⁷ *Aubaina wei ravai orai i bado.*

Taniġai i gudui,

Tau matai i vopotai.

Mepa da tau mataiei ita inainana,

taniġaiei ita nononora

oraiei ita araramanei,

ma ita mae-tavirei awariu ma ata vilawani.

(Isaiah 6:9-10)

²⁸⁻²⁹ —Lamna aubaina ona aramanei da God Riwana Aiaina vai-melana aubaina i paritawanei Jentail awarii. Tau ina rautaniġana.”

³⁰ Paul kampa numa i vivimaiei ma i mae madeġa ruaġa taputapuna. Ma rava maġamaġau i nenei da i raraugenari ma wei i vinuaiaiei. ³¹ Ana tepatorana God ana vigulau ma Iesu Keriso riwana Aiaina i jime. Ma eġa aiai ita vigaei.